



BIBL. NAZ.
VITT. EMANUELE III


148


F

53

NAPOLI







V I T A E
ITALORUM

DOCTRINA EXCELLENTIUM

QUI SÆCULIS XVII. ET XVIII. FLORUERUNT

VOLUMEN X.

AUCTORE


ANGELO FABRONIO

ACADEMIAE PISANÆ CURATORE



P I S I S MDCCLXXXIII.

EXCUDEBAT JACOBUS GRATIOLIVS
SUPERIORIBUS ANNVENTIBUS



ANGELUS FABRONIUS

PETRO METASTASIO

S. P. D.

Multa quidem sunt, quae Jani Vincentii
Gravinæ nomen illustrant, sed nihil est
ad ejus laudem illustrius, quam quod te, vir
immortalitate dignissime, ad magnarum artium
disciplinas & ad omne officii munus instruxe-
rit. Etenim non mediocris pars ad illum di-
manat praeclaræ famæ atque existimationis,
quas meritissimo ab omnibus collegisti homini-
bus; & extincta videntur maledicta, quae in
eundem contumeliosissime conjecta erant, ex quo
te virum summum educavit, & in lucem homi-
num protulit. Quod quidem nemo ignorare po-
test, cum semper in ore habeas Gravinæ no-
men, & in omni sermone multa & ornatè &
honorifice de illo praedices, eique in primis
referas accepta, quae in te homines maxime
admirantur, animi bona, praestantiam in poe-
si, multas litteras, reconditas & exquisitas.

Tom. X.

A

His praeconiis tuis aveo mea quoque ad-
 gere, ornatissime Metastasi, non quod tecum au-
 ctoritate contendere me posse putem, sed quod
 magnopere peccare viderer, si ingressus scribere
 de Italis doctrina excellentibus, qui nostra &
 patrum memoria floruerunt, Gravinam praeter-
 mitterem. Quae vero in hujus viri moribus, vi-
 tae consuetudine & ingenii monumentis expli-
 candis scripto mandavi, a te etiam atque etiam
 . pecto, ut limato ac polito judicio tuo expen-
 denda subicias, cui si erunt probata, omnibus
 se fore probata debent sperare. Magnam quo-
 que fidem, auctoritatem & firmamentum adjun-
 gere poterit iis rebus, quae a me de illo nar-
 rantur, confirmatio tua propter domesticum u-
 sum, consuetudinem, omniumque rerum com-
 municationem societatemque, quae tibi cum eo-
 dem fuerunt. Itaque cum intelligent homines ni-
 hil esse in hoc commentariolo, quod Metastasius
 diligenter non examinaverit comprobaveritque,
 Gravinæ non solum a me praeconium tribu-
 tum, sed etiam grave testimonium impertitum
 clari hominis doctissimi que judicabunt. Utinam
 illius sic per me vigeat memoria, ut multos
 tandem pudeat ita deerrasse a viis optimarum ar-

tium, quas ipse Italii suis monstravit, ut intolerabili neglectu atque fastidiis pene obsolescere videantur Graecarum atque Latinarum litterarum studia. Quid hoc est, nisi stultiia & perversitas est? Profecto non tantam Gothorum immanissimae gentes e Pontio erumpentes, atque in Italiae pestem atque vastitatem effervescentes obsceno ore ac barbaris moribus perniciem florentissimae provinciae importarunt, quantam isti in Italia nati atque alii dictis, scriptis & factis suis per summum scelus atque immanitatem afferre volunt, dum student avocare homines ab iis fontibus, unde omnis elegantia defluit. Faveant Galli, adulentur, blandiantur, & linguae lenocinentur suae; hanc unam colendam, expetendam atque, ut ita dicam, procurandam puenit; glorientur suis nota fecisse Graeca & Latina exemplaria Gallicis interpretationibus; per me licet pergant ridere eos, qui in iisdem exemplaribus versandis diu nocturnae elaborant; nos quidem, si sapimus, ita Italicis litteris operam dabimus, ut nunquam oculos a veterum scriptis amoveamus; imitabimurque sapientissimos Romanorum Tullium, Virgilium, Horatium, qui licet Latinas litteras ad summam

gloriam extulerint, nunquam tamen suis ita contenti fuerunt, quin totos se contulerint ad Demosthenem, Homerum, Pindarum aliosque huiusmodi Graecos scriptores, persuaserintque Romanis hominibus non exemplo modo, sed etiam voce, ut Graecorum volumina assidue pervolutarent. Scio, mi elegantissime Metastasi, te in excitanda atque acuenda iuventute plurimum valere, cum saepe laudes eos scriptores, a quibus didicisti mores & affectus hominum mirabiliter exprimere, exquisitissimas sententias molli & tenera oratione vestire, totos ad te rapere auditores lectoresque tuos, quidquid iis spectandum legendumque proponas, ac demum, ut de ceteris singularibus virtutibus tuis fileam, linguam & poësin Italicam tanta venuſtate, lepore atque dignitate ornare, ut eae vel agreſtioribus nationibus per te perplacuisse gloriantur. Sed tempus est, ut ad Gravinam veniam, quem omnes norunt ita a te efferri, quasi unum hominem, qui Italiae rem litterariam corrupto saeculo restituit. Vale.

Romae Kal. Februarii MDCCLXVII.

JANUS VINCENTIUS GRAVINA

ROgianum est oppidum pervetus in Brutiis non procul Consentia, idemque frequens. In hoc oppido parentibus quidem honestis Januario Gravina & Anna Lombarda natus est Joannes, sive ut ipse mauluit, Janus Vincentius Gravina XII. Kalen. Februar. an. MDCLXIV. Hic primam aetutulam domi consumpsit, ibique posuit rudimenta illarum artium, quae repertae sunt, ut puerorum mentes ad humanitatem fingantur atque ad virtutem. Mox a patre Scaleam ductus est ad Gregorium Caropresium, virum praestantem optimis artibus & doctrinis, eique in disciplinam traditus. Dicitur non potest quam praeceptori carus fuerit non minus propter propinquitatem (hunc enim amicum habebat) quam propter mores ingeniumque docile, come & ad omnia aptum. Porro Gravina res fere innumerabiles ita celeriter percipiebat, ut non tum primum percipere videretur, sed reminisci &

6 JANUS VINCENTIUS

recordari; perceptas vero ita firme retinebat, quasi insculptas haberet in animo. Hoc munus fuit naturae; illud vero fortunae, quod in ejusmodi inciderit magistrum, a quo non in perverso, ut ea ferebant tempora, dicendi scribendique genere erudiretur, sed in perfecto; docereturque fugere Peripateticae philosophiae auctoritatem, quae una tunc in scholis florebat ac dominabatur; contra vero Renati Cartesii disciplinam amplecti. Quod & fecit, iis a geometria adjumentis acceptis, sine quibus nulla acies humani ingenii tanta est, quae penetrare ad recentiorum physicam possit. Eodem quoque Caropresio auctore atque interprete, saepe sumebat in manum Bernardini Talefii & Petri Gassendi libros, qui libri Parmenideam & Epicuream philosophiam prope dimissam revocarunt. His copiis cum esset instructus Janus Vincentius Neapolim a Caropresio mittitur, eo consilio, ut ibi juris prudentiae in primis studeret. Itaque eum commendavit & tradidit Seraphino Biscardo Consentino, qui tum in Neapolitano foro Jurisconsultorum prin-

ceps numerabatur. Neque hoc contentus, illi tantum pecuniae, quantum satis esset ad honeste sustentandam principem in urbe vitam, assignavit. Biscardus priusquam adolescentulum ad juris prudentiam duceret, iussit eum renovare studia litterarum Graecarum & Latinarum, ac praesertim eloquentiae, quanquam in iis artibus ipsum a pueritia plurimum profecisse non ignoraret. Hoc enim magnopere ad id, quod volebat, conducere arbitrabatur. Audivit ergo Gravina Gregorium Masserium, aliosque ea tempestate nobiles illarum facultatum magistros. Hoc tempore dicitur duas Italico sermone condidisse tragoedias, quarum alteram *il Cristo*, alteram *il S. Atanasio* inscripsit, & quasdam etiam umbratiles composuisse orationes. His aliisque exercitationibus atque studiis cum sibi non solum acrisset ac procudisset linguam, sed & complevisset perfectus maximarum rerum & plurimarum copia atque varietate, impulsus est à Biscardo ad amplectendam juris prudentiam. Recusavit primum, quod non minus illum ad se alliceret mira quaedam suavitas ac de-

lectatio, quam ex mansuetioribus Musis ac philosophia percipiebat, quam deterreret praejudicata opinio, omnia in juris prudentia plena esse erroribus, barbarie ac coluvie. Ad hanc opinionem convellendam usus est Biscardus rationibus atque exemplis, quae quidem, accedente praesertim tanti viri auctoritate, satis apud Gravinam habuere momenti atque ponderis. Ex quo factum est, ut non dubitaverit, amplius ad juris prudentiam se conferre. Post autem adhibitis praeclaris doctoribus, studiose & multum volutatis non solum legum libris, sed etiam celebrioribus illorum interpretibus, ac praesertim Accursio & Cujacio, incredibili quodam illius scientiae perfecte tenendae studio flagavit. Quod quidem sic ei successit, ut anteferretur eidem nemo, perpauci pares putarentur. Juris scientiae tanquam ancillulam pedissequamque adjunxit Gravina omnis antiquitatis ac praesertim Romanae cognitionem, in qua adeo processit, ut nihil fere reperiri posset, quod ei esset incognitum. Et quia interdum utitur Jurisconsultus subsidio theologiae in iis prae-

sertim caussis , quae ad jus Pontificium spectant , idcirco Gravina huic quoque scientiae haud mediocrem operam dandam putavit . Ut vero nulla intermissio fieret illorum studiorum , quae a pueritia excoluerat , quotidie diligenter legebat illos non solum dicendi , sed etiam intelligendi gravissimos auctores & magistros , Platonem & Ciceronem . Magnis quidem in laboribus se exercuit Gravina eo tempore , quo Neapoli commoratus est ; cui rei illud indicio esse potest , quod nunquam pedem domo extulit , nisi quatenus aut religio , aut studia sua postulabant . Ex vehementi vero atque assidua lectione meditationeque erupit stomachi ac viscerum morbus , quo ille reliquo vitae cursu saepe , ac praesertim solstitiorum tempore , afflatus est . Hic cum arctissimam junxisset consuetudinem cum Dominico Aulifio summae eruditionis homine , eo socio & adiutore utebatur , quo facilius longam viam conficeret , quae ad sapientiam ducit . Cumque in hac longius processisset , aliis bonae indolis adolescentibus monstrare non recusabat , qua illis quoque

ingrediendum esset, & quale illud esset, quo ipse pervenisset. Haec res materiem fortasse dedit inimicis Gravinae, ut calumniarentur instituisse eum Neapoli fodalitium, quod haberet quamdam *Lucis Universalis* doctrinam, eaque una ad omnium rerum cognitionem facile perveniri posse ineptis hominibus persuaderet. Aliquot jam erant anni cum Gravinam mirum tenebat desiderium visendae Urbis; idque perficere non antea ei licuit per Caropresium, ex cujus voluntate pendebat, quam ineunte an. MDCLXXXVIII. Romam cum venisset, domo exceptus fuit a Paulo Coardo Taurinensi, & apud eum plures annos commoratus est tanquam apud fratrem. Quae vero causa impulerit Coardum, ut tam liberaliter se gereret in Gravinam, num amici alicujus commendatio, num opinio quaedam, quam haberet de illius doctrina (multum enim & litteras & litteratos homines amabat) non satis liquet. Domestico hoc praeconio brevi Gravina multorum doctrina excellentium virorum benevolentiam collegit; cumque ejus nomen tota jam celebraretur Urbe, partam existimatio-

nem non solum tueri , sed etiam augere
omni studio contendit. Frequens aderat lit-
terario coetui, qui in domo Joannis Justii
Ciampinii habebatur; ac saepe ei data est
ocasio ostendendi in illo lumen ingenii sui.
Socium se adjunxit iis, qui de instituenda
Arcadiae Academia cogitabant; qua in re
perficienda magni fuit ejus opera. Sexto
vero anno, quo constituta erat Academia,
cum placuisset scribi ea, quae condita erant
in Pastorum institutis ac legibus, haec res
Opico Erymanthaeo (hoc apud illos nomen
habebat Gravina) mandata est. Confecto
mandato ad priscarum legum exemplum,
coetus universus Pastorum convocatur, ad
quos postquam Gravina Latinam orationem
habuit sapientissimis sententiis & gravibus
verbis ornatam, quae maxime commenda-
bat simplicem ac plane pastoritiam eorum-
dem rationem institutionemque, nec non
conspirationem & concordiam ad conser-
vandam inter omnes aequalitatem, proposi-
tae fuerunt leges solemnibus illa formula; *Velle-
tis jubetis* &c. Propositas leges coetus sci-
vit, easque in marmore incidendas, & in

Parrhasio nemore figendas curavit. Laus, quam ex harum legum³scriptione hausit Gravina, minime quidem vulgaris fuit. Sed hac tamen parum ille contentus, in multis epistolis suis ad amicos, nec non in familiaribus sermonibus gloriari non dubitavit, se non modo scriptorem, sed etiam conditorem earundem legum fuisse. Hoc visum est indignum Custodi, ceterisque Arcadibus, quorum offensam in se voluntatem ut recuperaret Janus Vincentius, scripto declarare coactus est, *se nihil ex suo sensu protulisse, aut veteribus institutis adjecisse, sed totum ex Arcadicis commentariis, in quibus quadraginta monitorum capita vernacula & longiori oratione praescripta erant, eruisse*. Sed non diutissime mansit haec reconciliatio. Nam cum multi praeclaræ indolis adolescentes domum Gravinæ frequentarent exercendi se causa in litterarum studiis, id suspicionem movit Mario Crescimbenio, qui primum locum inter Arcades tenebat, illos aliquid contra se occulte moliri. Dolebant hi quidem Arcadium sapientissimis stabilitam consiliis & institutis eos evertere, qui potestatem &

honorem quinquennalem nimis diu in Crescimbenio retinerent; hunc videri appetere perpetuum dominatum; hunc leges perfringere, quoniam in creandis Collegis, qui Custodi adesse debent, tantum sibi arrogabat, ut quos eligere meritissimo debuisset, prae-teriret, & eorum solum rationem haberet, quos sibi amicitia commendabat. Haec ex ipsius ore Gravinae mitti arbitrabatur Crescimbenius; ex quo fiebat, ut quotidie magis eorum voluntates a se invicem abalienarentur. Erupere tandem inter eos apertae inimicitiae ex eo die, quo judicatum fuit contra sententiam Gravinae, verba illa legis II. quae est de creandis Collegis, *sex in orbem eligito*, non hoc velle, ut qui semel Collega fuisset, hac potestate iterum fungi non posset, nisi illa prius ad singulos Pa-stores in orbem pervenisset. Qui Gravinae sententiam sequebantur, acerbè invec-ti sunt in hoc judicium, quod eam legem convellere dicebant, quae est fundamentum ac vinculum aequalitatis. Itaque omnes una & mente & voce consenserunt ad auctoritatem ejusdem legis, & Arcadiae libertatem

defendendam. Hinc illa diffidia, quae in duas partes totam distraxerunt Arcadiam; de quibus quoniam satis multa persecuti sumus in Francisci Lorenzini vita, illinc asumes, quae ad hunc locum pertinebunt. Voluit Gravina quibusdam absentibus amicis suis, quorum magnum erat in Arcadia nomen, se purgare, ne ea, quae ipsius Arcadiae causa egisset, in suam contumeliam verterent. Itaque scripsit epistolam ad Scipionem Maffejum, qua illum docuit, quod, & qua de causa diffidium factum fuisset; ab eodemque petiit, ut Apostolum Zenum & Bernardum Trevisanum de tota re certiores faceret. Sed admonendi sunt lectores, ne putent omnia ad veritatem in hac epistola perscripta fuisse. Ac mihi quidem cogitanti lites, jurgia, contumelias, maledicta, quae hanc divisionem comitata sunt, fatalis quaedam calamitas accidisse Arcadiae videtur; consideranti vero laudabilem illam aemulationem, quae acri ac vehementi incitatione utriusque partis animos inflammabat ad primas in poesi tenendas, nullum occurrit tempus, quod magis Arcadiae ad

posteritatis memoriam gloriosum fuerit. In hac aemulatione praebuit se Gravina ducem & magistrum; invidebaturque ei, quod circum se semper haberet florem juventutis, cui gloriae cursum monstrabat. Sibi profecto placebat Gravina de hoc juvenum comitatu, inter quos eminebant Paullus Rollius, & Dominicus Octavius Petrosellinius, qui, quod emerfissent e barbarie, quae superiori saeculo humaniores litteras infusceverat, omnesque pene homines misere obruerat, unice se Gravinae debere profitebantur. Hoc auctore, condidit Petrosellinius poema, in quo habita quaestio de interpretatione verborum *sex in orbem eligit*, prolatumque a concilio Pastorum judicium varie, lepide elegantissimeque narrantur. Initio vero poematis ea manu Gravinae perscripta vidi, quae satis declarant, quam magni opus hoc atque ejus auctorem faceret. Sed majora quoque sunt, quae ille tribuebat Alexandro Guidio, cum solitus esset dicere, nescire se, an Italica poesis multis saeculis parem habuisset ullum. Hoc praesertim in Guidio laudabat Gravina, quod

genus poësis expresseſſet elegans, grande, claris, planeque novis conſperſum ſententiarum coloribus; quodque primus homines docuerit declinare tum liberam effrenatamque licentiam, tum ſervilem & cunctantem imitationem. De quo viro graviffimum præſertim idem reliquit teſtimonium in eo, quod tertio anno, poſtquam Romam venerat, ſcripſit opuſculo de Endymionis fabula. Conſiderat hanc fabulam Guidius juffu Chriſtinae Svecorum Reginae; cumque illa in publicum prodiiffet, contigit ei, ut in varias malevolorum atque imperitorum reprehenfiones incurreret. Hos Gravina refutare aggreſſus, orditur opuſculum ab exagitan- diſ iis, qui ope præceptorum quorundam, & ſine ductu philoſophiae cenſorum perſonas ſuſtinere ſe poſſe putant. Inveſtigans inde quam lati ſint fines poeticae facultatis, hos eadem terminatione, qua univerſam rerum naturam concludi ait: illum optimi poetæ munus implere, qui ſcit veris coloribus ad vivum exprimere actiones, mores & affectiones hominum, & quidquid

quid ex universitate rerum sibi subjicit tanquam materiem, in qua versetur: qua occasione ostendit perfectum naturae pictorem fuisse Homerum, ex nostris vero Areostum, ac praesertim Dantem, in quo illud satis se mirari non posse ait, quod uno poemate non solum humanas, civilesque res, sed etiam divinas comprehenderit; quodque incredibili brevitate atque evidentia omnes mores, conditiones atque affectus repraesentaverit, ut non aliquam poesin, sed picturam, verbaque in res ipsas conversa videamus. His aliisque praepositis, venit ad examen fabulae, quam sic textam ait, ut sine implicatione magnorum eventuum perquam attentos faciat auditorum animos. Saevo amore saucia Diana sibi demereri Endymionem studet, sed ita, ut nihil admittat, quod Divae indecorum esse videatur. Quam belle, quam proprie argumentum hoc tractaverit Guidius; quam scienter expresse- rit Dianam modo se in amore effundentem, modo se continentem, quam mirabiliter immortale cum mortali, caelestia cum humanis copulaverit; quanta denique novitate,

gravitate, copia ac splendore sententiarum hanc fabulam poeta distinxerit, pluribus persequitur Gravina. Hunc voluisse in Guidio commendando propriam ingenii gloriam consequi multa declarant, sed illud in primis, quod moleste tulerit illud suum opusculum loco non anteire fabulam in impressione, quae utriusque habita est Romae typis Komarekianis an. MDCXCII. Id ut aliqua ex parte corrigeret, simulavit apud Batavos recusum fuisse librum. Sed sola fronte ejus mutata, in qua primus concessus est locus Gravinae, secundus Guidio, haud sustineri simulatio potuit; inventique sunt, qui Gravinae ambitionem libere exagitarent. Is in eo quoque a nonnullis accusabatur, quod omnia, quae de arte poetica sciebat, eo in opusculo effudisset, quodque in laudibus tribuendis Guidio fuisset nimis & tanquam prodigus. Porro ita comparatus natura erat Janus Vincentius, ut tum in laudando, tum in reprehendendo modum facile excederet. Sed raro laudatoris personam sustinebat, saepissime reprehensoris; & dum aliquid nasute distringebat, non solum libe-

rum ingenuumque fastidium prae se ferebat, sed etiam odiosam quamdam arrogantiam, ut interdum videretur omnes despiciere, hominem prae se neminem putare. Hi mores multorum ei odium conciliarunt; cumque eo accederet, ut iniquo invidoque animo intuerentur nonnulli praestantiam ingenii ac doctrinae, quam consecutus erat, turbulentissimae in illum sunt excitatae tempestates. Quarum omnium turbulentissima a Sectano venit homine singulari ingenio praedito, qui sexdecim scriptis editisque satyris, Lucilii⁷ animam ab inferis evocasse videtur, ut Philodemum (hoc nomine Gravinam designat) omni crudelitate laceraret. Dici non potest, quam per manus virorum statim volitaverint hae satyrae, & quod scriptae essent elegantissime, & quod nihil tam est volucre, nihilque libentius excipitur, quam maledictum. De quibus ipsis quoniam plura persequemur in Ludovici Sergardii vita, ad illum locum studiosos Sectani delegamus. Gravina primo visus est non satis commoveri animo ad ea, quae in se jaciebantur; solitusque erat dicere, esse labem & ma-

culam suorum temporum virtuti invidere & obrectare; sed cum illius inimici non filerent, simulare amplius non potuit gravissimam suam aegritudinem, ad quam levandam scripsit declamationes quasdam, seu Ver-rinas in Q. Sestanum, nec non jambos, quibus de sua vita illi conviciatori respondit, eique contumeliosissime maledixit. Noluit tamen Gravina haec scripta lucem aspicere, credo, quod intelligebat Sestani saty-rarum famam illa minime aequatura. Sed aequassent licet, non iis tamen indigebat ad obtinendam nominis immortalitatem, quam ei alia multa, eaque graviora ingenii monu-menta compararunt; in quibus referendis ordinem servabo temporum, quibus illa sunt edita. Palam dictitabat Gravina, praeclaros mores, & sanctissimam disciplinam, quam a majoribus Christiani acceperant, pravis opi-nionibus recentiorum quorundam, qui se *Casuistas* dicunt, corruptam fuisse; hos quasi quoddam junxisse conjugium inter rationem bene pieque vivendi & vitiorum illecebras; quapropter de Christiana doctrina actum vi-deri, nisi huic occurreretur malo. Dialogum

itaque conscripfit, in quo ipsa per se loquens Casuistica cum Haeresi declarat quanta Catholicae reipublicae importaverit detrimenta; per quas vias ad illam penetraverit; quos dolos, machinas, fallacias ac praestigias adhibuerit, ut purioris pietatis splendorem macularet; quanta denique ab ea, quam dicimus, *Probabilitate*, quamque hydrae comparat, habuerit adjumenta, ut robur divinae legis infringeret, hancque ad consuetudinem voluptatemque hominum accommodaret. Edidit Gravina hunc dialogum sub Frisci Censorini nomine, quod ad effugiendam offensionem atque indignationem illorum, quos male in ipso dialogo habuerat, opportunum esse putavit. Sed cum minime diu occultari potuisset, ferre debuit multorum malevolentiam; hique, si non perfecerunt, magno certe studio conati sunt; ut liber ab iis, quorum potestas est, devoveretur. Interim Gravina, quo magis nominis sui famam contra inimicorum invdiam ac contumelias sustineret, magnum & arduum suscepit opus, quo sibi origines juris civilis explicandas proposuit. Diu mul-

tumque illud habuit in manibus. Sed ut in diuturno labore gloriam aliquam praeoccuparet, anno MDCXCVI. edidit commentariolum, quod inscripsit *Specimen prisçi juris*, quodque ferme totum composuit ex iis rebus, quas in primo Originum libro fufius tractaverat. Huic commentariolo quinque adjunxit alia, quibus praeit *Dialogus de lingua Latina* ad Emmanuelem Martinum. In hoc Emmanuel & Proculus disputantes inducuntur, quantaе utilitatis quantaque voluptatis sit illam linguam bene ac perfecte tenere; quae ejus fuerint origo, progressio ac vicissitudines; quam arcto foedere cum Graeca jungatur; quam longe multumque superet varietate, numero, gravitate, vi, aliisque ornamentis Italicam, Gallicam, ceterasque omnes vulgares linguas; & quibus utendum sit subsidiis, ut ad illius cognitionem facilius perveniatur. Quae vero Auctor praefatus est satis declarant, quanta is invidia & odio premeretur; & quam magno se beneficio obligatum putaret Emmanueli Martino, quod animadversiones condiderit in Sectani satyras, ut praesertim ostende-

ret, non pauca esse in iis mendose & inquinata scripta. Sequitur hunc dialogum epistola ad Jo. Gabrielem Reginarium *de conversatione doctrinarum*, eaque Italiae vicem dolet, quod dejecta de summo altissimoque gradu, quem semper tenuerat in omni doctrinarum genere, quotidie magis in tenebras ruere videretur. Causas quoque praecipuas affert hujus inclinationis; qui viri maxime superioribus temporibus excelluerint, commemorat; fremitque eam esse aetatis suae iniquitatem, ut non amplius virtuti, sed maledicto, scribendique licentiae pravitatique (his verbis innuere certe voluit Sectani satyras) plaudatur. Hisce Gravinae opusculis annumerantur epistolae breviores duae, sed omniuo ponderosae (sunt enim gravissimis sententiis refertae) quas dedit ad Franciscum Pignatellium Archiepiscopum Tarentinum, cujus negotia idem Romae procurabat, & ad Trojanum Miroballum *de contemptu mortis* unam, alteram *de luctu minuendo*. Sextum opusculum, quod ad Cardinalem Boncompagnum Archiepiscopum Bononiensem Gravina misit, rationem

aperit, quam veteres in fingendis fabulis secuti sunt; docet, quanta vis sit in his ad instruendos homines ad omne officii munus animique motus commovendos; quantaque in ipsis sint inclusa sapientiae semina. Harum rerum occasione plurima, eaque utilissima dat praecepta de arte poetica; unde & a quibus diversa poesis genera sint orta recenset; conferensque virtutes poetarum Graecorum ac Latinorum, qui maxime in singulis generibus praestent, diligenter perpendit ac judicat. Cui opusculo magna quidem ab intelligentibus viris data sunt praeconia; nec illud fuit ad laudem mediocre, quod Josephus Rignoldus Gallus in sermonem patrium verterit ex Italico. Diligentem investigationem antiquitatis, in eo quod pertinet ad theogoniam, ceterasque mythologiae partes, fatetur Gravina pergratam occupationem habuisse, & mirabilis utilitatis fructum sibi praebuisse ad noscendam disciplinam scientiamque magnarum rerum atque artium, ac praesertim eloquentiae, quae priscis viguerunt temporibus. De quibus rebus longum opus texendi olim co-

gitationem suscepit; sed hanc abjicere eum coegit infinitus prope labor, quem in concinnandis suis de Origine juris libris consumebat. Accessit eo, quod an. MDCXCVIII. commendatione Cardinalis Joannis Francisci Albanii ab Innocentio XII. delatum est illi munus docendi in Archigymnasio Romano jus civile; quod quidem munus multum poscebat operae & temporis. Etenim Gravina minime imitari volebat exemplum illorum, qui jejune & exiliter quaedam legum capita, judiciorumque formulas explicant, quique litigandi magis, quam justitiae tradere videntur vias; sed recludere sibi fontes proposuit, unde universi juris, ac legum ortus, natura ac disciplina emanant. Itaque postquam ex instituto majorum ea dictaverat auditoribus suis, quae magis sunt in usu forense necessaria, quaeque in angustum locum concludunt permulta, quae sunt descripta Romanis legibus & jure civili, eosdem modo in Lycei ambulationibus, modo in Academiae spatiis, modo in Zenonis porticu exercebat; sed praesertim ad veteres historicos, oratores & grammaticos

ducebat, jubens ipsos sedulo undecumque omnia colligere, quibus juris prudentia fieri posset instructior & ornatio. Haec docendi ratio incurrit in odia & voculas multorum, quibus socordia erat pro diligentia, quibusque idem esse videbatur multum sapere & multum audere, multumque in foro clamare, dum lucrari possent. Adversus hos nebulones, fordidosque juris prudentiae mercatores totos dies domi & in ludo invehebatur Janus Vincentius; ac saepe illud in ore habebat, si a juris prudentia lumen Latinarum & Graecarum litterarum auferretur, necesse esse, ut omnia densissimis ignorantiae tenebris sepulta atque obruta tenerentur. Nec juris prudentiae solum, sed & ceterarum disciplinarum bonarumque artium causam egit in multis, quas in instauratione studiorum habuit, orationibus ad amatores sapientiae. Quae quidem orationes, quanquam non ita saepe distinguantur eloquentiae luminibus, neque ita libere fluant, ut nunquam adhaerescas, redundant tamen omni eruditionis genere, sapientissimis philosophorum sententiis & saluberrimis prae-

ceptis , quae ad studiorum vitaeque iter recte gubernandum pertinent . Libenter quidem delaberer ad haec commemoranda ; sed nolo esse longus , praesertim cum ad alia properem . Itaque praecipua atque utiliora tantummodo attigero , & medebor cum satietati , tum desiderio lectorum . Et quoniam ille totam rationem studiorum , quam probabat , interrupte ac divise pluribus orationibus est amplexus , de ea scribam continenter , neque tam ordinem sequar scriptorum ejus , quam servabo meum . Principio cavendum esse ait , ne ingredientibus stadium litterarum diu cum grammaticis versentur , sed curandum , ut quanto citius fieri potest , ducantur ad exercitationes Ludovici Vives , Phaedri fabulas & Terentii comoedias . Exerceantur postea in lectione metamorphoseon Ovidii , historiarum Justinii & Livianae epitomes , ut eodem tempore cognoscant quidquid veri ac ficti habeat antiquitas . Quo cognito , tum iis tradendus est Cicero , ceterique aureae aetatis scriptores . Qui Graecis student litteris , quas sine piaculo a Latinis separari non posse dicebat Gravina , postquam ele-

menta quaedam perceperint, adeant Homerum, quem qui norit, non modo poetarum, sed & oratorum, philosophorum & historicorum linguam norit, quod hi omnes ab eo sumperint lumina sententiarum & dicendi formas. Communiora rhetoricae praecepta e libris ad Herennium petantur. Illud & damnat Gravina spinosa multa & barbara, quae in dialecticam investa sunt. Negat quidquam hanc artem ad inveniendum conferre, eademque nos opus habere ad vera & falsa dijudicanda. Quapropter non multum in illa immorandum, artemque inveniendi, immo ipsam recte iudicandi scientiam e geometria potius petendam. Studium philosophiae commendans, quanta huic intulerint Peripatetici detrimenta, ostendit; illum bene scienterque agere, qui diu noctuque habeat in manibus Platonem, cui uni e veteribus philosophis contigit, ut sapientiam, verasque de virtutibus ac de Deo etiam opiniones assequi posset: nullum bonum esse aut oratorem, aut poetam, qui idem non sit philosophus; omnium enim bonarum artium procreatricem esse & pa-

rentem philosophiam. Quam facultatem, illam praesertim, quae de hominum vita & moribus agit, ut & philologiam, si quis velit a juris prudentia sejungere, idem facere videri, ac si animam a corpore segregaret. Qui juri civili studet, deligat sibi aliquem legum interpretem, inter quos, tanquam solem minora inter sidera, lucere Cujacium saepe inculcabat Gravina; fugiat vero, tanquam pestem, scriptores illos & magistros, qui controversias non legum codicibus, neque rationibus ductis e fontibus juris, sed auctoritate & aliorum erroribus definiunt; qui congerunt multitudinem sterilium definitionum atque ineptarum regularum; quique non alium agnoscentes praeceptorem praeter scribam & acutum legulejum, quales sunt *Ridolphinistae*, brevi tempore absolutam juris prudentiae cognitionem adolescentibus impudentissimo ore promittunt. Nemo potest jus pontificium tenere, qui non sit juris civilis peritissimus; quique illi studio non praeferat, tanquam facem, sacrorum librorum & historiae Ecclesiasticae notitiam. In disputando has inter ceteras ut servarent

regulas discipulos suos monebat Gravina, ut abhorrerent a sophistarum captionibus; perspectam veritatem contentionis studio ne oppugnarent; argumentum satis explosum ne regerent; & refellere sine pertinacia, & refelli sine iracundia parati essent; contra oppositam sententiam lege aliqua repugnarent, legesque legibus committerent; & in speciem dissidentes, abstrusam sententiam eruendo, in concordiam redigerent: si legum repugnantia nulla esset, communes juris regulas opponerent; si hae quoque deficerent, tum repeterent vetustum jus ex historiis & morali philosophia; in forensibus quaestionibus agitandis Accursianos, & in veris sensibus legum eruendis Cujacianos praeferrent. Qui studio legum jus aliis reddere, & alios regere addiscit, scire quoque debet, quod est difficilius, jus reddere ipse sibi, & semetipsum regere. Coerceat igitur virtuti inimicas voluptates; Deum pie, caste, ac religiose colat; exerceat se in animi & corporis patientia; divitias atque honores contemnat; animi demissionem, modestiam, mansuetudinem, erga homines caritatem prae-

se ferat, harum, aliarumque virtutum exempla petat a Christo; hunc cogitet, & ad hujus morem atque doctrinam seingat atque accommodet: caveat ab ostentatoribus & simulatoribus pietatis, & ab iis praesertim doctoribus, qui corruptis saeculi moribus blandientes vim enervant divinarum legum, videnturque has perducere in potestatem suam. Satis de Gravinæ orationibus dictum erit, si hoc adjunxero, illum & reliquisse orationem, quam destinaverat Petro I. Moschorum Regi, quem, cum Viennae esset, fama ferebat Romam adventurum. Hoc unum videtur excipere in summis illius Principis laudibus, quod Catholicam Romanam religionem minime suscepisset, & in suum regnum transtulisset, sine qua nullam sanctam societatem nec fidem regni diu esse posse ostendit. Docet etiam quantum Romanae leges conducant ad mansuefaciendos excolendosque homines, & ad constituendam inter eos conjunctionem atque concordiam. Quinto anno postquam non magna auditorum frequentia, sed magna certe doctrina, eruditione ac sermonis elegantia jus civile

docuerat Janus Vincentius, vocatus est ad tradendas in eodem Archigymnasio Institutiones Canonicas; nec multo post ei munus impositum interpretandi Gratianeum Decretum. Cum jam expertus videret Gravina, haud frenari posse adolescentes, quin ab Institutionum schola quaestus cupiditate moti ad forum continuo properent, ut huic malo quantum posset mederetur, Institutionum fines proferre statuit. Itaque explicans non solum rerum capita, sed etiam seriem, demonstransque fontes, unde leges fluxerunt, & in omnem aetatem inquirens, ut oculis auditorum subjiceret priscam, mediam ac recentem Ecclesiae disciplinam, illud effiebat, ne plane inermes atque imparati in forum ingrederentur, utque haberent satis expeditam viam, qua per se ad plenioram & perfectam etiam, si vellent, cognitionem pervenirent sacrorum jurium, conciliorum, scriptorumque veterum Patrum. Cum vero e superiore loco descendisset, interrogantibus aut de pontificio, aut de civili jure copiam sui faciebat; & si quos ardere vidisset.

vidisset studio humaniorum litterarum, eos domum suam invitabat, tanquam ad ludum atque officinam dicendi scribendique. Neque his contentus, quo magis juris prudentiae studioforum utilitati consuleret, exornandas dilatandasque suscepit, quas in schola de scripto dictaverat, utriusque juris institutiones. Quod quidem opus absolutum, si in lucem minimum exiret, libentissime exciperetur, ac laude multum vinceret libellos, quos de iisdem institutionibus antea scripserat Gravina, sed breviter strictimque, quosque alii, illo insciente nec opinante, in vulgus edidere. Sed jam tempus est, ut veniamus ad tres libros de *Originibus Juris Civilis*; qui libri tanta eruditione, doctrina, sententiarum pondere atque elegantia abundant, ut ii soli aeternitatem immortalitatemque Auctori comparare potuissent. Et primo quidem libro, expressa prius quadam Romanae Reipublicae forma, differit unde sit orta juris scientia; quatenus progressa fuerit vel novis legibus, vel prudentum interpretationibus, vel Magistratuum edictis, vel Principum sanctionibus; quamdiu in altiore gra-

du steterit ; qua de causa inclinaverit ; & qua ratione demum suus ei honos & status redditus fuerit . Quibus expositis , ordine enumerat qui auctores jus constituerint , qui rursus corruerint , qui denique instauraverint ; & de singulorum scriptis , doctrina , ingenio vitaeque haud pauca scitu dignissima recenset . In secundo aperit primordia juris naturalis & gentium , eaque , secutus Grotium , repetit ab honestate naturae , quae est divina illa in omnium cordibus insculpta , inque animis inscripta lex . Initio libri quaerit qui sit boni & mali finis , quid natura sequatur , quid fugiat , unde virtutes & vitia oriantur ; concluditque non posse beate vivi , nisi sapienter , honeste justeque vivatur . Postquam haec e media sumpta philosophia explicavit Gravina , & originem patefecit societatis humanae , contractuum , jurium belli & pacis , civilis potestatis , imperii & jurisdictionis , ortum persequitur legum , quas diversi antiquitatis populi sibi statuerunt ; sed praesertim immoratur in interpretandis & illustrandis , quas habemus , reliquiis juris Papyriani legumque XII. Tabu-

larum. Tali modo proditis originibus per-
vetustis, & quasi juris prudentiae cunabu-
lis, transit in libro tertio ad recentiores,
nempe ad leges & Senatus consulta, qui-
bus priscum & privatorum praecipue jus aut
deficiente sententia XII. Tabularum auge-
tur, aut temporum ratione aliter poscente
mutatur, aut ubi obscurum sit atque perple-
xum potestate totius populi explicatur. Nam
quae ad reipublicae administrationem perti-
nent, cum jam nullius sint usus, vix atti-
git. Hasce autem ipsas res simpliciter &
splendide tractavit Gravina, usus oratione
continua, tinctaque colore illo & succo,
quo veterum Latinorum libri sunt imbuti.
Crebras quoque intexit sententias; & dum
laudat Clementem XI. P. M. in epistola, qua
opus hoc illi inscripsit, tantam affert maje-
statem, gravitatem atque eloquentiam, ut
verborum prope numerum sententiarum nu-
mero consequatur, nesciasque an quidquam
fieri possit magnificentius. Quae vero prae-
fatus est, tradunt ad lescentibus viam dire-
ctam & quasi compendiarium, qua facile
& jucunde ad juris cognitionem perveniant.

Igitur qui ad laudem juris consulti aspirat, audiat Gravinam, eique obtemperet; neque unquam e manibus deponat hosce tres *Originum* libros, qui suppeditare ei poterunt abundantiam & copiam omnis eruditionis ac praesertim Latinae, sine cujus subsidio nemo est qui ad forum satis instructus & ornatus possit venire. Vehementer laetatus est Gravina, ut pote qui laudis studio maxime trahebatur, quod suum opus magnifice celebraverint scriptores Actorum eruditorem Lipsiae, qua in urbe primum an. MDCCVIII. typis impressum fuit; quodque horum & aliorum doctorum hominum voce magna illico de ipso fama surrexerit. Scriptores vero Ephemeridum Italiae non solum laudarunt, sed etiam sextum in volumen ipsarum Ephemeridum intulerunt accuratam ejusdem epitomen, quam contexuerat Scipio Maffejus. Inter multa ac praeclara, quae de hoc ipso opere facta sunt judicia ab intelligentibus viris, illud gravissimum reputari debet, quod prae se tulit in epistola ad Gravinam homo certe disciplina juris civilis eruditissimus Josephus Averanius. Quam plena ma-

nu, quam ingenue, quam ornate illud in astra extulit! Neque ejus laudes quicquam imminuere putavit, quod Auctor in eodem conficiendo multa sumpserit, & si vis, etiam furripuerit a Cujacio, Gothofredo, Manutio & Sigonio. In tanta laetitia, quam ex suorum laborum praeconio percipiebat Gravina, id dolere unice videbatur, quod Lipsienses typographi praeclarum volumen plurimis iisque gravissimis mendis commaculassent. Cui malo ut occurreret, egit cum Neapolitanis typographis, ut idem recudendum susciperent. Quod facile obtinuit. Igitur anno MDCCLXIII. Neapoli iterum sunt editi *Originum* libri, cui editioni sane castissimae maximum accessit ornamentum a libro *de Romano Imperio*, quem dignissimum judicavit Gravina, ut ad tres superiores adjungeretur. Hoc judicium comprobarunt docti omnes; nec defuerunt qui dicerent, Gravina *Originum* libris ceteros omnes superasse, qui juris civilis ortum tractarunt; scripto vero *de Imperio Romano* libro ipsum a se se superatum. Justis de causis imperium cunctarum gentium acquisisse Romanos de-

monstrat, neque imperii constitutionem sustulisse Reipublicae statum, sed hujus regimen perrexisse lento progressu a vi & potestate Regis ad Populum, a Populo ad Senatum, a Senatu ad unum non Regem, sed Principem, quasi in Republica & Senatu primum, qui nec Populi, nec Senatus jus omne sibi vindicaret, sed cum eo partiretur & ab eo mutuaretur. Haud pauca exponit de praecipuis Romanae Reipublicae Magistratibus ac de Senatus auctoritate, quae sunt veluti fontes, unde jus imperatorium dimanat. Hoc a regio multum differre dicit, quod regium omnem potestatem, ex qua procedit, exhauriat, cum imperatorium tantummodo partem aliquam in se traducat. Exstitit tamen Tribonianus, qui assentandi studio legem extulit nescio quam regiam, quasi natam ex institutis Romanorum, per quam omne jus omnemque potestatem Populi Senatusque Romani in Imperatores translata esse contendebat. Hanc legem sic examinat Gravina, ut non solum Tribonianum assentationis reum convincat, sed etiam ex eadem lege gravissimâ argumenta ducat ad amovendam ab Im-

peratoribus regiam potestatem, retinendaque jura Populi ac Senatus Romani. Postquam potestatem civilem a S. P. Q. R. manasse ostendit, comprobat ex eodem fonte manare militarem quoque, neque jura civitatis unquam in castra transisse, aut transire potuisse. Ex quo colligit a militibus Senatui miuime ademptum fuisse jus imperii sive creandi sive regendi; & in illis militaribus Imperatorum creationibus legitime factum fuisse nihil, nisi quatenus auctoritas Reipublicae accessisset. Quae auctoritas veluti sua in sede Romae consistens non potuit a Constantino Byzantium transferri. Quapropter licet ille aequaverit Romae hanc urbem moribus, institutis, aedificiis, magistratibus, contrahendi ratione ac muneribus, non acquavit certe potestate; & quae ibidem agitantur ac definiebantur negotia publica, non ex civitatis curiaeve Constantinopolitanae, sed ex Populi Senatusque Romani juribus descendebant; quae jura cum Principe communicata sola poterant imperium constituere ac conservare. Haec ferme summa est earum rerum, quas in opere *de Romano Im-*

perio Gravina tractavit. Hoc secutum est aliud opus *de Romano Imperio Germanorum*, quo nihil scripsisse se aiebat, quod ad publicas eorum temporum controversias referret pluris; eaque arte, diligentia atque cautione contexuisse, ut veritatis ac partium offensionem una vitaret. Sed cum ab Emanuele Martino homine in primis docto & prudenti requisisset, quid sibi videretur, tulissetque responsum, certum in periculum se committere, si ea in apertum referret quae nonnulli Principes, bello pene tota Europa flagrante, occulta ac penitus abdita maluissent, omnem vulgandi operis cogitationem abjecit. Eodem anno, quo primum exiere *Origines Juris Civilis*, edidit quoque duos libros, nuncupatos nobilissimae eruditissimaeque feminae Colbertinae Principi Carpineae, quos *della Ragion poetica* inscripsit. In his libris voluit Gravina delineare formam perfecti poetae, atque fontes aperire, unde poeticae artis praecepta scriptaque insigniorum poetarum derivantur. Secutus Aristotelem poësin ex imitatione natam esse judicat, hancque totam in eo versari, ut verum sic

imitetur ac fingat, ut illud ponat in conspectu animi. Ex hac imitatione quasi in plura membra divisa, multas in species eadem abiit, atque ita poetae dicti sunt alii Epici, alii Tragici, alii Comici, alii Lyrici, alii Melici, alii alio nomine; nam pro cuiusque natura & moribus imitandi studium proferebatur. De illustrioribus autem poetis, qui in singulis poesis speciebus excelluerunt, a Graecis incipiens per Latinos gradiens, & in Italos defluens tam scite ac litterate judicat, ut, hoc iudicio duce, quilibet possit sibi ex eorum lectione acquirere cognitionem non solum verborum, sed etiam rerum, ex quibus poesis constare debet. Unum inter omnes eminere Homerum ait; atque enumerat quae sint in ejus poematibus virtutes, quam admirabilis compositio fabularum, quanta praecepta ad reipublicae vitaeque privatae rationes gubernandas, quam evidens descriptio hominum, naturarum, morum, & affectuum, omniumque pene rerum, quibus hic mundus universus variatur, ut in tot tantisque descriptionibus divina prudentia appareat. Jure igitur a ye-

teribus quibusdam Homerica poemata appellata fuisse contendit humanae vitae speculum, & universae rerum naturae imaginem, de quibus poematibus mentem suam fufius explicare peculiari libro sibi proposuerat, sed opus vix inchoatum e manibus deposuit. Homero proximum accedere ait Dantem non dicendi genere, sed scientia, copia, dignitate atque evidentia. Hunc non modo poesis, sed etiam Italicae linguae parentem appellat, quarum originem, progressionem mutationesque diligentissime persequitur secundo libro. Nec quidquam omnino huic operi deesse videtur praeter unam perspicuitatem, quod brevi magnarum ac multiplicium rerum comprehensioni in primis tribuendum est. Hoc idem opus cum saepe nominare contigisset Mario Crescimbenio in sua historia Italicae poesis, aliquid semper de ipsius Auctoris laudibus praedicavit, quod iudicium plurimi faciendum est, quia prolatum ab homine harum rerum intelligente, & in Gravinam non optime animato. Hoc etiam ad ejusdem operis laudem pertinet, quod non defuere qui illud Gallicam in lin-

quam verterint, ac Parisiis edi curaverint anno MDCCLIV. De poesi disseruit etiam in epistola Latina ad Scipionem Maffejum, notans quando coeperit tum apud Graecos, tum apud Latinos; quid utrisque illam commendaverit; quantum inter se hi populi studiis, moribus, vitaeque ratione differrent, qua in differentia totum discrimen, quod est inter Homerum & Virgilium, positum putat. Nonnulla etiam attigit de numero & elocutione poetica, libereque mordet tum eos, qui furere atque insanire videntur, dum novas sequi volunt dicendi ac cogitandi vias, tum eos, qui ad vulgaria praecepta quaedam & ad Petrarcham, tanquam ad saxum, adhaerescunt; illos demum ait videri sibi optime de Italica poesi mereri, qui sensus, modos coloresque mirificos Latino- rum ac praesertim Graecorum ad eam traducunt. Cujus rei voluit se ipsum exemplum proponere. Nam quinque condidit tra- goedias (condidit autem, si verum dixit, tribus mensibus) in quibus expressit suc- cum & sanguinem Sophoclis & Euripidis, medium tamen quiddam inter brevitatem u-

nus & copiam alterius tenens. His tragoediis nomina imposuit, *il Palamede*, *l'Andromeda*, *l'Appio Claudio*, *il Papiniano*, *il Servio Tullio*, quarum in prima & secunda heroica tempora, in reliquis regum, consulare, & militare imperium veterum Romanorum, horumque mores repraesentavit. Sed, ut ipse ad Martinum scripserat (1), voluit non tam antiquitati servire, quam aetatis suae mores carpere, vivos sub mortuorum personis in scenam saepe producens. Multum tamen interesse putavit, ne quid scenae committeret, quod non esset in hominum usu & natura & consonum conditio-

(1) *Hæc Gravina in epist. dat. Romæ Kal. Dec. 1716*: Tuum de tragoediis meis iudicium exspecto cupidissime, neque enim arbitror ad earum examen te scholam consulturum Lopensem & Chaldeonicam, aut inde scatentem Cornelianam (vide hominis morositatem!) Gallorum, sed Atticam & Sophocleam, qualem te decet eruditissimum Hispanorum; praeferat enim nullas attigisse litteras, quam has peperisse nostratum theatrorum pestes. Quem horum temporum furorem castigavimus, & rationibus atque exemplis veterum profligavimus in vernaculo tractatu de tragoediis recentioribus edito . . . Tragoediis autem illis si aliquam

ni, aetati, sexui, instituto & nationi dicentis. Imitatus Euripidem ornavit has fabulas copia gravissimarum sententiarum, ut ex his Principes praesertim viri pararent sibi optimam & pulcherrimam vitae, ut ita dicam, supellectilem. Usus est oratione, quae nec submissionem, nec elationem haberet; & propter similitudinem veritatis abstinuit a versu similiter desinente, adhibuitque hendecasyllabum, & interdum etiam duodecasyllabum, quod non raro accidat, ut ipsi natura incurrant in orationem (quemadmodum jambi olim apud Latinos) sermonemque quotidianum. Has aliasque virtutes extollebant amici Gravinæ: sed inimici aut elevabant, aut iis vitia multa opponebant, atque illa in primis, quod non

cibi attulimus voluptatem absenti, longe majorem caperes praesens, dum vivos sub mortuorum persona in scenam prodeuntes, & res praesentes sub veteribus latitantes videres, ut mos est ejusmodi poematum allegoricorum, quae mores aetatis suas nominibus carpunt alienis. Quo sine sapore atque humanae vitae documento, quorsum poeseos, artis aliqui laboriosissimae studium?

fatis sensus ac motus eae fabulae haberent, quod versus non libere fluerent, quod raro apte & numeroſe caderent ſententiae, quodque ſaepe poeta tranſiſſet lecta & illuſtria verba, ut ſumeret inuſitata, & ea, quae novavit, & fecit ipſe. Haec indignabatur Janus Vincentius, dicebatque audacter & aperte, qui ea reprehenderent, illis tenebras eſſe; quae maxime tragoedias ſuas ornabant longiſſime eſſe ab imperitorum intelligentia ſenſuque diſjuncta; nihil iis ſe ſcripſiſſe egregius, ſequē ipſum poſſe praedicare quaſi unum hominem, qui Italiae reſtituerit hoc poeſis genus. Sunt & alia, de quibus intollerantiſſime ſe jactat in ipſarum tragoediarum prologo; cumque aliquando eum ſcribentem offendiſſet Joannes Baptiſta de Miſſo vir ipſi multis nominibus, ſed praefertim doctrina, amiciſſimus, interrogaviſſetque, qua in re eſſet occupatus; *in reddendis*, inquit ille, *Latine tragoediis meis, ut judicare poſſint exteri, qui ſine amore, ſine odio & ſine invidia judicant, nihil unquam fuiſſe in hoc genere elaboratum, quod tam proxime accedat ad Graeca exemplaria*. Id ut facilius cognoſce-

rent homines, librum confecit, qui omnem antiquorum & Sophocleam & Euripideam condendae tragoediae rationem complectitur, quique non solum praecepta artis tradit, sed de ipsis etiam praeceptis judicat. Judicat etiam quam a norma & regula a Graecis relicta aberraverint, uno excepto Gravina, consequentes omnes tragici, quos si quis proponit sibi ad imitandum, idem facere videri ac si, inventis frugibus, glande vesci velit. Profecto nemo satis admirari potest magnitudinem cognitionis atque artis, quae in hoc libro elucet. Quapropter jure gloriari potuit Gravina, hoc aliisque de poesi libris magnum se attulisse adjumentum hominibus suis, ut non modo Graecarum litterarum rudes, sed etiam docti plurimum se arbitrarentur adeptos & ad scribendum & ad judicandum. Quibus libris si fuisset contentus, neque repugnantem naturam vincere contendisset in scribendis carminibus, melius quidem nominis sui gloriae consulisset. Poterat enim sapientem illum imitari, qui ad poesin invitanti respondit: *ea re*

poemata non facio, quia cujusmodi volo, non possum, cujusmodi possum, nolo. Sunt in manibus hominum tres Italicae eclogae, alias vidi ego ineditas, ut & lyrica quaedam apud virum humanioribus litteris politissimum Petrum Antonium Seraffium, ex quibus intelligi potest tantum Gravinam abundasse doctrina & arte ad poesin, quantum natura destituebatur. Sed incredibile est, quantum se cum Musis delectaret, quantumque ab iis reportaret levaminis, quo facilius magnos sustineret labores, quos in doctrinarum studia infumebat. Cum cogitasset multum interesse ad laudem suam utilitatemque juris prudentiae studiosorum, ut quibus tribus libris ortum, & progressus juris civilis patefecerat atque illustraverat, totidem quoque juris pontificii origines aperiret, in hanc curam toto animo incubuit. Sed dolendum est, magnum & artificiosum opus illum perficere non potuisse, aut jam perfectum in occulto latere. Sunt & alia multa praeclara, quae Gravina aut inchoata, aut prope jam absoluta, aut plane perfecta

fecta reliquit, de quibus singillatim perscriberemus, si ea nobis videre contigisset. Possem & pauca alia proferre, quae jam sunt edita, sed ea missa facio, quod tanti non sint, ut diutius in referendis scriptis Gravinae morari debeamus. Habebat hic, ut initio docuimus, magna propinquitate conjunctum Gregorium Caropresium probum ac doctum virum, quem devinctus magnis illius beneficiis sic semper observavit & co-
luit ut alterum parentem. Quo facto tulit pietatis fructum. Caropresius enim moriens Scaleae anno MDCCXIV. eundem heredem fecit ex asse. Volens itaque Janus Vincen-
tius non modo rei familiari suae, sed etiam valetudini consulere (nam viscerum doloribus hoc maxime tempore afflictabatur, quibus aut remedium, aut allevamentum al-
laturam sperabat patrii caeli aspirationem) ad Brutios remigravit, & apud eos duobus circiter annis remansit. Quo tempore magnas attulit utilitates Provincialibus suis. Eos enim cohortari non desinebat ad praeclara studia, iisque commonstrabat vias, quibus

ad id, quod volebant, facile pervenirent; Ex quo factum est, ut huic omnes honores, quos possent, haberent, eumque quasi alterum Pythagoram suspicerent ac praedicarent. Nemo enim ignorat, regnante Tarquinio Superbo, hunc philosophum illas regiones tenuisse, & privatim & publice praestantissimis & institutis & artibus exornavisse. Magnam vero delectationem capiebat Gravina, dum inviseret loca illa, in quibus accipiebat eundem philosophum fuisse versatum, eaque non solum Pythagorae memoriam sibi attulisse dicebat, sed eundem quoque in conspectu suo posuisse, ac sibi visum fuisse audire docentem. Romam rediit, opinor, an. MDCCXVI., quo tempore cum honestissimis conditionibus invitaretur a celeberrimis Germaniae Academiis ad docendum jus civile, utens excusatione valetudinis ac longinquitatis locorum ire recusavit. Non multo post autem cum valde liberaliter ipsum invitasset Victorius quoque Amedeus Sabaudiae Dux, conditionem libentissime accepit. Videbat enim se in Taurinensi lyceo non

unius modo juris prudentiae doctorem, sed & cunctorum studiorum moderatorem fore. Nam vel antea eidem Duci placuerat in instituendo illo lyceo, condendisque legibus, quae ad studiorum rationem gubernandam pertinerent, multa praescribere de sententia Gravinae. Hic igitur cum exeunte anno MDCCXVII. iter Taurinum pararet, tanta vi correptus est stomachi dolorum, ut tempus profectionis differre coactus fuerit. Sperabat tamen se brevi convaliturum, cum in abstinencia a cibo antea fere semper remedium his suis incommodis habuisset. Et quidem cum per aliquot dies nihil aut parum admodum cibi sumpisset, adeo levatus est, ut die S. Joanni Apostolo festo domo exire, & in proximo templo, quod vocant *del Suffragio*, Sacro adesse potuerit. Sed ineunte Januario, iterum gravissimis doloribus tentatus est, exaestuantque internis caloribus atram demum bilem evomuit. Id accidit quarta circiter hora ante lucem postrid. non. Januarii; cumque ad opem aegrotantis accurrisset Petrus Metastasius advocatus a

Leopoldo fratre, quocum ita partiebatur officia in magistrum & contubernalem, ut illius lectulo unus alterve assideret, invenit ipsum non solum viribus, sed etiam sensibus carentem; neque multo post, prima scilicet luce, ipsum efflantem animam vidit. Elatus est sine ulla pompa funeris, sepultusque in Aedícula, cui nomen *S. Blasii della Pagnotta*. Idem sua manu breve conscripsit testamentum, cujus hoc est exemplum.

Quod Deus bene vertat.

J. Vincentius Gravina ita testor. Annam Lombardam matrem meam haeredem instituo in bonis, quae habeo in Consentina Provincia Bruttiorum, quos Calabros vocant: in bonis vero meis aliis omnibus haeredem instituo Petrum Trapassum, alias Metastasium Romanum, adolescentem egregium, alumnum meum, cui sive ante, sive post aditam haereditatem meam quodcumque decedenti substituo Julianum Pierfantem, Laurentium Gorum, Horatium Blanchum, vernacule Bianchi, discipulos meos carissimos.

Corpus meum, antequam terrae reddatur, cultro dissectum, balsamoque de more perunctum volo.

Dominicanae familiae Patribus pro celebratione Missarum ad peccatorum meorum expiationem dantur semel, h. e. una solummodo vice, argentea scuta Romana triginta, decem juniorum in singula scuta; quae simul cum sumptibus funeris, parce quidem ac imoderate, a Petro Metastasio sive Trapasso persolvuntur. Nonis Aprilis ann. MDCCXV.

Ego idem J. Vincentius Gravina.

At Gravina non solum bonorum, sed & doctrinae heredem reliquit Metastasium. Hunc enim cum vel a prima pueritia in domum suam recepisset (recipiendi autem causa fuit juvenem e lapicida natum, qui aurifici operam suam locaverat, facilitas Italica carmina ex tempore fundendi) ita bonis artibus & disciplinis instituerat, ut nemo dubitaret talem illum futurum poetam, qualem omnes postea cognitum judicarunt. Neque sua institutione contentus duxit quo-

que ipsum aliquando ad Gregorium Caropresium, ut apud eum in philosophia magis magisque exerceretur, quod ei erat persuasum inter philosophiam & poesin arctissimam cognationem intercedere. Fuerunt praeterea plurimi alii nobiles discipuli Gravinae, quos singulos nominare longum esset. Illud satis fuerit dixisse, eorum alios excelluisse in juris prudentia, alios in oratoria, alios in cognitione antiquitatis, alios in philosophia, alios in dissimilibus poesis generibus, quod est signum, eundem vidisse quo sua quemque ferret natura, ad eamque institutionem suam accomodasse. Fructum vero ingenii & doctrinae omnisque praestantiae tum maximum se capere dicebat, cum in proximum quemque conferret. Neque magis discipulorum, quam amicorum nobilitate ac frequentia floruit; e quibus praesertim dilexit Emmanuelem Martinum, Henricum Brenckmannum, Joannem Georgium Graevium, Henricum Huysenium; e nostratibus vero Joannem Justum Ciampinium, Raphaellem Fabrettum, Joannem Baptistam de Miro, Lau-

rentium Magalotium , Franciscum Blanchium , Iosephum Averanium , Antonium Magliabechium , Joannem Mariam Lancisium & Scipionem Maffejum . Acceptus quoque fuit Pontificibus Maximis Innocentio XII. & Clementi XI. , nec non amplissimis Cardinalibus Hieronymo Casanatae , Thomae Turnonio , Gaspari Carpineo , Francisco Pignatellio & Laurentio Corfinio . Quos summos viros dum observaret , nemo poterat suspicari , eum quidquam ad utilitatem suam spemque amplificandae fortunae referre . Odit enim semper fordidum illud hominum genus , qui habent amicitiam & gratiam quaestui , ac saepe dicebat miserrimam omnino esse ambitionem honorumque contentionem ; seque idcirco beatum putare , quod rebus suis contentus nihil quaereret , nihil appeteret , nihil optaret amplius . Nemo illo magis ab adulatione & blanditiis aversus fuit ; & in hoc maxime gloriari videbatur , quod libere & aspere repreheuderet quae reprehensione digna esse sibi viderentur . Vel potentiorum ineptias , quae Romae degenti devo-

randae sunt, non ferebat, atque iracundius respuebat sive morose, ut putabatur, sive ingenuo liberoque fastidio. Ipse tamen & objurgari & moneri moleste ferebat; & si qua offensuscula facta esset animi sui, vix ignoscebat. Hoc quoque in amicitia peccavit, quod esset suspiciosus, & facile existimaret aliquid ab amico esse violatum. Primo aspectu tristis & severus erat; post autem ad comitatem facilitatemque proclivis esse videbatur; & in congressionibus familiarium hilaritati quoque interdum indulgebat. De ejus in Deum pietate dubito quemadmodum exponam. Profecto si ejus scripta dictaque expendere volumus, praeclara omnia atque egregia illum de religione sensisse fateri oportet. Nihilo tamen minus in hac officii parte gravissime accusatus est a multis sive suspicione, sive conjectura, sive; quod probabilius est, malevolentia. Extremo, quo aegrotavit, morbo bis peccata sua, quod ad defensionem illius plurimum pertinet, Sacerdoti aperuit. Sacro quoque omnibus ferme diebus interesse consueverat. Tan-

ta industria fuit, ut eum se perdidisse diem arbitraretur, quo non ad duodecim aut saltem ad decem horas studiis suis vacasset. Quare haud est mirandum, si tantam magnarum rerum atque artium scientiam est consecutus, ut aequi & intelligentes iudices nescire se faterentur, an urbs Roma nullo non tempore eruditissimis hominibus liberalissimisque studiis, affluens, Gravinæ aetate parem illius habuerit ullum. Neque cum optime ille sciret, contempsit artem faciendae & poliendae Latinae orationis. Latinam enim linguam praesertim amavit, eaque in primis usus est, quod Italico sermone locupletiores esse dicebat, & quod ex ea majorem gloriae fructum putabat se percipere posse, quia Latina leguntur in omnibus fere gentibus. Non multa igitur scripsit Italice, & haec minime ornavit colore illo, in quo Etruscae urbanitatis & dulcis perspicuique sermonis imaginem possis agnoscere. Etsi autem statuat bene scripsisse Latine Gravinam, nolim tamen cum quibusdam affirmare, fuisse illum & politissimum

& perfectum scriptorem. Videtur enim mihi deesse ejus scriptis festivum quoddam & solutum & effluens orationis genus, nec profecto semper hausit ille ex aureae aetatis scriptoribus verba dicendique modos; quod ad perfecte Latine scribendum maxime conducere videtur. Nam cum diversarum aetatum scripta multum diuque legerit, contriverit, edidicerit, concoxerit, & rerum plurimarum cognitione pectus oneraverit, componere jam per se aliquid posse putabat. Quapropter ridebat tum illos, qui stilum quasi panem frustillatim mendicant, quod iis nisi liber praesto sit, ex quo aliquid excerpant, tria verba jungere non possunt, tum illos, qui unum attoniti contemplantes, quem imitentur scriptorem, quamvis elegantissimum, impetum quodammodo retardant ingenii sui, carentque propterea in iis, quae chartis mandant, viribus & vita, carent affectu & motu, carent indole, atque jacere, dormire, & stertere videntur. Haec satis quidem sunt ad immortalitatem hominis, qui major etiam habitus est iis, quibus vixit;

temporibus, quamvis incurrerit nimium propriae gloriae cupidus & alienae invidus in multorum calumnias reprehensionesque. Statu-
ra fuit procera, corpore gracili, ore macilento
& pallido, lataque fronte; oculos habuit cae-
fios & distortos, tempora concava, nasum
acutum: sed quae natura dedit corporis vi-
tia homo philosophus contempsit, cum aliam
nullam quaereret laudem praeter solidam ve-
ramque illam, quae ex animi ingeniique
bonis colligitur.

OPERA EDITA

Omnia copiosissima editio operum Jani Vincen-
tli Gravinae est illa , quam Neapoli curavit Joannes
Antonius Sergius an. 1756. & 1758. Haec distingui-
tur tria in volumina in 4. Extant

In I. *Originum Juris Civilis libri tres .*

In II. *De Romano Imperio liber singularis .*

Specimen prisci Juris .

*Oratio pro Romanis legibus ad magnum Moscho-
rum Regem .*

--- *de Juris prudentia ad suos Juris civilis au-
ditores .*

--- *de Canone Interiori ad suos Juris Ponti-
ficii auditores .*

--- *de recta in Jure disputandi ratione .*

--- *de repetendis fontibus doctrinarum .*

--- *de instauratione studiorum ad Clemen-
tem XI. P. M.*

--- *in auspicatione studiorum de sapientia uni-
versa .*

--- *pro legibus Arcadum .*

Canones disputandi .

Leges Arcadum .

*De lingua Latina Dialogus ad Emmanuelem Mat-
tinum .*

*De conversione doctrinarum ad J. Gabrielem
Reginerium .*

*De contemptu mortis ad Franciscum Pignatell-
um Tarentinum Archiepiscopum .*

De luctu minuendo ad Trojanum Miroballum .
Hydra mystica , sive de corrupta morali doctrina
dialogus .

Acta Consistorialia creationis Cardinalium instituta
a Clem. XI. P. M. diebus 17. Maii & 7. Junii
An. Sal. 1706.

De foedere pietatis & doctrinae oratio ad suos
Gratianei Decreti auditores .

De disciplina Poetarum ad Scipionem Massicium
Marchionem .

Jambi ad Paulum Doriam , & quaedam
De-dicationes .

Receptoris Juris Specimen .

Encyclica Epistola nomine Cardinalis Francisci
Pignatelli , cum Neapolis Archiep. esset renuntiatus .

Testamentum Gravinæ .

Institut. Juris civilis receptoris libri quatuor .

Dissertatio de censura Romanorum .

Institutionum Juris Pontificii libri tres .

In III. Una Lettera del Sergio, in cui dà giudizio di ciascun' opera del Gravina dopo d' aver premesse alcune notizie della di lui vita.

Di Giovanni Vincenzo Gravina della Ragion Poetica libri due a Madama Colbert Principessa di Carpegna .

Della Tragedia libro uno al Principe Eugenio di Savoia .

Di Gio. Vincenzo Gravina Giuriconsulto tragedie cinque , cioè

Il Palamede .

--- *L' Andromeda.*

--- *L' Appio Claudio.*

--- *Il Papiniano.*

--- *Il Servio Tullio.*

Dell' Antiche Favole Discorso di Gianvincenzo Gravina al Card. Buoncompagni.

Regolamento degli studj di nobile e valorosa Donna all' Eccellentissima Signora Principessa Santacroce.

Ragion. sopra l' Endimione componimento Drammatico di Alessandro Guidi.

Della divisione d' Arcadia al Sig. Marchese Maffei.

Egloghe tre.

Epistolae Latinae familiares V.

Optassem indicem quoque subtexere operum Gravinae, quae minime in vulgus sunt edita. De quibus operibus cum per litteras requisivissem virum amicissimum Petrum Metastasium, hoc ab eo responsum tuli. Mancano i materiali per l' Indice da lei desiderato. I manoscritti, che esistono, sono qualche autografo inintelligibile di cose già pubblicate, o di pochissime altre incominciate per passatempo, e per lo più non finite, avendole giudicate l' Autore medesimo non eguali all' aspettazione dell' illustre suo nome. Può darsi che vi fosse di più. Ma pochi istanti dopo d' aver egli cessato di vivere, tutti gli scritti suoi furono richiesti e ritenuti per qualche tempo da chi aveva legittima autorità di farlo, e resti poi quanti e quali sono al presente. Sicchè io credo che questo articolo debba nell' opera sua essere affatto trascurato.

ANGELUS FABRONIUS

CAROLO INNOCENTIO FRUGONIO

S. P. D.

A *In tandem? Insanire tibi videor, quod in proposito susceptaque opera permaneam scribendi vitas Italorum doctrina excellentium? Tum insanirem, si quod mihi publicae utilitatis amor imposuit, propter ignaviam aut propter animi infirmitatem abjicerem. Scio te non hoc scriptoris genus improbare, si veritati serviatur. Hoc negas praestari posse ab eo, qui non fuerit in intimis illius, de quo scribendum suscepit. Hinc te optare, ut Biographos habeamus vernas, aut saltem quotidianos ac domesticos convictores, qui totam vitam, naturam moresque illorum, de quibus scire volumus, cognoverint. Pace tua dixerim, amicorum suavissime, magna nimis ab Historico requiris. Requiras diligentiam in inveniendis rebus, veritatem in exponendis, neque repugna-*

bo sententiae tuae ; gloriaborque ea me prae-
 stitisse in explicandis doctorum hominum vitis ,
 quin unquam morq̃us fuerim quorundam in-
 sulstatem atque fastidium , qui siquid mali of-
 fendas in iis , quorum facta historiae mandare
 tibi sumpsisisti , non redargui memoria scriptorum ,
 sed defendi volunt oblivione & silentio . Hi qui-
 dem ignorant eam esse historiae legem , ut non
 solum ne quid falsi dicere audeamus , sed etiam
 ne quid veri non audeamus , nec intelligunt ita
 homines natura comparatos esse , ut sua quem-
 que vitia comitentur , eosque perfectos esse , qui
 minimis urgentur . Sed delicatos istos continuis
 assentatorum depravatos blanditiis relinquamus .
 Quod quaeram nunc illud est , num ita possit
 temperari ratio scribendae historiae , ut veritas ,
 quando periculum est ne nimium offendant , leni-
 tate quadam sermonis aspersa in animos illa-
 batur , qua una re fieri posse videtur , ut neque
 fides , neque prudentia a scriptore desideretur .
 Sunt quidem nonnulli ita natura asperi , ut nul-
 lam ab acerbitate sejunctam veritatem probent ;
 & tum se beatos existimant , cum habent quod
 omni crudelitate mordeant ac lacerent , illud
 prae-

praetendentes liberum esse debere scriptoris iudicium in hominum vitiis notandis. Sed aliter se sentire arbutor, & cum iis stare, qui moment videndum quos reprehendas, & quae ea vitia sint, quae reprehendantur. In hominem insigniter improbum, in crudelem, in Dei humanaeque societatis hostem summa adhibeatur severitas; cujus severitatis illustria exempla dedit Livius in exagitandis praesertim Tarquiniorum & Tulliae sceleribus, & in Annibalis perfidia crudelitaeque reprehendenda. In eum vero, qui non multa peccavit, ita jungatur severitas cum misericordia, ut ipsa notatio parum habitura sit turpitudinis atque offensionis. Equidem semper sum admiratus Caesaris lenitatem, qui in exponendis iis, quae ab hostibus suis in se dicebantur atque agebantur, in neminem paullo acerbius invehctus est, neminemque verbo graviore, aut inclementiore appellavit. Quae si praestitit Caesar vel ipsis hostibus, qui inexpiabili odio in se ferebantur, & inter quos multi porro erant improbi, cupidi, nefarii, quanto magis praestare nos debemus viris doctrina & virtutibus insignibus? Quorum facta moresque sedulo inquirimus, non puto perscrutanda, odo-

randaque minima quaeque, excutiendas syngraphas, tabulas, codicillos, adversaria, quid sit actum cum argentario, quid cum procuratore, quid cum villico, quo quis sit medico usus, quo atriensi, pistore, coquo. Nolumus enim e quisquiliis aut laudem aut animadversionem eruerre. Spectabimus illustria, humilia contemnemus, nisi ex his sumere necesse sit lincamenta & colores ad totius oris imaginem exprimendam. Quorsum haec longior, quam putaram, oratio? Quia deesse amicitiae nostrae arbitrarer, nisi te omnium meorum consiliorum participem facerem. Illud autem a te vehementer peto, ut institutum ac iudicium meum cernere velis in vita Ludovici Sergardil, quam cum his litteris ad te mitto. Ex hac quanta diligentia fuerim in reconditiis inventendis rebus, quam sincerus & moderatus in narrandis iudicato & perpendito; intelligesque profecto adeo me verum amasse, ut, quando res postulavit, vel ipsas faeces indagare, patefacere ac proferre non dubitaverim. Et eo quidem liberius locutus sum, quod non putavi, lenissime agendum esse cum homine, qui ceteros vexare omnibus contumeliis solitus fuit. Equidem saepe te au-

divi execrantem insatiabilem crudelitatem , quam Sergardius in Gravinam adhibuit , praedicantemque hunc fuisse virum magnum in primis , plusque ei virtutem suam dedisse , quam aliorum calumniam abstulisse . Profecto si revivisceret Gravina , in hoc maxime gloriaretur , quod te haberet suarum laudum propugnatiorem defensorremque ; & sibi quodammodo gratularctur , videntis , quae tibi olim adolescenti , Romae dum esses , consilia dedit ad rite excolenda humaniorum litterarum studia , tam prospere cessisse , ut jure meritoque in principibus non solum hujus saeculi , sed etiam superiorum Italicis Poetis numereris . Vale .

Florentiae Kal. Nov. MDCCLXVIII.

LUDOVICUS SERGARDIUS

LUdovicus Sergardius ortum habuit Senis parentibus apprime nobilibus Curtio Sergardio & Olympia Biringuccia VI. Kal. Apriles an. a reparata salute MDCLX. Domi educatus non effugit immanem illam & intollerandam barbariem, quae summo cum humaniorum litterarum detrimento in Italiam invaserat. Id praesertim intelligi potest ex duabus, quas reliquit, orationibus, de Mariae Virginis doloribus una, altera de S. Bernardini Senensis laudibus, quae non modo resperfae sunt, immo vero cumulatae depravata & vitiosa saeculi illius consuetudine. Picturae praeceptorem habuit Dionysium Montorsellium, qua in arte non mediocriter ipsum profecisse indicant ea, quae pinxit in superiori parte majoris portae, qua Florentia venientibus aditus est ad civitatem. At philosophiae vel maxime studuit, & in obscurissimis tenebris, in quibus opera Scholasticorum tum jacebat haec scientia lumen aliquod Sergardio praetulit Pyrrus

Gabriellius vir rectissimis studiis & singulari doctrina praeditus. Tali modo praeparatus Ludovicus Romam venit, ut se exerceret in curriculo juris prudentiae. Tantum profecto de jure didicit, ut potuerit causas aliquas summo cum plausu defendere, & privatim & publice judicia reddere. Sed erat studium aliud, quod vi sua Ludovicum alliciebat ad se se, non emolumento captans aliquo, sed sua trahens dulcedine. Hoc erat studium humaniorum litterarum ac praesertim poësis, quod renovandum putavit, ut ex optimis fontibus purum liquidumque hauriret, quod contractas prima in aetate faeces ablueret. *Utinam*, scripsit ille ad Victorem Felicem Couccium, *bonis avibus incidissem in sanos praeceptores, qui nullo fuce cerussatam virtutem, sed simplicem nudamque contemplandam oculis meis exposuissent. Porro non damnares inuiti poenitentia consumptam in captandis musis adolescentiam. Graulor tamen, quod non tam sero sapiunt Phryges, ut barbariem illam loquendi, quam hausi, nec sine laude exercui, novo culturae genere extirpare non possim. Quod quidem ei prospere*

successit. Erat enim ingenio summo, nec
 mediocri industria, ut nullus illi vacaret a
 scribendo legendoque dies: quidquid vero
 legebat, quod sibi videretur notatione di-
 gnum, in adversaria referebat. Ex epistola
 quadam scripta Latinis versibus ineunte an.
 MDCLXXXVI. ad Tiberium Prosperum, qua
 pulchre exagitavit saeculi vitia moresque
 contubernaliū quorundam suorum, intel-
 ligi potest, quanta iis temporibus facta es-
 set in Ludovico mutatio. Namque tota
 Horatiana est, totaque conspersa sententiis
 veris, sine pigmentis fucoque puerili, fa-
 tisque ea ostendit, quam esset Sergardius
 natura propensus ad carpenda satyrico den-
 te vitia. Rusticabatur autumnō ejusdem an-
 ni in Aricio cum Chisia familia, aliisque
 nobilibus viris, cumque ibi omnia plena
 essent hilaritatis liberorumque jocosum, ex-
 primendos suscepit Latina satyra, quae es-
 set multo & acri sale conspersa, mores
 vitaeque consuetudinem eorum, quibuscum
 versabatur. Adeo indulgit voluntati ma-
 ledicendi in eadem satyra contexenda, ut
 eam comburendam putaverit, timens offen-

sionem & odium eorum, quos male in ipsa habuerat. Cum autem celebraretur eo tempore litteratorum hominum conventus, qui in Aedibus *Propagandae Fidei* habebatur ad excolenda studia theologiae, juris pontificii, sacrae & ecclesiasticae historiae, dedit operam Sergardius, ut in illum reciperetur. Magna quidem cum gloria sustinuit provinciam aut dicendi in eo de laudibus ecclesiasticae historiae, aut explanandi locos ex theologia & jure pontificio difficiles, aut referendi aliquid ex annalibus Ecclesiae & monumentis antiquitatis; quibus in studiis diuturnius tempus consumpsit quam, qui illum non bene noverant, arbitrabantur. In theologia secutus est Augustinum: odit Scholasticos & Casuistas, in quos libenter ac saepe invehebatur aut in sermonibus suis, aut in epistolis, quas ad amicos scribebat; vehementiusque infectatus est libello quodam, quem inscripsit *de veterum philosophia*. Cum hujus libelli fama esset pervulgata, graviter exarserunt potentes quidam religiosi viri, a quibus mala sibi metuens Sergardius, compressit opus, con-

sciditque etiam fortasse, cum ejus nulla vestigia appareant inter Auctoris scripta. Quae qui leget, eum suspicaturum arbitror, Sergardium ad severioris Christianae disciplinae praecepta vitam direxisse suam; in quo profecto vehementer erraverit. Voluptatis enim illecebris delinitus, mature ejus stipendia meruit; neque negabit quisquam, voluptate dominante, maximas virtutes jacere necesse esse. Cujus culpa illum aliquando piguisse oportet. Nam cum significaret amico constanter se recusasse oblatum sibi locum honorificentissimum in aula Medicei Principis, haec addidit: *Nobillior cura me tangit; regnare videlicet, non servire aggredior: habeo domesticam aulam in secreto mentis recessu, ubi effrenae cupiditates ac rebelles affectus quotidie insurgunt, dominanturque rationem; cum his mihi res erit.* Quod quidem feliciter illi evenisse non ausim dicere. Effictos mores expressamque imaginem vitae quotidianae Sergardii videre licet in tabula, in qua se ipsum pinxit. Exhibet haec hominem florenti aetate decoraque facie, stipatum libris, non iis quidem unius generis, sed quos disparia

studia disparesque mores sequebantur. Nam cum *Romanae Rotae Decisionibus* miscerentur carmina & epistolae amatoriae, cum sacris codicibus Martialis & Ovidius; neque ultimo loco conspiciuntur Cloridis armillae, & Protogeni, Zeuxique sacra tabella. Innocentio XI. P. M. mortuo, cum eligendus esset, qui de more ad Cardinales verba faceret de novo creando Pontifice, hoc munus Sergardio delatum est, commendatione praesertim Cardinalis Petruccii, cujus in clientelam se se dederat. Sic autem illud ipsum explevit, ut prudenter sententiose & ornate eum dixisse omnes judicaverint. Alexandro VIII. ad Summum Pontificatum evecto, gratiam apud illum iniit, & ad amicitiam accessit Cardinalis Petri Ottobonii, cui etiam a studiis (*Auditorem* vocant) fuit. Ei autem semper fidelissima consilia dedit, & omnium rerum habitus est particeps. Cumque in homine fidem & industriam magnam eximiumque ingenium quotidie magis admiraretur Cardinalis; neminem facere pluris, plusque diligere videbatur. Habuit eum quoque scriptorem Latinarum epistolarum, quas dare solebat ad viros prae-

sertim Gallos litterarum gloria praestantes. Qua occasione junxit Ludovicus amicitiam cum Joanne Mabillonio, quae semper culta fuit ab utrisque omni officiorum genere, ut indicant autographae epistolae ejusdem Mabillonii, quarum octo supra triginta evolverenti mihi Sergardii scripta se se obtulerunt. In iis epistolis multa sunt, quae pertinent ad eruditionem, quaeque judicium faciunt de quibusdam libris, qui per illa tempora Parisiis prodire. Haec autem omnia communicabat Sergardius non solum cum Cardinali Ottobonio, qui non mediocriter litteris tinctus erat, sed cum ipso etiam Summo Pontifice, quocum saepe sermones bene longos habebat. Conciliatore Mabillonio amicitiam quoque instituit cum summis viris Michaelē Germanio & Theodorico Ruinartio; & mandato Pontificis egit diligenter & prudenter cum Natali Alexandro, ut errores corrigeret, quos in sua *Ecclesiastica historia* disseminasse a Romanis theologis culpabatur. His aliisque meritis cum valeret Sergardius apud Pontificem, magna spe ab illo expectabat & fortunas & honores; cumque jam sacerdotia

quaedam obtinuisset, majora impetrandi spem illi praecidit mors, quam idem Pontifex xv. Pontificatus mense obivit. Jussu Cardinalis Ottobonii laudavit ipsum funebri oratione coram purpuratorum Patrum collegio, cujus orationis brevitās neque eloquentiae luminibus, neque Latini sermonis elegantia compensatur, quod fortasse tribuendum est praecipiti celeritati, qua illam Sergardius confecit. Consolabatur autem desiderium Pontificis usurpatione & renovatione studiorum suorum; versabaturque praesertim in philosophia, de hac multa communicans aut per litteras cum Pyrro Gabriellio, aut coram cum viro omni doctrina & virtute ornatissimo Francisco Blanchinio, qui erat eidem Cardinali Ottobonio a bibliotheca. Sic cum uteretur Ottobonius familiaribus & quotidianis convictoribus, hominibus sane doctis, auctor iis fuit, ut Academiam suis in aedibus conderent, quae tota esset in natura per experimenta investiganda. Et poterant facile, quod haberent in liberalitate Cardinalis, unde sibi suppeditarentur sumptus necessarii; quodque Romae non deessent viri

ingenio praestantes, qui in societatem gloriae vocarentur; sed contenti privatis exercitationibus noluerunt eas in lucem proferre, credo, quod huiusmodi studia, quae nunc foventur in primis, multi iis temporibus infectarentur. Antea quidem cum solitus fuisset Sergardius frequentare celeberrimum illum litteratorum hominum conventum, qui apud Iustum Ciampinium agebatur, exposuerat in eo physica nonnulla, quae a Gabriellio didicerat; neque unquam quaerentibus aliqua in hoc rerum genere visus est defuisse. Ille vero cum ex his studiis tantum haussisset laudis, quantum esset ad laureolam satis, ea intermisit, ut ad alia flecteret animum. Florebat tum viris doctissimis Arcadiae Academia, Romae anno MDCXCI. instituta ad convellendam avertendamque inveteratam barbariem, quae humaniores litteras ac praesertim poësin foede turpaverat. Cum adscisci postulasset in illorum numerum Sergardius, facile id affecutus est, datumque ei nomen Liconis. Ut autem ostenderet merito se tali honore dignatum esse, saepius protulit in Arcadum

coetum Italica carmina multa festivitate atque elegantia condita, gaudebatque ea ingenti plausu probari ab omnibus. Quoniam autem invidia gloriae comes esse solet, & libenter homines de iis detrahunt, quos emergere videant altius, coeperunt Gravina, cujus summa erat in Arcadia auctoritas, ejusque affectae in circulis vellicare, quae condebat, carmina Sergardius. Hic insuetus reprehensionis iniquo ferebat animo de se ab iis male judicari, quorum paullo ante in caelum fuerat elatus laudibus. A quo initio occulta odia inter eos orta sunt. Haec autem graviora fecit acre sane certamen, quod inter eosdem fuit, dum coenarent apud amicum. Calefcens Gravina cibo & portione (quanquam is vino non admodum delectaretur) quaedam temere effutivit, quibus & pietatem adversus Deum laedere, & insolentissime se cum aliorum contemptu efferre visus est. Exarsit iracundia & stomacho Sergardius; nec continere potuit voces irae & contumeliae plenas. Postquam diu multumque certatum est verbis, res ad manus venit, & ut sunt Senenses pugiles exer-

citati, non leviter Sergardius os & pectus Gravinae tudit. Acuit etiam hanc pugnam zelotypia ab amore adolescentuli profecta. Haec abdita in tenebris unius domus perpauci noverunt; narravitque mihi vir, qui fuit ex domesticis & intimis familiaribus Sergardii. Hic cupiens emovere forasque projicere conceptum in Gravinam odium, Latinam scripsit satyram, qua crudeliter illum mordet tanquam religionis & morum everforem. Hoc scriptum volitavit statim tota Urbe, & passim legebatur exscribebaturque. Doluit profecto cruento dente laceffitus Gravina; ajebat tamen alia nulla ratione hujusmodi esse carminibus respondendum quam neglectu & contemptu, quod summorum virorum auctoritate & exemplo confirmabat; nihil citius maledicto emitti, sed, si idem in eximiae ac singularis dignitatis viros conferretur, non modo restingui, sed in eorum quoque cedere laudem. Haec aliaque hujusmodi jaclata a Gravina ad dissimulandum dolorem suum, materiem addidere furori Sergardii, qui latens sub Q. Sectani nomine, ut impunius maledicus es-

set, non prius siluit, quam sexdecim scriptis, editisque satyris omni contumeliarum maledictorumque genere in Philodemum, quo nomine Gravinam designavit, inuestus est. In tanta injuriae atrocitate habuit Gravinam, quo se non mediocriter consolaretur. Nam Emmanuel Martinus vir sane Graecis & Latinis litteris doctus ad infringendos, & si fieri etiam posset, extinguendos plausus, qui maximi impertiebantur Q. Sestani satyris, animadversiones in eas fecit, quibus ostendere conatus est plura esse in ipsis barbara vocabula, inelegantes, incompósitos & ineptos dicendi modos, nec non syllabarum vitia; ipsum denique auctorem non in poetarum concilio, sed in scurrarum grege reponendum. In quo ferendo judicio nemo profecto non videt Martinum effuso suo in Gravinam amoris, plus quam concedit veritas, largitum fuisse. Nam quamvis jure meritoque nonnulla culpaverit doctus ille vir, quae postea emendata ab auctore fuerunt; & quamvis nonnulla adhuc supersint in iisdem satyris, quae nolim plane Latina dicere, attamen *trans alpes & magnum navigat*

aequor gloria Sæctani (ut ipse de se se gloriatur) *cui profecto Apollo ingenium jaculumque dedit, viresque paratas quidlibet audendi feliciter.* Quis æquus aestimator & iudex non admirabitur res plane remotas a Latinorum usibus atque moribus, & in quibus repræsentandis vel ipse Juvenalis infudasset, ita Latine, ita graphice describi a Sæctano, ut nihil venustius possit? Quis non fatebitur undique scatere salem & leporem, adeoque omnia compleri imaginibus acribus & insignitis, ut, quod de Xenophonte laudavit Plutarchus in vita Artaxerxis, illa oculis intueri videamur? Permulta sunt in iisdem satyris, quæ ad res Romanas, non illas antiquas, sed recentes pertinent, quæ haud intelligi possunt nisi ab iis, qui Romæ & in Romanorum moribus diu sunt versati. Romanum quoque Pontificem Innocentium XII. sæpe alloquitur poeta, effertque summis laudibus ad caelum. Incidit aliquando in ipsum Sergardius inambulans in xystris Vaticanis. Cui Pontifex: *heus tu adhuc Philodemum vexas Latinis satyris?* Ita me Deus perdat, respondit Sergardius,

dius, *siquid ejusmodi conscripsi. Maſte virtute*, inquit Pontifex: *mihi quidem gratum ſi ſeverus, diligens, non tamen malivolus eſſe volueris judex, animadverſorque vitiorum; & quod egere putavit, illum multa pecunia donavit. Atque ut iis ſatiſfaciam, qui a me percunctantur, unde ſciam Sergardium auctorem fuiſſe ſatyrarum in Philodemum, hæc ſunt argumenta. Vidi ego quaſdam autographas illius epistoſas ad intimos ſuos familiares, in quibus ſe Sectanum Sectanique ſatyrarum ſcriptorem nominat. Servantur adhuc adverſaria, in quæ idem retulit illuſtres nonnullas ſententias exquiſitoſque dicendi modos ex Horatio, Juvenale & Perſio, quibus poſtea uſus eſt in contexendis ſatyris. Harum exemplar totum conſcriptum manu Sergardii Senis extat apud illius heredes; in eoque tam multa variata auctaque, cum illud ipſum contuliſſem cum editis ſatyris ante an. M^{DC}CC. animadverti, ut viderer mihi alium Sectanum videre. Iſthaec proſecto varietas nihil aut parum admodum apparet, ſi cum eodem exemplari conſeras octo priores ſatyras, quas anno*

MDCC. duobus voluminibus comprehensas Amstelodami edidisse dicitur P. Antonianus & locupletissimis commentariis illustrasse. Cujus editionis quoniam a nobis mentio facta est, minime celandum putamus illam non Batavam, sed Romanam esse, ejusque & commentariorum auctorem fuisse Paullum Massejum Volaterranum, doctrina antiquitatis insignem & Sergardio conjunctissimum; & quae opus ornant, testimonia illustrium virorum de Sectano, composuisse ipsum Sergardium, ejusque civem & familiarem Canonicum Joannem Baptistam Brancadorium, qui haec amico suo, ex quo ego comperi, patefecit. Fortasse Massejus in incepto permansisset edendi illustrandique Sectani satyras, quod avidissime ab omnibus expectabatur, nisi inter eum & Sergardium similitates ortae fuissent. Possem quidem & alia in medium proferre argumenta, cur credam satyras in Philodemum conscripsisse Sergardium, sed prolatis contenti erimus. Non enim puto rem majoribus egere, nisi forte illud dubitationem affert, quod non parum absint a perfectione satyrarum cetera, quae

reliquit scripta Sergardius. Ac mihi quidem id consideranti facile venit in mentem non defuisse homini illi socium & adiutorem in conficiendis satyris, aut saltem prudentissimum censorem in iisdem expoliendis. Etenim is minime recusabat, ut admoneretur & amice doceretur; adeoque promptus erat & exercitatus poeta, ut aliquando plures a perito notatos satyrarum locos stans pede in uno decies usque variare potuerit. Hic postquam tertiam & decimam confecerat satyram, ecce audit tota Urbe sparsum rumorē obiisse Sectanum. Obierat quidem per illos dies haud illitteratus Grammaticus quidam; huncque exagitatore Philodemi fuisse tantummodo ex eo conjecturam faciebant homines, quod ille morti proximus quamplurima in ignem conjecerat scripta. Risit vulgi sermones Ludovicus, ex iisque novae condendae satyrae, omnium quidem, meo iudicio, pulcherrimae, occasionem sumpsit, quam orditur ab occurſu Ligurini, qui visum forte Sectanum ab inferis reducem curiose interrogat, quae aspexerit apud Tartara, quid egerit, & quo felix tramite

ab iis evaserit. Has autem quatuordecim satyras primus in lucem edidit Trifo bibliopola Romanus an. MDCXCVI. ediderunt & alii sequentibus temporibus, cum earum numerum poeta duabus auxisset, quarum postrema graviter de Trifone queritur, quod librum, incio auctore, impressum & quidem mendosissime, venderet. Extat & alia satyra a Sergardio conscripta calamo & atramento temperato, quod tota ferme versetur in tribuendis praeconiis Summo Pontifici Clementi XI. Nullum profecto locum praetermittebat Sergardius illius laudandi Pontificis virtute & doctrina spectata amplissimi, idque praesertim praestitit in ea, quam de architectandi, pingendi scalpendique artibus in Capitolio anno MDCCIII. habuit Etrusca oratione, & cum narrationem Etruscae pariter scripsit earum rerum, quas idem Pontifex non modica pecunia faciendas locavit ad ornamentum majoris aulae, quae in aedibus est Cancellariae, ut vocant, Apostolicae. Magna fortasse spes tenebat Sergardium, qui inter Romanos Praefules jamdiu adscitus erat, amplissimis se decoratum iri

honoribus ab Albanio , quocum ab adolescētia ferme sibi jucundissima fuerat amicitia ; & qui litteras litteratosque viros impense amabat . *Equidem* (sic enim ferme scribebat ad amicum) *primum ut honore dignus essem ; maxime semper laboravi , secundo ut existimer ; tertium mihi fuit illud , quod plerisque primum est , ipse honos , qui vel modestissimis debet esse jucundus , quoties testimonium doctrinae & merito , non beneficium ambitioni dari censetur .* Verum cum Sergardius in dies extenuari spes suas & evanescere videret , perfugium ac solatium in philosophia & in mansuetioribus musis quaesivit . Cum fuisset curator operibus faciendis in Basilica S. Petri , equestrem statuam in ejusdem Basilicae porticu Carolo Magno statuit , nonnullas aras tabulis emblemate vermiculato affabre elaboratis ornavit , aream silice stravit , & obeliscum in eadem area collocatum columnellis certo ordine dispositis sepsit . Sed postremum opus hoc incurrit in reprehensiones intelligentium , eaque propter non modo vocibus , sed etiam carminibus graviter vituperatus est Sergardius . Non est credibile

quantum id doluerit homo gloriae cupidissimus, quem tamen reninisci oportebat illam Publici Syri sententiam:

Ab alio expectes alteri quod feceris.

Et quidem vehemens adeo fuit in eo doloris sensus, ut nonnulli existimaverint huic maxime tribuendam esse incommodam valetudinem, qua his temporibus tentari coepit. Valetudini ut consuleret, Spoletum venit; sed nihil ei melius factum est, ibique diem obiit supremum VII. id. Novembris an. MDCCXXVI. Sepultus est cum pompa funeris in majori Templo ejusdem civitatis prope sacellum S. Francisci.

OPERA EDITA

Q. Scđani satyrae in Philodemum cum notis variorum. Coloniae 1698. apud Joannem Selliba in 8.

— *Eaedem satyrae numero auctae, mendis purgatae, & singulae locupletiores; editio novissima &c. con-
cinante P. Antoniano. Amstelodami apud Elzevirios
1700. vol. 2. Minime praetereundum putamus ipsum
Sergardium delineasse & in aere celasse Sapientiae i-
maginem, quae frontem ornat prioris voluminis. Ne-
mo dubitare videtur inter Scđani opera numerandum
esse librum, qui inscribitur:*

*Satire di Settano tradotte in terza rima dallo stesso
Autore: in Zurigo (falso; nam Florentiae liber typis
impressus est) a spese della compagnia l' anno 1770.
sed si hanc interpretationem conferes cum Latinis sa-
tyris, profecto dubitabis, adeo ab his distat ele-
gantia, vivido quodam spiritu, ceterisque poeticis
virtutibus, quibus eadem Latinae satyrae mirum in
modum abundant.*

*Oratio pro eligendo Summo Pontifice post obitum In-
nocentii XI. habita in Basilica Vaticana coram Sacro
Collegio a Ludovico Sergardi Senensi, Romae 1689.
typis Jo. Jacobi Komarek.*

*Distinta relazione della gran Sala della Cancelleria
Apostolica ornata nel Pontificato della Santità di N. S.
Papa Clemente XI. e aperta al pubblico il giorno 17.
Febbrajo 1719. In Roma 1719, presso Gio. Maria Sal-
vioni.*

Orazione di Monsignor Ludovico Sergerdi Senese Referendario dell'una e l'altra Segnatura, e Ponente della Sacra Consulta, recitata in Campidoglio per l'Accademia dell'arti liberali l'anno 1703.

Carmen ad Clementem XI. Exiat in parte altera Carminum Arcadum, Romae 1756.

Non defunt qui arbitrantur Sergardium plurimum adjuvaffe Caesarem Gregorium Scottum Senensem in concinnando Carmine, quod inscribitur *Cassianidos*.

Illud & addendum putamus esse nunc Lucae, qui in nova editione satyrarum Sergardii concinnanda elaborant, cum earum autographa ab illius heredibus obtinuissent.

LUDOVICUS ANTONIUS MURATORIUS *.

Ludovicus Antonius Muratorius operibus quinque ac quinquaginta in lucem editis nemini, cui quidem litterae cognitae sint, in Europa minime cognitus. Natus est XII. Kalen. Novembris anno Domini MDCLXXII. ex Francisco Muratorio & Joanna Altimania, honestis hominibus at in tenui re, Vignolae, quod oppidum, duodecim fere passuum millibus Mutina distitum, ab Atestinis Ducibus, feudi jure, Boncompagnorum gens nobilissima obtinet. Vix primis ille fuerat litterarum elementis imbutus, cum fabularum, quas *Romanenses* appellare solemus, a celebri femina Scuderya descriptarum, lectione mirum in modum captus est, ac deinde quotquot invenit ejus generis libros, tanta perlegit aviditate, ut ad mensam etiam eos adhiberet. Ex eo

* Hanc vitam conscripsit Aloysius Brenna; idem ille auctor elegantissimus Galilaei vitae, quae extat in I. volumine.

tempore correptus est semper aliquid addiscendi desiderio, quo semper ad ultimam senectutem mirifice flagravit. Cum prima Latini sermonis accepisset Vignolae rudimenta, neque ultra deficientibus magistris progredi posset, Mutinam studiorum causa mittendus erat; sed parentis paupertas impedimento fuit, quominus illuc ante annum MDCLXXXV. concederet. Ibi grammatica ac deinde humanioribus litteris opera Jesuitarum, quos ut bonos adolescentium institutores & habuit semper & coluit, impertitus est; quo tempore liberalibus ita se se tradidit disciplinis, ut etiam quidquid otii supererat a scholarum occupationibus, in legendis libris, praecipue Latinis, quos faciebat Italicos, plerumque libentius, quam puerilibus in ludis infunderet. Jam tum ille coepit particulae cujusque temporis avarior esse, quam homines etiam litteris dediti consueverint; ac legem ipse sibi indixit, quam per omnem exinde vitam sanctissime servavit, non amplius unquam, longioribus quoque noctibus, quam septem horarum spatium somno concedendi. Ipse quidem a teneris, ut ajunt, unguiculis op-

taverat *clericali* adscribi *militiae*; sed pater eo repugnabat; quod unicus ei filius esset; tandem manus dedit, & mense Januario **an. MDCLXXXVIII.** per Carolum Molzam Episcopum Mutinensem noster sacro ritu tonsus est, ac duobus tunc primis minoribus ordinibus, anno vero, qui consequutus est, aliis duobus insignitus fuit; ex quo tempore ludicris quibusvis nuncium omnino misit, ac mores in melius ita commutavit, ut nullus Mutinae adolescens aut magis deditus liberalibus studiis, aut modestiae ceterarumque virtutum laude florentior existeret. Cum triennio versatus esset in Jesuitarum scholis, ad publicam se se contulit Academiam, quo philosophiae navaret operam. Magistro usus est Joanne Dominico Guidottio ex tertio, quem vocant, S. Francisci ordine. Hunc deinde semper honoris causa Muratorius nominavit, neque parum ei se se debere profitebatur, quod res etiam difficiliore mirabili quadam discipulis enodare perspicuitate consueffet. Quanquam enim ille Scholasticorum opinionibus non tam occupabatur quam impediabatur, Peripateticas

doctrinas ita proponebat, ut & in alias quandoque discederet sententias, & quod caput est, quid ex recentioribus summi philosophi docuissent, luculenter explicabat. Sub eo Muratorius pridie nonas Februar. anno MDCXCII. de subtilissimis quaestionibus in doctorum hominum conventu solemniter more disputavit, Ludovico Masdonio tum Episcopo Mutinensi in patronum adscito. Hanc quidem nostro juveni disputationem honori non levi fuisse memoriae traditum accepimus. Deinde legibus in eadem Academia sub Hieronymo Pontiano doctissimo viro ac praeceptore satis commodo, nec non eodem tempore theologiae morali sub Joanne Juliano Societatis Jesu, quem etiam summis & iisdem meritis etiam aetate maturior laudibus extollebat, ac theologiae Scholasticae operam dedit. Hac in postrema facultate se se duces non invenisse conquerebatur, qui sibi satisfecisset: itaque libros consuluit; cumque non multos eo tempore habere posset, aliorum scripta non sine magno labore descripsit; quamobrem quidquid in ea scientia profecit (profecit autem plurimum) sibi tan-

tum ingenioque suo debuit acerrimo & maximo. Tum pater tum familiares aliqui Muratorium hortabantur, ut morali theologiae ac juri utrique totum se se dederet magnos ex iis honores atque divitias facile relaturus. Iis aliquando noster aures adhibuit, ac spei dulcedine se se aliquantulum capi passus est. Ea de causa Nicolai Santii tum scientia juris tum dignitate florentis domum frequentare coepit, ut qua ratione tum leges tum responsa prudentum deducerentur in usum (*praxim legalem* barbari totum illud appellavere negotium) edisceret. Sed & scientia illa morum, qualem Theologi tradunt, non satis ei placebat & juris prudentia, qualis in foro & apud judices locum habet, vehementius ejus animum offendebat. Id nempe factum est iis omnino de causis, propter quas ab utraque facultate mobilia ingenia, quibusdam natura inditis igniculis ad veritatis inquisitionem exarscunt, nisi forte honorum aut lucri cupiditate alliciantur, abhorre consueverunt. Itaque totum illud tempus, quod in iis audiendis praeceptoribus haud terebat, huma-

nioribus litteris, praecipue vero lectioni poetarum, nec non eorum, qui de poeticis rebus aliquid scripserant, coepit impertiri. Sed ea temporum erat conditio, ut per ipsam Italiam prorsus absurda vigeret adhuc scribendi ratio superiore saeculo cum tanto bonarum artium incommodo invecsta: quare mirandum non est, Muratorium etiam fucatis illis pigmentis & orationum versuumque calamistris atque cincinnis fuisse delectatum. Thesaurus ineptissimus, videlicet ille scriptor, qui dein a Muratorio tantopere vapulavit, ipsi tum in deliciis erat; Petraracha, multoque magis qui Petrarcham sequerentur, jejuni ac sicci nulla voluptate lectorum animos posse perfundere videbantur. Dum ea ratione Muratorius ineptiret, ac versus tamen ederet, qui scriptoris ingenium saperent, facile impetravit, ut in coetum admitteretur hominum honestissimorum, qui saepe de rebus ad liberalissima studia pertinentibus conferebant sermones; ut alter alterius prudentia doctior evaderet; quos inter Marchio Joannes Rangonius, Joannes Carissimus, Petrus Antonius Bernardonius eminebant. Ac-

cidit, ut ad eum coetum carmina Etrusca deferrentur recenter edita Caroli Mariae Maggii, ac paullo post alia Francisci Lemenii. Dici vix potest, quantopere homines, qui natura emunctae naris erant, quamvis in ingentibus eatenus erroribus volutati, capti fuerint Maggii vi atque copia, Lemenii vero tum amoenitate tum vero magnificentia. Non secus atque homines ex longo experrecti somno tum primum oculos coeperunt veritati aperire, ac demum videre quid ab eo praestandum sit, qui quidem esse velit poeseos laude perfectus. Ex eo tempore Ludovicus Antonius quidquid in poesi didicisse visus ipse sibi fuerat perdendum ratus, poetas antiquos tum Latinos tum etiam Graecos, quorum carmina Latina facta essent, accuratius coepit nocturna diurnaue manu versare, & quidquid in iis notatu dignius deprehendebat in adversaria conferre. Sub idem fere tempus in oratione quoque soluta numeris proficiendi studio inflammatus est. Vereor tamen ut ad eam aequae ac ad poesim omnino teretes attulerit aures exquisitumque iudicium. Declamationes Quintiliani, Libanii,

ac Senecae senioris legebat assidue, illorum videlicet ingenio, quod tamen fortasse nimis extat, summopere delectatus. Equidem neque scriptum inveni, neque ex ea, quam tenuit deinceps, scribendi ratione deprehendere unquam potui, Ciceronis libros Muratorio in deliciis fuisse habitos. Illud sane legi, juvenem Ludovicum Antonium a Maggio petiisse, ut orationi nescio cui ejusdem judicio commissae *aliquid Plinianae amoenitatis ac florum Ciceronianae gravitati admisceret*; qua de re a Maggio reprehensus est admonente, Ciceroni, qui habendus esset in scribendo Deus, nihil vel ab arte vel a natura deesse, quominus ejus exemplum, quicumque velit optimam sibi comparare scribendi rationem, respicere perpetuo debeat ac sequi. Quid Maggus eo monitu profecerit, equidem nescio. Sane Ludovicus Antonius, quem vel ab ineunte juventute librorum helluonem, non secus & veterem illum Catonem, haud absurde dixisses, iis perlectis auctoribus, ad Senecae philosophi opera totum se contulit, ex quo tempore

Stoicae

Stoicae philosophiae, quam in iis didicerat libris, amore captus est omnino singulari. Hinc & Epitetto & Ariano studere coepit impensius, & tantos progressus habuit in Stoicis, ut nullis esse animi perturbationibus obnoxius ipse sibi videretur. At cum ejus mater elata est, tanto dolore animi coepit affici, ut magnum nihil sine Christiana Religione humanam posse philosophiam sibi persuasferit. Sed tamen ea disciplina delectatus Justi Lipsii opera diligentius pervolutare coepit, ex quo factum est, ut antiquitatum Romanarum, de quibus ille multa praeclare, nec non totius eruditionis, quam prophanam dicimus, incredibili quodam studio & amore corripere. Tum Graecae linguae sine magistro ac duce navavit operam, & paucos intra menses ita profecit, ut aliorum dux atque magister esse posset. Verumtamen ut in studio antiquitatum tutius procederet, in disciplinam totum se se tradidit Benedicto Bacchinio Cassinensi Monacho, de quo nihil me attinet dicere, cum ejus vita fuerit ab elegantissimo doctissimoque Angelo Fabronio tam accurate descripta. Pendebat ab ore Bac-

chini Muratorius, nec ab ejus unquam latere discedere voluisset. Senex etiam fassus est saepius tanti viri consuetudinem atque institutionem sibi maximo in suis studiis adjumento fuisse, quin & ei potissimum quidquid in arte critica poterat referere acceptum. At Bacchinius auctor juveni fuit, ut eruditionis, quam prophanam dicimus, studio aliud etiam adjiceret ejus, quam sacram & ecclesiasticam appellamus; praesertim quod vitae generi ab eo electae id optime conveniret. Hinc Muratorius Spondani Annales, dein Ecclesiasticos melioris notae scriptores historicos, postea Concilia, Sanctosque Patres, aliosque libros illuc facientes ita perlegit, ut ad verbum (tanta erat ei memoriae vis) edidicisse videretur. Fusius fortasse, quam necesse fuerat, de primis Muratorii studiis loquutus videbor. Sed res notatu digna mihi visa est, eum rationibus iis admodum profecisse, quae ceteris fere omnibus non eadem acie mentis ac reminiscendi facultate praeditis, cum ipsa copia rerum obrui facile soleant, haud levi fuissent impedimento. Atqui Muratorius ex alia in a-

liam facultatem aut scientiam ita brevissimo temporis intervallo gradum fecit, ut cum quae didicerat, omnia memoria custodiret, exemplo suo probare posset, quam arcto inter se universae disciplinae vinculo contineantur, ut altera alteram juvet, cum aliae ex aliis aptae videantur ac nexae. Ille quidem inter tot pulcherrima studia dies noctesque jungens parvo contentus vivebat, nec de honoribus multoque minus de divitiis exaggerandis aliquid cogitabat. At enim de illo duo cogitabant amici praestantissimi, ingenium atque doctrinam ac mores juvenis admirati, Joannes Josephus Ursius eruditionis & carminum gloria per Italiam, quin & per Europam quam qui maxime nobilis, & Antonius Felix Marsilius, qui postmodum apud Perusinos fuit sacrorum Antistes, vir & ipse magnorum hominum familiaritate dignissimus. Horum opera factum est, ut adnitente Comite Carolo Borromaeo, qui litteratis & ipse hominibus impense favebat, Mediolanum juvenis Muratorius advocaretur, quo unus ex Doctoribus esset Ambrosianae bibliothecae Praefectis. Nihil ii

viri gratius nostro potuissent efficere, si per
 eos ad alicujus florentissimi regni procura-
 tionem fuisset admotus. Antequam illuc com-
 migraret ad XVII. Kal. Jan. an. MDCXCIV.
 doctorem, quam dicunt, in utroque jure
 lauream Mutinae accepit, & a praefule Ma-
 sdonio factus est Diaconus, cum anno ante
 Subdiaconatus ordinem ab ipso accepisset.
 Mediolanum pervenit initio Februarii anno
 MDCXCV. ac brevi, indulgente Summo Pon-
 tifice, non enim per aetatem licuisset, Sa-
 cerdos inauguratus est per Thomam Cevam
 Tortonensem Episcopum. Bibliothecae Prae-
 fectus non se se libris immiscuit, sed totum
 in eosdem se se abdidit, veteresque codices,
 quos illa abundat, ita scrutatus est, ut
 multa deprompserit ad id temporis ceteris
 incognita, ex quibus libros, qui *anecdota La-
 tina* & qui *anecdota Graeca* inscribuntur,
 elaboravit. Iis enimvero de libris, quibus
 tum primum Europae totius admirationem
 in se Muratorius convertit, hic esse vide-
 retur dicendi locus. At mihi propositum est,
 ne saepius non sine taedio lectorum ad res
 omnino distitas vel invita distrahi videatur

oratio, primo quid Muratorius egerit, deinde quid scripserit, explicare. Cum iis distineretur curis, non tamen ille recusabat, quominus aliquid in iis doctorum hominum coetibus, quos Academias nuncupamus, recitaret. Novam etiam huiusmodi Academiam ad philosophiam morum & humaniores litteras juyandas in Borromaeorum aedibus curavit institui. Eo etiam tempore marmoribus antiquis & inscriptionibus veterum monumentorum, praesertim ineditis, colligendis operam dare coepit, & ea moliri, quae postmodum ex magna parte perfecta videbimus. Beatus sibi videbatur in Ambrosiana bibliotheca, tanquam in suo regno, Muratorius, cum improvise Mutinam a Raynaldo I. Duce revocatus est. Videlicet is multis justissimisque de causis apud se statuerat hominem Estensi archivio praeficere, qui cum fidelitate, tum in rebus praesertim ad antiquiora monumenta codicesque spectantibus doctrina esset omnino singulari. Ita sibi facile persuasit, neminem ad id munus Muratorio suo aptiorem inveniri posse. Eum igitur de mente sua certiozem fieri curavit,

dignitatem Archivio Praefecti ac stipendium idem, quo fruebatur is Mediolani, pollicitus. Aegre admodum ab Ambrosiana bibliotheca se se divelli patiebatur noster: nec non Ursius atque Marfilius auctores ei erant, ne Mutinam Mediolano praeferreret. Sed domino suo, praesertim & iusta petenti, & praecleara cupienti, obistere durum admodum Ludovico videbatur. Ad id patriae pietas ac fororum trium, quas paullo ante moriens pater plenis annis nobiles reliquerat, caritas accedebat. Re multum deliberata tandem se se vicit, ac Ducis iussa facturum se se respondit: sex tamen mensium inducias, quo res suas Mediolani componeret, fidemque suam de Maggii operibus cum ejus vita edendis liberaret, efflagitavit; simulque ne dumtaxat Archivio Praefecti, sed & Bibliothecarii titulo honestaretur, petiit, ne videretur exteris praesertim hominibus, ad quorum amicitiam se se per epistolas adjunxerat, aliquid amisisse pristinae dignitatis. Utrique petitioni statim Raynaldus annuit, eumque Bibliothecarii sui munere ac nomine decoravit. Mutinam rediit Muratorius

mense Augusto anno MDCC. Statim Archivio in aliquem ordinem redigendo manum admovit; qua quidem in re non sine magno taedio, quamvis & alios haberet adjutores, ferme duos insumpsit annos. Majorem tamen animo cepit molestiam, veritus frustra tantos a se labores fuisse susceptos, cum anno MDCCII. periculosum per totam Cisalpinam Galliam extitit bellum. Tunc enim Estense Archivium, quod sine chartarum ac monumentorum perturbatione fieri vix poterat, cum aliis majoris pretii rebus Raynaldus Dux in tutiorem locum transferri jussit, priusquam a Gallis, quod paullo post factum est, Mutina occuparetur. A Gallis Muratorius honorifice est habitus, dignitate ipsi etiam stipendioque servato, quin & Regii Bibliothecarii nomine insignitus; quo tamen ipse, ne videretur domino suo injuriam inferre, nunquam uti voluit. Tum vero magis, quam antea, libris elucubrandis ita se se tradidit, ut postremus etiam morbus scribentem aliquid invenerit, imo nec prorsus a scribendo deterruerit. Sed nunc alia, quae respiciunt reliquum ipsius vitae

curriculum, more nostro breviter ac strictim attingamus. Ille quidem, ex quo praesertim, tempore Sacerdos factus erat, haud levem a se conferendam operam esse statuerat ad aeternam Christianorum salutem promovendam. Hinc & eorum confessionibus Catholico ritu excipiendis erat, cum opportunitas id fieret, assiduus, & iis praecipue, qui carceribus inclusi fere deserebantur, praesto esse contendebat; quin & a Raynaldo Duce obtinuit, ut munus, quod vocari solet, *Visitatoris* carcerum Mutinae constitueretur; quod munus ipse miserabilium illorum hominum caritate permotus ultro sibi optavit, ac per annos bene multos exercuit. Hic enim vero nobis itinera memoranda sunt, quae fecit per autumnum an. MDCCXIV. ac MDCCXV. ac ver anni MDCCXVI. jubentibus Raynaldo Duce ac Georgio I. Magnae Britanniae Rege. Iis profecto temporibus quotquot potuit archivaria cum Petro Hercule Gherardo, docto viro, necessario suo, illorum auctoritate litterisque commendatitiis ad Principes Italiae viros instructus, in eadem Italia in-
visti, atque ita scrutatus est, ut omnia col-

legerit, quae quidem aliquid vel ad Eiten-
sis ac Brunsvicensis familiae decus, qua
praecipue de causa missus fuerat, vel ad
historiam universam quoquo modo illustran-
dam conferre viderentur. Inter epistolas, quas
diximus, quaedam erat Georgii Regis ad
Joannem Cornelium Venetiarum Ducem, in
qua noster vocabatur homo *in studio histo-
rico versatissimus*. Eam quidem gravibus qui-
busdam, de causis Veneti recipi noluerunt.
Id tamen non obstitit, quominus aliqua tum
Venetiarum tum Venetae ditionis Muratorio
paterent archivia. Reduci in patriam anno
MDCCXVI. munus oblatum est Praepositi in
Ecclesia Mutinensi S. Mariae, quae *Pompo-
sae* dicitur. Etsi non pingue sit Sacerdotium,
eo, de quo diximus, juvandi ceteros deside-
rio illud suscipere minime abnuvit. Ita se ges-
sit in eo munere Muratorius, ut Catholi-
corum Parochorum exemplar & haberi me-
reretur & dici. Primo quidem ingentem pro-
fudit pecuniae vim, ut Ecclesiam suam sa-
cris calicibus, sacrisque vasibus aliis ac ve-
stibus, omni denum supellectile, nec mo-
do necessaria, qua ferme carebat, sed &

splendidiore donaret. Anno autem MDCCXVII. etiam aggressus est Ecclesiam eandem, quod ex omni fere parte labefactata ruinam quoque minaretur, aere suo reaedificare, ac tertium ferme post annum quod molitus erat absolvit, plusquam centussibus quater mille in id erogatis. Tunc enimvero ex calcis effluviis, aut potius ex pestilentibus fundamentorum halitibus, cum ubi putrefacta materies ac veteres tumuli delitescerant, iacta essent, in morbum incidit omnino periculosum. Accidit id anno MDCCXX. Sed ex eo morbo medicorum opera, praesertim quos Raynaldus Dux, veritus ne maximum suae ditionis decus amitteret, ei submiserat, brevi convaluit. Multas etiam alias fecit expensas in alia, quae Ferrariae Ducis ipsius beneficio adeptus erat, Sacerdotia: quoniam & in eadem urbe Ecclesiam S. Agnetis, cui Prioris cum dignitate praeerat, fere totam instauravit. Illud etiam memoria dignum, quod cum levandi pauperum calamitates incredibili quodam studio teneretur, ei multo magis, ex quo Parochus factus est, habenas esse remittendas putaverit. Non modo

liberalitate sua quotquot potuit stipem emendicantes ille iuvit aut ad januam suae domus aut ad viam quacumque transiret, quae de re memoriae proditum est, nihil unquam ipsum eis negavisse, cum etiam ultro quaereret cui largiretur; sed & ingentem aliquando iis, qui de gradu suo deciderant, donavit pecuniam, eis rationibus usus, ut ipsorum non modo necessitati, verum etiam verecundiae consuleret. Aliquando centum, aliquando etiam ducentos centusses eo modo largitus est. Semel etiam cum non haberet nummos, petenti quò filiam suam inter moniales Deo sacraret, vasa quotquot domi habebat argentea & torquem aureum a Carolo VI. Caesare dono sibi missum contulit, non dedit oppignorandum. Neque vero dumtaxat ille pauperes pecunia sublevabat, sed & ea cum iis agebat ratione, ut se se illis non conditione naturae, sed fortunae munere praestare, semper cum animo suo volvere videretur. Nunquam recusabat, quominus eisdem praeberet aures iis etiam horis, quibus a nemine alio voluisset interpellari. Saepius visebat aegrotos, saepius quos hieme

per vias offendebat nimio frigore laborantes invitabat domum, quo tum igne tum cibis e mensa sua foverentur, quin & si qui non poterant per se se advenire, per bajulos deferri curabat. Nunquam superbe, nunquam non omnino patienter cum illis egit, semper in iisdem communem parentem Deum agnoscens, ac veneratus. Sed & in Ecclesia sua societatem instituit, quae *Charitatis* dicta est, ac magno deinde pauperibus Mutinensibus adjumento fuit. Ad eam enim pertinet viduarum & orphanorum & aegrotantium cura; illud praecipue ut pueri atque puellae miserabiliores iis artibus imbuantur, quae deinde victum atque vestitum sine certissimo, quod antea contingebat, honestatis morumque discrimine comparare possint. Huic societati plurima ille donavit dum vivit, nec non moriens grandem quoque pecuniam legavit ab heredibus, omniq; oppo contendit, ut ab aliis etiam augeretur divitiis praesertim qui sine consanguineis decederent. Sed & sacros impudit oratores, ut e suggestu caritatis commendarent virtutem, & Christianorum animos pauperibus subveniendi

desiderio inflammarent. Eam societatem sanctissimis ipse munivit institutis ac legibus, nec non a Ducibus impetravit, ut ipsa coercedi eos, qui cum aliquod exercendi opus haud destituerentur viribus, inertissimam mendicandi consuetudinem praeferebant, gauderet auctoritate. Sed & edita obtinuit ab iisdem, quibus aut revocarentur aut constituerentur sapientissimae leges in eosdem voluntarios pauperes, qui certe, ne alii vera miseria pressi Christianorum pietate juventur, sunt impedimento. Per eundem etiam emendata fuit prava consuetudo, qua pauperes in Ecclesiis, non sine piorum hominum interpellatione, stipem poscebant. Cum vero Mutinae gravissimis Hebraeorum foenoribus homines miseri non habentes quo confugerent, ut mutuum aliquid acciperent, per ea tempora premi solerent; *Montem*, ut vocant, *Pietatis* erigi curavit. Ejus quidem esse voluit hominibus id genus mutuos, quin ullos exigeret fructus, nummos impertiri. Montem hunc Antonii Pavarottii pii civis Mutinensis hereditate, quin & pluribus aliis etiam de suo

accessionibus curavit locupletari. At ne omnia, quae de Muratorii effusa in omnes liberalitate dici possunt, studiose persequar, complectar brevi. Etenim post ejus mortem rationibus magna diligentia subductis omnino compertum est, expensarum multo plus in Ecclesiarum, quas tenebat, commoda & ornamenta, nec non ad pauperum levandas calamitates eum fecisse, quam ab omnibus Sacerdotiis toto vitae suae tempore perceperit; qua quidem re quid afferri possit ad Sacerdotis alicujus laudem gravius aut magnificentius equidem nescio. Illud tamen non omiserim, quod Parochum agens, & Societatis, de qua diximus, institutum & rationes ac negotia procurans, aliquando contumelias, aliquando minas, & eas quidem atrocissimas a flagitiosis hominibus ita pertulit, ut nunquam ejus mansuetudinem aut constantiam immutatam fuisse dixeris. Accidit etiam, ut mortis aut gravissimi certo vulneris periculum subiret, cum a nefario patre filiam ab ipso prostituendam in tutiorem locum deferri curasset. Vespere in ipsum incidit. Ardebant perditum hominis ocu-

li; toto ex ore facinus, quod aggressurus erat, quin & ex verbis atque conviciis, eminebat. Muratorius quidem in domum se se recepit, cujus forte januam invenit adaper- tam. Postea nullam ex inimico poenam per suos expeti voluit; quin etiam nihil habuit antiquius, quam ut eundem certiore faceret, a se quidem nihil ipsi esse timendum; quidquid contigisset, se se non esse memorem. Demum criminis poenitentia ductum ac veniam infimis precibus postulante- amantissime complexus est. Jam vero cum ea, quae omnino difficiliora sunt in Parochi munere, tam egregie praestiterit, vix me attinet dicere, quanta cura in ce- tera incubuerit, quae suarum esse partium optime noverat. Nam & memoriae prodi- tum est quantopere adlaboraverit, ut homi- nes curae suae commissi ex Evangelii nor- ma moderarentur mores; ut aegroti Catho- licae sacramentis Ecclesiae procurarentur; ut nihil intra suae Paroeciae fines, quantum fi- neret loci conditio, admitteretur, quod praesertim simpliciorum vitam corrumpere- t; ut qui Ecclesiasticae militiae nomen dede-

rant, fidelibus ceteris virtutum omnium essent exemplo. Hujus quidem rei gratia *pias*, quas dicimus, *Exercitationes* a S. Ignatio de Loyola primum inventas in Ecclesia sua quotannis per eosdem Clericos obeundas instituit. Multus etiam erat in eo, ut non modo Sacramentorum administratio, sed & alii quique Catholici ritus in Ecclesia sua non solum sine negligentia, sed & cum magna dignitate peragerentur. Hac etiam de causa pro Clericis universis aperuit scholam, ac magistrum aere suo conduxit, ut cantus, quem Gregorianum dicimus, ab iis ediceretur: quo quidem loco non est praetermittendum, eum ipsum eidem cantui dedisse operam, quamvis exili admodum & incommoda voce usus non, quantum voluisset, proficere potuerit. Ita se gessit in gravissimo Parochi munere ad ann. usque MDCCXXXIII. Eo anno acrioribus, quam antea, coepit valetudinis incommodis affici, cum ejus caput haud leviter inflammaretur, quoties aut Christianae Fidei rudimenta pueris traderet, aut sacrum ad harmoniam faceret, aut solemnibus

bus diebus populo de more benediceret, aut alios in magna praesertim hominum frequentia hujusmodi ritus exerceret. Consulebant amici, nec non ipsi medici, ut ab iis per se obeundis abstineret. At cum animum non posset inducere satis decere ut Parochus esset, neque tamen, ut putabat, parochum ageret, id potius consilii cepit, ut eo se se toto munere abdicaret. Nunquam tamen aut sacras Christianorum confessiones excipiendi, aut subveniendi pauperibus consuetudinem intermisit; quin & societati, de qua diximus, semper ipse, qua solitus fuerat, sedulitate praeesse voluit. Ex eo tempore alia omnia, quae ipsi ultro oblata sunt, munera suscipere constantissime recusavit; ac multo magis ab iis quoque majoribus, quae facillime, si quidem levem operam in id contulisset, adipisci potuisset, petendis aut exoptandis abstinuit. Anno quidem MDCCXXXIV. cum Dominicus Lazzarinius vir magni nominis in republica litterarum, qui cathedram, quam eloquentiae appellant, Patavii magna cum laude tenebat, obiisset, viri nobiles Veneti,

ad quos ea cura pertinebat, Muratorium ei subrogare exoptassent. Nihil enim huic a natura denegatum, nihil non a doctrina delatum existimabant. Itaque curarunt, ut Apostolus Zenus amantissimus Muratorii id negotii susciperet, eamque tenuerunt rationem, ut nihil honorificentius docto cuilibet homini potuisset accidere. Etenim de mandato ipsorum scribebat Muratorio Zenus, eum votis omnium ad illud munus expeti; nihil ab eo petendum, at amico tantummodo significandum, se se munus a Magistratu oblatum haud recusaturum; eas fore conditiones, ut neque ad honorem, neque ad utilitatem quidquam ei gratius esse posset. In spem venerat Zenus fore, ut Maratorius annueret, quod ea temporum conditio erat etiam Mutinae, ut quietem litteratis hominibus, quam quod maxime gratam esset amori patriae facile praelaturus. Verumenimvero etiam inter arma litteris locus apud Muratorium esse poterat, qui gratis Zeno ac nobilibus illis viris de more actis ab Estensi bibliotheca se se divelli minime passus est. Cum vero Cardinalis Prosper Lamber-

tinus ad summi Pontificatus apicem XIV. Kal. Septembris anni MDCCXL. sub nomine Benedicti XVI. fuisset evectus, quid non ab eo vetere amicitia & familiaritate sibi conjuncto sperare potuisset noster? Ea quidem amicitia jam anno MDCCXXVIII. ortum habuerat, ex quo tempore Lambertinius litteras ad Muratorium saepe dedit cum gravissimis verbis & sententiis perscriptas, tum rebus ipsis & studiis in eum officiisque gratissimas. Prima quidem epistola XV. Kalen. Novembris an. MDCCXXVIII. affirmat Lambertinius, sua quidem sententia, Muratorium inter universos Italiae homines litteris deditos omnino principem habendum esse; id se se Romae coram gravissimis viris saepe numero pronunciasse, nunc vero, cum typis nonnulla esset editurus cum sibi optare atque seligere, in cujus aures omnia descenderent, sapientem & aequum judicem quin & emendatorem. Alia quidem epistola pridie Nonas Junii anno MDCCXXXIX. Lambertinius ei se se amicissimum esse confirmat, & eundem a se se coli, ut verum atque unicum Italiae nostrae decus. Alia

consonant his, quae apud Solium videre potes. Neque solum epistolis quanti faceret Muratorium Lambertinius testari voluit, sed & omnibus officii ac benevolentiae significationibus. Cum ab Anconitana ad Bononiensem Ecclesiam fuisset evectus, ad villam prope Mutinam amicissimi sui Marchionis Ursii, cui tanta erat cum Muratorio necessitudo, conferre se se voluit per autumnum an. MDCCXXXI. quo Muratorium etiam de facie nosceret, ejusque colloquio perfrueretur. Triduo ibi cum Ursio ac Muratorio versatus est, quo tempore quae dederit in hunc amoris indicia significari vix potest. Idem Lambertinius anno MDCCXXXII. praestitit, atque omnibus praestare voluisset annis, nisi acerbissima Ursii mors interceisset. Pontifex autem factus nunquam oblitus est Muratorii, quin & saepius de illo cum doctioribus familiaribus libentissime verba faciebat. Si quid in lucem edebat novi, edidit autem etiam Pontifex plura, eademque doctrinae plenissima, vel si quid elegantioribus typis imprimi denuo jubebat, ad Muratorium illico mittebat eorum librorum exempla. lis

vero, cum mitteret, uti solebat verbis, ut duplicem fructum caperet Muratorius, ac sibi in comparatione difficilem ad judicandum, amorem ne erga se tanti Pontificis, an gravissimum de sua doctrina iudicium pluris aestimandum putaret. Saepius etiam, praecipue per Cardinalem Tamburinium de maximis rebus ad sacram doctrinam disciplinamve spectantibus eundem consuluit; saepius etiam e tanto fastigio litteras ad eum & ipse dedit, quarum exempla apud diligentissimum Solium videre potes. Mihi pauca quaedam commemorare sufficiat ex epistola XII. Kal. Novembris an. MDCCXLIV. ad eum data, cum ei gratias agenti propter libros sibi missos *de Canonizatione Sanctorum* humanissime respondere voluisset. Illum enim & plurimi semper aestimatum ac dilectum a se fuisse, quemadmodum & aestimari & diligere affirmat; cum & *bonus ille sit Sacerdos & in rebus ad litteras pertinentibus Italiae sit decus*. Ei enim deberi dicit, quod Italia non modo aequet, sed etiam superet caeteras Europae partes, quae nimis arroganter suos tantummodo sapere ja-

Abant; quin & cum quaedam de suis inter tot curas orbis sibi commissi studiis verba fecisset, addit ad extremum se se id eo fecisse, *ut bono magistro studiorum suorum rationem aperiret.* [Suis autem in libris & Cardinalis & Pontifex Summus nunquam nisi honoris causa Mutatorium appellavit; quin & iis extulit laudibus, ut in omni ferme re primas eidem deferre videretur. Neque vero in verbis dumtaxat constitit Benedicti in Muratorium amor, at quidquid unquam hujus nomine rogatum est statim ille concessit. Nihil enimvero aut ad suam dignitatem augendam, aut ad divitias exaggrandas ab eo Muratorius petiit, sed ea ferre, quae vel Parochorum Mutinensium decori, vel amicorum commodis, vel aliorum aeternae saluti conducere videbantur. Eandem ille modestiam semper prae se tulit, cum unus factus est ex familiarissimis atque intimis Raynaldi I. posteaque Francisci III. Mutinensium Ducis. Ii tamen ad eum orandum, ejusque vel rem familiarem vel dignitatem amplificandam non levia beneficia contulerunt, quantique facerent tantum

virum non modo litteris ad eum datis, sed & aliis habitis honoribus non semel demonstrarunt. Praecipue Franciscus, qui fuerat in philosophia, quae pertinet ad mores, a nostro institutus, litteratosque homines magno semper habere visus est in pretio, non semel quid Muratorio tribueret palam ostendit. Sed & Fridericus Regius Poloniae, nec non Electoralis, ut vocant, Saxiae Princeps cum anno MDCCXXXIX. per tres dies Mutinae substitisset, & in colloquium ejus quotidie venire voluit, & aureo numismate discedens eundem donavit. Verum id fortasse levius. Anno MDCCXLII. Marchio de Ormea, qui tantum apud Sardorum Regem vel auctoritate vel gratia poterat, Muratorium facpius humanissimis litteris invitavit, ut se se Augustam Taurinorum conferret honorifico ibi muneri praeficiendus. Ingens autem offerebat stipendium & omnia tum urbis tum ruris commoda atque delicias; quibus ille se se in suo nido mediocritate sua contentum emori velle constanter respondit. Hoc quidem in loco memorandum est, quod etiam alibi dicturi sumus, Muratorium ab ipso Re-

ge Sardorum Carolo Emmanuele III. magno semper in pretio fuisse habitum, illudque addendum, tantum Regem, cum eodem anno MDCCXLII. suis & Austriacis armis Mutinensem occupasset ditionem, saepius Muratorium colloqui voluisse. Ipse Rex, cum aliquando in Muratorium extra Mutinae muros incidisset, non solum amicissime valere iussit, sed ut ad se rediret suismet ipse verbis invitavit, ac nunquam omisit, quin eidem pluribus rationibus quanti faceret ejus doctrinam, coram omnibus ostenderet, quae quidem gratia usus non est Muratorius, nisi ad domini sui patriaeque utilitates in eo gravissimo bello procurandas. Nimirum duo dumtaxat Muratorio cordi fuisse videntur, ut & ea ratione vitam traduceret, qua Catholicum deceret Sacerdotem, & quantum posset in optimis artibus disciplinisque proficeret. At Sacerdotes & Parochos optimos, qui omnem suae vitae rationem ad Evangelii normam componerent, omnis tulit aetas: homines autem ipsi doctrina similes & omnino paucae tulerunt & paucos. Sane vidimus Benedicti XIV. fuisse judicium, ne-

minem iis temporibus in Italia potuisse cum nostro verae germanaeque doctrinae gloria comparari; Maffei quoque fuit * & aliorum hominum, quibus ea de re sententiam quasi jure suo ferre licuisset. At si quis & Benedictum & eos, de quibus loquimur, amicitiae fortasse quidpiam tribuentes modum in iis laudibus aliquantulum excessisse velit, praesertim quod Marchio Scipio Maffejus tantum litterarię reipublicae praesidium ac decus, eadem vivebat aetate, non equidem magnopere repugnabo. Ille tamen mihi concedat necesse est, Muratorium sin minus omnino principem, unum certe ex principibus fuisse viris, qui vel hac vel retroactis aetatibus & Italiae ornameto & litteris ipsis emolumento fuerint. Possem hoc loco, si vellem, plurimos in hanc rem ex omnibus gentibus doctissimos homines attestari, qui de Muratorii scientia praeclare senserint, & ejus amicitiam sibi concupie-

* Vide ejus epistolam ad Muratorium apud So-
lum Viri, del Muratori Cap. XV.

rint, ac per epistolas de gravissimis rebus non raro consuluerint. Possem de nobilissimis viris instituere sermonem, qui per Italiam iter facientes Mutinae substiterunt, ut cum eo jungerent amicitiam, ejusque colloquio perfruerentur. Possem etiam de pluribus loqui coetibus doctorum hominum, quos Academicarum nomine decorare consuevimus, qui Muratorium habere socium ultro exoptarunt; quin & honoribus fere inu-
sitatis prosequuti sunt; ex quibus Regia Londinensis Academia ipsum Italum hominem Sacerdotemque Catholicum, quod iis temporibus magis quam nostris mirum videri poterat, suos inter socios cooptavit; Albrizziana Societas Venetiis in ejusdem decus anno MDCCXXIX. argenteum numisma cudi jussit, & Columbaria Florentiae ipse adhuc viventis dedicavit imaginem; possem & bene multos appellare, qui cum ederent libros, eum ipsis patronum exoptarunt, eosdem illi inscribentes, quae fufius a Solio omnia commemorantur. At vel utilitatis nihil vel jucunditatis parum ea mihi habere videretur oratio, cum temporibus, quae

ista scribimus, nemo qui litteratus aut esse aut haberi velit, non facile assentietur idem fere Muratorii esse nomen ac politioris eruditionis atque doctrinae. Ut vero tantus evaderet noster contulit sine dubio acerrima quaedam ingenii vis, mensque diviniore ad veritatis inquisitionem omnino facta: qua quidem ille res, de quibus aliquid esset sibi scribendum, ita complectebatur animo, ut nunquam necesse habuerit, siue rerum, quam vocant sylvam, rerumque molem indigestam in adversaria conferre, quam postea limae labor ac mora perpoliret, siue uni tantum vacare argumento, cum potius eodem tempore duobus aut etiam pluribus elaborandis operibus invigilaret: contulit incredibilis quaedam memoria, qua quidquid legerat, (quis autem plus illo legerat?) ita mente custodiebat, ut ipsum *bibliothecam viventem* appellare, nisi fuisset ea formula per optimum sane judicem reprehensa, fortasse animus ferret: qua quidem de re litteris mandatum accepimus, numeros ipsos & annorum notas, si quidem eas vel semel in aliquo libro perlegisset, mente ita tennisse,

ut etiam cum libros ille conscriberet, ad fontem recurrendi necessitatem plerumque minime passus fuerit. Verumenimvero contulit etiam assiduus labor, quo litteris ita vacavit, ut equidem nesciam, an post hominum memoriam aliquis Muratorium diligentia vicerit, aut etiam aequaverit. Quo liberalissimis hisce studiis navaret operam, non modo noxiis a voluptatibus per omne tempus aetatis abhorruit, sed ab aliis quoque temperavit honesto quovis homine dignis. Aliquando mane veniebat ad amicos ut ab iis resciret, quid in terrarum orbe gereretur; unius horae spatio, vel certe paullo majore, animi seu potius valetudinis causa cum Julio Marefcottio viro nobili Mutinensi amicissimo suo, quandoque cum aliis etiam aut per urbem aut extra urbis moenia vespere deambulabat. Per ver & per autumnum rusticari consueverat, ita tamen ut nunquam libris nuncium mitteret, sine quibus ne vitam quidem existimasset aliquid habere jucunditatis. Haec unica erant a gravissimis animi corporisque laboribus Muratorio solatia. Nunquam convivii nisi pla-

ne invitus atque ut aliis morem gereret, interfuit, nunquam aut somno indulſit, aut vinis, aut cibis. Multo ante ſolis ortum etiam hieme ſurgebat mane; quin & ſi quando, cum in lectulo eſſet, non ita cito ſomnum eſſe capturus ſibi videbatur, inutilem eam temporis jaſturam ratus, ſe ſe veſtibus induebat & conferebat ad libros. At ne res omnino minutas & exiguas, quod fortasſe quibuſdam vitarum clarorum hominum ſcriptoribus poteſt vitio dari, perſequi videar, omnia complectar, ſi Muratorium ferme duodenas horas quotidie, niſi cum neceſſariis, praefertim Parochum agens, interpellabatur curis, tribuiſſe litteris dixerō. Ea quidem ille honeſtiſſima ratione vitam agens ad ſummam pervenit ſeneſtutem. Sed jam lectorem ego meum nimis fortasſe moror, quid tandem ſcripſerit Muratorius & quid ad litterarum incrementum ille praefiterit, ſcire cupientem. Mihi quidem videor ipſi Lectori multo magis eſſe ſatisfactorius, ſi non temporum, quibus ille ſcripſit, niſi cum id commodiſſime fieri ex aliqua parte poſſit, verum ipſarum ordinem rerum teneam ac-

curatius. Itaque de singulis agam disciplinis, quas quidem Muratorius excoluit ac de libris ad singulas pertinentibus; quo loco etiam, ne saepius iisdem de rebus occurrat oratio, quos ii libri, saltem dum vixit Muratorius, oppugnatores habuerint, quarumque controversiarum ipsi cum claris aut certe famosis hominibus, occasionem praeberint, enarrabo. Antea tamen mihi visum est de *Republica Litterarum* verba facere; de qua constituenda plures per annos cum summis viris egit, quod & disciplinas omnes illa respublica complecti debuerit ingenuo doctoque homine dignas; & de universis differendi disciplinis, easdemque sapientissimis omnino monitis instruendi opportunitatem Muratorio tribuerit. Itaque Muratorius aetatis hujus initio, cum a Gallis Mutina teneretur, nec fortasse, quantam voluisset, codicibus antiquis operam dare posset, plura secum animo volvit de republica seu societate doctorum hominum in Italia constituenda, quae litterarum incremento studeret ac gloriae. Ut quidquid ea de re commentatus erat, omnibus notum faceret

sub Lamindi Pritanii nomine latere voluit. Scripta vero sua edenda curabat per Bernardum Trevisanum Venetum Patritium, doctrinae gloria florentem, ac sibi multis iustissimisque de causis amicissimum. At principio quidem ipsi Trevisanio ignotus esse voluit. Itaque litteras ad eum dabat sub Antonii Lampridii nomine, qui Bononiam incoleret. In ea urbe Franciscus Bottazonius, vir editis in Ursii defensionem libris doctos inter homines & ipse doctrinae laude praestans, cum totius rei conscius esset, epistolas recipiebat, ac Mutinam aut Venetias mittebat ultro citroque datas. Liber Lamindi Pritanii, qui primum Venetiis opera Bernardi Trevisanii prodijt anno MDCCIII. de primis erat ejus Reipublicae quasi lineamentis *. Fingit in eo Muratorius consilium de hujusmodi Republica constituenda dudum fuisse doctos inter homines initum, ac se

* *I primi disegni della Repubblica letteraria d'Italia rubati al segreto, e donati alla curiosità degli altri eruditi da Lamindo Pritanio. Melior fortuna sequetur. In Napoli (Venezia) 1703. in 8. di pag. 96.*

publici juris ea facere, quae jam in manus doctorum plurium iis assentientium privato studio descripta pervenerant. Ergo cum de Academiis, ut vulgo dicuntur, in Italia usitatis, at exiguo cum fructu litterarum, verba fecisset, & qua ratione reformari possent ostendisset, de qua tamen re omnino desperare videtur; Rempublicam constituendam vult esse foedus praecipuorum hominum cujusvis conditionis aut gradus quamlibet liberalem artem aut scientiam profitentium. Multos nominatim profert eruditos viros, qui jam huic foederi componendo consenserint. Eam vero Rempublicam nulli certo Italiae loco assignat, sed ex provinciis omnino quinque coalescere debere statuit; *Regia* nempe Neapolis ac Siciliae regna complectente, *Pontificia*, *Etrusca*, *Veneta* ac *Longobarda*: formam regiminis Aristocraticam esse debere; qui magnum sibi libris editis aut edendis aut alia ratione doctrinae nomen gloriamque pepererint, *Arcontes* in ea dicendos, & *clarissimorum* etiam appellatione decorandos: magistratus autem efforman-

dos;

dos, ex primo Arconte, quinque Consiliariis, Censoribus duobus & homine uno, qui sit a secretis: horum omnium munus ad triennium esse producendum: primum autem Arcontem ex quinque provinciis esse eligendum hoc statuto, ut ex tribus aliorum Arcontum partibus duae saltem in eligendum consentiant: ab illo autem Arconte alium, qui sit a secretis, esse renunciandum. Haec de primis Magistratibus, quorum omnium munera designat, multasque proponit leges ad reipublicae bonum non leviter facientes. At sub ordine Arcontum duos alios dicit instituendos; unum ex hominibus, qui litteris appime faveant, at pluribus de causis impediti non possint, ut vellent, multum operae in easdem impendere: alterum ex juvenibus acri praeditis ingenio, studioque deditis, qui magnam excitent expectationem sui, quos *Candidatos* appellari posse dicit: & ex iis aliquando Arcontes deligendos fore. Deinde de fine copiose disputat ipsi reipublicae proposito, hoc est de litteris qua repurgandis, qua perpoliendis ac perficiendis; quo loco optima proponit explicatque praecepta de sin-

gulis disciplinis & artibus verba faciens, ut non modo in nulla ex illis eum rudem fuisse videas aut hospitem, sed quam emunctas habuerit nares prudensque iudicium, facile colligas. Sed quoniam honos alit artes, jacentque ea semper, quae magnis patrociniis haud sustentantur, principes Italiae viros, Clementem XI. Pontificem Maximum, Venetam Rempublicam, Cosmum III. magnum Etruriae Ducem, Raynaldum I. Mutinensium, ac Franciscum I. Parmensium Duces ejus reipublicae *perpetuos Protectores* vult esse appellandos, ex iis unum per tres annos *Magni Protectoris* nomine decorandum, & caput reipublicae futurum; quod munus deinde in singulos alios ex ordine transferatur. Vult etiam a primo Arconte Arconti alii committendum, ut reipublicae contexat historiam, de libris sociorum differat, qui in lucem deinceps emittantur, vitam eorundem describat, quae tamen non debeat nisi post illorum mortem edi: historiam vero post tertium quemlibet annum imprimendam: ad primum Arcontem referri oportere, si quis novum aliquid in aliqua sive arte sive scien-

tia excogitaverit, de quo tamen ipse librum conscribere aut per otium non possit aut nolit; & ad eum pertinere, ut alii, quem magis idoneum judicet, ejus rei perfectionem committat. Praeterea de Academiis, de hominum sacris ordinibus addictorum scholis, de publicis gymnasiis reformandis, de typis dirigendis, de condendis ephemeridibus litterariis multa scribit a sua republica curanda, quæ sine dubio in magnam bonarum artium gloriam conducere viderentur. Alia omittimus. quæ de concordia præcipit inter socios servanda, de satyris interdicendis ac ceteris, ut brevitati serviamus. Cum libellus, de quo loquuti sumus hætenus, omnino publici juris factus est, quod non ante annum MDCCIV. accidit, magnus de illo per omnem Italiam rumor extitit, ac variae fuerunt hominum discrepantesque sententiae. Quis ille Pritanius esset, plurimi coeperunt curiosius inquirere, neque tamen unquam ea de re certiores per ea tempora fieri potuerunt. Nonnulli Bernardum ipsum Trevisanum sub eo nomine latere putarunt, quos inter fuit Apostolus Zenus, ac demum

Actorum Lipsiensium auctores. Aliqui saltem illum esse totius negotii participem, & scriptis ad eam rempublicam pertinentibus & imprimendis & evulgandis operam dare collegerunt: quibus auditis, ille multo cautius in posterum esse sibi agendum duxit. Nemo quidquam de Muratorio suspicatus est. Hinc plures ad eum docti homines dedere litteras, ut ipsius de tota re sententiam exquirerent: quibus universis ita respondebat, ut iis aut animos adderet, aut eos confirmaret aut hortaretur, ut operam rei navarent magno Italiae decori ac bono futurae. Sed quod pertinet ad rem ipsam, hujusmodi reipublicae constituendae fuisse consilium revera initum, doctis hominibus bene multis, praecipue Neapolitanis persuasum est. Aliqui auctoris institutum collaudarunt, litterasque juvandi desiderium. Aliqui de eo palam obloquuti sunt, ac plurima in eo libello reprehensione dignissima se se deprehendisse clamarunt. Inter cetera vituperabant, quod humanae gloriae consecutionem a Lamindo reipublicae suae finem proponi crederent; quod in Arcontum indice plures omissi fue-

rint eo honore digni, plures etiam descripti, qui minus digni viderentur, quod ipsa nomina Arcontum & Candidatorum puerilia viderentur, qualia quae in scholis ad adolescentum aemulationem excitandam adhibentur: demum quod perperam ille finxisset, plures homines doctos sua cogitata probavisse, cum de iis nihil omnino sciverint. At majorem Pritanio creavit invidiam, quod post eum libellum *Epistola* missa fuerit ad omnes aut saltem celebriores Italiae Arcontes, in qua praeter cetera ii rogabantur, ut sententias quisque suas de nova republica mandaret litteris, ac Francisco Blanchinio tum dignitate tum doctrinae gloria in Aula Romana florenti significaret, qui nascentis ipsius reipublicae veluti custos esset. Hic enim totam eam rem accepit in malam partem, ac pluribus epistolis ad amicos huiusmodi onus suscipere se se velle aut posse negavit. Hinc igitur in Pritanium querela mota est, quod tam difficile munus gravissimo viro, non obtenta facultate, imo ne explorata quidem ejus voluntate, commiserit. Cum id rescisset Muratorius, neque ta-

men se rescisse ostenderet, suomet ipse nomine litteras ad Blanchinium dare ausus est, ut quid de republica illa Pritanii constituenta opinaretur, eidem communicaret, eundemque ad pulcherrimum institutum sua quoque opera juvandum hortaretur. Scripserunt etiam ea de re Blanchinio tum Marchio Ursus, tum Abbas Bacchinius, doctissimi gravissimique homines. Iis omnibus anno MDCCV. ita respondit Blanchinius, ut omnem, quam forte conceperant, de illo in suas partes pertrahendo spem prorsus ademerit*. Per idem fere tempus aliquot Itali doctrina praestantes, qui constitui Pritanii rempublicam omnino voluissent, id moliebantur, ut quoniam Blanchinius nollet, alius designaretur, qui *Custodis*, quod dicebamus, munus libenti animo susciperet. Neapoli vir doctus ad Bernardum Trevisanium scripsit; quoniam Summus Pontifex, nec non Maurocenus Venetorum Romae Legatus, aliique viri prin-

* Epistolam hac de re Blanchinii ad Muratorium legere potes apud Solium: *Vita del Muratori Append. Num. III.*

cipes in Italia constituendae reipublicae fa-
vebant, tentandum esse, an Joannes Maria
Lancisus Summi Pontificis Archiater littera-
rum gloria celeberrimus se se *Custodem Ar-*
contem renunciari fineret *. Alii docti viri
primo Lancisium ipsum, deinde Dominicum
Passioneum ac Justum Fontaninium propone-
bant. Hi duo postremi Lancisium eo demum
impulerunt, ut demandatam a Lamindo Pri-
tanio provinciam pro suo in litteras amore
fisciperet; quod statim universis per Italiam
Arcontibus nunciatum est. Quamvis autem
ex Blanchinii litteris atque sermonibus foe-
dus a Lamindo nunciatum esse commenti-
tium multi suspicarentur, de die in diem
crescebat eorum numerus, qui rem ipsam at-
que consilium summopere collaudarent; quin
& plures, qui nondum Arcontum nomine
insigniti fuerant, ut insignirentur, ope ami-
corum a Trevisanio contendebant. At Mu-
ratorius cum Blanchinio vidisset menda-
cium suum, quamvis nemini noxium, quin

* Vide epistolam ap. Solium in Append. Num. V.

& mendacii nomine non omnino dignum; summopere displicuisse, cogitare coepit, satius ad litterarum incrementum fore, si quidquid ipse finxerat, aperiret, ac sine ulla quamvis levissima specie fraudis consilium suum de doctis hominibus, quantum fieri posset, in unam societatem conjungendis promoveret. Aliam eo rationem accessisse scribit Solius; quod nempé vidisset Muratorius jam sibi non esse integrum ut impediret, quominus iis, quae mittebat ad Bernardum Trevisanum imprimenda, scriptis aliqua ille demeret, aliqua adderet, aut immutaret. Id autem novissime acciderat in chartis quibusdam ad idem reipublicae institutum spectantibus impressis, non sine doctorum quorundam hominum ipsiusque Lamindi Pritanii querela. Quamobrem Trevisanius eas chartas deinde suppressere conatus est, ut eas invenire postmodum valde difficile fuerit. Continebant eae quatuor epistolas aliorum nomine a Muratorio scriptas, unam Trevisanii, novorum Arcontum indicem, & nescio quos Italicos versus. Omnia autem eo collimabant, ut qui reipu-

blicae nomen dederant, confirmarentur, & aliorum, si fieri posset, animi accenderentur ac voluntates. Jam vero hisce de causis non amplius quidquam esse sibi fingendum de toto litterariae reipublicae negotio ratus est Pritanius. Hinc aliam edidit ipsius Trevifanii, quamvis inviti, opera longam eandemque modestissimam epistolam, ut omni se se invidia liberaret. Probabiliter ad omnia respondet, de quibus accusabatur. Causas aperit, propter quas illa finxerit de litteratis hominibus, qui suae reipublicae nomen dederint. Quod gravius videbatur, rationem affert, quamobrem magni nominis dignitatisque virum inconsultum designaverit, ad quem spectaverit hominum eruditorum de novae reipublicae instituto suffragia Romae potissimum, hoc est in urbe, ut ille ait, omnium eruditissima, colligere. Valde Muratorio displicuit, quod huic etiam epistolae Trevifanius de suo quaedam inseruisset cum reliquis manifeste pugnantia. Et ea quidem a Trevifanio addita nonnullis etiam Italae litteratis viris movere stomachum, perinde ac si Pritanius, quo tempore magis

videri volebat ingenuus ac modestus, non sine aliquo gravissimorum virorum contemptu confidentissime luderet. Hinc Muratorius omnino vetuit Trevisanio, ne duas alias typis vulgandas curaret epistolas eidem ea de causa dudum submissas, quarum altera ad Clementem XI. inscribatur, altera ad universos, *quocumque demum appellatos nomine, qui religiosis ordinibus in Italia praesident*. Postrema haec epistola, quam librum verius fortasse dixeris, quod non sit ita brevis, ut epistolae modus ferre solet, post Muratorii obitum in *appendice* ad ejus *Vitam* a Solio conscriptam, quam saepe laudavimus, primo lucem vidit *; quae quidem in re doctissimi ac diligentissimi viri consilium omnino probo. Nihil enim ea gravius, nihil doctius, nihil ad eorum, qui sacris ordinibus dedere nomen, animos scientiae cujusvis amore inflammandos opportunius excogitari aut litteris consignari potuisset. Quod utinam assidue illam haberent in manibus, at multo magis infixa gererent animis sa-

* In Append. Num. VII.

pientissima, quæ abundat, monita homines
 aliquot ex iis, quos Pritanius alloquitur!
 Næ illi multo melius & ordinibus, quibus
 præfunt, aut quorum membra existunt, &
 sui nominis gloriæ, quin & universæ Chri-
 stianorum reipublicæ consulerent. Neque
 enim huic quandoque magno ac vix feren-
 do, ut sunt, essent oneri, sed & ornamen-
 to non levi, ut esse deberent, & certissimæ
 utilitati. Sed illuc redeamus, unde digressi
 sumus. Epistola, quam diximus dudum Tre-
 visani curis impressam, anno MDCCV. edi-
 ta est. Ex eo ferme tempore de Muratorii
 republica, non secus ac de aliis Platonis,
 aut Felenonii, vel de foedere Abbatis S.
 Petri transactum esse videbatur. Ludere vo-
 luisset in hoc toto negotio Muratorium, si-
 mulque litterarum amorem in Italiam excitare
 scribit Solius. Alterum equidem vereor ut
 ita sit; de altero nullus dubito. Sane con-
 secutis annis ea scripsit Ludovicus Antonius,
 quæ cum ad litterarum incrementum vel
 maxime conducere, tum etiam non esse
 in eo prorsus extinctam spem, aut certe
 desiderium tam præclari foederis doctos in-

ter homines componendi manifeste declarant. Huc enim sine dubio facit aureus ille Muratorii liber, *cogitata de sano in disciplinis atque artibus sensu complexus* *, scriptus Italice, cujus *primam partem* Trevisanius Venetiis anno MDCCVIII. emisit in vulgus. Huic libro praemittitur ipsius Bernardi Trevisanii, cui certe sapiens erat exquisitumque iudicium, neque levis in omnibus disciplinis exercitatio, prooemium omnibus numeris absolutum. Agit enim in eo de rebus, ex quibus ille sensus coalescit, generali quadam ratione, quam θεωρητικὴν dixere Graeci, considerato. Liber autem in eo totus est, ut quae natura ipsa magistra facile discimus, in morem usumque convertat atque derivet. Ceterum cum prior haec libri, de quo loquimur, pars vulgata est, plures litterati homines Trevisanio, non secus ac si totius fuisset auctor ac parens, gratulabantur; quod ille genus officii mini-

* *Riflessioni sopra il buon Gusto intorno le scienze e le arti di Lamindo Prisanio. In Venezia 1708.*

me respuere videbatur. In ea fuerunt etiam opinione Lipsiensium Actorum scriptores ad annum MDCCXV.* Sed ne ipse quidem Trevisanius, quis Pritanius esset, adhuc noverat. Se se manifestavit ei Muratorius sub initium anni MDCCIX. cum alteram partem ipsi submitteret ejusdem libri Venetis typis imprimendam, priorique jungendam. Humanissimis litteris ei Trevisanius respondit, eidemque se jus omne atque officium amicitiae, tum quae cum Lampridio, tum quae cum Muratorio intercesserat, semper esse praestiturum significavit. Nescio tamen quae de causa scriptis iis a Muratorio transmissis evulgandis operam dare noluit, quin &, ne Venetiis aliorum curis evulgarentur, omnino prohibuit. Hinc enim vero factum est, ut ea pars altera non pervenerit in manus hominum ante annum MDCCXV. quo Blasius Majolius de Avitabile vir litteris apprime deditus a Muratorio impetratam typis per Benedictum Marcum Benaudium Neapoli, quamvis Coloniae nomen praetexere-

* *Ved. Tom. VI. Suppl. p. 306.*

tur, simul cum illa, de qua dudum verba fecimus, priore parte, mandari curavit. Totus autem liber praelum saepissime subiit: neque mirum: est enim unum ex optimis Muratorianis. Diximus autem & ipsum ad Pritanii pertinere rempublicam, tum quod illi priori parti novus index subiectus fuerit Arcontum Italiae primo illo valde numerosior; tum quod primo capite quidquid erat de republica eadem propositum ab iis, quae contra opponebantur, studiose vindicatur. Multos ex doctissimis Italis ea probavisse dicit, nec dubitare, quominus auctoritatem illi nomenque suum impertirentur: principes quoque viros ea de re interpellatos spondidisse, eam se se protecturos esse ac promoturos. Tum ea summoveere conatur, quae ingenia quaedam fortasse timidiora impedire videbantur, ne quod propositum fuerat amplecterentur. Hinc aperit sibi viam, ut doceat, quid ab Arcontibus novae reipublicae spectandum sit ad litterarum & disciplinarum omnium incrementum ac decus. At de ipso in rebus ad litteras pertinentibus optimo dijudicandi sensu, quem

Gustum Itali appellant, per universum opus copiose disputat. Duplicem autem eum esse statuit, & eum scilicet, quem *generalem* nuncupat, & ad omnia pertinere genera doctrinarum affirmat, & eum quem *particularem* vocat in singulis disciplinis versatum, neque fines illarum facile praetergressum. De magno ingenio, de prompta memoria, de ardente voluntate agit; quae omnia ad illum sibi comparandum necessario quis debeat asferre. De memoria differens, quam vana sit omnis ejusdem ars patefacit, cum valde facilius sit quae velis recordari, quam iisdem stare praeceptis ac regulis. Tum quibus rationibus possit sanus ille sensus facilius acquiri, quae sint ab ejus consecutione impedientia, persequitur. Mira quaedam de libris habet, qui solent aetate nostra elucubrari. Ephemerides litteratorum, quas magna cum diligentia conscribi ipsi erat in votis, optimis munit institutis, ut vitia, quibus hoc scriptorum genus abundat, eliminentur. Vitia demum plurimorum litteratorum hominum exagitat, oppositasque virtutes commendat. De philosophia ita disse-

rit, ut Aristotilem minime contemnat, sed animum a praejudicatis scholarum opinionibus omnino prae se ferat vacuum, ac recentiorum inventa, mathematicas disciplinas, physicam praecipue experimentis innixam omnino probat. Theologiam vero nollet ille, quod fieri consueverat, in vanis omnino futilibusque versari quaestionibus exile quoddam sequentem atque spinosum disputandi genus. Eam videlicet ad originem suam referri vellet, ut divinarum Scripturarum sanctorumque Patrum sententias magna cum sedulitate perscrutetur, ut hinc ea colligat, quae possunt iis de rebus liquidius judicari. De ceteris disciplinis ita loquitur, ut optimas earum regulas non modo percurfas animo ac prope decantatas habere videretur, sed & nova quaedam de suo protulerit ad eas illustrandas, & ex magistrorum, qui tunc Italorum tenebant aures, vel incertitia, vel nescio qua superstitione vindicandas. Itaque negari non potest, quin etiam nostro non levem illae dignitatis, qua nunc perfruuntur, partem referre debeant acceptam. Quamvis autem, ut ipse post plurimos

mos annos ad Vernejum scribebat, *invidiam subierit apud nonnullos pertinaces adhuc barbaricae methodi sectatores... brevi, iniquis, clamoribus factus est finis*. Demum hoc loco memorandum Lamindi Pritanii laborum fuisse fructum libellum omnino brevem anno MDCCIX. vulgatum, sed tamen ab aequis rerum aestimatoribus non levi habitum in pretio. Inscribitur is *de recte instituenda Juris Academia ad Lamindum Pritanium nobilissimum & eruditissimum virum epistola*. Auctorem ejus principio latentem fuisse Antonium Gattium omnes norunt. Ea non Venetiis, ut fert titulus, at Papiæ impressa est. Scriptor juris prudentiae Doctor fingit se se exterum esse hominem, & fama Lamindi Pritanii ejusdemque reipublicae commotum ipsi scribere, ut quod ille cupierat, quid in Italorum juris prudentia corrigendum sit, aperiat. At ex eo tempore nihil amplius de Pritanii republica litteris est mandatum, quod quidem posteritatis memoria dignius esse videretur. His igitur omissis, de singulis disciplinis, quas quidem excoluit Muratorius, diligentius dicturi, primo quid in poesi po-

tuerit, enarremus. Ille quidem non tam artis poeticae gloria praestitit, quae molitur aliquid & efficit ingeniosius, quam ejus, quae quid faciendum sit sapienter admonet, ac de factis recte dijudicat. Ejus carmina, tum quae in obitu Caroli Mariae Maggii profudit, ejusdemque vitae adjecit, tum quae Gobbius, Crescimbenius, ac demum Lucensis editor collegit, tum quae, Neapolitanis efflagitantibus, anno MDCCXLIII. ac tribus aliis consecutis de Virgine Deipara sine labe concepta publici juris fecit, tum alia etiam ejusmodi sunt, meo quidem judicio, ut neque illa contemnas, neque vero summo opere laudes. Quamobrem cum sine istis coena (absit invidia verbo) duci possit, ac mediocribus esse poetis nemo concedat, non ex hac videlicet parte Ludovicum nostrum vehementer admireris. Illi fortasse tot aliis occupato studiis curisque distento vacuus animus, & ipsa defuit patientior exercitatio: fortasse liberior quaedam atque ferventior vis imaginandi defuit, quamvis alia subtilius intelligendi nunquam sine dubio defuerit. At poeseos criticam, si fas est ita lo-

qui, sic tenuit artem, ut etiamſi non alia ſcientia praefitiſſet, inter eos, qui noſtræ Italiae non levi fuerint ornamento, ſcriptores numerandus merito videretur. Sane Muratorius in libris *de Perfecta Poefi Italica* anno MDCCVI. primum editis permulta attulit, quae nemo ante animadverterat, praecipue ad lyricam poefim pertinentia, de qua non ita multa vel ipſe Ariſtoteles ac reliqui antiquitatis magiſtri tantopere celebrati. Opus autem univerſum in duo volumina, ſingula vero volumina duos diſtribuntur in libros. Quid in iis contineatur, paullo ſuſius exponam, quod nullum opus Muratorianum, ea ſi demas, quae de celeberrimo Voto *Sanguinario* per Theologos nuncupato agunt, aut plures aut aciores adverſarios habuerit; nullum fere tanti nominis viros ex aliqua parte oppugnatores. In primo non pauca eademque prorsus nova proferuntur hiftoriam Italicae poeſeos mirum in modum illuſtrantia. Oſtenditur etiam Gallos, Fontenellium, Boeløjum, Bailletium, quae pertinent ad ipſam, non admodum tenuiſſe. Probat autem Gallicam poefim, quae tantummo-

do post dimidium saeculum XVI. majus aliquid potuit, ex Italica effluisse: falsos ac nimio fuco illitos mentium conceptus post annum MDC. per universam Europam, non minus quam per Italiam, ruptis habenis, fuisse vagatos: Lopium de Vega poetam Hispanum, ex praecipuis tam pravae scribendi rationis propagatoribus unum, ante nostrum equitem Mariium floruisse: hunc autem & per tempus non ita breve, & non sine magna celebritate nominis in media Gallia fuisse versatum. Tum de fine poeseos multa differit, quo loco philosophum agnoscas, quo nemo sit vel auctoritate gravior, vel humanitate politior. Hinc de sano in carminibus dijudicandis sensu (*gustum* diximus ab Italis appellatum) cum de eo quem *sterilem*, tum de eo quem *focundum*, aut quem *generalem*, aut *particularem* vocat; quemadmodum quid sit pulchrum illud & in *materia* positum & in *artificio*, quod poetae sequuntur, studiose disquirat. Putat enim bonum poetam id spectare, ut naturam perficiat, aut verum quaerat certum, aut saltem credibile, quod postremum nomine ve-

rifimilis donat ; opinionem autem improbat multorum ac praecipue Sfortiae Pallavicinii, cum nunquam five mentiendi five fallendi finem poetae bono propositum esse dicat. Hoc etiam in libro quid agat in poesi vis imaginandi, quam *phantasia* appellavere Graeci, ab ingenio per ipsum iudicioque disjuncta, & quid idola vel imagines rerum, tum quas *phantasticas* ille *simplices*, tum quas *artificiales* nuncupat, in poesi praestent, acutius rimatur. Omnia optimorum poetarum exemplis luculentisque rationibus ita declarantur, ut nihil verius, nihil dici possit illustrius. Liber alter primi voluminis, quae sint in poesi partes ingenii, quaeque iudicii considerat ; multa de fucatis illis mentis conceptibus habet cognitu sane praeclara, quemadmodum & de verisimili atque inverisimili, nec non de vitiosis metaphoris aut nimium turgidis cogitandi ac dicendi modis, ac de *florida* etiam, nec non de *matura scribendi ratione*, quae styli nomine venire solet, ac de artificio demum aut *abscondito* aut *manifesto*. Vitia, quae saeculum XVII. infecerunt, non modo exagitantur, sed &

eorum aperiuntur causae. Ut aliquod afferam exemplum,prehendit ipse si formato jam *τροπο*, ad rem subjectam metaphorae id quod pertinet ad propriam suamque transferatur, inde ridiculorum ejusmodi mentium conceptuum fontem existere. Monet idem, si mens supra facultatis, quae res per *φαντασίαν* veluti pictas exhibet, imagines aedificare quid velit, illorum, de quibus loquitur, conceptuum esse certissimam causam. Hoc etiam in libro Galli saepe vapulant, Boeljus, Rapinus, Mambrunus, at praecipue Buhursius, qui suae genti omnia summa tribuentes plurima nostrorum poetarum quamvis egregia, fortasse quod non satis assequantur, reprehendere non verentur. Illud summatim dici ac verissime potest, hoc in libro Muratorium optimis praeceptis & exemplis aperire quid & quatenus deceat, quod esse difficillimum Cicero pronunciavit. Volumen etiam secundum in duos, ut diximus, libros dividitur. In priore libro voluminis hujus primum is agit, quemadmodum in superiore, philosophum, cum velit artis poeticae proprium esse non

tantum ut delectet, quod brevioribus carminibus haud gravate concedit, sed etiam ut juvet. Multa graviter disputat de rationibus, propter quas poesis apud plures homines non in eo sit, in quo deberet esse, pretio, & in usum invehitur poetis omnium aetatum, temporum, civitatum valde familiarem versibus amores canendi suos. Dramata etiam, qualia in theatris exhibentur, vituperat, nec non harmoniam illam, cui necessario debent aptari atque adeo servire. De tragoedia reformanda Italos commonet, nec non de comoediis ipsis, in quibus multa contra bonos mores admitti dicit non solum ab Italis, verum etiam a Gallis. Videtur enim ipsi Molierius studuisse potius ut doceret, quam ut derideret vitia, & ad ea potius allexisse, quam ut contra eadem pugnaret. Ad linguae Italicae laudes dilapsus, quam in *Grammaticalem* & *Vulgarem* dividit ex sententia Dantis, probare nititur ejusdem aetatem auream non fuisse Boccaccii temporibus, at post annum MD. Equitem Salvatium confutare conatus, qui saeculo MCCC. eum honorem tribuendum statuerat,

Florentinis fere universis in ejus opinionem discedentibus. Deinde Buhursium oppugnat, qui suis in Dialogis, ut Gallicam extolleret linguam, Italicam deprimere conatus est iis rationibus, quae non possint nisi risum excitare sapientis; quale illud est de *omotionia*, de *rationibus diminuendi*, quas adhibemus, de *antithesibus* aut *flosculis*, quos amamus. Postremus hujus operis cedro sane linendi liber aliqua celebriorum poetarum carmina sibi proponit aurificis profecto statera non populari trutina examinanda, ut aliquibus justo severior fuisse videatur. At optimi critici partes is agit, & quam recondita & multiplici subtilique arte subactum habuerit ingenium satis ostendit. Hoc opus de *Perfēcta Poesi*, ex quo editum est, magno doctissimi homines habuerunt in pretio, ex quibus Auctores *Ephemeridum Trevulsiensium*, Justum Fontaninium nondum Muratorio inimicum, Alexandrum Guidium, cujus nomen, cum de his rebus agitur, sexcentorum testium instar esse potest, Joannem Josephum Ursum, Joannem Mariam Crescimbenium, Antonium Mariam Salvi-

nium, Theobaldum Cevam commemorabo; nec non Sebastianum Paulium eloquentiae praesertim gloria nobilem, qui Muratorium in hisce libris artis poeticae magistris universis anteferre non dubitavit. Ait enim nullum fuisse hominem, qui hujus artis principia tam longe repetiverit, & ea demum perspicuitate exposuerit atque doctrina omnino singulari. Sed praeter eosdem Trevultientes, qui locos, in quibus de Marini, & in quibus de Cornelio ipsorum ac de Racinio agitur, prorsus injuste reprehenderunt, aliqui extiterunt etiam ex Italis, qui aut multa, quod pauci, aut nonnulla, quod plures, hoc in opere contenta carperent. Aliqui docti viri antiquitatis admiratores tulerunt aegrius, quod Homerum exagitet, quem optimae poeseos tanquam exemplar vetustissimae etiam aetates habuerunt. Aliquibus, praesertim Etruscis, opinio illa multum displicuit de Italica lingua post annum MD. perfecta, quum nemo unquam extiterit, ipsis quidem auctoribus, qui cum Boccaccio comparandus videatur. Aliqui demum riserunt, quod divini cognomen Danti & Ho-

mero invidet, quod Maggio suo tam liberaliter tribuit. Opera etiam aliqua typis commissa contra Muratorium ex eo tempore prodierunt. Ac primo quidem Hiacyntus Vincioli Perusinus Advocatus, edita, ut inscripsit, *Accademica Lectione* *, defensionem suscepit epigrammatis Italici aliqua ex parte a Muratorio improbat. Erat illud Francisci de Beccutis, cui Coppettae agnomen vulgo fuit additum. Inignis hic poeta, meritis etiam a Muratorio laudibus non uno in loco celebratus, ea fortasse defensione minus indiguisset. Acerbiores extiterunt in Muratorium duo Vicentini poetae, Andreas Maranus & Antonius Bergominius, edito dialogo anno MDCCVIII. **, quo se se defenderent. Reprehenderat eos Muratorius, quod & falacia nimis atque inverecunda essent eorum carmina, ac dicendi rationibus ex Graeco aut Latino fonte admodum imperite detortis non illi quidem jacentem, quod

* *Lezione Accademica di Giacinto Vincioli ec.*

** Dialogus hic inscribitur *Eufrazio*. In eo videlicet, ut praefertur, *si discorre di alcuni difetti scoperti nelle opere di due poeti Vicentini ec.*

praeferre videbantur, crexissent poesim, at si plurimos nacti essent discipulos, omnino pessumdedissent. Noluit iis respondere Muratorius. Etenim apud se statuerat, nullis hujus generis controversiis involvi. Ejus tamen partes Nicolaus Amenta & Sebastianus Paulius ita susceperunt, ut Vicentinos impudentiae suae poenitere potuerit. Sed eodem anno MDCCVIII. tres celeberrimi viri, qui certe nisi praejudicatis quibusdam laboravissent opinionibus, de rebus ad poesim pertinentibus ceteros, quasi jure suo, docere potuissent, Joannes Bartholomaeus Casaregius, Joannes Thomas Canevarius & Antonius Thomafius, opus collato studio condiderunt, quo plura Petrarchae carmina, praesertim quae de *oculis Laurae* sunt, non omnino, sed aliqua tantum ex parte per Muratorium improbatu tuerentur. Ita scripserunt ii homines, quemadmodum eos decebat scribere, qui optimis disciplinis ad omnem humanitatem exculti in rebus ad liberalissima studia pertinentibus a gravissimo viro dissentirent. Itaque Muratorius ipse Canevario gratias per epistolam agere non dubitavit. Non tamen idcirco a

sententia discessit, ut ex eo satis apparet; quod *Italica* postmodum *Petrarchae carmina* edens, easdem iis apposuerit *Animadversiones*, ac lectorum suorum iudicio perpendendas reliquerit. Sane qui non sit studio partium addictus, & in omnia interpretum Petrarchae verba cum Etruscis bene multis jurare didicerit, non video qua ratione Muratorio non tandem concesserit, & humilia quaedam esse, & dura, & implexa, nimiaeque tenebris obscuritatis involuta, vel in ipsis illis, quae sunt de oculis Laurae, carminibus immortalitate profecto, quod & Muratorius praedicat, aliunde dignissimis. Praeter illa, quae diximus, alia quaedam Thomafius in Petrarchae defensionem elucubravit. Vir scilicet singulari doctrina praeditus inter nobilissimos aetatis nostrae poetas adnumerandus erga praeclarum illum Italicae poeseos lyricae auctorem & quasi parentem nimio fortasse studio ferebatur. Hinc probandum sibi contra Muratorium & illud sumpsit, optimum ea Petrarchae carmina referre numerum, quae quivis aetate nostra vel mediocriter eruditus ipso aurium iudicio repu-

diaverit. Sane, quod jure mireris, ipse Thomafius nunquam iis Petrarchae versibus ver-
sus ullos effudit fimiles, quod pertinet ad
harmoniam, de qua loquimur, innumeris ex
capitibus ab illo laudatam. Semper enim
non modo elegantia & magnificentia, sed
& ipso numero, qui sine satietate delectet,
lectorum animos atque aures mirifice tenet.
Quamobrem hinc etiam colligas, quo se se
viri quidam litteris dediti abripi sinant con-
tradicens libidine, cum & ea magnis laudi-
bus extollant, in iis quos semel laudandos
defendendosque susceperint, a quibus ipsi
admittendis, aut suis in operibus exprimen-
dis magnopere abhorruissent. Epistolam con-
tra Thomafium omnibus vel eloquentiae vel
doctrinae numeris absolutam scripsit ad Jo-
sephum Mariam fratrem suum Paullus Ber-
nardus Quirinius, cujus etiam non multa
quidem, at elegantissima, legimus carmina:
Eam epistolam in Muratorii defensionem an-
te *primam Theobaldi Cevae Collectionem* inve-
nias. Humanissimus etiam fuit in Murato-
rium Antonius Maria Salvini, vir, si quis
alius, in optimorum scriptorum lectione ver-

fatus, ac multarum tum veterum tum recentiorum cognitione linguarum oppido celebratus. Miserat ad eum hoc opus Muratorius, antequam ederetur, ut siqua in eo vitia deprehenderet, indicare vellet. Morem amico Salvinius gesserat. Cum primum est editum volumen, Salvinius, qui tum rusticabatur, magna quadam illud aviditate perlegit, nec tamen se se cohibere potuit, quin aliqua per otium censoria virga notaret. Sed universa quae scripserat Muratorio misit. Tantum absfuit ut ea re Muratorius offenderetur, ut Salvinium potius rogaverit, ne, quod in priore fecerat, in altero volumine facere gravaretur. Praestitit id etiam Salvinius. Eae sunt *Criticae Animalversiones* Antonii Mariae Salvinii, quae deinde cum libris de *Perfecta Poesi*, curante Sebastiano Paulio, de quo diximus, quin & Muratorio annuente, Venetiis in lucem an. MDCCXXIV. prodierunt. Saepe Muratorium Salvinius laudat, saepe defendit, quamvis aliqua subinde carpat, quae homini Etruscae linguae studiosissimo aut minus eleganter quam cetera, aut etiam non ex Etruscae linguae in-

genio dicta videbantur; nec non aliquibus in locis Muratorii aut nolentis de rebus amatoriiis tam multa scribi, aut quaedam insignium poetarum carmina reprehendentis, aliquam severitatem notet. At pro Etruscis saeculi XIV. scriptoribus & illius aetatis lingua tanquam pro aris ac focis contra Muratorium, modestiae tamen & amicitiae quavis lege servata, pugnat, atque ut Salviatii ceterorumque Florentinorum sententias hac in re tueatur, omnem lapidem movet. Non ejusdem generis ea sunt, quae contra Muratorii opus Blasius Schiavus ex eo pago, qui nuncupatur Este, conscripsit aut edidit. Etenim anno MDCCXXXII. *Praefatio ad Aristotelis Rhetoricen in Etruscum sermonem ab Hannibale Caro conversam* Venetis typis ab illo vulgata est *, additis sub finem *Litteris Francisci Petrarchae ad ipsius Praefationis auctorem* **; quo quidem in libro multis verbis juvenes admonentur, ut si poe-

* *Prefazione alla Rettorica d' Aristotele fatta in lingua Toscana dal Commendatore Annibal Caro.*

** *Lettera prima di M. Francesco Petrarca all' Autore della Prefazione ec.*

tae, nedum Graeci aut Latini, sed tantum Etrusci velint evadere, ne latum quidem unguem a praeceptis Aristotelis audeant discedere; ac multa non modo petulanter & inurbane in Muratorium, sed & contumeliose dicuntur. Eiusdem est furfuris scriptum aliud ejusdem Schiavi nomine anno, qui consequutus est, in lucem editum, in quo Muratorii Etruscum quoddam epigramma non modo carpitur, sed & nulla tanti viri habitatione irridetur*. Eorum tamen libellorum non ipsum Schiavum, qui editioni praefuit, sed Dominicum Lazzarinium Schiavi praepotorem, qui Hannibalis Cari manes a Muratorio in Cattelvetri vita reprehensi voluerit ulscisci, parentem fuisse conjicit Solius. Etenim & Lazzarinus minacibus quibusdam litteris jamdiu Muratorio nunciaverat, se se Cari partes esse suscepturum, & ex ipsa scribendi ratione se se Lazzarinium agnoscere Solius idem scribit. Equidem ex iis, quae

* *Lettere di M. Francesco Petrarca all' A. della prefazione ec. Epigrammatis Muratoriani pro Virgine quadam Deo sacrandi initium erat: Quest' alma, cui per tempo ai santi amori ec,*

quae tam confidenter hic pronunciat, qui avunculi sui sensus universos optime noverat, idem & Muratorio fuisse persuasum facile credo. Quidquid ea de re sit statuendum, quamvis hi libri tantis Muratorium injuriis afficerent, hic silentium, quod sibi semel his de rebus indixerat, perpetuo servavit. Idem Jacobum Martinenghium Placentinum improbavit, quod is anno MDCCXXXIII. *Responsionem* ad postremum Schiavi libellum in lucem emiserit *. Hunc Martinenghii libellum ea causa, quam tutabatur, indignum fuisse idem Solius agnoscit, qui ne lectum quidem a Muratorio fuisse testatur nolente de Schiavi calumniis ex ea lectione edoceri. Joannes Josephus Ursius, qui certe pro Muratorio ita scribere potuisset, ut adversarium quamvis multo sale & aceto perfritum flere cogeret, & insignem tota cantandum Italia exhiberet, cum nequicquam hortatus amicum esset, ad impudentissimi hominis retundendam audaciam contra hunc

Tom. X.

L

* *Risposta al libretto intitolato: Lettere di M. Francesco Petrarca ec.*

arma sumere decreverat. At enim per ea tempora Muratorii familiares ac patroni, quorum plures tum Patavii tum etiam Venetiis erant, a Senatoribus, quibus ea provincia demandata est, privilegium irrogari Schiavo curarunt, ne quid amplius contra Muratorium typis ederet, cum nebulo plusquam C. esse contra Muratorium penes se vulgandas epistolas importunissime gloriaretur. Ursius autem paullo post non sine magno litteratorum totius Italiae hominum moerore e vivis ereptus est. Neque tamen defuere, qui pro Muratorio pugnarent. Ex iis Theobaldum Cevam & Vincentium Cavalluccium commemorare sufficiat. Ipse demum Schiavus ad sanam mentem redire visus est, quin & cum Muratorio palam reconciliari voluit. Impius enim est *Praefatio ad versus Laurae*, quam typographi nomine Muratorio inscripsit. Verum ad poetica Muratorii opera redeamus. Jesuita Buhurius, qui Gallicam ita percallebat grammaticam, ut in minimis maximum; ita parum artem criticam, & alia quaedam, de quibus tamen scribere volebat, noverat, ut, in maximis minimum fortasse non inju-

ria dixeris: hic igitur multa in auctoribus praesertim Italis carpere non dubitabat. In libro illo praesertim, quem de modo recte cogitandi Gallice scripsit, plurima effudit, quae minime cum veritatis norma conveniunt. Id ferens aegrius Joannes Iosephus Ursus, quem saepe laudavimus, Italogrum scriptorum patrocinium a se se suscipiendum esse duxit. Ejus libro respondere conati sunt *Ephemeridum Trevultiensium* scriptores, sed adeo inepta effuderunt, ut Ursi facillimum fuerit, editis anno MDCCVII. *quatuor ad Dacieram* singulari doctrina mulierem *epistolis*, eosdem convincere. His *epistolis* undecim aliae adjectae sunt a praecipuis viris Italis doctrina praestantibus datae, quas inter una fatis longa Muratorii eminet. In ea Muratorius illum Lucani versum defendit.

Victrix causa Diis placuit, sed victa Catoni:

quem Trevultienses contra Ursium scribentes maximae damnaverant impietatis. Alios etiam egregios poetas ab adversariis laudatos etiam pejora de falsis Numinibus scripsisse ostendit: sapientissimos quosque viros quan-

topere illa contempserint, pluribus patefcisse: neque a magistratibus, neque a legibus fuisse interdictum, quominus quid quisque vellet de iis affirmaret: id praecipue Stoicis fuisse concessum, qui sapientem suum Diis ipsis anteferre videbantur: neque vero *Αἰετῆρα* sapere illum *Lucani* versum,

Jupiter est quodcumque vides, quodcumque moveris;

cum aliis in locis homo Stoicus alia per multa eademque praeclara de natura divina litteris mandaverit. Non modo majoris est molis, sed & multo majoris pretii liber, quem ad Italicos *Francisci Petrarchae* versus illustrandos exaravit. In prooemio hujus libri Antonio Rambaldo Comiti Collalti ac Nobili Veneto inscripti rationes aperit consilii sui in carminibus Etruscis *Petrarchae* edendis. Etenim praeter emendatissimam editionem anno MDXL. Venetiis factam, antiquissimorum codicum fidem secutus est, duorum praesertim, qui in *Estensi* bibliotheca servantur; & editionem Romanam *Friderici Ubaldini* anni MDCXLII. multorum ex iisdem carminibus ad *αὐτοῦ γραφὸν* ipsum, quale

in bibliotheca Vaticana asservatur. Differit etiam de epigrammatibus quibusdam Petrar-
chae nondum editis, aut de quibus ipse in
libris *de Perfecta Poesi* mentionem fecerat.
Idem patefacit, quare *Considerationes* Tassoni
cum *Adjunctis & Adnotationibus* Hieronymi
Mutii, quas ex Mutii libro idem Tassonus
excerpserat, iterum ediderit, quamvis illas
Considerationes non esse magni ponderis plu-
ribus in locis ostendat. In fine hujus pro-
oemii eos laudat, qui contra ipsum adorna-
verant *Defensionem trium de oculis cantionum*,
quibus quare nunc minime respondeat, ad-
monet. Deinde vitam subtexit Francisci Pe-
trar-
chae, quod etsi fecerit post auctores o-
mnino XXV. qui eandem fusa descripserant,
negari non potest aliquid etiam novi lecto-
ribus attulisse. Quod attinet ad *Observatio-
nes*, quae vel maxime veniunt in hoc ope-
re considerandae, satis perspicuum est, Mu-
ratorium non easdem exarasse, ut Petrar-
chae gloriam levissima etiam ex parte im-
minueret. Etenim & saepius egregium poe-
tam contra obtretractores defendit, & pluri-
ma, quae in eo eminent, studiose persequi-

tur, ac magnifice laudat. Igitur id tantum sibi ponit ob oculos, ut juvenibus consulat, qui difficile, quae in eo poeta reprehensione digna sunt, agnoscunt, & ex ejusdem auctoritate se se in errores ac vitia abripi sinunt. Quae ipse carpit, sane carpenda sunt, si partium studio seposito, eam sententiam ferre velis, quam res & veritas ipsa ferri patiatur. Quamobrem injuria, quod hic noster contra Petrarcham scripserit, plures praesertim Etrusci succensuerunt. Rationem autem hic etiam sequitur, quam in extremo libro *de Perfecta Poesi* sequutus fuerat, ut post quodlibet carmen judicium exponat suum. De re autem universa ita pronunciat: carminum genus, quod Itali *Sextinas* vocant, tum Petrarchae, tum aliorum quoque veterum tam parum referre boni, ut vix ea legi mereantur; *Cantiones* autem Petrarchae multo pluris esse faciendas, quam ipsius epigrammata, quae *Sonetti* ab Italis nuncupantur, quamvis inter haec quaedam ab ipso Apolline dictata esse videantur. De *Triumphis* etiam sequitur opinionem sapientiorum: esse hos ceteris Petrarchae Ita-

licis versibus omnino deteriores; inventionem esse laudandam summo poeta dignam; pulcherrimas in iis legi descriptiones, partes, affectus, versus; non tamen haec esse carmina, quae summis eundem lyricis vatibus inferuerint. Quae cum ita sint, meo quidem iudicio, sapienter Auctores *Ephemeridum Litterarum Italiae*, cum eas *Observationes* collaudassent, Muratorium inter eos, qui feliciter ad Florentini Horatii carmina illustranda manum admoverint, atque iter adolescentibus ad optimam ipsius imitationem patefecerint, recensendum esse pronunciarunt. Haec de poeticis rebus Muratorius, quibus etiam addere possemus ab eo fuisse conscriptum *Articulum XIII.*, qui est in *Volumine V. Ephemeridum*, quas modo laudavimus, ubi de versibus ac de aliis soluta numeris oratione elucubrat, ac de *Theatro* praesertim Petri Jacobi Martellii tam apte copioseque differitur. Neque vero, quod pertinet ad humaniores litteras, poesim dumtaxat Muratorius excoluit, sed & cetera, quae respiciunt affines disciplinas & eloquentiam, il-

lam praecipue, quae inter scribendum ex-
 ritur. Cum enim satis commodam vocem
 ei natura denegasset, neque multum, quod
 jure in tanta doctrina mireris, ad verba ex
 tempore facienda comparatus esset, bonus
 orator neque esse potuit, neque ut esset ad-
 laboravit; quamvis & quaedam ejus *Oratio*
de spei Christianae virtute, & alia quaedam
 inedita, quae de suggestu dixerat, a doctis
 etiam auditoribus collaudata fuerint. Sed cer-
 te praestantissimam eloquentiae formam ani-
 mo ipsum imbuisse vel ex iis constat sapien-
 tissimis monitis atque praeceptis, quae de il-
 la dedit, cum de optimo in disciplinis at-
 que artibus ageret sensu. Stylus vero illius
 tum in iis quae Latine, tum in iis quae
 scripsit Italice, is meo quidem judicio fuit,
 qui hominis non esse non poterat in pluri-
 mis exarandis maximi momenti libris toto
 vitae suae tempore exercitati. Affert ille qui-
 dem omnino mirabilem quamdam in rebus
 etiam spinosis obscurisve natura perspicuita-
 tem, nec solum a brevitate nimia, sed & a
 morosa omni prolixitate abhorrentem. Nun-

quam tamen Muratorius est habitus ab iis, qui nollent immeritis etiam laudibus eundem ornare, oratione tam limatus atque politus, ut in vitia quaedam haud facile incurrat. Nativam quamdam ille secutus est dicendi rationem ab ornamentis fere omnibus alienam, ut res omni quidem loco, verba tamen haud unquam quaesivisse magnopere videatur. Hinc ille, quanquam a magnis vitiis abest, in iis praesertim quae materno sermone tradidit litteris, non tamen iis refulget virtutibus, quae multo diligentiore operam scriptionemque desiderant. Ceterum, quod pertinet ad libros ejus de litteris humanioribus, primo quidem commemoranda videtur *Dissertatio de linguae Graecae usu & praestantia*, quae tamen ante obitum ejusdem evulgata non fuit. Hanc ille scripsit adolescens anno MDCXCIII. cum sub initium ejusdem anni operam ei linguae navare incoepisset, & ad Gibertum Borromaeum, qui postmodum Ecclesiae Romanae ex Cardinalibus unus, & Novarae Episcopus fuit, misit. Quicumque illam legit, non leviter admiratus est, quod tantam in ea lin-

gua peritiam tam brevi tempore consequutus esset. At sub extremum tempus aetatis cum per hiemem anni MDCCXLIX. opera Joannis Chrysostomi diligentius lectitasset (neque enim eo tempore quidquam scribere per valetudinem potuerat) opusculum condidit *de popularis eloquentiae laudibus*. Hominem ille sumit doctrina liberaliter institutum, & aliquo jam imbutum usu, eundemque docet moderari orationem multitudinis auribus accommodandam, ad oblectandos animos, ad impellendos ad ea probanda, quae non genus sermonis, ut fieri solet in scholis, exile, aridum, concisum ac minutum, sed liquidum ac fusum ac profluens expostulant. Illuc autem rapit lectorem, ubi non seclusa aliqua aquula teneatur, sed unde universum eloquentiae flumen erumpat. Quamquam enim ille non habitavit in hac arte tractanda, ut ii solent, qui se se germanos ejus magistros profitentur, eadem acie mentis, qua tot aliarum viderat vim naturamque rerum, haec quoque aspexisse dicendus est. Hic postremus Muratorii liber post mortem ejus Venetiis, ac demum simul cum u-

niversis ejusdem carminibus ad ea tempora vulgatis in lucem editum fuit. Sed haec omnino pauca, cum de tanto agatur viro. Jam gradatim ad alia veniamus. In rebus pertinentibus ad philosophiam, quae sola, post religionem divinitus traditam, hominibus inter tam crassas inscitiae tenebras constitutis lucem veritatis asferre potest, non insipiens fuisse Muratorio judicium ex pluribus ab eo conscriptis apparet. Quanquam negari haud potest eam philosophiae partem, quae est de natura rerum, non eadem industria, qua ceteras facultates, a Muratorio fuisse cultam, quemadmodum & illud omnino verum est, in mathematicis disciplinis, sine quibus illa vix, aut potius nullo modo stare potest, fuisse nostrum omnino rudem. Verum illam philosophiae partem, quae de moribus aut officiis agit, nec non omnia praecipit, ex quibus evadant homines honestis laude perfecti, ac similiter aliam, quae versatur in differendi ratione, ac veritatis inveniendae modum studiosius inquirat; quin & alia quaedam humanae sapien-

tiae capita libris diligenter conscriptis illustrare conatus est. Opus Muratorii, quod *Philosophia Moralis* appellatur, an. MDCCXXXV. Veronae primum, ac postea saepius in aliis Italiae urbibus typis commissum, non in postremis numerandum est, quae philosophiae partem illam ceteris utilitate ac dignitate praestantissimam exornent. Non ille Aristotelis agit interpretem, non in alicujus jurat verba magistri, quod praeter quam a Montagnio paucisve aliis factum ad ea tempora fuerat, verum philosophandi ratione prorsus nova suaque fretus pulcherrimum ita tractat argumentum, ut vix aliquid magnificentius afferri, vix aliquid possit utilius. Anno autem MDCCXLV. Venetiis librum edidit *de viribus humanae mentis*, quo Pyrrhonis redarguit discipulos. Praecipue tamen evertere nititur quod in libro Petri Danielis Huetii Episcopi Abricensis *de imbecillitate mentis humanae* legerat. Videlicet hic auctor cum libris praeclare scriptis & de nobilissimis quibusque disciplinis & de ipsa Religione Christiana fuisset optime meritus, vertit ad extremum omnia, opusque reliquit, quo

vel philosophiae vel Religionis adversarii non leviter abuterentur. Ponit enim eadem, quae Sextus Empiricus, ut in eo libello ne argumenti quidem aut sententiarum novitatem vel commendare vel admirari possis, neque veretur celebrem hunc Pyrrhonis asseclam totius philosophiae contemptorem laudibus haud sane meritis in caelum extollere. Hoc igitur Huetii opus confutandum sibi Muratorius assumit, quin & majus aliquid molitur. Cum enim celeberrimi hominis vel ipsam auctoritatem, & quam ille sibi peperit doctrinae famam Sceptici soleant nobis opponere, volumen ipsum non genuinum Huetii foetum, sed omnino suppositum fuisse conatur efficere. Ratio autem ejus potissima est, quod hoc opus Gallico sermone conscriptum ipse haberet in manibus, cum Latine fuisse elucubratum accepisset. Verumenimvero Sceptici recentiores saepe memorant utroque sermone fuisse illud ab Huetio elaboratum. Itaque Muratorii ratio nihil aliud melius aut liquidius ostendit, nisi ipsum a libris perlegendis, qui viderentur Christianae Religioni adversari, valde resu-

gere consueſſe. Hoc quidem Solius etiam diſerte narrat, & in magnam putat avunculi gloriam vergere. Id fortaffe poterat non modo ſine nota negligentiae, ſed & cum laude pietatis a doctiſſimis etiam ac religioſiſſimis hominibus fieri, cum nondum ut noſtris uſuvenit temporibus, tanta vis librorum vel ipſa Chriſtianae fidei fundamenta convellentium ex aliis regionibus in Italiam ingruiffet. Nunc enim proſecto vel lectoribus vel cauſae non ſatis bene conſuleret, qui ſcribendum de huiusmodi rebus ultro ſuſciperet, & in iis tamen libris fere hoſpes eſſe vellet. At enim ex aliis quoque libris omnino conſtat, Huetium opus idem & Gallice, & Latine ſcripiſſe. Demum Suazetius Amſtelodamenſis bibliopola Huetii opus ab ejus conſanguineo ſibi miſſum typis vulgavit, praemiſſa (non enim indoctus erat) praefatione, qua ſatis evertit quidquid, ad probandum illud non fuiſſe conſcriptum ab Huerio, dici potuiſſet; monens etiam praeter Latinum exemplar, quod ipſe accurate deſcripſerat, extare alterum in Regia Bibliotheca Pariſienſi deſiſitum; Huetii manum

ibi agnituros, qui eam aliunde noverint. Amstelodamensis haec editio peracta est anno MDCCXXXVIII. Denique Muratorius ipse, cum ejus editionis vidisset librum, agnovit errorem suum, & frustra se se adlaborasse confessus est, ut Huetium ejus perniciosi operis conditi crimine liberaret. Aliud philosophicum Muratorii opus anno MDCCXLVIII. lucem primo Venetiis, vidit. In eo *de viribus illius facultatis, qua quid imaginamur, phantasiae* vulgo nuncupatae, differit. Quorum ea nostrae mentis potentia maiorum esse possit origo demonstrat, & quibus rationibus possumus iisdem occurrere aut mederi malis, sapienter admonet. Primam ego partium harum vero philosopho satis dignam esse non nego, nescio tamen, an omnia vir valde religiosus commemoraverit, quae commemorari potuerant. Neque enim ille, quasdam auctoritates nimium fortasse veritus, Massejo prorsus assentiri voluit, quidquid post Evangelii promulgationem de magicis narratur artibus ubi fraus humana, quod saepissime fit, non interveniat, ipsius *phantasiae* ludis atque mendaciis tribuendum

hujus operis partem plurimum continere utilitatis, quisquis eam perlegerit, facile agnosceret. Ad philosophiam quoque pertinet *scientia medicorum*, cujus aliquam non sine magna laude partem Muratorius attigit; quamvis ea studia viderentur ab iis, quae profitebatur, quam quae maxime aliena. Sed ea pestis, quae anno MDCCXIII. per multas Germaniae provincias debacchata est, quam bovina pestis longe lateque diffusa praecesserat, & quae, cum remittere multum visa esset in iisdem partibus, iterum non minus quam antea ferox extitit, occasionem detulit nostro legendi & in adversaria conferendi quidquid de hoc argumento summi viri litteris consignaverant. Hinc librum facile composuit *de rationibus, quas eo tempore, quo pestis grassatur, tum Magistratus, tum Medici, tum sacri Pastores animarum sequi debeant*. Liber hic a medicis ipsis plurimi factus est. Praefatio praesertim haud ita brevis vehementer ab iis probatur, qui de rebus hisce judicare possunt. Ab anno autem MDCCXIV. saepius, quam alia quaevis opera Muratorii, propter argumenti utilitatem praelum subit.

biit. Factum autem est id etiam in Anglia anno MDCCXXI., iis dumtaxat omiſſis, quae ad *Eccleſiaſticum regimen* ſpectant. Sed ut de ceteris hujus libri editionibus ſileam, omnibus ea Mutinenſis praestare videtur, quam Vigonii fratres ac Joſeph Cairolus anno MDCCXXI. perficiendam curarunt. Etenim ea ſuis locis additamenta quaedam auctoris ipſius habet, nec non *peſtis, quae Maſſiliam depopulata eſt, Narrationem*. Hanc vero collegit Muratorius e medicorum plurium, qui eidem interfuerant, teſtimoniis, ſuiſque animadverſionibus illuſtravit. Peſtis etiam Meſſinenſis effecit, ut pluries hic idem liber vulgaretur. At enim, quod caput eſt, Pa-normitani ejus utilitatem vel maximam experti ſunt, & innumeris laudibus celebrarunt. Iis enim uſi rationibus atque praeceptis, de quibus ſuſe Muratorius ac luculenter agit, tantum malum a ſuis moenibus, quæ imminere videbatur proximis, avertere potuerunt. Verumtamen hic etiam Muratorii liber ſuos habuit adverſarios. Multis id diſplicuit, quod praefertim de Maſſilienſi peſte diſſerens ſtatueræ conatus fuerat, hæc

teterrimum morbi genus e quibusdam esse corpusculis aut effluviis aut atomis , quae cum venefica quadam eademque subtilissima natura polleant , in hominis corpus evolantes magna ferocia humores perturbent , spiritusque conficiant ; ex quibus universa consequantur , quae in ea , de qua diximus , *pestis Massiliensis* narratione describuntur . Itaque Bartholomaeus Corte Mediolanensis medicus *epistolam* (sic enim vocavit) *apologeticam* ad Muratorium ipsum eodem anno MDCCXXI. edidit Mediolani , ut celeberrimi viri Antonii Vallisnerii defenderet opinionem . Ea quidem ferebat , pestem non aliunde existere , quam ab incredibili quadam vermiculorum multitudine , qui per contactum a corpore in corpus facillima ratione transeant . Cum fufius ea de re disputare Ludovicus ab instituto suo fortasse duceret alienum , neque adversario quidquam responderet , illius partes ultro suscepit Carolus Richa medicinae Doctor in Academia Taurinensi sub finem alterius partis *Historiae* , quae *morborum vulgarium* inscribitur , anno MDCCXXII. in lucem editae . Quoniam de rebus agimus

ad medicinae studium pertinentibus, hoc loco memorabimus Joannem Baptistam Davinium, Ducis Mutinae medicum, hortatu Muratorii *Dissertationem* anno MDCCXX. edidisse *de potu vini calidi*, quam ipsi dicavit. Multae adjiciuntur huic libro epistolae ad Muratorium de hoc eodem argumento datae cum alia quadam Auctoris ad Vallisnerium. Sed & inter eas docta Muratorii ejusdem epistola legitur. Philosophiae quidem ut finis praestituitur hominum, quanta maxima possit in hoc esse terrarum orbe, felicitas. Ea re scientia, quae politica vocari solet, ad veri nominis philosophum vel maxime pertinet. Quamobrem & Plato & Aristoteles & Cicero & Seneca & Plutarchus & alii veteres eandem scientiam suis curis, vigiliis atque laboribus dignissimam judicarunt. Eos imitatus noster tria conscripsit opera, quae non levi civitatibus universis emolumento esse possent. Primo quidem an. MDCCVIII. Mutinensibus typis libellum edidit *de ratione pacem inter privatos homines facile conciliandi*. Occasionem autem hujus exarandi libelli ei detulit vir equestriis ordinis, qui praeclaro

munere in patria sua fungebatur pacis inter homines praecipue nobiles componendae. Hic magnam in eo difficultatem experiri se se conquerebatur, quod non raro haud facile statui posset, an ea vera essent, quae ad sui defensionem afferebant, qui exercebant inimicitias; cum facta ne revera fuissent an secus, quae praeferebant illi, non satis constaret. Itaque Muratorius ab eo rogatus, ut aliquam ad id aperiret viam, conscripsit hunc librum, prudentibus monitis omnino plenum. Attamen quantum is ea scientia, de qua loquimur, nec non alia prorsus affini juris legumque praestiterit, ex eo libro, quem *de vitiis ac naevis Juris prudentiae* composuit, luculentius apparet. Ille quidem cum anno MDCCXXVI. a Carolo VI. Romanorum Imperatore non levia benevolentiae accepisset indicia, *Dissertationem* elucubravit illi dicendam *de codice Carolino; sive de novo Legum Codice instituendo*. Hunc tamen libellum non modo ipse non edidit; sed cavuit etiam, ne post mortem suam ab heredibus aut alio quovis ederetur. Nimum enim fortasse ausus fuerat, nimium-

que tentaverat, quod operis titulus ipse declarat. Verumtamen usus est iis, quae ad eum librum condendum collegerat, ad alium Etrusca lingua exarandum, de quo sermonem instituimus. In eo conclusionibus centum nonnulla complectitur, quae correctione in plerisque Tribunalibus digna videbantur, aut in quibus alio quovis modo recentiores (de his enim dumtaxat loquitur] leges quidvis haberent vitii non sine aliquo civium incommodo. Neque vero sibi & ingenio suo iudicioque, cum ista scriberet, quamvis gravissimis atque maximis confusus est noster; sed cum principibus in patria ju-reconsultis omnia contulit, quin & exte-rorum quoque sapientum sententias exquisi-vit. Quamobrem qui temeritatis Muratorium quasi in alienas possessiones irruentem coar-guerunt, eos omnino temere loqui ac sen-tire facillima ratione convincitur. Editus est hic liber primo Venetiis anno MDCCXLII. ac postea saepius tum Venetiis, tum etiam alibi, post mortem quoque Ludovici Antœ-nii nonnullis additis, quae ab eodem au-ctore prodiisse Solius, haud semel a nobis

honoris causa nominatus, testatum reliquit. Quantus, edito libro, inter jureconsultos rumor extiterit, haud facile quisque dixerit. Plures Muratorio assensores erant, verum obtractatores fortasse plures, cum causidicorum praesertim venale genus admodum aegre ferret ea vituperari, ex quibus tot corrogare pecunias tanta cum facilitate consuevit. At hos humaniorum fere litterarum ac politiorum artium expertes quis minime contemnat? Aliqui tamen etiam ex doctioribus scripserunt in Muratorium; ac primo quidem Joannes Antonius Querinius ac deinde Franciscus Amorca de Latamo. Qui dialecticam vel primoribus, ut ajunt, labris attigerit, etsi juris prudentiam ne a primo quidem limine salutaverit, duobus hisce viris facillime respondeat. Laudibus enim pugnant, iisdemque magnificis, quas ei facultati homines impertiti sunt omni tempore. Atqui laudes illae minime prohibent, ut quod humanum opus est, vitiis careat aut naevis. Majoris momenti (vix enim commemoranda esse putamus quae Augustinus Matteuccius oppugnavit) duo viri celebres in Academia

Neapolitana Franciscus Rapolla & Pasqualis Cirillus, qui tamen ita scripserunt, ut maximo in pretio se se habere, quem carpebant, auctorem aperte significarent. Quin & Cirillus diserte praedicavit, Muratorii librum esse dignissimum, ut ab iis, qui reipublicae procuratori praesunt, in manibus habeatur, ac multas ex illo posse in publicum bonum utilitates existere. Ceterum Muratorius hic etiam tenuit morem suum nemini, a quo carperetur, respondendi, nisi forte nomine violatae pietatis & religionis postularetur. Solum ad Franciscum Rapollam, qui suum ei librum miserat, humanissimam, quo proprium tueretur opus, dedit *epistolam* *. In ea Rapollae tum doctrina tum voluntate publicum provehendi bonum collaudata, illum a proposito aberrare modeste admonet. Defendebat enim Rapolla antiquam juris prudentiam ac legum collectionem jussu Caesaris Justiniani peractam. Eam enimvero non ster haud spreverat duas tantum aut tres

* Vid. eam apud Solium edit. Aretinae Append. N. XI.

in illa peculiares leges haud satis probans. Deinde semper illud vitio minime carere convincit, hujusmodi leges esse, ut magnae quae sunt, dissensiones interpretantium, in magnum vergentes incommodum civitatis, non esse non possint. Profecto si meum esset de magnorum hominum controversiis aliquid ferre iudicium, Muratorio illud prorsus assentire: multo commodius, utilius atque omni ex parte melius futurum fuisse, si rei publicae moderatores curassent, ut Justiniani leges & clarius expressas & vernaculo sermone perscriptas haberemus, iis quae saepius repetuntur in digestis omnino resecatis, legibus discordibus amputatis, nec non regulis indicatis, quas jureconsulti sagacissimi, praeter illas in ea collectione contentas, innuerunt, cum res ad sua principia revocarent. At enim librum Muratorii de *juris prudentiae maculis aut naevis* a censuris universis vindicandum illustrandumque susceperat vir Muratorio multis justissimisque de causis amicissimus Dominicus Brichierius Columbius, qui nunc difficillimo muneri apud D. N. Petrum Leopoldum Magnum E-

truriae Ducem non levi cum gloria praeest. Gravissimis tamen curis implicitus, quod volebat perficere nunquam potuit. Ceterum quid in scientia juris ac legum posset Muratorius, ex libris etiam ejusdem *de causa Comadenfi* scriptis (quidquid plures Romani dixerint) apparet satis. Eos certe Victorius Amedeus Regum sui temporis nemini prudentia & sagacitate secundus tanti faciebat, ut Muratorium *optimum inter Italos Advocatum* & haberet & appellaret. Hoc autem a Cajetano Cennio, qui non satis aequus in Muratorium extitit, temere negatum * Solius gravissimis comprobatur testibus **. Id videlicet Muratorio scripserat Carolus Richa Regis medicus litteris datis xv. Kalendas Martii anno MDCCXX., & an. MDCCXLII. confirmaverant plures dignitate conspicui homines ex Caroli Emmanuelis Sardorum Regis exercitu. Denique ad extremum contra jureconsultos, qui dictitare solent Muratorium de arte aliena scribendum suscepisse, illud

* *Giornale di Roma* ec. anno 1760.

** Ante vitam Murat. edit. Aretinae an. 1767.

etiam est memorandum, inter opuscula, quae reliquit inedita, reperiri nonnulla, quae *Scripturas legales* illi vocant. Eas inter eminare audiivi *scriptum* nescio quod *pro civitate Utinensi apud Forum Julium*, cui competere jus negatum fuerat, ut ex ea Melitenses Equites creari possent. Ex his, inquam, omnino constat, in scientia juris atque legum nostrum hunc ab illis jureconsultis injuria hospitem dici. Tertium opus ad politicam, de qua dudum instituimus loqui, scientiam vel maxime faciens *de publica felicitate* differit, quam viri principes ac Reges respicere semper debeant. Hic liber vernaculo sermone conscriptus editus est anno MDCCXLIX. Venetiis, Lucae tamen adscito nomine, quamvis iterum eodem anno revera Lucae fuerit in lucem emissus. Probatus autem est ab universis fere lectoribus, ex quibus haud ita pauci litterarum gloriâ praestantes, datis ad *Muratorium* epistolis, quam magnifice sentirent de illo, testari voluerunt. Comes etiam Richécourtius, qui tum Etruriae pro Caesare Francisco I. summa cum potestate praeerat, humanissimam & ipse ad auctorem dedit epi-

solam, qua, libro summopere collaudato, quin & pro suis quibusdam legibus in eo probatis, animi sui demonstrata laetitia, inter magnos aetatis nostrae homines illum ipsum enumerare non dubitat. Sed jam eo devenimus, ut fufius nobis exponendum fit, quantus in eo studiorum genere fuerit Muratorius, quae scilicet eruditionis tum sacrae tum prophanae nomine solent nostris hifce temporibus appellari. Complectuntur autem ea studia historiam, chronologiam, veterum scriptorum, praecipue quod pertinet ad eas disciplinas, illustrationem, & illam in primis nobilissimam atque utilissimam artem, tantopere doctis ab hominibus per duo praesertim postrema saecula excultam, quae proprius ab iisdem critica dici solet. Hic enimvero tanquam in Muratorii regno consistimus. Etenim & ii qui contra Muratorium modo non exercebant inimicitias, aut eidem impotentius invidebant, summae cuiusdam & incredibilis eruditionis laudem nunquam ei denegare potuerunt. Primo quidem hic memoranda videtur *Dissertatio de primis Christianorum Ecclesiis*, quam an. MDXCIV.

vigesimum vix egressus aetatis annum elucubravit, ac Maecenati suo Antonio Felici Marfilio Praefuli juris prudentiae praesertim gloria nobili misit. Ea quidem ante Muratorii obitum typis impressa minime fuit; sed iis laudibus a Marfilio celebrata est, ut imprimi demum non sine auctoris gloria potuerit *. Non possum hoc equidem loco, quin Cajetani Cennii temeritatem iterum arguam. Cum enim hic opus ipsum ad ea tempora ineditum nunquam videre potuisset, nimias fuisse Marfilii laudes & immeritas confidentissime scripsit. Hujusmodi censuras exponere, meo quidem iudicio, refutare est. Hinc etiam facile colligas, quid sit de Cennio ipso sentiendum *Anecdota Latina*, quae juvenis edidit Muratorius, parvi facienda esse jactante. Atqui vel primum ipsorum volumen tanti factum est a doctissimis viris, ut ex eo tempore cum Ludovico Antonio jungere amicitias voluerint, ex

* Vide Marfilii epistolam ad Murator. apud Seilium in *Append. I. N. I.*

quibus equidem Joannem Lamium * sequutus commemorabo Henricum Norisium, Joannem Ciampinium, Antonium Magliabechium, Joannem Mabillonium, Bernardum Montfauconium, Daniele Papebrochium, Antonium Mariam Salvinium. Hoc opus primum fuit inter omnia a Muratorio elucubrata, quae quidem ipse typis evulgaverit. Cum enim Mediolani codices Ambrosianae bibliothecae pervolveret, aliquot invenit veterum scriptorum opuscula nondum edita, ad quae statim illustranda incredibili studio incubuit. Primum volumen typis Mediolanensibus prodiiit mense Julio anno MDCXCVII. cum nondum ille quintum supra vigesimum expleffet aetatis annum. Continet autem quatuor S. Paulini Episcopi Nolani poemata, quorum tria in honorem S. Felicis martyris condita, ac die ipsius natali pronunciata, *Natalia* appellantur; quartum autem *contra Paganos* inscribitur. Singula vero poemata, praesertim ubi difficiliore loci, opportunis illustrat animadversionibus, duas etiam ac vi-

* *Lami elogio del Muratori &c.*

ginti *Dissertationes* subjiciens, quibus res ad trutinam revocat diligentiore dignas examine. Singularum argumenta breviter indicabimus, quod non satis quid in iis contineatur ex ipso voluminis indice appareat. Itaque prioribus octo multa disputat de illustribus aliquot hominibus a Paulino celebratis; at aliis quinque subsequenter de ipso agit Paulino, cujus vitam atque res gestas in clariore, quam fuisset ad ea tempora praestitum, luce collocat. Decimaquarta *Dissertatio de miraculis* agit S. Felicis, cujus etiam obitum, contra sententiam antiquiorum, ad quartam Aerae vulgaris aetatem eundem referentium, ad secundam pertinere S. Paulini auctoritate statuere se se posse putat. Tum XV. *Dissertatio corpora sanctorum Martyrum Gervasii atque Protasii a Divo Ambrosio*, non anno CCCLXXXVII. ut Baronius, Puricellius, alique existimarunt, sed anno CCCLXXXVI. inventa, atque hinc ad annum CCCLXXXVII. Divi Augustini conversionem ad Catholicam Fidem esse rejiciendam probat. XVI. Henricum Ottrium Calvinianum impugnat, qui Baronium reprehendit.

derat affirmantem, aureis atque argenteis vasis ac pretiosa supellectile veterum Christianorum templa fuisse exornata, atque in iis ad Martyrum sepulchra cereos ac lampades accendi consueſſe. De veterum Christianorum ſepulchris agit XVII., ac morem intra ſepta Eccleſiarum cadavera humandi multo eſſe antiquiorem Gregorii Magni temporibus contra Kepperum alioſque Proteſtantes oſtendit. De votis atque *votivis* Chriſtianorum *oblacionibus in Sanctorum honorem* eſt XVIII. qua Erasmus Reterodamus, qui in dialogo, cui titulus *Naufragium*, ea diſeſerat univerſa, reſutatur. At XIX. Pagium oppugnat, qui *Sanctorum* plerorumque *feſtivities* non iis, quibus mortui fuerant aut ſepulti diebus, ſed aliis omnino celebratas fuiſſe poſuerat. Quenam ſententia Paulini fuerit in iis poematibus de rerum elementis, in quibus etiam cælum numerabatur ab eo, XX. explicat, & in eadem opinione de cælo non modo quosdam Eccleſiæ Chriſtianæ Doctores, at ipſum Ariſtotelem fuiſſe demonſtrat, quamvis id ejus recentiores interpretes nunquam adverterint. De forma ſan-

Altissimae Crucis XXI. disputat, ac Paulini
 temporibus non modo quam *Commisam* di-
 cimus, sed & quam *Immissam*, qualem vi-
 delicet nos effingere consuevimus, in usu
 fuisse conficit. Postrema demum *Dissertatione*
 de operibus Paulini deperditis agendum su-
 mit, ac nonnulla eorum fragmenta colligit,
 & quas variantes lectiones appellare consue-
 vimus. Ex iis putasse Paulinum, quod Hie-
 rosolymae excidium anno post Christi in cae-
 los ascensum XLII. contigerit, ejusque mors
 anno XV. fuerit Tiberii Caesaris, duobus
 Geminis consulibus, hoc est Aerae vulgaris
 anno XXIX.,prehendit. Denique ad ex-
 tremum appendicem addit *de antiquo jure*
Metropolitae Mediolanensis in Episcopum Tici-
nensem in octo capitula tributam, in qua
 septem prioribus Ecclesiae saeculis hunc illi
 fuisse subjectum idoneis argumentis videtur
 ostendere. Hoc est primum illud *Anecdoto-*
rum volumen, quod vix conscriptum juve-
 nis Muratorius, ut ipse testatur in *epistola*
de studiorum suorum ratione ad Comitem Articum
de Porcia familiarissimum suum, nemine con-
 sulto,

sulto, nec limae nec morae patiens multo felicius quam prudentius edidit. Ea, quae hoc in volumine continentur, iterum typis edita sunt Veronae an. MDCCXXXVI. cum Paulini universa imprimerentur opera, aliquibus tamen ab Auctore ipso immutatis, aliquibus etiam additis. Quae vero contra opus istud scripta sunt a nonnullis, levissimi momenti videntur esse. Anno MDCXCIX. Eustachius a S. Eubaldo in *prooemio* ad librum *de Metropoli Mediolanensi*, quod ipse Muratorio inscripsit, *Chronicon Datii mant scriptum* idem esse atque illud Landulphi Mediolanensis historici, contra sententiam Muratorii, multis argumentis probare contendit. Non ante iis respondere Muratorius voluit, quam cum volumine IV. *Rerum Italicarum ipsius Landulphi Chronicon* ederet. Tunc enim iis, quae ab Eustachio fuerant allata, in *prolegomenis* abunde satisfecit. Alii quidem litteratissimi viri in eo dissenserunt a Muratorio, quod poema quartum, quod ipse Paulino tribuerat, alius poetae, cui nomen Antonio fuisset, foetum esse dicendum existima-

rent. Potissima vero ipsorum ratio fuit ; quod in primo poematis versu Antonium ipse videatur se se appellare, cum dicat,

Discussi, fateor, sectas Antonius omnes.

Inter eos, quos laudavimus, homines eminent Joannes Lironius, Joannes Albertus Fabricius, ac demum qui *litterariam Galliae historiam* anno MDCCXXXV. emisit. Illi argumento Muratorius in una enarratione Veronensis, de qua diximus, editionis haec reposuit: *Antonius. Quem Paulinus haec adloquatur, quis me doceat? Nominativum pro Vocativo ab antiquis adhibitum ostendit Vossius Lib. IV. Cap. V. de Arte Grammatica. De aliis, quae contra Muratorii sententiam a Gallis illis auctoribus allata sunt, vide Solum **. Jam vero alterum *Anecdotorum Latinorum* volumen an. MDCXCVIII. typis etiam Mediolanensibus Muratorius publici juris fecit. Primo quidem *prolegomenis & animadversionibus* elucidat *Professionem Fidei* aut *Apologiam Bacchiarii* scriptoris ad III. saeculum

* *Vita del Muratori Cap. IX. §. 4.*

Aerae Christianae pertinentis, quam deperditam eruditi viri existimaverant, ipse autem in codice Ambrosianae bibliothecae annorum saltem mille antiquitatem praefervente adinvenerat. Deinde *historiam* exhibet a Joanne de Cermenate conscriptam, qui scriptor saeculi XIV. res ab Henrico VII. Imperatore gestas in Italia fusiore quam ceteri oratione persequitur. Exinde *fragmentum* describitur *vetustissimum*, in quo Manichaeorum damnantur errores. Hoc autem singulari *Dissertatione* illustratur. Tum oratio subsequitur adhuc inedita Aeneae Sylvii Piccolominei Senensis Episcopi, qui Pius II. postea dictus est, cum Romanam cathedram tenuit. Eam Viadobonae habuerat Aeneas an. MCCCCLXII. cum Pontificius illic esset Nuntius, contra populos Austriae, qui Nicolai V. iussibus obtemperare detrectaverant appellantes ad Generale Concilium. Subjicit huic *Dissertationem* suam Ludovicus Antonius formulam exhibens manumissionis, sine qua nemo poterat ex aliqua familia seu demo sacros ordines suscipere, tum de ipsa manumissione, tum de prisco codice, ex quo illam habue-

rat, erudite multa observans & adnotans. Alia *Dissertatione* illustrat *Catalogum sanctorum Martyrum*, qui temporibus S. Gregorii Magni Romae sepulti colebantur; quem quidem non ex Ambrosiana bibliotheca, ex qua cetera opuscula, sed ex musaeo Settaliano Mediolani habuerat. Demum inedita quaedam *Chronica Regum Italarum*, *Constitutionem Henrici I. Imperatoris*, versus aliquot antiquissimos in bibliotheca quondam S. Isidori Hispalensis aservatos, & *Expositionem Fidei Venantii Fortunati* profert, & ex hac occasionem sumit condendae *Dissertationis de vero Symboli auctore*, quod Divo Athanasio tribuitur. Demum *Barzizii orationem epitalamicam* & aliam incerti auctoris saeculo xv. habitas proferens Borromaeae gentis, quae in illis celebratur, laudes singulari *Dissertatione* persequitur. Ex Bacchiario, de quo diximus, occasionem accipit *Dissertationis de quatuor Temporum jejuniis*, cui *Commentarius* subjicitur de *Corona Ferrea*, qua nimirum in Italiae Reges Romani Imperatores inaugurabantur: Hoc alterum *Anecdotorum* volumen non minus, aut fortasse magis, quam primum do-

clissimis placuit hominibus. Fontaninius tamen anno MDCCXVII., cum maxime de rebus Comaclensibus arderet controversia, Muratorii *commentarium de Corona Ferrea*, alia ejusdem argumenti edita *Dissertatione*, carpendum sumpsit. Ut aliquid ei reponeret Muratorius eo tempore minime curavit; at cum epistolae responderet Joannis Burchardi Menchenii, qui Muratorium sciscitatus fuerat, quid esset de Fontaninii rationibus omnino sentiendum, easdem sibi dissolvendas suscepit *. Alia etiam ad suam contra Fontaninium defendendam opinionem attulit in eo *prooemio*, quod *Chronico* praemisit *Matthaei Villani*, cum XIV. adornaret *Re- rum Italicarum* volumen. Locus ipse postulat, ut aliquid *de tertio & quarto* dicamus *Anecdotorum Latinorum* volumine, quorum utrumque, cum Ambrosianae praesideret bibliothecae, maxima ex parte confecerat, quamvis non ante annum MDCCXIII. lucem ea vi-

* Aliqua Muratorianae epistolae fragmenta Petrus Burmannus edidit post praefationem ad P. I. Volum. IV. *Thesauri Scriptorum Italiae*, quem a Gregorio inchoatum ipse produxerat,

dere potuerint. Edenda autem curavit typis Patavinis Georgius Cornelius Patavinus Episcopus, S. R. E. Cardinalis, vir de litteris ac litteratis hominibus optime meritus. Ideo libros eos fratri Cardinalis Venetiarum Duci auctor inscripsit. Quae contineantur in iis hoc loco prosequi & nimis longa res esset & minime necessaria. Etenim ex eadem Ambrosiana bibliotheca multa deprompsit noster adhuc inedita veterum Latinorum scriptorum opuscula, epistolas, orationes, sermones, aliquot etiam parva chronica & huiusmodi alia, in quibus praeter antiquitatem & auctorum nomina nihil admodum fortasse suspexeris. Neque vero suam aliquam iis *Dissertationem* noster apposuit, quod in prioribus duobus voluminibus praestiterat; quamvis & ea doctis & admodum brevibus praefationibus & quibusdam animadversionibus illustraverit. Ipsa similitudo argumenti nos cogit, ut jam de Muratorii *Anecdotis Graecis* verba faciamus. Ea quidem anno MDCCIX. edidit ex manu scriptis item codicibus. Continet autem hic liber octo ac viginti supra ducenta epigrammata Gregorii Nazianzeni,

cui Theologi cognomen fuit; epistolas quinque & quadraginta Firmi Caesaraeae Episcopi, qui saeculo V. floruit, epistolas quatuor Juliani Imperatoris, quem Apostatam dixere Patres, ac denique epistolam ad Dionysium, quae Julio I. Summo Pontifici tributa est. Non modo haec omnia, quae in bibliothecarum pulvere delitescabant, diligenter collecta edidit, sumptus in eam rem Cardinali Cornelio, quem paullo ante laudavimus, suppeditante, sed & e Graeco vertit, & perpetuis illustravit enarrationibus atque emendavit. Nazianzeni quidem versus magnam partem ex codice collegerat Ambrosianae bibliothecae ante septingentos annos exarato; partem a Joanne Boivino Regis Christianissimi bibliothecario, partem ab Antonio Maria Salvinio, denique partem a Joanne Baptista Miraeo ex ordine S. Benedicti obtinuerat. Haec autem epigrammata de multis nos certiores faciunt ad ipsum Nazianzenum, ejusque domum & amicos pertinentibus, quae videlicet antea latuerant. Ex epigrammate CXXXII. Nazianzenum ipsum fuisse matrimonio conjunctum Theosebio san-

ctissimae feminae omnino videretur, nisi sup-
 positum illud fuisse Muratorius ipse multis
 iustissimisque de causis esset suspicatus. Tres
 autem *Disquisitiones* iis carminibus noster a-
 djecit, quae magnam *Christianae Antiquitatis*
 notitiam prae se ferunt. Primam *de Synisactis*
 & *Agapetis*, celeberrimo Bernardo Montfau-
 conio dicatam inscripsit. Ii autem Synisacti
 aut Agapiti Clerici erant sive Monachi, qui
 postquam Deo castitatem voverant, cum vir-
 ginibus Deo plerumque sacris cohabitare
 non dubitabant. Amorem autem erga ipsas
 aut *communione* profitebantur, quae ad *spi-
 ritum* unice pertineret, ex qua etiam re no-
 men habuerunt. Putat autem Muratorius
 ab Ethnicis ac praecipue a schola Platonis
 amorem illum adeo periculosum in ipsos di-
 manasse Christianos, eique praecipue dedisse
 operam Origenistas, Geracitas, Encratitas
 ac Gnosticos, qui non alio nomine quam
Fratrum ab ipsis Agapetis adamoto in nefa-
 riis illis commerciis appellari volebant. Mul-
 ta autem de origine atque progressibus il-
 lius abusus, nec non de Patribus atque Con-
 ciliis eundem reprehendentibus erudite per-

sequitur. Obiter autem haereticos, praesertim Henricum Dodwellum, confutat, qui Sacerdotum castitatem ac virginitatis cultum recentiorum saeculorum superstitionem fuisse calumniantur. Altera *Disquisitio* Joanni Boivino inscripta *de Agapis sublati* est. Agit autem de conviviiis, quae Christiani veteres in Martyrum honorem diebus, quos ipsorum *natalitia* vocabant, celebrare consueverant. Ipsius opinio est sanctorum Patrum maxime Nazianzeni auctoritate fulta, hujusmodi morem ab Ethnicis fluxisse, non ab Apostolis. Cum enim illi necessariorum & amicorum mortem solemnibus epulis prosequerentur, iis mortuorum animos perfrui existimantes, antiquissimi Christiani stultum ritum non ita facile destrui posse rati, in purum ac religiosum convertere conati sunt. Tum de abusibus disserit, qui sensim gliscere coeperunt, quibusque de causis eam ceremoniam de medio tollere Patres & Concilia decreverint. Tertia *Disquisitio* Fontaninio nuncupata *de antiquis Christianorum sepulchris* disserit. Illud in hac *Disquisitione* nobis occurrit memoria dignius, quod etiam apud

antiquissimos Christianos in Oriente in more positum fuisse probat, ut in sacris aedibus vita functi tumularentur. De lege autem VI. Codicis Theodosiani differit, quae non modo Haereticos, sed & aliquos Catholicos in errorem induxerat. Fidelium sepulturam in Ecclesiis omnino fuisse vetitam. Ostendit autem nullo modo fuisse futurum, ut hujusmodi sepulturam Imperatores interdicerent, nisi antea in more fuisset; sed & eam *Constitutionem* Pancratio Constantinopolis Praefecto missam ad eam tantummodo urbem, non ad Imperium universum pertinuisse, imo ne ad suburbana quidem fuisse extensam; quae hanc eandem ob causam valde multiplicari coeperint. Epistolas autem Firmi, de quibus diximus, e codice descriptae bibliothecae Ambrosianae, qui versus XI. saeculum videtur exaratus. Multa autem Auctor adnectit de ipso Firmo cognita satis digna. In eodem codice epistolas, quas exhibet, Juliani Apostatae invenit. Prima praefertim & quarta erudito lectori gratissimae accidunt. Epistolam Julio I. ab Eutychianis falso tributam eo consilio primum ex codice

Ambrosiano edidit, ut ex ipsa ejus lectione quam futilis ea calumnia fuerit a Centuriatoribus Magdeburgensibus renovata, facilius appareat. Quartam autem huic *Disquisitionem* subjecit, cui titulus, *In epistolam sub Julii I. nomine impressam*, Antonio Mariae Salvinio dicatam. Ostendit autem Gennadium Massiliensem V. saeculi scriptorem fuisse primum, qui eam epistolam Julio Pontifici tribueret, quamvis eandem, ut idonea Muratorius ratione conjicit, nunquam ille fortasse viderit. Opinatur autem noster cum Leontio Byzantino haeticum Apollinarem ejus epistolae verum auctorem esse: ac certe Julio Pontifici tribui non posse iis efficit argumentis, quibus nulla solida ratio reponi posse videatur. Ex hoc etiam opere Muratorii liquidius judicari potest, quod aliis etiam rationibus omnino constat, quantopere Graecum sermonem ille calluerit. Quamobrem nescio equidem, quid Cajetano Cenno in mentem venerit, cum ejusdem sermonis cognitionem in Muratorianis operibus non multum eminere affirmavit. Eos publico bono non parum consulere, qui homi-

num quavis eximia laude florentium vitas conscribendas suscipiunt, nemo est quin plane sentiat ac fateatur. Id cum Muratorius intelligeret, hanc etiam historiae, quamvis recentioris, & eruditionis utilissimae partem in ipso juventutis flore sibi duxit excolendam. Cum adhuc esset Mediolani vitam exaravit Caroli Mariae Maggii poetae celeberrimi & studiorum & morum similitudine Ludovico nostro conjunctissimi, qui anno MDCXCIX. diem clauit extremum. Ut enim extincti desiderium levaret, non modo bene multos effudit versus, sed statim ad ejus res gestas & scriptas, moresque posterorum memoriae commendandos incubuit. Ea quidem vita edita est Mediolani anno MDCC. cum ejusdem poetae carminibus in quinque parva volumina distributis ejusdem Muratorii opera ac studio. Sed anno MDCCV. Romanis Arcadibus efflagitantibus, ejusdem Maggii vitam, nec non aliam Francisci Lemenes, qui etiam & probitate morum, poeseos & gloria iisdem fere, quibus Maggiius, temporibus celebratus fuerat, in pauciora contraxit, qua de re inter ipsos Arcades coo-

ptatus fuit . Ad haec edidit Mutinae anno MDCCXX. vitam Pauli Segneri Junioris e Societate Jesu cum *piis Exercitationibus* ea ratione digestis , qua solebat is easdem populo proponere . Maxima quidem fuerat Muratorius jam ab anno MDCCXII. cum Segnero familiaritate conjunctus , eidemque sacris , ut vocant , in missionibus semper assistere . Curaverat etiam , ut Mutinae illas perageret ; qua de re a multis reprehensus fuerat , cum dicerent hujusmodi spectacula potius in castellis aut pagis apud rusticos homines , quam apud politiores cives in urbibus exhibenda . Sed exitus apud Mutinenses Muratorii consilium haud leviter comprobaverat . Itaque postmodum , ut Segnerus an. MDCCXIII. in templo Divi Augustini *pias* , de quibus diximus , *Exercitationes* traderet , facile nosse impetravit . Jam ab anno MDCCXV. , quo scilicet anno Senogalliae Segnerus obierat , ejus res gestas memoriae tradere decreverat ; sed pluribus de causis impeditus rem differre coactus fuerat : praesertim quod Jesuitae , qui non satis adhuc Muratorium fortasse noverant , parum ei fidere , nec velle

monumenta quaedam e suis tabulariis ad Segnerum pertinentia ejus integritati ac probitati committere videbantur. Quod pertinet ad opusculum de *piis Exercitationibus* Segneri vitae subjectum, auctoris illud non modo reminiscendi vim prope singularem, cum ipsis fere verbis, quibus Segnerus fuerat usus, ipse uteretur, sed & pietatem in Deum ac fervorem quemdam amoris in Jesum Christum aperte declarat. Reprehensus tamen est liber a nonnullis, quod dicerent pietati erga Deiparam ceterosque Caelicolas adversari: qua quidem calumnia vel saltem errore, quid injustius, aut certe absurdius excogitari potuerit, equidem nescio. At de hujusmodi injuriis Muratorio illatis alio loco. Ludovicus Castelvetrus etiam, qui communem cum Muratorio patriam habuit, id promeritus est, ut vir tanti nominis ac doctrinae vitam ipsius elucubraret. Praestitit id praecipue Muratorius, ut Argelatio necessario suo morem gereret, qui vitam eam exoptaverat, quo nonnullis ipsam Castelvetri opusculis hactenus ineditis in eorum, quam parabat, editione praemitteret. Illa quidem

ita explicata est, ut hominem in aliorum scriptis dijudicandis quam qui maxime verfatum de homine scribere decebat emunctae naris, quem sui temporis Aristarchum non absurde dixeris. At quoniam aliquid de Hannibale Caro Castelvetri multis de causis adversario detrahere visa est, vehementer offendit Dominicum Lazzarinum virum apprimè doctum, at difficilis cujusdam acrisque naturae. Itaque epistolis duabus ad Muratorium, quicum non levis amicitia intercedere visa fuerat, anno MDCCXXIX. datis *, se se Cari defensionem suscepturum esse minitatus est. Multa quidem ipsum animo suo moliri, quo Castelvetri elevaret auctoritatem & scriptorem ejus vitae confutaret, satis apparebat. Quid ille praestiterit, non omnino liquet. Attamen haud temere suspicari mihi videtur Solius, scriptorum, quae anno MDCCXXXII. & MDCCXXXIII. de rebus poeticis contra Muratorium prodierunt, fuisse Lazzarinum auctorem: qua de re alio etiam loco diximus: At multo majorem Castelve-

* Vid., si vis, eas apud Solium in Append. I. ec.

tri vita maledicendi occasionem Iusto Fontaninio praeiuit ob controversiam de Comaclensi ditione contra Muratorium vehementius irato. Cum enim Fontaninius corrigendum & amplificandum suum *de Italae Eloquentiae* librum suscepisset, non dubitavit in ipso Castelvetro haereticum appellare, quin & eodem nomine contra Muratorium impotentius invehi. Quamvis eodem anno Fontaninius obiisset, non putavit Muratorius, cum tanto de crimine ageretur, sibi dissimulandum. Itaque ut Castelvetro seque defenderet, anno MDCCXXXVII. libellum edidit Italico quoque sermone, quem *Primum* inscripsit *Examen Italae Fontaninii Eloquentiae*. At sibi vir mitissimus imperavit, neque ultra ut habuerat in animo, progressus est, cum rescivit alios, praesertim Apostolum Zenum, Fontaninii opus ad trutinam revocasse. Attamen Muratorii libellus iterum editus est an. MDCCXXXIX. simul cum *defensione Ferrariensium Scriptorum* a Joanne Andrea Barotio exarata, & aliis quibusdam. Scipio etiam Maffejus Muratorii defensionem contra

Fonta-

Fontaninium suscepit *; quem certe sapientes quique viri modum omnem in suis ob-
jurgationibus excessisse facile concesserunt.
Vitam quoque Caroli Sigonii scripsit Muratorius, hanc tamen Latino sermone, quemad-
modum & alias Tortii ac Raynaldi I., de
quibus mox, cum reliquas Italico elucubra-
verit. Sigonius quidem vir fuerat de litte-
ris ab ipsa juventute optime meritus, nec
mediocre decus Mutinensi civitati addiderat.
Itaque cum Argelatus opera omnia Sigonii
edere vellet, facile a Muratorio, ut is, quae
pertinerent ad tanti viri memoriam collige-
ret, impetrare potuit. Legitur ea vita ini-
tio primi voluminis operum Sigonii, quae
Mediolanensibus typis anno MDCCXXXII.
prodierunt. At quod vitam conscriberet no-
ster auctor Joannis Josephi Ursii Bononiensis,
non tam nobilitate quam integritate morum
ac doctrina praestantis, amoris tribuit, ac
grati animi erga ipsum virtuti omnino sin-
gulari. Cum enim Mutinae Ursius plures

Tom. X. O

* Vid. *To. II. delle Osservazioni Letterarie* ipsius
Maffei.

vixisset annos, magna illi cum Muratorio familiaritas intercefferat; cumque is anno MDCCXXXIII. mortem obiisset, universos bibliothecae suae libros ipsi Muratorio legato reliquerat. Cum igitur Italica illius carmina imprimenda post ejusdem obitum essent, ac reliqua opera, *thesibus* quibusdam *equestribus*, ita enim appellabantur, exceptis, rursus edenda, vitam ejus Muratorius posterorum memoriae ultro mandare voluit. Edita est ea vita ante carmina, quae diximus, nec non in secundo volumine operum Ursii anno MDCCXXXV. typis impressorum. Ad hoc etiam historiae genus, quo clarorum hominum vita immortalitati commendatur, pertinere videtur epistola, quam an. MDCCXXXV. dedit ad Apostolum Zenum haud semel a nobis commemoratum. Etenim in ea fusius agit de causis, propter quas Alphonsus II. Ferrariensium ac Mutinensium Dux Torquatum Tassium in nosocomio S. Annae Ferrariae concludi jusserat. Ea quidem epistola praefixa legitur pluribus ejusdem poetae epistolis antea ineditis a Muratorio collectis, quae volumine x. operum Torquati Tassi Ve-

netiis anno MDCCXXXIX. impressorum leguntur. Facile quoque se se exorari passus est Ludovicus a Bartholomaeo Soliano, qui Alexandri Tassoni celeberrimum illud, quod vocant *Eroico-comicum*, poema rursus imprimere typis cogitabat, ut etiam tanti viri componeret vitam, qui Mutinensi & ipse civitati non mediocri fuerat ornamento. Venetiis eo ferme tempore Tassoni poema committebatur typis. Itaque Typographus Apostolum Zenum impulit, ut eam vitam ab amicissimo suo Muratorio efflagitaret; prius tamen Solianus edidit an. MDCCXXXIX. ac paulo post etiam Venetiis Typographus, de quo diximus. At commentarium hoc postea noster pluribus augere potuit additamentis, cum quibus bis ab eodem Soliano anno MDCCXLIV. poemati Tassoni bis item impresso praefixum est. Ea quidem vita non mediocri controversiae, quamvis de causa fortasse levi, extitit inter duos apprimè doctos homines. origo. Muratorius enim affirmaverat Tassonum inter Lynceos Academicos, qui Romae summa cum gloria floruerant, esse numerandum. Scripserat id eorum

'Academicorum syllabo confusus, quod Roma missum eidem communicaverat Dominicus Vandellius in Mutinensi lyceo Mathematicarum disciplinarum Doctor. Negavit id argumentis quibusdam allatis Joannes Blancus Arimini medicus in *Lynceorum Notitia* *, sic enim appellavit, *Fitobasano Fabii Columnae* praemissa. Noluit Ludovicus in arenam contra Blancum ea de causa descendere. Descendit itaque Vandellius, ac pluribus ex utraque parte scriptis, acrius fortasse quam oportuerat, pugnatum est; de quibus nihil nos attinet plura dicere, nisi Joannis Lamii judicio Vandellium omnino causa cecidisse **. Mutinensis etiam fuit Franciscus Tortius, qui medicinam in patria summa cum laude fecerat. Liber ejus de *medicamine*, quod veteribus ignotum *China-china* vocatur a nostris, pluris fieri solet ab iis, qui de his rebus judicare possunt, quam alia sexcenta medicorum volumina. Obierat is an. MDCCXLI. Ante ipsius opera denuo Venetiis edita anno

* *Notitia de' Linnei*.

** Vid. *Elogio del Muratori*, & ejusdem *Litterarum Ephemerides* pluribus locis.

MDCCXLIII. legitur ejusdem vita a Muratorio, ut diximus, Latinis litteris tradita. Muratorius etiam epigraphen ad ejus tumulum in S. Augustini composuit, quo tanti civis desiderium Mutinenses testati sunt. Hic quoque memorandum a Muratorio Raynaldi I. Ducis Mutinensis, fortis ac magnanimi viri, litterarum fautoris vitam Latino sermone fuisse conscriptam, quam Lamius a se auctam edidit anno MDCCXLII. Denique vitam explicavit Benedicti Jacobini Varalensis Praepositi, quem omni virtute ad Catholicum Parochum spectante summopere florentem jam ab iis temporibus, quibus Mediolani fuerat, valde suspexerat. Haec vita Patavii edita Latinitate donata est a Petro de Strafoldo Goritienfi, quo utilior esset Germaniae Parochis. Equidem praeterieram de Latina epistola Muratorii ad Jo. Albertum Fabricium verba facere. Hanc donatam nomine *Commentarii de vita & scriptis Jo. Alberti Fabricii* editam invenies an. MDCCXXXVII. ab Hermanno Samuele Reimario. Praetermiseram quoque epistolam aliam ad Comitem Josephum Mariam Jacobattium in Francisci Pu-

ricellii laudem ; quae quidem epistola ante Italica ipsius Puricellii carmina Mediolani legitur impressa. Ambae autem praeclarorum hominum vitas illustrant. At quis, ubi de Muratorio agitur, aliquid ab eo scriptum, cum tot composuerit libros, nedum opuscula, quot vix alii etiam litteris dediti diligentius legerint, non facile praetermittat? Non levem hominis eruditionem haecenus enumerata opera patefecerunt. Verumtamen gloriam ille multo maiorem apud aequos rerum aestimatores & a studio partium alienos iis sibi peperit scriptis, quibus Atestinae Domus tum jura tum dignitatem acerrime propugnavit. Ac primo quidem de controversia nobis dicendum est, quam ab an. MDCCVIII. contra Justum Fontaninium ac Laurentium Zaccagnium, vel potius contra Romanam aulam habuit. Cum enim eodem anno Josephus I. Austriacus Romanorum Imperator Augustus, quadam cum Clemente XI. Summo Pontifice simultate intercedente, Comacum armis occupasset, ac brevi composita pax fuisset ea conditione, ut de juribus Caesaris ac Domus Atestinae in Comacum,

quin & hujus in Ferrariensem quoque ditionem amice cognosceretur, plurima Romae sunt inter ministros ex una parte Summi Pontificis, ac Caesaris & Atestinae Domus Legatos ex alia, maximo animorum ardore disputata. Demum Justus Fontaninius ac Laurentius Zaccagnius a Romanis electi sunt, ut pro Summi Pontificis jure scriberent, Muratorius autem a Raynaldo Mutinensium Duce, ut pro se utrique responderet. Ipso an. MDCCVIII. Fontaninius primum in scenam prodiit, edita *epistola*, ut *dominationem Summorum Pontificum in Comaculum per decem continua saecula* demonstraret *. Eodem anno respondit Fontaninio Muratorius, *observationibus in eam epistolam editis*, quae *observationes* ex Italico in Gallicum conversae sermonem iterum anno MDCCX. Hagae Comitum in Hollandia prodierunt. Anno autem MDCCIX. rursus Fontaninius exitit eandem producens epistolam, iis additis, quæ Muratorio satisfacere se se

* Il Dominio temporale sopra la città di Comacchio, ecc: per lo spazio continuato di dieci secoli ec.

posse existimaverat; extitit & Zaccagnius cum opere Latino, quod inscribebatur *Dissertatio historica de summo Apostolicae Sedis Imperio in Urbem Comitatumque Comacii*: utrique venit obviam noster libello supplici Raynaldi Ducis nomine ad Caesarem Augustum dato: quod Raynaldus idcirco jusserat, ut Romanis occurreretur multa per id temporis Viennae molientibus, quo possessionem Comacii Caesar dimitteret. Sed anno MDCCXI. libri duo in eandem causam prodire, alter Muratorii, qui *Comacensium Quaestionum*, alter Fontaninii, qui *Secundae Defensionis Pontificii in Comaculum dominatus* praeferebat titulum. Demum cum se collegisset Muratorius, & omnia ad tanti momenti causam pertinentia maturius ad examen revocasset, an. MDCCXII. aliud edidit pro Domo Atestina opus, quod *Plenam Expositionem Jurium Imperialium & Extensum in Comacii urbem nuncupavit*; & hoc quidem opus anno, qui consequutus est, de Italico Gallicum factum Trajecti ad Rhenum secundo fuit editum. Instituti nostri fert ratio, ut quid sibi voluerit Muratorius his in libris, breviter indicemus. Putat ipse

Comaculi urbem cum vallibus circumjectis ; quamvis a Pontificiis fuerit an. MDXCVIII. occupata , ad Imperii Romani jura pertinere ; atque hinc ad Atestinos , quod an. MCCCCLIV. quin & ad sua tempora , ejus regionis, quam barbari dixerunt, *investituram* Atestinis Imperatores concesserint . Probare contendit etiam civitatem eam Ferrariensis ditionis nunquam fuisse partem ; neque eam unquam a Pontificibus Atestinos tenuisse ; quin & pro iisdem Atestinis facere *praescriptionem plusquam centenariam* , cujus vim his etiam in rebus ultro , qui pro aula Romana scribebant , agnoscerent . Haec de Comaculo . Ad Ferrariam quod pertinet, ut Domini sui jura defenderet, aliud exaravit opus, quod anno MDCCXIV. typis impressum est , non tamen in vulgus editum . Contendit autem ille majores Mutinensium Ducum injuria fuisse a Clemente VIII. Summo Pontifice ditione Ferrariensi spoliatos . Cum aliquantum in tantis litibus ardor animorum deferbuisse videretur , aliud pro Estensi Domo de Raynaldi mandato suscepit onus Muratorius profecto non leve . Fontaninius, qui eo erat animo,

ut iram tenere sibi que imperare vix posset, de rebus Comaclensibus scribens eo se se abripi siverat, ut antiquitatem ac nobilitatem Atestinae Domus in dubium revocaret. Muratorius quidem ab anno MDCCXI. de nobilitate illius inclytæ Domus praeclare scripserat, quum *duabus epistolis Latinis ad Leibnitium datis* * ex eodem esse stipite Estensem ac Brunsvicensem familiam, hoc saeculo Magnae Britanniae Regno potitam ostenderet. Etenim Guelfus IV. Azzi II. Marchionis Estensis filius in Germaniam concesserat, ac Bavariae Dux creatus fuerat, cujus posterì eidem ditioni Saxoniam adjecere. His autem in epistolis ultra saeculum XI. vix progressus est. Etenim Azzus ille II. qui & Albertus, anno circiter DCCCCXCVI. natus anno MXCVII. decesserat. At majora molitus, cum tabularia, quod narravimus, Italiae scrutaretur, omnem lapidem sibi movendum esse duxit, ut Atestini generis ori-

* Primam epistolam edidit Leibnitius post praefationem ad Volum. III. *Scriptorum Brunsvicensia illustrantium* anno MDCCXI. Haanoverae impressum.

ginem quantum posset ultimam deprehenderet, ac quidquid ad nobilissimam pertineret illam familiam illustraret. Praestat id maxime opere celeberrimo, quod *Prima pars Antiquitatum Etsensium* dicitur. Quam ardua res ea fuerit atque difficilis, ii sine dubio norunt, qui saeculis barbarie & inscitia prorsus illitis neque gestarum rerum memoriam fuisse litteris consignatam, neque, si quando conservata est, incensis inter tot bella sive direptis tabulariis, servari potuisse didicerunt. Hinc factum est, ut Genethliaci, qui principibus viris assentari volebant, ad arbitrium pleraque finxerint, credulisque lectoribus venditaverint. Aliquando eam artem adhibuerunt, ut etiam sapientiores in fraudem induxerint. Celebre est exemplum Francisci Rosieres, qui Baronium, Florentinum, aliosque doctos homines aliquando decepit. Opus enim ediderat, cui titulus: *Stemmatum Lotharingiae ac Barri Ducum Tom. VII. ab Antenore, Trojanarum reliquiarum ad paludes Maeotidas Rege ad haec usque tempora*. Attamen ei fraus magno stetit, cum fuerit, ea detecta, coniectus in carcerem, ac pa-

rum abfuerit, quin capite minueretur. Quod pertinet ad ipsam Domum Atestinam, quae nemini concedit nobilitate, paucas autem omnino pares habet, cum nulla etiam regia stirps plusquam octo circiter saecula antiquitatis ita jactare possit, ut ea res omnino certa videatur, non defuerant, qui ad eam amplificandam aut multa comminiscerentur, aut saltem omnino falsa monumenta sequuti & ipsi deciperentur, & alios quoque deciperent. Fuerunt enim qui Domum eam & florentem & Heroum foecundam, & Ateste dominantem circa Aerae vulgaris annum CCCCXXVIII. exhiberent. Ii quidem sequuti sunt opus, quod Muratorius ipse fabulosum esse demonstrat. Inscrbitur autem *Historia belli Atilae Hunnorum Regis*, quae Latino sermone scripta dicitur a Thoma Aquilejensi a secretis Patriarchae Nigetae, & in Provincialem linguam a Nicolao de Casola Bononiensi conversa, ac demum in Italicam translata, ac Ferrariae per Franciscum de Rubeis anno MDLXVIII. typis impressa est. Non his profecto viis progredi Muratorius voluit; sed omnia severio-

ribus parens *Artis Criticae* praeceptis ad trutinam revocavit, nihilque attulit quod gravissimis viris probari minime posset. Omnino certum esse ponit Albertum Azzum II. Marchionem Italiae, Lunigianae Comitem, Atestis ac Rhodigii dominum, quem circa annum DCCCCXCVI. natum anno MXCVII. decessisse diximus, progenitorem fuisse familiarum tum Brunsvicensium in Germania, tum Mutinensium in Italia Ducum. Hunc hominem nobilitatis quoque gloria fuisse conspicuum ex divitiis, ex amicitiiis, ex possessionibus, ex affinitatibus, quas cum principibus viris vel Germaniae vel Galliae contraxit, ex honoribus, quos tum ipse tum liberi ejus consecuti sunt, conjicit. Praeterea validioribus quibusdam aliis rationibus ostendit, hunc eundem Albertum eos habuisse majores, Adalbertum III. Marchionem Italiae, qui anno DCCCCXL. inter vivos degebat; Obertum I., qui & Obizus etiam appellatus est, Marchionem Italiae & Sacri Palatii Comitem, qui ab an. DCCCCLI. ad DCCCCLXXII.; Obertum II. Marchionem Italiae, qui ab anno DCCCCXCIV. ad MXIV.; ac demum Al-

bertum Azzum I., qui etiam Marchio fuit Italiae & Comes, & ab an. MXIV. ad MXXIX. summa cum gloria floruerat. At Adalbertum illum III. conjecturis omnino probabilibus efficit natum esse a Guido Marchione ac Duce Etruriae, qui circa annum DCCCCXXX. vita functus fuerat. Hujus autem Guidi genus ita texit, ut primo quidem occurrat Bonifacius I. Lucae Comes & Etruriae. Dux anno DCCCXI. florens, deinde Bonifacius II. Etruriae Dux & Corsicae Praefectus, qui anno DCCCXXIX. claruit: hinc Adalbertus I. Marchio & Dux Etruriae, cujus res gestae ab anno DCCCXLVII. ad DCCCLXXV. inveniantur, ac postmodum Adalbertus II., qui Dives appellatus est, Marchio item & Dux Etruriae, qui anno DCCCCXVII. diem supremum obierit. Ultra etiam progreditur Muratorius, ut originem ultimam hujus inclytae domus adinveniat. Confutatis enim opinionibus Pauli Marri scriptoris saeculi XIII. qui Estenses a Trojanis derivabat, Leonis Marficani, alio nomine Ostiensis, nec non Aeneae Sylvii Piccolominei, postmodum Pii II. qui e Gallia in Italiam venisse

statuerant, ac demum aliorum, qui aut a Principibus Italis, aut ab antiqua Romanorum Azzorum domo deducebant, e Germania esse, non secus atque alias inter Italicas omnino principes, optimis argumentis probat. Hoc eodem opere aut prorsus e tenebris eruit aut magis illustrat, optimae notae semper monumenta proferens, quae Atestini homines domi ac militiae celeberrimi ad annum usque MCCXV. praeclara edidere facinora. Potuisset illud Muratorius an. MDCCXVI. in lucem edere; sed ut de Raynaldi Ducis consilio mos Leibnitio gereretur, qui provinciam eandem sibi susceperat, & quid Muratorius perfecisset, antequam ederetur, videre concupierat, an. demum MDCCXVII. Mutinae publici juris fecit. Huic *primae parti Antiquitatum Etsensium* adjicere multa volebat a se diligentissime conquesta, quibus barbararum aetatum recondita quaevis cognoscere cupientibus fax quodammodo praeferretur. Ideo cum primum conscripsit opus *Antiquitates Etsenses & Italicas* appellavit. At sapientiore postmodum consilio ea servavit, ut opus aliud Latinum, hoc est *Antiquitates*

medii Aevi conderet, de quo suo loco dicturi sumus. Hanc eandem primam tanti operis partem de mandato ipsius Raynaldi Ducis dicavit Georgio I. Magnae Britanniae Regi omnium beatissimo, non tam quod in suis tria florentissima regna, vastissimasque provincias, quam quod Newtonum atque Leibnitium numeraret. Ille quidem quanti faceret tale munus & humanissimis verbis testari voluit, & quatuor majoris formae numismatibus aureis, quae plusquam centussibus quadringentis aestimata sunt, ad Muratorium dono missis. Sed & litteratissimi quique viri hoc opus unum ex praecipuis Muratorianis, & ex iis, quae nostrae Italiae decori sint atque ornamento habuerant. Cennius ipse ac Romani Cennio non absimiles illud magnopere suspiciebant. Langlelius autem in libro Gallico, quem *de ratione historiae studendi* conscripsit, non dubitavit ut optimum ac fere unicum exemplar illud proponere iis, qui familiarum historias essent conscripturi, pluribus aliis in ejus laudem non profecto magnificentius dictis

eo loco quam verius. *Altera pars Antiquitatum Eftenſium* non ante ann. MDCCXXXIII. paullo majore quam quinque menſium ſpatio elaborata, neque ante ann. MDCCXL. typis Mutinenſibus excuſa fuit. Non minus quam ſexaginta documenta ſeu monumenta profert, quae Auctor omnino genuina putat, de maximi momenti rebus. Ea quidem & in hoc opere illuſtrat, & in duobus etiam aliis *Rerum Italicarum & Antiquitatum mediæ ævi*, de quibus alio loco. Sed cum partem primam Antiquitatum Eftenſium non ultra mortem produxiſſet Aldovrandini I. Marchionis Ateſtini, quae anno ſcilicet MCCXV. contigerat, alteram hanc exorditur ab Azzo VII. qui non modo Ateſtis, ſed & Anconae Marchio fuit ac Rhodigii Dominus. Hic quidem Aldovrandini frater erat, eique in Ateſtino Marchionatu ſucceſſit. Hinc de aliis Marchionibus ac Dominis, ac deinde agit de Ducibus Ateſtinis ad eundem Azzum originem referentibus, eorumque reſgeſtas narrando proſequitur. Poſtremo demum capite de Franciſco III. tum regnante loquitur, qui duodecimus inter Duces fuit. De-

Tem. X.

P

finit autem haec historia universa in anno MDCCXXXIX. Haec autem altera pars Antiquitatum Estensium priore satis digna existimata est a plerisque sapientibus aequisque iudicibus; ex quibus Joannem Lamium in ejus laudes effusum commemorare sufficiat. Romanis tamen bene multis & aliis, qui pro aula Romana stabant, valde displicuit, quod jura describat atque defendat Atestinae Domus in Ferrariam, ea ponens & amplificans, quae in libello scripserat anni MDCCXIV. quem libellum in manus hominum minime pervenisse diximus. Etenim probare contendit, celebrem illam mulierem Lauram Eustochiam cum Alphonso I. Ferrariensium Duce legitimo matrimonio fuisse conjunctam, atque hinc Alphonsum Caesaris patrem filium legitimum habendum fuisse. Nititur autem ea solvere, quae Romani objicere consueverant. Ex iis autem universis ille vult efficere, ut injuria fuerit an. MDXCVIII. per Clementem VIII. ditio Ferrariensis occupata, & Dux Caesar expulsus. At quoniam universo huic operi Antiquitatum Estensium Fontaninii calumnias in praeclarissimam Do-

mun, ex qua sunt Mutinensium Duces, cum de causa Comaclensi scriberet, occasionem dedisse diximus, aliqua jam alia scripta ad eandem causam pertinentia, quae multos extitere post annos, a nobis memoranda sunt. Etenim anno MDCCXX. quo tempore omnis lapis a Romanis Viennae movebatur, ut Comaclum Apostolicae Sedi restitueretur, Fontaninius novum libellum typis procudendum curavit, quo se se omnibus ac singulis contra Summi Pontificis in Comaclum jura post annum MDCCXI. prolatis respondere profitebatur *. Ille quidem praecipue contra Muratorii librum *Quaestionum Comaclensium* pugnabat; librum autem ipsius Muratorii postremum *Plenae*, de qua diximus, *Expositionis*, in qua demum omnia noster ad causam facientia collegerat, & omnes adversariorum rationes susceperat sibi solvendas, non aggredi videbatur. Hunc librum Fontaninii typis impressum, at non illico vulgatum Muratorius opera Dominici

P 2

* *Risposta a varie Scritture contra la S. Sede in proposito di Comacchio pubblicate dopo l' anno 1711.*

Mariae Jacobatii Mutinensium Ducis Romae Legati admodum mature habere potuit. Itaque, jubente Raynaldo Duce, statim alium librum conscripsit, quo Fontaninio se se opponeret, eodemque anno MDCCXX. non sine summa hominum admiratione, quo ferme tempore opus Fontaninii prodiit, & ipse suum publici juris fecit *. Quinam fuerit tantae litis exitus, cum Summo Pontifici Benedicto XIII. Comaculum reposcenti Caroli VI. Caesaris Augusti pietas obsistere noluisse, ex historia ejus temporis magis compertum est, quam ut id a nobis hoc loco narrandum esse videatur. Neque vero nostrum est dijudicare utrum veriora Fontaninius an Muratorius attulerit. Quaedam tamen hoc loco historicorum more adjiciemus, ut Muratorii famae, quamvis necesse non sit, magis magisque consulamus. Primo enim omnino falsum est, quod Cajetanus Cennius alique jaëtarunt, Carolum VI. Augustum in

* *Disamina di una Scrittura intitolata: Risposta a varie Scritture, e pubblicata in Roma nell'an. 1720. in proposito della controversia di Comacchio ec.*

caussa Comaclensi tandem edidisse sententiam, qua Muratorium & Atestinos causa prorsus cecidisse constiterit. Cum enim pius Imperator ob suum erga Sedem Apostolicam faepius cognitum amorem ac reverentiam induxisset animum Summo Pontifici obsecundare, inter Cardinalem Fabritium Paolucium pro eadem Apostolica Sede, & Cardinalem Alvarum Cinfuegos pro ipso Caesare VII. Kalend. Decembris anno MDCCXXIV. ita statutum est: *Possessionem Comadi a Sacra Caesarea Majestate eo duntaxat pacto dimitti, ut in eandem Sedes Apostolica restituatur ut prius, ita scilicet, ut neque eidem Sedi Apostolicae per hanc restitutionem aliquid novi juris tributum, neque Imperio vel Domui Atestinae quidquam juris sublatum esse censeatur; sed Sacrae Caesareae Majestatis, & Imperii, Domusque Atestinae jura omnia tam respectu possessorii quam petitorii salva remaneant, neminique ex hoc actu praejudicium ullum irrogatum intelligatur, usque dum cognitum fuerit ad quem Comadum pertineat. Illud etiam magis est advertendum & Justum & Dominicum Fontanios, & Justi discipulum aut clientem Cen-*

nium & alios quosdam nimis in Muratorium injustos extitisse, cum eundem *contra Sedis Apostolicae jura scripssisse*, aut *sequentum esse Protestantes Romani Pontificis adversarios*, aut *non ita se, ut Catholicum decebat hominem praecipue Sacerdotem gessisse* posuerunt. Pauci, enim acrius, quam Muratorius, iis quidem temporibus, vera Sedis Apostolicae jura, quod attinet ad Ecclesiae gubernationem, tutati sunt, ut vel ex uno libro *de ingeniorum moderatione* satis apparet. Jura quidem illa, quae *temporalia* dicimus, nunquam evertere cogitavit, quamvis aliqua ex aliis capitibus, quam plures Romani, repeteret. E libris etiam ejus editisque monumentis non pauca eruuntur, quae illa magis magisque constabulantur. Quod spectat ad Comaclum atque Ferrariam, si potiora esse Domini sui jura & putavit & scripsit, quid tandem ille peccavit? An in iis, quae pertinent ad historiae cognitionem, ipsi Protestantes vera nequeunt afferre? An iis in controversiis de rebus dumtaxat civilibus Clemens VIII. aut Clemens XI. falli non poterant? An quidquid aula Romana suum, aut sui Principes

esse putet, ne hiscere quidem Catholicus audeat, qui non satis ejusdem rationes videat, qui se se spoliari sentiat, qui contra suum jus eandem vel opinari vel agere possit ostendere? Somnia delirantium ista, non Theologorum sententiae. Equidem illos etiam non satis in Muratorium aequos fuisse dixerim, qui affirmant extitisse, cum Benedictus XIV. vellet ipsum Cardinalem creare (id sibi narratum tradidit Lamius, sed nos rem incertam in medio relinquimus) qui Pontificis animum, non secus ac si de homine ageretur Sedis Apostolicae inimico aut certe adversario, ab eo consilio deterruerunt. Sane Muratorius neque odio Romanae Curiae, neque contemptu eam causam agenda suscepit, sed ut Domino suo pareret, cui multis justissimisque de causis parere debuerat. Ejus etiam rei argumento est, quod cum a maximae dignitatis viro fuisset ille rogatus, ut contra Praefulem Antonellium Parmam atque Placentiam ad Sedem Apostolicam pertinere edito libro contendentem scriberet, non levia laborum suorum praemia relaturus, constanter abnuvit. Etenim con-

tra Romanam aulam pro Domino suo decertare nemini inhonestum videri posse respondit; at nullo modo decere, ut aliorum principum virorum controversiis se se immisceret: quae quidem responsio sapientibus etiam Romanis valde probata est. Denique ad Muratorii laudem vel maxime facit, quod in omnibus libris de causa Comaclensi aut affinis aliis controversiis contra Romanam aulam scribens animi moderationem constantissime tenuit. Hinc etiam factum est, ut non modo ii, quorum nihil intererat eam litem disceptare, sed etiam sapientissimi quique Romani, cum causam non possent, eximiam singularemque modestiam Muratorii, praesertim in tanta doctrinae gloria, summo-pere collaudaverint. Ab hujus certe postremae laudis genere plurimum Fontaninius absuit. Hic enim adversarium suum injuriis omnibus, quin & contumeliis, ingenuo quovis homine litterisque polito, ne dum Archiepiscopo indignis, sibi prosciendum duxit. Quod profecto non leviter mirari debeas, quod ante controversiam eam Fontaninium inter ac Muratorium summa amicitia, ac

prope familiaritas per annos fere decem intercesserat. Id ex epistolis pluribus inter illos ultro citroque datis facile cognoveris. Cum Fontaninius Muratorium in Comaclensi caussa adversari sibi rescivit, tanta excaudit ira, ut teterrimus ejus omni vitae tempore inimicus extiterit. Ut auctoritatem ejus ejusque librorum elideret, multa molitus est; quin & eo progressus, ut sanctissimos ipsius libellos, quamvis irrito conatu, Romae interdicens curaverit, & *haereticum hominem* haberi appellarique voluerit. Ceterum Pontificii etiam, quibus erat sapiens intelligensque judicium, eam agendi scribendique rationem summopere sibi displicere prae se tulerunt. Fuit inter eos celeberrimus etiam Marchio Franciscus Maria Otterius, qui licet Fontaninio esset familiaritate conjunctus, asperam ejus & injuriosam in Muratorium orationem diserte improbavit *. Hic etiam eo loco narrat, cum Fontaninius libellum edidisset in Muratorium Bionaeo illo fale re-

* *Storia delle Guerre avvenute in Europa ec.*
Tomo V.

fertum, quem nullius iudicio corrigendum commiserat, inde factum esse, ut in Pontificatu Innocentii XIII. quamvis Fontaninio faventis à Pontificiis aedibus removeretur & arceretur, in quibus antea à Clemente XI. cubicula obtinuerat. A sexcentis aliis huiusmodi rebus hoc loco memorandis abstinere, quod potius ad Fontaninii dedecus, quam ad ipsam Muratorii vitam proprie pertineant. Non me quidem latet, Dominicum Fontaninium id pluribus scriptis molitum esse, ut patrum omni invidia liberaret, ac Muratorium ipsum in Fontaninium injurias & contumelias coniecisse ostenderet. Ea de re inter ipsum ac Solium acriter dimicatum est *. At aequus lector, cui sit tota lis adjudicanda, nullo negotio statuet. Muratorius in libris de causa Comaclensi animi moderationem ita servavit, ut verbum, quod iracundiae aut arrogantiae reprehendas, nullo modo invenias. In *Examine primo Eloquentiae Italicae* Fontaninii, quo libro hic & Mura-

* Vid. Solium *vit. Murat.* edit. Aretin. in App. II. N. I. & III.

torium & alios doctissimos viros innumerabilibus affecerat contumeliis, aliquod ille verbum excidere sibi passus est, quod minus Muratorio dignum non injuria dixeris. Etenim vir, etsi natura lenissimus, de Vatiniano illo in se Fontaninii odio ad mortem usque fervato acerbius conqueritur. Ei quidem odio tribuit, quod is Castelvtrum aliis locis laudatum ad extremum tam male habuerit, postquam ipsius vitam ab adversario suo conscriptam legerat. Alia quaedam habet ad libri *de Italica Eloquentia* elevandam auctoritatem, ex quibus etiam Muratorium fuisse hominem, & humani nihil a se alienum habuisse, haud gravate fatearis. Quid tamen haec ad injurias in Muratorium atque convicia, quibus Fontaninius referat libros? Ea quidem, ingenue dicam quod sentio, etiam referre pudeat. Sed antequam hoc loco Fontaninium dimittamus, aliam ipsius cum Muratorio controversiam de re ad Artem Criticam pertinente explicabimus; cujus quidem principia paullo altius repetenda sunt. Anno MDCXCV. reliquiae detectae sunt corporis sancti hominis sub ara maxi-

ma Templi, quod *S. Petri in Coelo Aureo* dicitur, in urbe Ticini. Cum fuisset memoriae proditum, in illo eodem Templo *S. Augustini* corpus olim fuisse tumulatum, at deinceps absconditum, reliquias ipsas esse tanti Doctoris permulti crediderunt, permulti tamen negitarunt. Scriptis autem, ut fit, ex utraque parte editis illico pugnatum est. Ea lis instaurata est anno MDCCXXVIII. non sine magno animorum ardore. Episcopus quidem Ticinensis, ut mala, quae solent ex huiusmodi controversiis inter Christianos existere, prorsus averteret, quindecim tantummodo dierum intervallum utrique parti, quo suas aperiret deduceretque rationes, definivit. Romae tamen eodem anno MDCCXXVIII. Fontaninius *Dissertationem* edidit, ut revera corpus illud esse *S. Augustini Hipponensis Episcopi* comprobaret. Muratorius autem rogatus est ab amicis Canonicis Regularibus Lateranensibus, ab eo praecipue, qui ceteris summa cum potestate praeerat, ut de controversia, quae multum ipsis afferebat sollicitudinis (erant enim ex negantium numero) mentem suam aperiret. Cum is Fonta-

ninii perlegisset librum, neque satis firma veteris adversarii argumenta sibi viderentur, in contrariam sententiam opusculum eodem anno elucubravit*. Hoc tamen opusculum in eorum manus, quorum intererat, etsi magna celeritate conscriptum, intra quindecim illos dies ab Episcopo praefinitos pervenire minime potuit: qua de re typis eo anno mandatum haud fuit: sed & an. MDCCXXIX. nescio qua de causa omissum est, cum omnia iterum subirent praelum opuscula & cujusvis generis scripta ad eam controversiam spectantia. Itaque lucem non vidit nisi anno MDCCXXX. Lucae, quamvis Tridenti nomen Typographus editioni apposuerit. Cum id Fontaninius rescivit, dici vix potest, quanta ira sit in Ludovicum Antonium accensus. Eodem anno typis edidit libri titulum, quem quidem librum conscribere se se velle aut prae se ferebat aut revera cogita-

* *Motivi di credere tuttavia ascoso, e non iscoperto in Pavia nell' anno 1695. il Sacro Corpo di S. Agostino Dottore della Chiesa ec.*

bat *. Sane si liber titulo respondisset, quid acerbius aut quid in Muratorium contumeliosius potuisset afferri? Abstinuit tamen ab opere conficiendo Fontaninius. Ab amicis fuisse rogatum ut irae temperaret, facile credo. Vir tamen magnae auctoritatis Muratorio scripsit, multo plus quam amicorum officia, acrem valuisse reprehensionem ac minas Cardinalis Banchierii, qui tum apud Clementem XII. rerum summae praeerat. Hic etiam multa congerit Dominicus Fontaninius **, ut Muratorio creet invidiam, quasi de tanta controversia idem scripserit, postquam Ticinensis Episcopus, transactis iis

* Titulus erat hic. *Inventario delle imposture contenute nel libello de' Motivi contro l'Identità del corpo di S. Agostino, fatto dal Dottor Muratori da Modena a spesa del P. Calvi Procuratore Generale de' Canonici Lateranensi alla Pace, e in questo anno MDCCXXX. da lui pubblicato con falsa data di Trento, e poi nel mese di Novembre distribuito in pieghi per la posta del Papa in Roma, in dispregio del Giudizio e Decreto solenne di Monsignor Vescovo di Pavia ad mentem del Concilio di Trento ec.*

** In Praefat. ad lib. cui tit. *Discorsi Accademici di Monsig. Fontanini*.

quindecim diebus, sententiam pronunciaverat, quae quidem Romae confirmata fuerat, de S. Augustini corpore Ticini revera invento. At ex narratione nostra statim apparet, quid sit illi respondendum. Scripsit enim initio controversiae Muratorius. Edendum tamen opusculum anno MDCCXXX. ii curarunt, quorum id intererat. Praeterea uter hac etiam in causa moderatius egerit, Ludovicus ne an Justus, ex ipsis librorum indicibus quivis deprehendat *. Verum haec ubi de Muratorio agitur, leviora: ad majora veniamus. Jam enim ad se nos vocat ingens illud opus, quo *de historia medii aevi* maxime omnium bene meritus est Muratorius; quod scilicet *Rerum Italicarum Scriptores* inscribitur. Ille quidem jamdiu significaverat, sibi in votis esse, ut aliquis existeret, qui multos ineditos libros veterum scriptorum, per tabularia seu bibliothecas antiquiores teneis aut scombris laxas iunicas dantes

* Si plura desideras iis de rebus, epistolam lege apud Solium in vit. Muratorii Append. II. Num. III.

e situ eriperet atque illustraret *. Confusus aliquando fuerat id Apostolum Zenum esse facturum. At ejus ad Caesaris aulam advocatio totam eam spem interceperat. Tandem anno MDCCXVII. ipse operi manum admovit. Sciebat ille quidem jam ab anno MDC. fuisse doctum virum, qui Francofurti multos hujusmodi scriptores ederet unico majoris formae volumine, quod *Italiae illustratae Scriptores varii* inscriptum est. Sciebat etiam suis temporibus celeberrimum hominem Georgium Grevium edidisse tria volumina operis, cui titulum fecerat, *Thesaurus Antiquitatum & Historiarum Italiae*, quod quidem opus Grevii morte interruptum non multo post Petrus Burmannus vir & ipse clarissimus producendum susceperat. Haec tamen opera Muratorii desiderio minime faciebant satis. Etenim Auctores, qui sunt in iis *Collectionibus* maximam partem saeculo XVI. aut XVII. floruerant. Ipsi autem erat in animo scriptores colligere, qui ab anno D. ad MD. extite-

* *Riflessioni sopra il buon gusto ec.*

extiterant; neque vero universos, sed eos dumtaxat, qui de rebus scripserant, ea, quae vivebant, aetate, aut certe proximioribus temporibus, in Italia gestis; iis omissis, qui suas historias e remotissimis aetatibus, aut etiam ex orbe condito duxerant, aut saltem ex eorum historiis, partibus iis amputatis, quae non ad ea tempora referrentur. Solummodo Sicardi, Gualvanei Fiammae, & Ducis Andreae Dandoli historias integras exhibere constituit, tum quia tanti auctores eo videbantur honore digni, tum quia de rebus atque scriptoribus nos edocent, quorum notitiam alibi frustra requiras. Primum volumen hujus ingentis operis prodiit anno MDCCXXIII. at XXVII. non ante annum MDCCXXXVIII. ea praecipue de causa quod Italicum bellum anni MDCCXXXIV. impedimento fuit, ne possent ad eam editionem peragendam typographi, quae commissa erat, incumbere. His voluminibus universis post Muratorii mortem quorundam opusculorum ad eam *Collectionem* facientium, nec non *indicum*, quos vocamus, anno MDCCLI. alio

volumine adjectio facta est. Jam vero incredibile dictu est, quot labores exanthlare Ludovicus Antonius, ut, quod sibi proposuerat, exequeretur, quot per Italiam invisere tabularia, quot maximis occupationibus distineri debuerit. Praeter vulgatos jam libros, quorum plurimos etiam emendavit, bene multos e bibliothecis, praesertim Ambrosiana & Estensi, in pulvere delitescentes ipse protulit. Ejus nominis celebritas & gloria id etiam obtinuit, quod ceteris fere omnibus litteratissimis viris fortasse non contigisset, ut viri principes ipsi concederent, archiva scrutari, in quibus codices maximi pretii servari suspicabatur. E bibliothecis etiam Caroli VI. Augusti & Christianissimi Regis recondita quaedam accepit, ex quibus ea *Collectio* non mediocriter crevit. Victorii etiam Amedei Sardorum Regis hanc ipsam ad rem liberalitatem expertus est. Infimis ab eo precibus postulaverat noster, ut exemplaria describi fineret quarundam historiarum, quae videlicet in Pedemontii Monasteriis Novalesae ac Fructuariae nuncupatis ipse asservari cognoverat. Ei respondere di-

gnatus est Rex ille magnanimus litteris officii humanitatisque plenissimis *: tum earum historiarum exempla ipsa Mutinam ad eum deferri mandavit, quo Muratorius ipse & eadem suis oculis perlustrare posset, & qua potissimum veliet ratione describi curaret. Negari non potest, alios etiam doctos homines ad eandem praeclariissimam *Collectionem* operam suam contulisse. Praecipue Mediolanenses Palatini Socii, hoc est nobiles viri, qui tantam editionem curandam exornandamque cum Muratorio susceperant, libros bene multos eorum scriptorum ad veterum codicum fidem exactos, summoque labore ac diligentia castigatos variis lectionibus atque adnotationibus tam editis vetustiorum hominum eruditorum, quam novissimis auxere. Ex eorum Sociorum numero Philippus Argelatus, propter *Scriptorum Mediolanensium bibliothecam*. & alia quaedam opera doctos inter homines celebratus, maximam in hac editione sub oculis ipsius Mediolani peracta, Mu-

Q 2

* Muratorii litteras ad Vicerarium ac Vicerarii ad Muratorium adest Solius in Append. I. vii. Murat.

ratorio praestitit industriam, diligentiam ac fidem. Laudat etiam in *prooemio* priori volumini atque adeo universo operi praefixo Muratorius doctos alios viros in antiquorum codicum lectione satis exercitatos, qui hanc eandem editionem promoturi essent, Iosephum Antonium Sassium Ambrosianae bibliothecae Praefectum ejusque fratrem Franciscum Hieronymum, nec non Horatium Blancum Romanum Mediolani commorantem. Hujus autem, praeter alia, partes futuras esse dicit, ut historicos quosdam Italicos antiquiores quasi alia quadam lingua loquutos, ut nemo fere eos audeat attingere, Latinum in sermonem convertat. Sed partes in hoc opere longe potissimae Muratorii fuere. *Praefationes* ipse condidit, ac maximam *Animadversionum* partem. Multis in locis de scriptoribus ipsis fusissime differit, & qui suppositi cuique foetus, qui genuini debeant agnosci, disputat ipse atque dijudicat. Neque vero labori ulli in codicibus quoad fieri potuit per se visendis, ordinandis emendandisque pepercit. Carolus VI, Caesar hoc opus maxime sibi probari non obscure

declaravit, & ut in suis aedibus Mediolanensibus imprimeretur concessit, Sociis Palatinis expensas in eam rem, praeter operam, ut significavimus, liberaliter suppeditantibus. Quantopere vero probatum fuerit a doctis hominibus universis etiam extra Italiam dici vix potest. Omnium instar Montfoconii testimonium nobis erit, qui litteris ad Muratorium datis non modo de judicio suo gravissimo videlicet atque maximo, sed & universae Galliae Muratorii nomen ob eam rem summopere celebrantis, eundem certiorum reddidit. Non tamen defuere, qui aliquid in ea *Collectione* desiderarent. Scipio Maffejus voluisset, ut ab anno potius CCCC. quam a D. ipsa initium sumeret *, praemissis iis, quae Philostorgius, Zosimus, & Orosius de rebus Italiae scripserant. At Muratorius sibi proposuerat ab iis incipere temporibus, quae barbaries in Italiam inuenta multo profundiores radices egerat. Ea qualiscumque Maffei censura alteri scriptori ma-

* In lib. cui tit, *Osservazioni Letterarie* ec. T. I, Art. III,

gni nominis, qui facile Muratorium carpit, ansam dedit affirmandi, non esse *Collectionem* illam omnino perfectam, aliaque similia fastidii delicatissimi *. Verumenimvero id fecisse Muratorium quod fieri potuit, cum nonnullorum hominum suspiciones ac timores a quorundam archivorum vetera magni pretii monumenta servantium aditu ceteros prohibeant, neque majorem aut ex illo aut ex alio quovis homine diligentiam, quam ea, quae praestita sit, potuisse requiri, qui prooemia ipsa legerit, in quibus, quid actum sit ad subjectum librum illustrandum, fuscè declaratur, facillime concesserit. Praeterea in ipsa ad I. *volumen* doctissima *Praefatione* Muratorius causam late persequitur, quamobrem ea *Collectio* non posset ex omni parte absolutissima evadere. Quisquis eam legerit, statim videbit vitia scriptorum non posse in editorem refundi, neque meliora allata esse, quod ex aetatibus tanta barbarie involutis afferri meliora minime po-

* Vid. Tom. XLI. *Collection. Caloger*, opusc. cui tit. *Lettera sopra gli studj ec.*

tuerint. Fuit etiam qui, edita *epistola*, carperet editionem trium Villanorum ad codicem Muratorio commodatum a Joanne Baptista Recanatio Veneto patriciae gentis exactam. Displicuit ea *epistola* Florentinis bene multis, qui facile concesserunt plurimum tribus illis historicis fuisse splendoris a Muratorio allatum. Noluit tamen Muratorius ei *epistolae* respondere, quamvis a Sociis Palatinis rogaretur. Plura tamen Argelatio suppeditavit, qui provinciam ab amico recusatam ultro suscepit. Scripsit etiam contra Muratorium Ferdinandus Caccia Bergomensis opusculum sane ridiculum *, quod ille demonstraverat ** falso fuisse traditum a quibusdam, Magistrum Moysen Bergomensis, auctorem poematis *de Laudibus Bergomi*, ad tempora Imperatoris Justiniani II. pertinere. Ne hunc quidem hominem a se confutandum Muratorius censuit. At molestissimus omnium Muratorio fuit Gabriel Rossius Carmelita, magna quadam inter suos dignitate, non tamen aut pruden-

* Vide *Novelle Letterarie di Firenze* an. 1749. col. 342.

** Vol. V. *Script. Rer. Ital.*

tia aut doctrina conspicuus, quod is *Ricer-
dani Malaspinæ historiam Florentinam* edens *
recitaverat verba quaedam in aliis nescio
quibus editionibus omissa. Affirmabat enim
gravis historicus, D. Thomam Aquinatem in
Monasterio Fossanovæ occubuisse, cum ad
Lugdunense Concilium, ut *Fratrum Carmeli-
tarum Ordinem destrui curaret*, iter arripuisset.
At Carmelitam ea verba magis exasperave-
rant, quæ subjecerat Muratorius: *fortasse vi-
ro prudentissimo & sanctissimo Carmelitica Fa-
milia oneri potius quam utilitati Christianorum
reipublicæ futura videbatur*. Itaque longissimam
Rossius ad Muratorium dedit *epistolam XVIII.*
kal. Maii anno MDCCXXXIX. ut suam ipsi
obtruderet opinionem, *Ordinem Carmelitarum
ante Concilium illud a Sancta Sede fuisse proba-
tum*, eundemque ad ea verba revocanda
qua monitis, qua argumentis, qua etiam
minis impelleret. Respondit ei Muratorius.
eodem anno IV. kalend. Maii epistola, qua
nihil humanius aut modestius, nihil etiam

* *Tom. VIII. Rec. Italicar.*

sapientius aut doctius excogites * ; neque tamen a sententia discedere se se posse significavit. Minime quiescendum sibi ratus importunus Carmelita, alia epistola conviciis potius quam rationibus referta iterum eundem interpellavit. At Muratorius, cui nulla, nisi temporis avaritia videbatur honesta, non amplius ei respondendum esse judicavit. Postremo loco animadversio alterius generis in hoc opus commemoranda est, quam scilicet Muratorius, qui semper in bibliothecis habitaverat, multo magis quam contra se dicentium reprehensiones, reformidare potuisset. Cum enim in *Prooemio ad historiam Petri Cirnei de rebus Corsicis* ** vocasset ille Corsos *ferocium atque agrestium hominum genus*; quae verba quidem ad saeculum praefertim, de quo sermo erat institutus, referri facile poterant, Corsus non defuit, qui statim tacito nomine plenas furoris ad eum litteras daret, mortem etiam ei comminatus;

* Epistola Rossii recitatur a Solio in *Append. ad vitam Muratorii*, quemadmodum & illa Muratorii ad Rossium.

** *Velam, XXIV. Rerum Italicar.*

nisi, quod scripserat in Corforum dedecus; retractando corrigeret. Nihil tamen veritus est Muratorius, quam inhabitaret ipse regionem, & quantum inter minitantium temeritatem & facinororum hominum audaciam interfit, probe agnoscens. Itaque litteras eas illico flammis tradidit; neque vero ille nebulo, quisquis tandem fuerit, ultra contumelias illas ac minas progressus est. Quamquam ea *Collectione* Muratorius, ut diximus, de re litteraria fuit optime meritus, quid is in antiquarum rerum scientia & arte illa critica valeret, multo magis ostendunt *Antiquitates Italicae mediæ ævi*; opus videlicet, non minus quam *prima pars Antiquitatum Etruscorum*, litteris omnium gentium linguisque celebratum. Jam ab anno MDCCXIV. cum Italiae bibliothecas & archiva inviseret, animo specimen tanti operis efformaverat. At enim quando pene infinitam vim ac materiam ad idem facientem intra manus quoddammodo crescere sentiebat, illud differre longius, quam voluisset, plane coactus est. Anno MDCCXX. cum gravissime aegrotasset animum pene desponderat; neque se se am-

plius ipsi perficiendo parem futurum existimabat. Sed, pristinis recuperatis viribus, supremam eidem potuit manum imponere; quin & ea, quae fere omnia Italico sermone scripserat, ut exteris etiam hominibus satisfaceret, in Latinum convertere. Non tamen hoc opus ante annum MDCCXXVIII. typis imprimi coepit; neque ante annum MDCCXLII. absoluta impressio est expensis & curis ejus, de qua dudum loquuti sumus, Mediolanensis Palatinae Societatis. Comprehenditur autem opus universum omnino sex maximae formae voluminibus *Dissertationes quinque ac septuaginta* complexis. *Dissertationibus* iis, praeter monumenta plurima, quidquid ipse affirmat comprobantia, plurima etiam opuscula nondum edita adnectuntur, quae scilicet, cum *Rerum Italicarum Scriptores* illustraret, nondum in ejus manus pervenire potuerant; pene etiam infinita numerorum medii aevi copia subjecta. Ita sex haec volumina illorum septem ac viginti *Rerum Italicarum* appendicem ipse haberi voluit. Sed jam aliquid enucleatius a nobis asferendum est, quo nostri sequamur instituti

rationem, ut specimen tanti operis exhibeamus. Ipse quidem animadverterat Romanarum & Graecarum quoque rerum a plurimis eruditionem fuisse cultam, qui vix novi argumenti quidquam reliquerint posteris, nisi nova forte antiquitatis monumenta efodiantur; at non idem de *Antiquitatibus medii aevi* esse dicendum. Sigonius quidem, si non primus inter eos, qui de rebus Italiae medii aevi commentati aliquid fuerint, certe omnibus iisdem scriptoribus praeferendus, elucubratis de *Occidentali Imperio*, ac de *Regno Italiae* libris, latissimam viam ceteris aperuerat, ut in eam eruditionis partem invaderent. Ejus enim vestigia quidam magni viri sequuti, enixius tamen & crebrius exteri quam Itali, omnem operam suam ad illustranda barbarica saecula contulerant, neque vero levem ea re gloriam sibi pepereant. Verumtamen in ea vastissima, si fas est ita loqui, studiorum regione illi tam parum ad ea tempora progressi fuerant, ut adhuc latissima spatia primo occupanti patere viderentur. Animadverterat etiam Muratorius studium *Antiquitatum medii aevi* non

tantum amplificandae eruditionis gratia, sed etiam spe referendae voluptatis, ac novae cujusdam gloriae sibi comparandae a viris doctrinae deditis esse colendum, cum tot ritus, nec modo sacri, sed & civiles atque domestici, qui sunt nobis in usu, non a Graecis aut Romanis illis aetatibus, sed a barbaricis repetendi sint, nec fieri posse, ut quid egerint majores nostri, qui mulro propius ad nos quam antiquiores illi Romani Graecive pertinent, sine magna & ingenuo quovis homine digna delectatione teneamus. His praecipue de causis hoc tantum opus ille conscribendum sumpsit. Iis autem fere omissis, quae Sigonius ac ceteri attulerant, in regione, ut ita dicam, aliis incognita versatus est, ut in densissimis tenebris, nemine facem praeferente, ipse vias & itinera quodammodo struere sibi & explanare debuerit, quo posset in abdita veritatis penetralia tandem aliquando pedem inferre. Quantopere nimirum ille laboraverit in codicibus, quibus uteretur, seligendis, quin & legendis ac describendis, cum innumerabiles evolvisset per Italiae bibliothecas ac ta-

Bularia membranas Imperatorum aut Regum; five Summorum Pontificum & Episcoporum & leges & placita, & Monasteriorum erectiones, iis aut aliis concessa beneficia, potentium hominum testamenta, donationes, aut publicarum aut privatarum rerum narrationes, aut alia huiusmodi sexcenta complexas, facile sapiens lector intelligit. Ex immensa tot chartarum farragine inutilia repudians, & optima quaeque seligens eo pervenit, ut qualis Italiae facies per plura saecula fuerit, post Barbaros in eam illapsos, nobis ostenderet, simulque specimen conditionis ac status temporum eorundem nobis exhiberet. Nam primo quidem de Regibus, Ducibus, Marchionibus, Comitibus & Magistratibus ad vetus Italiae regnum pertinentibus differit; deinde varios civici regiminis ritus ac privatorum hominum exponit mores: de libertate ac servitute, de judiciis, de militia, de legibus, nummis, artibus, litterarum studiis, linguae Italicae origine, mercatura, reliquisque similibus verba facit. Pulcherrimae quoque sunt maximam partem atque utilissimae illae *Dissertationes*,

quibus expedit quidquid ad politicum regimen Italiae post annum Christi millesimum pertinet; quo videlicet tempore plurimae civitates libertatem & quamdam aristocraticae Reipublicae formam adeptae sunt, at postmodum intestinis agitatae discordiis Principum seu Regulorum dominationi se se subjecerunt. Quod spectat ad Christianam Religionem atque Ecclesiasticam disciplinam, habet ille quaedam in his libris, nimirum quibus aliquid lucis rebus sibi propositis ad differendum addere se se posse perat. Reliqua enim intacta dimittit, non quod, ut cavillatur Cennius, ab hoc studiorum genere, quasi non admodum sibi exculto, refugeret, sed ne, quod vetere proverbio vetamur, non sine fastidio lectoris actum agere videretur. Pleni enim sunt doctorum hominum libri, plenae sunt iis rebus historiae, ut aliquid novi difficile possit afferri. Opus autem universum a declinatione Romani Imperii ad annum Christi MD. ducitur. Ceterum hoc etiam in opere quaedam invenies non modo medium, quod sibi proponit, aevum, sed & antiquius illustrantia. Ut unum asseram exem-

plum, *Dissertatione* XXXII. sub initium, duobus e Suetonii *de illustribus Grammaticis* libro locis allatis, comprobat fuisse Romae per vetera illa tempora scholas, in quibus adolescentes non modo Graecam, sed & Latinam linguam edocerentur. Eadem volumine II. *de Perfecta Poesi* Muratorius dixerat, sed in *enarrationibus* Antonius Maria Salvinus inficiatus fuerat. Verum haec obiter. Hoc opus a Muratorio sub extremum tempus aetatis in epitomen vernaculo sermone contractum est. Amicis videlicet id efflagitantibus indulgit, cum nullum eo tempore prae manibus tractandum haberet argumentum. Laborem hunc circa medium annum MDCCXLVIII. subire incoepit, & opus ad umbilicum perduxisset, nisi obstitisset valetudo. Cum haud aliud superesset ea ratione contrahendum quam dimidia *Dissertatio* LXIX. ac LXX. (nam postremas etiam ad quintam supra septuagesimam duxerat ad exitum) oculis captus est, ac non multo post e vivis ereptus. Sed ante mortem illius totam absolvit epitomam. Petrus Hercules Gherardus, qui Praefecti biblio-

bibliothecae Estensi gerebat vices, Muratorii familiaris ac necessarius. Comprehenditur autem haec epitome tribus dumtaxat mediocris formae voluminibus. Etenim consulto Muratorius maximam partem amputavit veterum monumentorum, & omnia ea parva Chronica (sic enim dicuntur) omisit, quae scilicet in sex illis majoribus voluminibus legas, auctorum tamen locos exhibet, qui vel maxime faciunt ad id, quod sibi proposuit. Aliqua etiam adjunxit, aliqua mutavit, aut correxit, ut ex aliqua parte novum opus effecerit. Exemplum ejus rei suppeditat *Dissertatio XIV. de Servis ac Libertis antiquis*. Eam siquidem auget initio *Dissertationis*, quam de argumento eodem separatim elucubrauerat ac Socii Columbarii Florentini. an. MDCCXLVII. I. *memorabilium suorum volumine* in lucem emiserant. Evulgavit autem haec tria volumina post Muratorii mortem Solius ejus sororis filius anno MDCCLI. Venetiis, ac postmodum alias alii. Romae, Neapoli, atque aliis in locis. Sed cum in hoc opere, quemadmodum & in illo majori, nonnulla sint, quae aulae Romanae displiceant, Cajetanus.

Cennius iterum edendum anno MDCCLXV. & praefationibus suis castigandum emendandumque suscepit. Negari sane non potest hoc in opere Cennium de Muratorio magnifice loqui, ac multa in horum librorum laudem praeclara scribere. Suis autem in *animadversionibus* Cennius duo sibi praecipue ostendenda sumit. Alterum est, Muratorium, quod attinet ad dominationem Apostolicae Sedis, quam *temporalem* dicimus, omnino commentitias opiniones fuisse sequutum. Id tamen non odio, aut pravae voluntati hominis Cennius ipse tribuit, sed tantum ex eo evenisse dicit, quod a juventute Muratorius Atestinae Domui obsecundare studens ea diligentius conquissiverit, quae dominationi eidem adversari viderentur, nec satis ea perpenderit, quae maturius animadversa facile ipsum a sententia discedere coegissent. Alterum est, magnum opus *Rerum Italicarum*, *Antiquitates medii aevi*, nec non *Annales Italiae* (de iis suo loquemur loco) quod spectat ad eandem Romanorum Pontificum dominationem falsis inniti opinionibus jamdiu a Muratorio in libro *Plenae Expositionis*, de quo

fatis alibi diximus, acerrime propugnatis. In prima *Praefatione* Cennius praesertim, quid sibi praestandum sumat, exponit, consilii-que sui rationes aperit. In altera *Dissertationem* XXXIV. oppugnat, in qua donationes, quae Apostolicae Sedi factae narrantur, a Muratorio non sine contemptu aliquo rejiciuntur. In tertia demum Cennius evertere illa conatur, quae Muratorius de *Origine Cardinalium*, de *Canonicis Patriarchalium* Romae, ac de *Praebendis*, de *Monasteriis* item *Romanis*, de *Bonis ac Redditibus Ecclesiasticis*, de *Indulgentiarum origine*, de *origine Ecclesiastici Principatus*, aliisque similibus attulerat, quae Romanis probari minime potuerunt. Ut paucis omnia complectar, eo Cennius tendit, ut pro juribus aulae Romanae, quoties ea Muratorium aggredi putat, in arenam descendat, quod quidem ita praestat, ut hoc quidem in opere multo se se modestiorem ac moderatiorem, quam Fontaninius, exhibeat. Quaedam de *Chronologia* ac de *Chorographia* Muratorii obiter attingit, de quibus hoc saltem loco, ut brevitati consulamus, nihil nos dicere necesse est. Jam vero tum

ingens illud sex voluminum opus Latinum de *Antiquitatibus mediæ ævi*, tum hæc Italica illius *Epitome* maximi fieri solet, ut initio significavimus, ab universis hominibus germanæ solidæque doctrinae laude præstantibus. At enim Franciscus Antonius Zaccaria de *Antiquitatibus mediæ ævi* verba faciens *, conqueritur multos errores intervenisse in describendis veteribus chartis, quas *Diplomata* dicimus, quæ quidem rerum, de quibus agitur, fundamenta sunt. Sane quod attinet ad codices ipsos a Muratorio visos, viderat autem ipse plerosque, neque fidem in iis describendis, neque diligentiam, neque doctrinam ei defuisse nunquam Zaccaria dixerit. Quod pertinet ad reliqua, nullum ab orbe condito scriptorem labore ac diligentia præstitisse nostro, quis non facile concefferit? Erat autem idem Muratorius in veris cognoscendis codicibus, & a falsis, qui sæpius occurrunt, distinguendis acumine & experientia omnino singulari: eam siquidem jam ab eo tempore sibi com-

* *Storia Letteraria ec. Tom. II.*

paraverat, quo primum Ambrosianae ac de-
 mum Atestinae bibliothecis, quae codicibus
 iisdem mirum quantum abundant, summa
 cum diligentia praesidebat. Huc etiam illud
 accedit, quod Muratorius sui Ducis ac Re-
 gis Magnae Britanniae commendatione mu-
 nitus archiva scrutari, codicesque inspicere
 potuerit maximi pretii, quod ceteris etiam
 doctrinae gloria florentibus hominibus non
 ita facile datur. Quamobrẽm si neminem aut
 fere neminem hac aetate, quod pertinet ad
 veteres codices exhibendos, antecellere Mu-
 ratorium auctoritate dixero, non erit qui
 nisi injuria me temere loquutum esse cau-
 sari possit. Hae rationes, inquam, facile mi-
 hi persuadent, illum Muratorii aemulum de
 typographi erratis illa scripsisse. Fatendum ta-
 men hoc loco est codices nonnullos a Mu-
 ratorio quamvis exoptante inspicere non po-
 tuisse (quis enim omnia possit?) sed ab a-
 nticis descriptos ac sibi missos typis consi-
 gnandos curasse. Si multos in eorum descri-
 ptionem errores irrepsisse Zaccaria velit, ni-
 hil est quod magnopere hoc loco repugnem;
 quamvis optandum esset, ut aliquam senten-

tiae suae rationem vir doctissimus aperiret ; ne moti ejus auctoritate , ea dubia esse existimemus , quae clarissimam faciem in barbarorum temporum densissimas illas tenebras pedem inferre volentibus praeferre possunt : Sed quoniam de iis aliquid diximus , qui codices antiquissimos Muratorio suppeditarunt , iniquum omnino esset tacere de Caroli Emmanuelis beneficio , quem non semel in Muratorii vita maximi honoris causa nominamus . Ipse quidem anno MDCCXXXIV. cum esset in castris S. Benedicti , Mutinensium Ducis Oratori admodum honorifica de Muratorio verba fecit . Hic ea de re certior factus ad Marchionem de Ormea sibi amicitia conjunctum statim litteras dedit , rogans ut Regi maximas nomine suo gratias ageret , eodemque tempore non dubitavit monumenta petere , quibus opus de *Antiquitatibus Italicis* , quod habebat in manibus , augeretur . Placuit officium Regi , qui statim Ludovico Caissotio Senatus Taurinensis primo Praefidi mandavit , ut scripta , quae petebat Muratorius , eidem submitterentur . Itaque brevi per eum doctissimum virum de-

scripta exemplaria Muratorius habuit membranarum sane plurium aliarumque chartarum ad Ecclesias aut Monasteria Pedemontii pertinentium, quae quidem in ipsius Regie erant archivo. Ne saepius de rebus omnino similibus instituam sermonem, hoc loco memorabo, quod idem ille Rex, non modo belli, sed & pacis artibus nobilissimus, ab eodem Muratorio rogatus iussit, ut omnes antiquae inscriptiones, quae in Sardinia essent, tum aliquae Pedemontii haecenus ineditae, quin & illa Arcus Segusiani non sine aliquo errore per Maffejum exhibita, describerentur, & ipsi mitterentur Muratorio. Iis autem inscriptionibus hic uti volebat ad opus inscriptum *Novus Thesaurus Veterum Inscriptionum*, de quo jam a nobis institui sermonem ipsa temporum atque rerum efflagitat ratio. Primis annis, quibus Mediolani versabatur Muratorius, *Collectionem veterum Inscriptionum* efficere cogitaverat, quas Gruyerus, Reinesius ac Sponius omisissent. Itaque multas jam ad id inscriptiones ipse conquisierat atque adinvenerat, multas item subniserant eidem amici, praecipue Joannes

Ciampinius, Prosper Mandosius, Antonius Felix Marfilius, Julius Antonius Averoldus, Apostolus Zenus, Antonius Magliabechius. Opus insigne a Fabretto editum, in quo multa marmora expressa erant, de quibus ipse Muratorius differere voluisset, causa fuit cur hic eo tempore cogitationem eam omnino deponeret. At cum *Dissertationes de Antiquitatibus Italicis* absolvisset, aliquid etiam in eo genere novi se se praestitutum speravit. Quamobrem novam suscepit *Collectionem* adornandam, in qua veteres posuit inscriptiones maximam partem ineditas, aut e manu scriptis erutas codicibus, aut ab amicis sibi submissas, aut etiam e libris jamdiu typorum ope impressis descriptas. Haec tamen e libris descripta, ut id obiter contra Cennium *Collectionem* eam inerudite aspernatum adnotemus, minima pars earundem inscriptionum dicenda est. Ceterum habuit in animo tum in Gruteri, tum in Reinesii, tum in Sponii aut Fabretti voluminibus contenta relinquere, nisi quando aut integra cum adjunctis essent afferenda aut emendanda. Quibus autem de causis factum

fuerit, ut nihilominus aliquas identidem inscriptiones eodem modo, quo sunt in iis libris, repeteret, infra enarrabimus. Jam vero ea tota *Collectio* quatuor constat maximae formae voluminibus, quorum primum anno MDCCXXXIX., alia consequentis annis impressa sunt Mediolani. Inscriptiones plerumque Muratorius opportunis adnotationibus illustrat, quamvis & magnam hujus operis partem alii sibi vindicent. Primum quidem volumen, praeter doctissimum ipsius Muratorii *prooemium*, quo consiliorum suorum in hoc opere omnem rationem aperit, *Dissertationes & epistolas Josephi Bimardi la Bastie Parisiensis Montis Seleuci Baronis atque Inscriptionum Academiae Socii* exhibet; tum inscriptiones habet, quibus quidquid pertinet ad antiquorum Deos, ad Tempia, Aedes sacras, Aras, sacra Dona, Kalendaria, Pontifices, Sacerdotes, aliosque sacrorum Ministros, Augustos, Caesares, ac Reges, Consules, Opera & loca publica & privata, demum Collegia varia, satis illustratur. Alterum volumen ea continet, quibus de Senatus consultis, de

Plebiscitis, Decretis & Actis publicis, de Spectaculis, Ludis, & aliis populi oblectamentis, de Magistratibus ac majoribus Dignitatibus, de Militaribus, de Officiis Domus Augustae, de Artibus, Officiisque minoribus, de Libertis & Servis Domus Augustae, de Geographicis, Civitatibus, aliisque locis, de Municipiis & Coloniis, de affectibus parentum erga liberos edocearis. Volumen tertium affectus liberorum erga parentes, nec non conjugum, fratrum, cognatorum & amicorum inter se, patronorum ac dominorum erga liberos & servos, atque istorum erga illos, tum vero promiscuos libertorum servorumque persequitur. Alias habet *Inscriptiones*, quas *Singulares*, *Minutiores* & *Quisquilias* nec non quas *Dubias* aut *Spurias* ipse Muratorius appellat. In ipsa voluminis IV. fronte sunt *Inscriptiones Christianae*. Iis *appendix* subjicitur *Inscriptionum*, quas post susceptam eorundem editionem Auctor ab amicis sibi communicatas excepit. Hinc inspicitur *Inscriptio Sigea antiquissima cum Commentariis & Notis Clarissimi viri Edmundi Chisullii S. T. B.*

Magnae Britanniae Regis a Sacris, & cum ejusdem aliis commentariis & notis Psephisma, ita enim dicitur, *Sigeorum ad honorem Regis Antiochi*. Est & *Dissertatio ejusdem Chisullii de Nummo CKΩΠI inscripto*. Ad extremum *Descriptio urbis Romae* a clarissimo viro Philippo Labbeo Societ. Jesu edita, nunc vero cum *lectione duorum manu scriptorum codicum bibliothecae Vaticanae* iterum typis edita. Hoc vastum opus ab ea perfectione, quam habere potuisset, non parum abest. Attamen etiam in eo Muratorium facile agnoscas. Eduardus Corfinius cum in aliis, tum in his etiam, de quibus verba facimus, liberalissimis studiis maximam ingenii doctrinaeque gloriam adeptus, postquam *Muratoriani Thesauri* naevos indicasset, ea tamen gravissime pronuntiavit *. Si ex ingenti illa *Muratorii Collectione* naevos illos sustuleris, nemo est certe qui vel plures in marmoribus notas viderit, aut qui plures erudite ingenioseque explicaverit. Maffejus autem **, quod ad eam, inquit, *Collectio-*

* In prolegomenis ad opus de votis Graecorum.

** In praefatio ad *Museum Veronense*.

nem maximam pertinet, perpendendum est; aliorum opera saepe in his uti oportere; itemque opere in longo fas esse obrepere somnum. Inscriptiones sine erroribus conglobare impossibile factum est. Adde velim, non huic praecipue studiorum generi, quamvis & in hoc praestet, virum doctissimum se dedisse majoribus intentum argumentis atque occupatum rebus, haec interdum velut aliud agentem tractasse puto. Ut ut sit, permultas praestantesque ab eo vulgatas esse epigraphes, quae alioquin adhuc delitescerent, omnino constat, multaque etiam enarrata & tradita, quae antiquam eruditionem non minimum illustrent & juvant. Ex Corfinii ac Maffei testimoniiis facile statuas, quid sit de his Muratorii libris omnino sentiendum. Verumtamen; ut horum voluminum elearent auctoritatem, plura scripserunt Joannes Henricus Leichius Lipsiensis, Henricus Cannegetierius, Cristophorus Saffus, Franciscus Antonius Zaccaria, ac Joannes Gaspar Hagembuchius, & hic quidem non modo importunus extitit in Muratorium, sed & inurbanus. Quoniam operis hujus defensionem contra obrectatores nunquam voluit suscipere Mu-

ratorius curis aliis, quas multo majoris existimabat momenti, distentus, nihil de iis, quae contra ipsum objecta sunt, longius commentari necesse est. Nam & esse naevos in opere illo, quod non modo ex Muratorii laboribus atque vigiliis, sed & ex aliorum curis in tantam excrevit molem, ultro concessimus, & ea, quae reprehensione aliqua digna erant, fuisse ab iis amplificata, qui carpendi tantum virum rimabantur occasione, facile sibi quisque persuaserit. Attamen hoc loco facere non possum, quin breviter adnotem, quae contra Ludovicum Antonium aut inimici, aut invidi, aut certe adversarii attulerunt, hujusmodi maximam esse partem, ut de iis ultro noster in *Praefationibus* tum ad I. tum ad IV. volumen fuisse differuerit, quibusque de causis non illa quidem neglexerit, sed non tanti fecerit, ut ab hoc opere sibi abstinendum esse duxerit, satis ostenderit. Quod enim aliqua contra consilium ejus irrepserit in hanc *Collectionem* inscriptio ab aliis etiam *Collectoribus* allata; primo quidem id universis post Gruterum laborem eundem subeuntibus, ut

noster admonet, objici potest, deinde facilius in hac ipsa *Collectione* fieri potuit, etsi non ita saepe factum esse deprehendas. Nam & in Sponii & in Fabretti voluminibus *Indices*, quos dicimus, *rerum* desiderantur. *Indiculum* ille sibi paraverat ad *Inscriptiones Fabretti*, at nequaquam eum laborem ad *Sponianas Inscriptiones* assumpserat: de quo quis eum nisi injuria reprehendat? Quod pertinet ad *Gudium*, de quo, perinde ac si descriptus a Muratorio fuisset, tantas *Hagembuchius* tragoedias excitat, haec ille habet in I. voluminis *Prooemio*. Ubi animadverti potiore illarum (*Gudianarum Inscriptionum*) partem ex *Pyrrhi Ligorii* scriniis fuisse depromptam, cujus fides dubia & sublesta est apud *Eruditorum* non paucos, uti infra ad *Classem Primam* non diffitebor, ipsamque praeterea *Collectionem* incuria editorum perfecto *Indice* fraudatam fuisse eam insalutatam dimisi, ac si ignota prorsus mihi fuisset. Eoque magis id mihi dicere sum arbitratus, quod permultas ex meis *Ligorianis* apud ipsum expiscatus desiderari hic animadverti, ita ut is aliis fontibus ac *Tomis* usus videatur, quibus non eadem forsitan erat

Sinceritas & legitima origo, atque in Farneſianis Ligorii Tomis. Majoris omnino ponderis illud videtur eſſe quod objicitur, multas hujus Theſauri inſcriptiones ita eſſe deſcriptas, ut ingentes in iis errores quotidie deprehendantur. Hinc illae querelae, hinc illae Graeculorum etiam, ſi Superis placet, exprobrationes. Solet enim ea eſſe adverſariorum Muratorii non omnino mendax, ſed exaggerata altius oratio. Iis, antequam exiſterent, ſatis in *Prooemio I. voluminis* Muratorius, meo quidem judicio, reſponderat. Cum enim non ſine debita laude ſingulorum doctorum hominum nomina recitaſſet, qui vel inſcriptionum exempla, vel etiam Latinas interpretationes ſibi ſuppeditaverant, non omnes illos in marmoribus aut ſchedis exſcribendis accuratiſſimam operam collocare potuiſſe aut voluiſſe, modeſte conqueſtus eſt. Fatetur etiam aliquando ſe huiusmodi inſcriptiones accepiſſe, ut de ſententia iisdem ſubjecta, quin & de valore notarum divinandum fuerit. Id autem ex eo quoque dicit accidere, quod interdum occurrant marmora ita a tempore attrita, ut non quaedam litterae tan-

sum, sed etiam integrae lineae perierint. In hujusmodi monumentis aliisque similibus excubendis doctos etiam homines inter se discordes non raro esse vel ipsa experientia sibi compertum esse testatur. An erit aliquis tam injustus, ut dicat, debuisse Muratorium tale opus aggressum marmora ipsa accuratius consulere, & quae prave fuisse ab amicis descripta vel suspicari posset, diligentiori studio restituere? At, amabo, cui tantum temporis aut pecuniae suppetit, ut universas tam intra quam extra Italiam regiones, ex quibus veteres haustae fuerant inscriptiones, peragrarere aut velit, aut possit? Verrum, ut quisquis humanitate non caret, Muratorium, siquid in hoc peccavit, excusatum habeat, legere illa sufficiat, quae sub finem *Praefationis in IV. Volumen* ille scribit. *Quum Inscriptiones*, inquit, *ab amicis identidem acciperem, easque sine mora Mediolanum mittere deberet, quasdam interdum notas addidi, non pacata consultatione digestas, sed tumultuaria festinatione conceptas, Norunt eruditi... quam multa corrigere possit, qui sua a Typographis descripta accipiat, antequam praelo tradantur. Hujusmodi*

modi beneficiorum expers ego fui . . . Reliqua vero ad examen revocare mihi neque vacavit , neque licuit , adeo non dicam prostratum , certe a meditatione alienum animum meum calamitates Patriae meae anno praecipue MDCCXLII. effecerunt . Alia possem in Muratorii defensionem afferre ; sed jam in iis etiam afferendis me longiorem fuisse sentio . Jam igitur de controversia dicamus aliquid ob formulam *de Ascia Sepulchrali* cum Maffejo habita . Nam & ea de re Muratorius in primo hujus *Thefauri* volumine fufius agit . An. MDCCXXXVI. *Dissertationem* elaboravit Muratorius *de Ascia Sepulchrali* , ac de Formula *sub Ascia dedic.* , quae scilicet in antiquis reperiuntur quibusdam inscriptionibus . Typis ea impressa est anno MDCCXXXVIII. Romae . Putat ipse , Asciam insculptam fuisse tumulis , tumulosque sub Ascia fuisse dedicatos , quo moneantur heredes aut possessores agri , in quo sepulcra condita erant , ut eadem a dumis , cespitibus , vepribus , aliisque aut herbis aut arbusculis molestis expurgarent , & sic evaderet carorum hominum cineri terra levior . Ita Muratorius non modo alias doctorum ho-

minum hac in re sententias sed & Maffei explicationem oppugnaverat censentis, nihil aliud Asciae figura significari voluisse, nisi ea monumenta de novo fuisse excitata, & nulli antea patuisse. Statuerat id Maffejus in *Antiquitatibus Galliae* an. MDCCXXXIII. editis *epistola* X. quae est ad Muratorium ipsum. Jam vero se se ab eo demum oppugnari molestius tulit, quam noster ullo modo suspicari potuisset; neque modo acrius fortasse, quam par fuerat, Muratorio suis in *Observationibus litterariis* respondit *, sed & Romae cum primario quodam viro de Muratorio, tanquam de homine jam ab annis triginta sibi molesto, obloquutus est. Cum id rescisset Muratorius etiam hac vice satis ostendit, quam miti esset animo facillique natura. Quanquam enim de amicitia tam levem ob causam dissociata vehementer doluit, etenim illa multorum annorum usu crebris litteris ultro citroque datis confirmata videbatur, honorificentissimis verbis de Maffejo mentionem fecit, quotiescumque fecit.

* *T. IV. delle Osservazioni Letterarie p. 223. e seg.*

Dissertationem illam suam in Latinum convertit sermonem, ac volumini primo *Theauri Inscriptionum*, de quo nunc loquimur, inseruit, nec non responsionem ad ea subiecit, quae novissime a Massejo fuerant allata. At iis demum verbis universam conclusit orationem. *Rogandus est doctissimus Marchio, ut & ipse pacatiore animo ista excipiat, neque putet, quod sibi interdum contradicatur, quidquam detrahi amplissimis suis in re litteraria meritis. Equidem ab iis agnoscendis ac depraedicandis, quantum potero, faciam, ut me nullus affectus ne in posterum quidem avertat.* Sensit fortasse Massejus in objurgando Muratorio sui se se dissimilem praestitisse. Quamvis ergo suam illam opinionem de *Ascia Sepulchrali* etiam in *Musaeo Veronensi* produceret, ab acribus quibusque verbis in adversarium suum prorsus abstinuit; quin imo novas a Muratorio pro sua sententia rationes in volumine I. hujus *Theauri* allatas omnino reliquit intactas. In aliis etiam non ita magni momenti rebus a Massejo Muratorius dissensit, ut ex hujus *Dissertatione* XXXIV. & XL. de *Antiquitatibus Italicis*, aliisque constat. Amicitia tamen in-

S 2

ter tantos viros, ipsa similitudine virtutis atque doctrinae facillime instaurata, non amplius aliquid ob opinionum diversitatem detrimenti cepit. At Muratoriana *Dissertatio de Ascia* eodem anno MDCCXXXIX. a duobus aliis doctissimis viris, Jacobo Martinio scilicet atque Alexio Simmaco Mazzocchio oppugnata fuit *; quorum argumentis respondere semper Muratorius distulit, aliis nimirum occupationibus impeditus; etsi Mazzocchio, quod ab eo, quamvis ea in re adversario, humanissime fuisset habitus, litteras dederit officii amorisque plenissimas **. Infinitus essem, si quidquid protulit Muratorius ad antiquitatem illustrandam, cujus omni tempore studiosissimum se se praebeuit, fusius persequerer. Sed argumentorum cum iis, quae modo attigimus, ipsa similitudo efficit, ut cursim & obiter aliqua per eum-

* *Martin. Explication de divers monumens singuliers: A Paris &c. Dissertatio Mazzocchi de Ascia Neapoli fuit edita.*

** Recitat eas in *Appendice I.* Solius, qui & Mazzocchi, qua Muratorio respondet, epistolam exhibet.

dem edita, ad hoc studiorum genus pertinentia commemorem. Huc enim facit *Dissertatio* Muratorii de celebri quadam *Inscriptione Hispelli inventa*, quam sibi missam publici juris anno MDCCXXXV. fecit Venetiis in X. suorum *Opusculorum volumine* Angelus Calogeraus, inter homines litteris faventes illustre nomen. Hic quidem anno MDCCXLIV. volumine XXXI. aliam edidit Muratorii *Dissertationem* Dominico Bertolio dicatam *de Inscriptione ad Urbem Fori Julii in Provincia spectante*. Facit etiam huc opusculum, quod inscribitur *Placitum Ravennae apud Classen habitum a Sylvestro II. P. M. & Otzone III. Augusto* a Muratorio illustratum, quod volumine V. *Symbolarum* suarum edidit Antonius Franciscus Gorius; cui etiam debemus editionem primam *Dissertationis* Muratorianae *de insigni Tabula Aenae ad alimentarios pueros atque puellas Trajani Augusti in Italia pertinentes*, quae prope Placentiam anno MDCCXLVII. eruta fuerat. De hoc eodem argumento scripsit Maffejus, quin & Muratorium antevertere voluit eandem inscriptionem ante ipsum typis imprimens: vo-

luisse etiam, ut Muratorius non ante se quidquam ad illam tabulam explicandam evulgareret, idque per communem amicum curavisse dicitur; sed cum Muratorius *Dissertationem* suam Etruscam de Latina factam *Sociis Columbariis* Florentiam misisset, morem tanto viro, quemadmodum exoptasset, gerere non potuit. Muratorii opus hoc Socii Columbarii *secundo Memorabilium suorum volumine* optravissent edere: at cum res protraheretur in longum, Gorius, de quo diximus, gloriæ Muratorii ac litteratorum hominum desiderio consuluit. Denique ad extremum hoc loco memoranda est *epistola* item Italico sermone scripta ad Angelum Mariam Bandinium *de Obelisco Campi Martii*, quem anno MDCCXLVIII. Benedictus XIV. in lucem extrahi mandaverat. Ea quidem ab eodem Bandinio fuit edita post *Dissertationem* suam ad illud insigne monumentum antiquitatis illustrandum litteris consignatam. Demum inter opera Muratorii, quibus res ad antiquitatem pertinentes magis illustrantur, non ultimum obtinet locum, quod in duo volumina distributum Venetiis an. MDCCXLVIII.

prodiit praefixo titulo: *Liturgia Romana vetus tria Sacramentaria complectens, Leonianum scilicet, Gelasianum & antiquum Gregorianum*. Ansam autem hujus condendi operis ei dedit Josephus Blanchinius vir & sua & patri gloria illustris. Hic in animo habuerat hujusmodi opus per se condere, atque ad id plurima jam collegerat monumenta; quin & universa, quae dicuntur *Sacramentaria* typis jam edita rursus in illo decreverat exhibere. Verum aliis curis impeditus nunquam id praestare potuerat. Itaque Muratorio quae collegerat ipse liberaliter omnia obtulit, quin & ipsas cupreas notarum formas tradidit, quas incidi curaverat, ut codicum, quibus usus erat, nosceretur antiquitas. Libenti animo haec Muratorius accepit, operique manum, etsi jam senio gravatus, admovit. At ne opus nimis excreceret, noluit omnia in eo *Sacramentaria* describi. Itaque *Leonianum* edidit ac *Gelasianum* jamdiu vulgata, simulque *Gregorianum* ex illis Blanchinii schedis excerptum. Iis addidit *Missale Gothicum, Francicum & Gallicanum*. Ea jam Cardinalis Thomafius edenda cura-

verat. Addidit etiam aliud *Gallicanum vetus*, simul cum duobus vetustissimis *Ecclesiae Romanae Libris Ritualibus* opera Mabillonii jam evulgatis. Doctissimam iis omnibus *tractationem de vetere ejusdem Ecclesiae Liturgia* praemisit, quam cum aliarum vel *Orientis* vel *Occidentis Ecclesiarum Liturgia* comparavit. Sed & Theologum in hac eadem tractatione agit contra Haereticos, praecipue Binghamum atque Basnagium, Catholicam ex iis quoque *Liturgiis de Sacramento Eucharistiae ac de Missae Sacrificio* doctrinam asserens atque defendens. Itaque mirum non est, si hoc idem opus Catholici admodum lubenter exceperint. Ex his autem, quae narravimus, unusquisque videt erravisse Cennium, cum fere nihil praeter nomen suum ad hoc opus contulisse Muratorium, confidenter affirmavit. Sed tempus est, ut ad *Annales Italiae* veniamus, qui mirum in modum nostram illustrant historiam. Eos anno MDCCXL. suavis amicorum scribere incepit. Tanta illos celeritate confecit, ut anno MDCCXLIV. Venetiis, quamvis Mediolani praeferreretur nomen, typis impressa priora quinque vo-

lumina fuerint, & alia quatuor anno, qui consequutus est, quamvis in ipsorum fronte ejusdem anni MDCCXLIV. nomen invenitur. Illi enim ab initio Aerae vulgaris ad annum MD. novem voluminibus pertinebant. At demum ab iisdem amicis se se exorari passus est, ut tria iis volumina adjiceret, quibus res gestas ad an. MDCCXLIX. prosequeretur. Duobus annis novem priora volumina fuisse elucubrata, quod Solius discrete tradit, nec Muratorius in *I. voluminis Praefatione* videtur abnuere, Cennio persuaderi nullo modo potuit. Tanta enim celeritas ipsi videtur omnino incredibilis. Idem conjicit, multos Muratorio fuisse adjutores tum in hoc tum in aliis operibus exarandis, qui merita laude fraudati sint. Haec omnia, meo quidem judicio, temere dicuntur. Cum enim huic narrationi Muratorii testimonium haud repugnet, ut ipse Cennius ultro fatetur; quis eum gravissimum virum vanae profecto laudis nullo modo indigentem, in re tam exigui momenti sine causa voluisse mentiri suspicetur? Res autem avunculi, quod pertinet ad ipsam historiam, nemo melius quam

Solius nosse poterat, plurimis annis, cum illo dies noctesque versatus. Ejus autem honestas ac morum integritas satis perspecta vel ipsi Cennio esse debuerat. Praeterea, quod spectat ad tantam scribendi atque operae cudendi celeritatem, quae certe non fuit in ullo scriptore quam in nostro major, ut ejus libri Cassii Parmensis opuscula vel ipso numero vincere videantur, tota Mutinensis civitas & nobilitate & litteris florentissima ejus rei testimonio esse potest. Vir quidam oppido doctissimus ac Muratorio familiaris mihi narrare solebat, ipsum, etsi libris in Estensi bibliotheca circumfusus, fere memoriter, & ea ratione, qua solemus litteras ad amicos de rebus non maximi momenti dare, *Annales Italiae* perscripisse. Cum enim in *Rerum Italicarum Scriptoris* evolvendis consumpisset aetatem & memoria polleret singulari, huic commendaverat res omnes in Italia gestas, ut vix aliquando Scriptores eisdem de notis annorum, aut aliis haud absimilibus, ad numerorum rationem pertinentibus, consulere opus habuerit. Jam vero priora illa novem volumina Germanicam

in linguam conversa iterum Lipsiae prodierunt. Omnia autem rursus edita sunt Romae opera Iosephi Catalanii viri docti, qui & eadem *criticis illustravit praefationibus*, ac tres adjecit annos. Venetiis item ac Neapoli sunt impressa, ac saepius etiam in posterum, quoad litterarum respublica stabit, multis in locis imprimuntur. Res enim scitu dignissimas, quarum bene multas historici, praesertim barbararum aetatum, cum aliis aut inutilibus aut etiam fabulosis tradiderunt, e tenebris eruit, atque ordine aptissimo, nec non magna semper usus perspicuitate verborum in optima luce collocat. Is quidem ordo & ea perspicuitas, nisi fallor, efficit, ut *Annalium* lectio mirum in modum delectet homines etiam mediocriter eruditos, ac sine satietate delectet. Negari non potest in hoc etiam Muratorii opere naevos inveniri, quin & rationem scribendi doctissimum auctorem tenuisse, in qua praeter illa duo, quae diximus, nihil admodum laudes; multa etiam, si exigas ad narrationis historicae regulas a rhetoribus traditas, aut Etruscam desideres orationis elegantiam, valde vituperes.

Ut ingenue fatear, quod sentio, mihi videntur *Annales* ea ferme ratione scripti, quae solent ii scribere, qui de rebus in toto gestis terrarum orbe per singulas hebdomadas chartis illis vulgo notissimis nos edocere student. Eos quidem ille naevos, & quae nos perstrinximus, vitia, cavere facile potuisset, si festinare lentius, ut antiquum fert adagium, neque typographis amicisve semper urgentibus, ut aliquid daret imprimendum, nimis obsecundare voluisset. Sed ut ad res ipsas in *Annalibus* contentas referamur, non Itali modo, sed etiam exteri, qui possint hisce de rebus jure suo quodammodo judicare, maximo se se hoc opus in pretio habere significarunt: qui vero eidem adversati sunt sibi met ipsi potius nominique suo, quam Muratorii gloriae, nocuerunt. Ex iis Petrus Antonius Vitalis anno MDCCXLVI. Neapoli librum edidit *decem* constantem *animadversionibus in Muratorii Annales*, quibus non adversarium, quod ipse moliebatur, at se se ridendum praebuit. Cum enim quaedam improbaret & carperet eruditis ab hominibus nunquam despectui habita, in id

orationis intendebat nervos, ut nebulonem & inanis gloriae cupidine inflammatum ostenderet Muratorium, quo nihil humanius, nihil modestius, aut sapientius inveniri poterat. Cum hunc gravissimus ille senex lectitasset librum, non modo non exarsit ira, sed hominis levitatem risit; docti vero homines atque prudentes impudentiam Vitalis atque temeritatem quovis convicio dignissimam existimarunt. Aristarchi partes in Muratorium eodem anno MDCCXLVI. suscepit Cajetanus ille Cennius, de quo saepe loquimur, in *Romanis Ephemeridibus*, quamvis anno MDCCXIV. duo prima volumina inter easdem *Ephemerides* laudibus fuissent elata. At hic etiam in carpendo modum sapiente doctoque homine dignum non satis adhibuit; fortasse quod suum in ea scriptione nomen haud proderet. Sane verbis quandoque usus est in gravissimum virum, quae plerisque Romanis litterarum amore flagrantibus stomachum moverint. Nolebat ei respondere Muratorius, tametsi ab amicis enixe rogetur, cum id tantummodo reponeret, multo diutius *Annales* suos, quam *Romanas E-*

phemerides, duraturos. Sed cum tria, de quibus diximus, volumina prioribus novem adjiceret, ut historiam ad annum MDCCXLIX. produceret, *defensionem* quoque *suam contra Cennium* iisdem apposuit nervi succique plenissimam. Iterum Cennius exitit in *Annales*, quin & in alia Muratorii opera, cum typis impressam legit illius *vitam a Solio descriptam*. Etenim inter ipsas *Romanas Ephemerides* multa contra historicum scripsit, de quibus, praesertim quod ab ipso, in *responsione ad Aretinam Muratorianorum Operum editionem praefixa*, satis confutata sint, nihil nos attinet plura dicere. Illud certe non est a nobis de Muratorii vita scriptisque differentibus omitendum, pleraque Cennii eo tandem facere, ut aulae Romanae jura, quamque *temporalem* dicimus, *Ecclesiae dominationem*, contra Muratorium confirmet atque defendat. Ea quidem in re Cennio veniam facile concedimus. Aliqua tamen ferenda minime videntur ab ipso contra Muratorium petulantius enunciata; quod sane ad causae suae defensionem minime conferebat. Invehitur in Muratorium, quod in Ludovici Pii *Diplomate*,

ubi de Roma ac *Ducatu Romano* loquitur Caesar, quaedam illè verba mutaverit *. Atqui Muratorius nihil mutavit. Tantummodo monuit, ubi legitur *a praedecessoribus vestris*, potius legendum videri *a praedecessoribus nostris*. Ea quidem esset maximi momenti correctio. Non tamen eam proprio Marte Muratorius excogitavit: a Gratiano hausit Romae iussibus Gregorii XIII. Summi Pontificis emendato, & ibidem in maximae formae volumen anno MDLXXXII. typis evulgato **. Quod vero Cennius ait haud semel in *Annalibus* Muratorium Pagii *Chronologiam* fere descripsisse, nullum fere artis criticae usum prae se ferre, Baronium ab eo in epitomen redigi, aliaque similia, certe gravissima essent, nisi ab iis, qui lectioni *Annalium* vel minimam dederint operam, facile refelli possent. Nam & Pagium saepius oppugnat, & Baronium deserit, & eum se se praestat, ut voluisse Cennium Mu-

* Tom. IV. degli *Annali* pag. m. 303.

** Vid. *Decret. Gratiani P. I. Distinct. LXIII. Cap. XXX.*

ratorio detrudere, sed quaerentem fragili dentem illidere solido offendisse, nullo negotio statuas. Locus hic esset, ut aliquid de Bartholomaeo Carrara Theatinae familiae homine, in *enarrationibus ad alterum volumen vitae Pauli IV. Summi Pontificis* an. MDCCCLIII. editae, parum liberaliter de Muratorii *Analibus* obloquente, ac de aliis quibusdam ejus adversariis, dicerem. Sed neque hujusmodi oppugnatores Muratorius curavit, nec curare unquam potuisset, nisi a scribendo prorsus abstinuisset. Ad recentiorum temporum historiam pertinet Muratorianum opus, vernaculo item sermone elucubratum, de *Christianis in Paraquaria sub Jesuitarum illic Evangelii praedicandi causa missorum regimine felicibus*. Hoc anno MDCCXLII. scribere instituit, cum *epistolas* lectitasset *Cajetani Cattanei Jesuitae annis MDCCXXIX. & MDCCXXX. ad Josephum fratrem e Paraquaria datas*. Quamvis nihil e Jesuitarum tabulariis, quod faceret ad hoc opus, impetrare potuisset, illud absolvit, atque edicavit Venetiis anno MDCCXLIII. cum *tribus*, de quibus loquuti sumus, *Cattanei epistolis*,

stolis. Cum ostendisset in eo Muratorius nullam esse Jesuitis in eos populos dominationem, quam *Monarchicam* appellamus, scribit Solius ad gloriam ipsius contulisse non parum, quod eodem anno MDCCXLIII. XV. kalend. Januar. edictum Philippi V. Regis Hispaniarum, iis, quae scripserat Muratorius, omnino consonum, Jesuitas eo crimine liberaverit. Facilis est conjectura quantopere liber hic Jesuitis ac Jesuitarum amicis universis fuerit acceptus. Praeter *Praepositum Provinciale* Paraquariae *Praepositus Generalis* Jesuitarum gratias ei per epistolam totius nomine Societatis egit, ac postmodum litteras ad eum hic dedit, quibus qui poterantur, Jesuitarum veluti fratres & erant & habebantur. Hieronymus autem Lagomarsinus, cui primas eo tempore Latini sermonis omnes facile concedebant, homo, cui nihil unquam in orbe terrarum Ciceronis operibus ac Societate sua fuisse videtur antiquius, I. volumen ei dicavit Antonii Mariae Gratiani *De scriptis invita Minerva*, quod ipse illustravit atque edidit. Hic quidem cum aliis Jesuitis Muratorium flagitavit, ut re-

Tam. X.

T

rum quoque a Jesuitis in Malabaria gestarum, contra Norbertum Lotharingum ex Cappucinatorum ordine defensionem suscipere; sed impetrare non potuit. Etenim multo magis erat Muratorius a contentione alienus, quam ut tot tantisque litibus se se ultro immisceri sineret. Illud quidem libenter fecit, ut cum e Jesuitarum archivis ea, quae concupierat, monumenta potuisset excerpere tum ad Paraquariam, tum ad alias Americae provincias pertinentia; cumque Henricus Henriquez Nazianzi Archiepiscopus, Pontificius per ea tempora Matriti Nuncius, libros bene multos ei submisisset ad id facientes, *alteram partem* operi, de quo diximus, adjiceret. Ea tamen non ante annum MDCCXLIX. typis vulgata est, quo tempore etiam illa prior iterum excusa fuit. Et id quidem saepius contigit, ut fieri debuisse omnes facile vident. Instituti nostri ratio ferre videretur, ut aliquid de hoc toto Muratorii opere a pluribus probato, a pluribus rejecto dicerem. Sed id malo aliorum iudicio relinquere. Ea quidem commemorabo, quae Solius hanc in rem habet.

Ille quamvis non parum in Jesuitas, cum a quibusdam ex illis non modo laceffitus, sed & indignis omnino rationibus habitus fuisset, iratus, sanctissime tamen testatus est, Muratorium omnia, quae scripserat de Paraquariae rebus, ad mortem usque verissima existimasse, & a vero prorsus abludere narrationes eorum, qui Muratorium sub extremum tempus aetatis a Jesuitis amicisque Jesuitarum se se deceptum sensisse tradiderunt. Deinde Solius id suo dolori dedit, ut revera Muratorium fuisse deceptum a Jesuitis affirmaret. Suae rationem sententiae narrationibus iis inniti, quae non ita multis post Muratorii obitum annis de Jesuitis Americae, ipsorumque in Paraquaria Regno vulgatae sunt per Europam, Solius idem non obscure significat. Jam ergo lector statuatur, an, quae de Jesuitis iisdem fere quatuor ac viginti ab hinc annis conscripta sunt, veritate niti opinetur: quanquam de his posterius melius fortasse judicabunt, quam nos; nam certe incorruptius, quoniam & sine amore & sine odio, ac rursus sine invidia, & sine timore aliquo judicabunt. His tan-

dem omiſſis, equidem cum hoc Muratorii de Paraquaria opus ex aliis capitibus commendare poſſem, tum in eo vel maxime Scriptorem admiror, quod ille tam multa in Jeſuitarum afferret laudem, tamque praeclara quo tempore non ita levibus per plures Jeſuitas injuriis fuerat affectus. Videlicet Jeſuitas a Jeſuitis ille perpetuo diſtinxit; nec quos malevolos noverat ac maledicos, ſuperbos, ſuſpicioſos, aliorum contemptores, falſa demum pietatis ſpecie deceptos, decipientes, cum ceteris confudit aut hominibus frugi, quantum ſatis eſſet, aut etiam vel doctrinae, vel eximia quavis alia laude praeſtantibus. Utinam univerſi aetatis noſtrae homines tanti viri ſequerentur exemplum! Iis, de quibus diximus, editis, cogitavit etiam Muratorius ſcribere de ſacris aliis in Infidelium regiones expeditionibus, illaſque praeſertim deſcribere, quas in Aethiopiam factas audiverat. Ea de cauſſa, ut chartae ſibi traderentur ad id facientes ex archivo Collegii de *Propaganda Fide* a Benediſto XIV. efflagitaverat. Facile Pontifex annuit, ſed Muratorio ſimul ſignificari cu-

ravit, multo sibi gratius & Ecclesiae utilius fore, si de rationibus ageret, quibus per diversa ejusdem Ecclesiae tempora Evangelii praecones, ut ejus lucem in barbaras inferrent regiones, uti consuevissent. At neutrum postea Muratorius praestare potuit, illud, quia monumenta, de quibus diximus, non ejus expectationi responderant; hoc, quia visum est majus onus, quam ut humeri senis jam nec otio nec libris ad id necessariis abundantis, ferre possent. Quae diximus hactenus non leviter, opinor, ostendunt, quantum in studiis, quae vocamus, eruditionis Muratorius excelluerit. Jam ergo nobis enarrandum superest, quid in rebus Theologicis potuerit, quidque praestiterit. Nos hoc etiam loco, quem in superioribus tenuimus, morem tenebimus, ut opera, quae condiderit ad eas pertinentia disciplinas, exponamus, ac deinde quid in republica de iis operibus judicatum sit, quasque pugnās ob eadem auctor sustinere debuerit, ubi sit opus, enarremus. Ex universis Muratorii libris ad Theologiam pertinentibus, primo videre lucem, *scilicet*, quae dixit *Prolegomena ad*

veritatis & pacis amantes praemissa operi, cui titulus; *Elucidatio Augustinianae de Divina Gratia Doctrinae*. Hoc opus, quod Muratorius anno MDCCV. curavit edendum non Coloniae, quod titulus praefert, sed alibi; duobus constat ex libris, sive *Tractatibus*, ut vocant, *Theologicis*, quorum alter est Celsi Cerii Canonice Regularium S. Salvatoris Abbatis, qui sub Lescii Crondermi nomine latere voluit, alter Francisci Dirosii Galli Sorbonae Doctoris. Opus autem universum erat contra Jansenii doctrinam, ex qua tot per ea tempora in Ecclesia Gallicana turbarum occasio extiterat. Ita scripsit Muratorius, ut non modo, quid jam posset in gravissimis hisce studiis omnino praefaceret, sed & animum ab inanibus alienum contentionibus, & omnino pacis, omnino veritatis amantem in ipso juventutis aestu praeseferret. Utinam saepius id in Theologis nostrorum temporum vel maxime grandaevis laudare possemus! Quanquam vero Muratorii commentarius nemini fere Jesuitarum, cum alias omnino sequerentur vias, valde placuit, post ejus editionem glo-

ria Muratorii non mediocriter crescere visa est. Ut nihil de aliis dicam, qui haec *Prolegomena* magnopere laudarunt, Cardinalis Prosper Lambertinius in epistola ad ipsum Muratorium, quam Solius affert, ea esse confirmat auctore suo, qui numquam a veritatis via declinet, omnino digna. Quis crederet post annos XLV. hominem inventum esse ita impudentem, ut eadem *Prolegomena* non a Muratorio, sed ab ipso Celso Cerrio fuisset conscripta, temere pronunciaret *? Ille quidem scriptor, qui dumtaxat eo laudandus mihi videri solet, quod nomen suum, veritus fortasse reprehensionem doctorum hominum atque prudentum, operi suo minime inscripsit, plagii Muratorium postulavit, a quo crimine, si quis mortalium, omni tempore aetatis suae vel maxime abhorruit. Nam si quid alienum suis inseruit libris, aut ab amicis sibi communicatum, aut ex aliorum scriptis excerptum, ita semper ultrò confessus est, ut modestiam hominis & in-

* Auctor Anonymus libri cui tit. *Difesa delle Animaverfioni ec.* editi Lucas anno 1750. contra Maffejum,

genuitatem omnes admirati sint. Ceterum nihil facilius est, quam crimine, de quo diximus, Muratorium liberare. Nam ipse Cerrii epistolam anno MDCCIV. id. Sext. datam ad Muratorium profert Solius *, quam nihil aut validius aut clarius hac quidem in re desideres. Nam & *Prolegomena* ipsa Muratorii se se Praefulis Borromaei opera jam accepisse testatur, & quid in iis notaverit amice. ipsi patefacit, & gravissimis verbis laudat, & ut suo praefigantur commentario, probat atque optat **. Alterum opus Muratorii ad Theologiam pertinens inscribitur: *Lamindi Pritanii de Ingeniorum moderatione in Religionis negotio &c.* Hanc tractationem suscipiens Muratorius illud sibi proposuerat, ut Joannem Clericum praestantem doctrina virum confutaret; qui scilicet sub nomine Joannis Fereponi anno MDCCII. ediderat suas in *Augustinum. Animadversiones*. Iis nimirum Criticus, nunquam satis ingenio doctrinae-

* *Vit. Muret. Cap. IX. §. VIII.*

** Vid. Maffejam in libro, cui tit. *Giansenisimo Nuovo &c.*

que suae temperans, tantum Ecclesiae Doctorem contumeliis afficit atque proscindit : Ut, quod intendebat noster, felicius praestaret, quatenus essent verioris artis criticae regulae ad sacras disciplinas relatae, ostendendum duxit. Etenim eruditi quique norunt de regulis artis criticae ita scripsisse Clericum, ut plurimos homines tum sibi tum libris suis in Europa conciliaverit. Itaque tamen periculosum erat aggredi tantum virum, at certe superare, cum ad laudem illustre atque magnum, tum ad causam, quam susceperat noster, omnino necessarium esse videbatur. Cum ille se se compararet ad retundendas adversarii calumnias, scriptores aliquot etiam Catholicos quasi obiter arguit, qui nimirum ingenio nimis indulgent in ipso Religionis negotio. Saepius tamen admonet hominum mentibus non esse frenum injiciendum, quod ferri non possit, ut nihil in scribendo audeant; nec non de libertate differit, qua Christianorum ingenia frui debeant, quin id Ecclesiae moderatores non satis aequo animo patiantur. Duobus haec primis libris exequitur. III. Augustini

defensionem comprehendit. Opus autem universum Joanni Carolo Bignonio tum *Inscriptionum Academiae* tum *Scientiarum Praesidi* Parisiis. anno MDCCXII. dicatum jam ab anno MDCCX. perfecerat, quin & pluribus jam ante annis inchoaverat. Sed enim, quod jure sine dubio mireris, neque in Italiae urbe quadam florentissima, neque in Gallia illius imprimendi facultas per ea tempora facta est, quod illic parum, hic autem nimium Romani Pontificis auctoritati tribuere videretur. Effectum tandem an. MDCCXIV. ut Parisiis evulgaretur. Verumtamen, qui libri editioni praefuit, veritus minime fuit nonnulla de suo adjicere verba, ne Pontificis Romani, quam Theologi vocant, *infallibilitatem* auctor tueri videretur. Ea res Muratorio valde displicuit, ac de sua mente auctores *Ephemeridum Litterarum Italiae* per epistolam anno MDCCXVI. diserte monuit. Ea quidem epistola inter easdem *Ephemerides* legitur. Sane Muratorium Romanis in ea re consentire Theologis ex ipsius *Libri I. de Ingeniorum moderatione* Cap. XVII. & XVIII. satis apparet; quamobrem, quae Gallus edi-

tor adjecit, cum Auctoris mente manifesto pugnant. Etsi autem haec eadem tractatio *de Ingeniorum moderatione* consequutis annis recusa typis est Coloniae, Francofurti, Veronae, Venetiisque saepius, editio tamen anni MDCCLII., curante Andrea Gallandio (sub nomine Andreae Grandorgaei) adornata Venetiis, & ab eodem *opportunis animadversionibus* illustrata, iis quidem, quae praecesserant, editionibus praestat universis. Etenim ex manu scripto expressa est commentario per ipsum recognito Muratorium, & correcto & aucto; quamobrem ipsius menti ex omni parte respondet. Jam vero dici vix potest, quot laudibus & quantis per doctos homines hic Muratorii liber, etsi temporibus omnino difficilibus editus, fuerit Parisiis exceptus. Omnes enim ferme Theologi, quamvis inter se maximis de rebus ea tempestate dissiderent, Cenforis Regii probaverunt judicium, qui scilicet haec pronunciaverat. *Opus meo quidem judicio eximium ac multum utilitate multiplici commendandum, in quo suspexerint aequi omnes rerum aestimatores literatissimi & candidissimi Scriptoris sincerum veri-*

tatis ac religionis amorem, variam & summam eruditionem cum modestia summa, gravem sermonis elegantiam, lucidum rerum tractandarum ordinem, meditatam in tradendis scribendi, ut par est, & incumbit hominibus Christianis, legibus sapientiam, exquisitae & temperatae criticae specimen & exemplum omnibus probandum, nervosae censurae laudabilem aequitatem adversus censorem iniquum, & criticum non satis temperantem. Iis omnino consonant, quae Londino scripsit ad Muratorium anno MDCCXVI. Antonius Contius Venetus Patricius, nec tamen doctrina minus, cum egregius fuerit philosophus atque poeta, quam generis splendore praestans. Aiebat enim a Theologis utriusque partis, hoc est tum eorum, qui *Constitutionem Unigenitus* tutabantur, tum eorum qui oppugnabant, multis ex capitibus & doctrinam auctoris libri *de moderatione Ingeniorum* & peritiam in Sanctorum Patrum operibus, & animi nulli studio partium additi moderationem fuisse laudatam, ipsumque Malebranchium secum non sine debitis laudibus de ipso libro pluries fuisse colloquutum. Aliorum possem gravissimorum Theo-

logorum de hoc eodem libro a levibus quibusdam hominibus reprehenso judicia proferre. At unus mihi sit instar omnium Cardinalis Prosper Lambertinius, qui magno illum semper in pretio habuit, & anno MDCCXXXII. in litteris ad Muratorium (eas integras recitat Solius) vocavit illum *vere pulchrum, & suo prorsus auctore dignum*. Romae tamen Fontaninius multa commentatus est, quae *Observationes criticas* appellavit in hunc Muratorii librum, eaque per manus amicis tradidit, non tamen ausus est typis committere. Fortasse, quam infirma essent ea omnia, ipsum amici monuerunt. Muratorius quidem *Observationes* eas ab amico sibi missas anno MDCCXVII. cum legisset, facillime *Responsionem* ad easdem elucubravit. Ea tamen, quoad Muratorius vixit, minime fuit in vulgus edita; credo, quod a suis edendis, ut diximus, Fontaninius abstinuerat. Eam in Aretina Muratorianorum operum editione invenies. Multo acrior atque diuturnior ex hoc eodem opere Muratorio controversia extitit cum *Sicula Societatis Jesu Provincia*, quin & cum aliis & intra & ex-

tra Siciliam Theologis bene multis, de qua jam quidquid accepimus memoriae mandare, quamvis id fortasse non sine quorundam hominum offensione fieri poterit, minime dubitabimus. *Amicus enim nobis Plato, amicus Aristoteles, sed magis amica veritas.* Ille quidem hujus praestantissimi operis Lib. II. Cap. VI. Votum improbaverat, sanguinem ac vitam ad defensionem *Piae opinionis de Conceptione Beatissimae Virginis immaculata* profundendi. Displicuit id Panormitanis bene multis, qui Votum illud suscipere, atque aliis proponere consueverant. Hunc sane morem Ludovicus Antonius, cum illa scripsit, minime noverat. Occasionem ei dederat illa scribendi sacer nescio quis Orator in Ecclesia maxima Mutinensi populo Votum illud commendans, & ad ipsum nuncupandum cohortatus. Nullus tamen per plures annos extitit, qui bellum ea de causa Muratorio indiceret. Tandem anno MDCCXXIX. Panormi Franciscus Burgius e S. J. sub Candidi Partenotimi nomine latens libellum edidit, cui titulus: *Votum pro tuenda Deiparae Conceptione ab oppugnationibus recentioris Lamindi*

Pritanii vindicatum. Maximam videlicet ac prope divinam persuadendi vim fuisse Burgio non absurde quis dixerit. Ejus liber, ejus vox, ejus oratio totam fere contra Muratorium Siciliam concitavit. Id scilicet ille potuit, ut fere omnium praecipue religiosorum hominum animi Votum illud veteribus prorsus incognitum certatim faciendi desiderio flagrarent, quin & sancto quodam odio in ipsius oppugnatores ardere viderentur. De religione agi putabant, de puro cultu Deiparae: hanc exploratissimam esse rationem gratiae ab eadem ineundae, hanc fere certissimam ad aeternam salutem perveniendiam; nihil autem divino Filio gratius, nihil acceptius fieri posse, tum Burgius tum Burgii collegae vel in concionibus, vel in aliis hominum coetibus praedicabant. Hinc Jesuitae, qui Panormi erant, novam quamdam ceremoniam inducentes, Votum illud ante aram in *Domus Professae* Templo ad unum omnes maximo quodam animorum ardore fecerunt. Tum ex iis unus assurgens frequentissimum, qui convenerat undique, populum hortatus est, ut preces funderet,

ne Panormi *haereticis* invalesceret, quam sequebantur plures, *impollutam Deiparae Conceptionem negans, ac Votum effundendi pro ea sanguinem oppugnans*. Quid plura? Res eo pervenit, ut Jesuitarum opera fere omnes hominum, quos religiosos proprius appellamus, familiae, quin & omnes illius florentissimi Regni civitates, praeter quam Messanenses, ejusdem Voti sponfione se se Deo obligarent. Theatini tantummodo & Scholarum Piarum, nec non Ordinis Praedicatorum homines ea se se religione obstringere noluerunt. Pudet me scribere, quamvis obiter, non defuisse quosdam Panormi Jesuitas, qui causam pestis, quae memoria nostra Messanae grassata est, in eam recusationem ad populum e suggestu verba facientes refundarent. At enim nuncio de tanta Siculorum commotione ad Muratorium allato, cum per multos menses ille Burgii librum frustra expectasset, in eum scribere instituit. Non enim ille tam famae suae, quam ipsi Religioni Catholicae consulere studebat, veritatis ne, quod malum ille putabat atque superstitiosum, latius inter Christianos serpere inciperet,

peret, & falsa quadam specie pietatis bonorum hominum mentes animosque corrumpere. Tandem Burgii libro perlecto & ad diligens examen vocato, suum absolvit, cujus erat index: *De Superstitione vitanda, sive Censura Voti Sanguinarii in honorem Immaculatae Conceptionis Deiparae, emissi a Lamindo Pritanio antea, oppugnati atque, a Candido Parthenotimo incassum vindicati*. Hoc autem in libro sub Antonii Lampridii nomine voluit occuli. Ad umbilicum illum duxerat jam ab anno MDCCXXXII. Verumtamen tum quia voluit illum Auctor a pluribus iisdemque gravissimis perpendi Theologis, tum quia quaedam alia occurrerunt, de quibus nihil dicere necesse est, liber hic edi non potuit ante annum MDCCXL. Id factum est Venetiis, tamen praeferat in ipsa fronte Mediolani nomen. Edendum curavit celeberrimo illo Danieli Concina e Dominicana familia; non tamen aliquid de suo addidit, ut non nemo credere visus est. Hoc in opere Muratorius illud unice sibi proposuit, ut *Votum Sanguinarium* (ita enim illud appellatur, de quo differimus.) *superstitione non carere ostenderet.*

Ponebat enim non posse sine peccato profundi vitam ad opiniones aut sententias dubias, ac solummodo probabiles, id est non certas ea, quam *Fidei certitudinem* dicimus, defendendas. Etenim vel Deus vel ipsa natura nobis praecipit, ut vitam conservemus, neque eam ad arbitrium projiciamus, cum sit bonorum in toto terrarum orbe maximum, cujus nos vere domini neque dicimur, neque sumus. Cum ergo peccatum non sit esse in sententia ei, quam propugnatores *Voti Sanguinarii* amplectuntur, contraria; cumque is crimen admittat, qui mori velit ad id defendendum, quod utrum veritate an errore contineatur, non omnino sit exploratum; hinc qui Votum illud fecerit, temere esse facturum. Quod autem ea sententia, cui Votum illud innititur, non omnino sit certa, Muratorius, multis undique conquisitis rationibus, conatur efficere. Ostendit etiam, nullo modo posse defendi opinionem aliam, quae statuit, non modo ab ipso conceptu sine labé fuisse Deiparam, sed & prorsus immunem a debito peccatum originis contrahendi fuisse. Hinc autem concludit,

ut multo magis reprehendendum sit Votum hanc etiam alteram sententiam ad sanguinis effusionem defendendi; quod Votum Cofentiae in urbe Regni Neapolitani dudum suscipi consueverat. Jam vero hic etiam Muratorii liber plurimos praesertim e Sicilia natus est adversarios. Ac primo quidem incredibile dictum est, cum ille pervenit in manus hominum, quot animorum ac quanti motus extiterint. Erant qui tota, quam proposuimus, argumentatione Muratorii non leviter commoveri viderentur. His occurrebant *Voti Sanguinarii* defensores tum in privatis colloquiis, tum etiam apud concionem religionem injicientes, si *Beatae Virginis immaculatum conceptum inter res omnino certas, & extra controversiae aleam a Catholicis omnino ponendam esse* fateri detrectarent. Videbant enim, hoc fundamento suae sententiae concusso, sententiam ipsam omnino ruituram. Non desunt etiam nostris hisce temporibus pii quidam homines, qui eadem jactent. Hos equidem minime contemno. Ab iis tantummodo vituperandis abstinere vix possum, qui pio quodam, si tamen vere pius esse potest,

furore in Muratorium elati , ut librorum ejus elevent auctoritatem , non satis videntur attendere , quid res & veritas ipsa concedat . Ceterum ubi quis velit utrisque respondere , facillime id faciet , & sapientissima illa verba Benedicti XIV. theologica lance pensitaverit : *Antequam controversia ab Ecclesia definita sit , ille qui tuetur Beatissimae Virginis immunitatem a peccato originali in sua Conceptione , non potest non habere , imo tenetur habere formidinem de opposita sententia* . Quid ad confirmandam Muratorii argumentationem validius afferri possit aut clarius , equidem nescio . Sed ejus adversarii pinguiore minerva tunc agere videbantur . Hinc , ut populum , credo , suas in partes magis pertraherent , atque homines leviter eruditos a novo Muratorii libro legendo deterrerent , religiosam quamdam , si Superis placet , sanctamque struxere calumniam , Muratorium doctrinae suae nimis confisum eo tandem esse prolapsum , ut *Immaculatam Deiparae Conceptionem negaret* , quod fieri quidem non potuerit , quin & pietatem & religionem & Ecclesiae auctoritatem non mediocriter lae-

deret. In aliquibus etiam ex libris, de quibus mox dicemus, haec eadem invenias. Quis jam ista commemorans aut legens stomachum tenere possit? Etenim si hoc non est mentiri, impudenterque mentiri, quid erit per Deum immortalem? Sane Muratorius in hoc eodem libro *de Superstitione vitanda* non multo post initium, Summorum Pontificum ac Tridentini Concilii Decreta, quæe pertinent ad controversiam de Beata Virgine sine labe concepta, fuisse recitat, ac deinde ea subdit: *Ego illa cum sub meis, tum sub Lectorum oculis volui; nihil enim enixius cupio quam ea, qua par est, veneratione omnia intacta servare Romanorum Pontificum praecepta...* Non ergo hic disputatio erit, fuerit ne concepta, an secus, sine labe originali gloriosissima Dei Mater Maria. Una inter me ac Parihenotimum controversia est ac erit, utrum amplectenti sententiam de Immunitate Virginis ab Originali peccato liceat vovere ac jurare, se pro hujus sententiae patrocinio sanguinem quoque & vitam, quoties occasio ferat, daturum. Quaestionem hanc nemo Romanorum Pontificum attigit... Quamobrem, uti jam fassus fueram in libro *de*

Ingeniorum moderatione , iterum lubentissime fateor , sententiam patrocinantem Immaculae Conceptioni Virginis non solum piam , sed summe piam in Ecclesia Dei esse . Rectissime faciunt , qui eam populo in publicis concionibus , aut editis libris depraedicant , atque commendant : Neque adversus illam quoquomodo dimicare amplius licet , quamquam liceat aliter sentire in intimis cordibus . Parendum est Pontificibus ... Ab eorum Decretis ne latum quidem unguem discedere mihi quoque animus ac firma voluntas est . Hoc unum ergo mihi propositum est , videlicet offendere ; ab iis Decretis reapse deflexisse ac deflectere , qui pro Sanguinario Voto , aut olim , aut nunc propugnant ; quippe abutentes silentio contrariae parti indicto , licere fortasse sibi putant quidquid volunt , quasi Romani Pontifices , dum piae sententiae favent , licentiam quoque tribuerint quilibet superaddendi , neminique futurum fas sit contra haec superaddita hiscere , vel quum a veritate & rectitudine aberrare creduntur . Haec magis clara sunt atque perspicua , quam ut majorem explicando lucem possint accipere . Quamobrem nihil necesse est hoc loco alia commemorare , quae Solius narrat ,

illud praecipue, quod Muratorius ipsam de Beatae Virginis immaculato Conceptu sententiam & populum suae curae commissum erudiens, & Christifidelium Catholico ritu confessiones excipiens commendavit, & carminibus etiam editis, ut & nos narravimus alio loco, celebravit. Demum ex cordationibus Muratorii adversariis quidam vituperarunt, quod in libro *de Superstitione vitanda* cultum *Immaculae Conceptionis ac devotionem* (utar enim saepius hac voce, quam ipsa Christianorum consuetudo mollivit) traduceret ut novum inventum priscis temporibus inauditum. At enim Muratorius huiusmodi cultum nullo modo contempsit. Id tantum significavit, quod disertius D. Bernardus habet circa annum MCXL. Canonicis Lugdunensibus scribens. Cum enim illi primum *Immaculae Conceptionis festivitatem* instituisent, non dubitavit is, quem omnino singulari erga Deiparam fuisse pietate omnes norunt, pios illos homines ea quidem in re satis aperte reprehendere, cum festivitatem illam vocaret: *Novam celebritatem, quam ritus Ecclesiae nescit, non probat ratio, non commen-*

dat auctoritas, quin & sub ejus epistolae ad ipsos datae finem ea celebritas ab ipso discrete vocatur *praesumpta novitas*. Sed infinitae res esset ac minime necessaria universos persequi rumores, quos *Voti Sanguinarii* defensores contra librum *de Superstitione vitanda* per Italiam ac maxime per Siciliam excitarunt. Praestat jam de scriptis praelo commissis contra eundem dicere; quamvis eorum pleraque non multo sapientiora fuerint quam illae voces contra Muratorium obmurmurantium. Quanquam in Sicilia maxime Muratorii nomen eo tempore flagrabat invidia, primus tamen contra librum *de Superstitione vitanda* scribere apertius ausus est Venetus homo Joannes de Luca e *Minoribus*, ut vocant, *Observantibus in Monito*, quod edidit, *ad Lectorem* Neapoli anno MDCCXLI. Hoc quidem ille *Monitum* praemittendum scripsit Dissertationi anno MDCCXXXIX. ibidem a se vulgatae *De Immaculata B. Virginis Conceptione*. De scriptis hujus hominis, quem ego Romae valde cognovi, vehementer mihi probatur judicium Jo. Lamii; sin minus ea doctrinam satis magnam atque

scientiam, certe summam redolere pietatem & in Deiparam fervorem quemdam amoris, ut auctorem a bonitate vitae atque optima in scribendo voluntate non mediocriter laudare debeas. Eodem anno MDCCXLI. Panormi editae sunt *tres epistolae contra Antonium Lampridium*, quarum fuit auctor Franciscus Antonius Zacharia *. Eodem tempore eademque in urbe sua in Muratorium scripta vulgarunt & Franciscus Burgius ** & Laurentius Migliaccius Canonicus *** & nescio quis Melchior Laurentius **** & Antonius Saguas,

* Earum est titulus: *Lettere al Sig. Antonio Lampridio intorno al suo libro nuovamente pubblicato de Superfluitate vitanda &c.* Hae non multo post Lucae recusae sunt, addita alia epistola ad Cardinalem quemdam Alexandri Santocanalis e S. J.

** *De pietate in Deiparam amplificanda Dissertatio duplex, in qua duplex exponitur & vindicatur Votum pro tuenda ejusdem Deiparae Immaculata Conceptione; auctore Candido Parthenotimo Siculo S. T. Professore.*

*** *Lampridius detectus & castigatus, seu intemperate Marianae Conceptionis magnanimo Voto vel usque ad sanguinem propugnatæ Dissertatio.*

**** *Risposta ad un Cavaliere erudito desideroso di sapere ciò che debba intendere intorno al libro del Sig.*

hoc est Vespasianus Trigona, qui duo e S. J. erant. An. demum MDCCXLII. prodiit in scenam Bonaventuras Attardius ex Augustiniensium familia, nonnullis contra Muratorium Panormi editis *epistolis* *, & Josephus Ignatius Milanesius Jesuita opere nuncupato: *Lampridius ad trutinam revocatus*. Animum non despondit Muratorius, sed anno MDCCXLIII. Venetiis, quamvis & hic Mediolani praeferatur nomen, librum edidit, cui titulus: *Ferdinandi Valdesii Epistolae, seu Appendix ad li-*

Antonio Lampridio, nel quale si asserisce imprudente; superstizioso, sanguinario e peccaminoso il Voto di difendere usque ad sanguinem l'Immacolata Concezione della Madre di Dio: Trigonae autem; Lettera di Pier Antonio Saguas ad Antonio Lampridio, in cui si dimostra, che il suo libro iniuriato de Superstitione vitanda, seu Censura Voti Sanguinarij &c. troppo si opponga alle leggi del Buon Gusto già con plauso stabilite da Laminio Pritanio.

* Auctor hic apertus erat, si Superis placet, atque sincerus: certe, si quid errabat, uti poterat illa imprudentium hominum excusatione, se se res eo modo dicere, quo cogitant. Epistolae ejus inscribentur: *La risposta senza maschera al Sig. Lodovico Antonio Muratori del P. Attardi Agostiniano.*

brum Antonii Lampridii de Superstitione vitanda, ubi Votum Sanguinarium recte oppugnatum male propugnatum ostenditur. Scriptae sunt eae quidem epistolae fere in disputatione ac dialogo. Hinc & Abbatem Romanum & Gregorium de Azebedo & alios loquentes inducit. Hanc esse rationem aptissimam sine taedio lectorum difficillimas explicandi controversias optimi scriptores & Graeci & Romani, & Itali & Galli norunt, exemploque suo confirmarunt. Quamobrem nescio equidem, quid in mentem venerit inepto cuidam homini, qui sub Francisci de Vera nomine opus in Muratorium edidit anno MDCCLIII. dum Muratorium reprehendit, quod in eo libro *de re Theologica fecit Scenae Tragoediam unus & idem plures repraesentando personas.* Barbari verba sunt. Jam vero Muratorius hoc in opere contra singulos dimicat, qui contra ipsum arma pro *Voto Sanguinario* sumpserant. Primis quinque epistolis Joannis de Luca tum *Prooemium* illud, tum ipsam *Dissertationem* in multis oppugnat; sexta & septima respondet epistolis, quae a Zacharia conscriptae fuerant; octava Melchiori Lauren-

tii; nona ac decima Trigonae: tribus, quae subsequuntur, Parthenotimo; decimaquarta Santocanalis, decimaquinta Migliaccio; decimasexta Attardio; postrema demum Milanesio satisfacere nititur. Universarum autem epistolarum is est scopus, ut sententia de *Immaculata Conceptione* omnino probabilis; quin & fortasse *probabilior* opposita statuatur, sed tamen ea *certitudine* (Theologica & hic utar voce) carens, quae tantummodo possit efficere, ut licitum sit atque laudabile vitam pro ipsa profundere. His etiam in epistolis aliqua ad invidiam ipsi conflandam ab adversariis opposita dissolvit. Inter illa est, quod Migliaccius ipsi exprobraverat, nec non Jesuita quidam Siculus, cui nomen Antonius Ignatius Mancusius *: *Devotionem erga Sanctissimam Dei Genitricem esse utilem at-*

* Mancusii libro, qui prodit anno MDCCXLII. Panormi, titulus praefigebatur: *Ritratto della falsa dottrina di Lamindo Pritanio esposto da Fulgoso di Monte Pelero ec.* Nihil magis contemptu dignum in ea caussa prodit, quam hic liber, quem non modo Muratorius, sed & ipsi ejus adversarii videntur stoc-
 ti fecisse.

que laudabilem, non tamen ad salutem omnino necessariam, cujusmodi devotio est erga divinum nostrae salutis Auctorem. Muratorius itaque doctrinam eam esse Catholicae Ecclesiae doctrinam bono illi viro Migliaccio satis ostendit. Ceterum & cum hae sub praelo essent epistolae, multa contra librum *de Superstitione vitanda*, & iis demum editis contra easdem scripta ad manus Muratorii pervenerunt, quibus ipse de amicorum sententia, cum crambem requere viderentur, minime respondendum putavit *. Contempsit etiam ille plurimas ex variis Italiae partibus epistolas a *Voti Sanguinari* propugnatoribus ad ipsum datas, ut eundem ad *παλινωδιαν* qua hortationibus qua etiam minis impellerent; quoties illi qui scribebant aut nullum aut commentitium nomen iis apponebant litteris. Semel iterumque, non tamen tertio, respondit Victorio Cavalesio, qui argumentum quoddam ei proposuerat contra librum *de Superstitione vitan-*

* Indicem Operum pro *Voto Sanguinario* editorum videre potes *T. V. della Storia Letteraria d'Italia*, aut apud Solium *vit. Murat. C. IX. §. V.*

da, nec Muratorii rationibus acquiescere videbatur. Hic ille est auctor, qui Muratorio e vivis erepto librum edidit jamdiu elaboratum, cui titulus *C. Octavii Valerii* (sub hoc nomine latere voluit) *de superstitiosa timiditate vitanda, sive vindiciae Voti, quod vocant, Sanguinari pro tutela Immaculatae Conceptionis Deiparae suscepti contra censuram praecipitem Viri alioqui Clarissimi, qui se modo Lamindum Pritanium, modo Antonium Lampridium, modo Ferdinandum Valdesium sive adpellitare.* Quid sit de hoc libro statuendum, haud equidem hoc loco disputabo. Unum illud, ut tanquam ex ungue leonem, quid in arte critica possit auctor, agnoscas, commemorabo; illum nec joco, nec obiter, sed & serio & multis contendere, ut Muratorium sub extremum tempus aetatis propter *Votum Sanguinarium* oppugnatum Deiparae poenas luisse persuadeat *. Contempsit etiam Muratorius insulsam rerum farraginem potius quam ingentem epistolam, chartas videlicet

* Si plura de Cavalese cupis, vid. Sol. vit. Mur. editionis Aretinae.

ineptiarum plenissimas, quæ ipsæ, tacito suo vero nomine, anno MDCCXLV., cum *de Voto Sanguinario* controversia composita nullo modo videretur, interpellavit Joseph Maria a Jesu ex *Carmelitis*, quos *Discalceatos* appellamus. Hic quidem jam tum se se comparabat ad opus duobus voluminibus comprehensum contra Muratorium, quod anno demum MDCCLIII., suis Praefidibus invitis, in vulgus edidit, ac vero suo nomine occultato inscripsit: *Deipara ejusque Cultores vindicati a querelis Lamindi Pritanii &c. Opus Francisci Josephi Antonii de Vera Hispani &c.* Hoc opus idcirco commemoravi, quod ejus fere totam epitomam in chartis, de quibus diximus, auctor Muratorio mittere ausus fuerat. Ceterum nihil magis hac ætate indignum ab ullo Theologo prolatum est. Ipse per te, quid sit de illo sentiendum, nullo negotio statues, si quamvis paginam, in quam vel casu incideris, cursim perlustres oculis. Unum exemplum afferò, quod mihi nunc occurrit. Ille quidem parte II. invidiam Muratorio ita conflare nititur: *Erat capillatus ob longum, capillique albi quasi per duos pal-*

mos vel ultra supra humeros & scapulas se se protendebant, divisi in ramos duos, ad ostensionem majoris pompae, quam etiam ipso ingrediendi modo demonstrabat. Quid jam de homine dicas, qui ea ratione scriberet, cum ignorare vix posset, quam facile totius Mutinensis civitatis, imo innumerabilium hominum, qui Muratorium de facie noverant, testimonio refellendus esset? Nihil enim Ludovico Antonio tum in habitu fuit, tum in incesu modestius, nec nisi brevibus de more sapientiorum Sacerdotum crinibus in publicum prodiit unquam *. Ex epistolis Muratorio propter *Voti Sanguinarii* controversiam missis illae contemni non debuerunt, neque contemptae sunt a sapientissimo viro, quae de argumento a Cardinali Quirinio Pontifici Summo Benedicto XIV. recens proposito eundem commonebant. Si enim, agebat Quirinius, Thomas Cantuariensis ab Ecclesia Catholica Martyr est habitus ac renunciatus, quod

* Si plura cupis contra hunc nebulonem, consule longam epistolam contra ipsum, quae est in Append. II. vit. Muraz, Soli edit. Aretinae.

quod vita etiam profusa *Immunitatem Ecclesiasticam*, quam esse *de jure divino* fides Catholica minime statuit, ut rem omnino exploratam, defenderet, cur etiam ad defendendam *Conceptionis Innumeratae* sententiam, *etsi de fide illa non sit*, vita profundi non poterit? Haec Quirinius; cui doctissima Muratorius epistola ostendit, non potuisse Thomam Cantuariensem Regi Henrico obsecundare, quin grave crimen admitteret. Non enim ille jubebat, ut sententiam de *Immunitate Ecclesiastica*, quae sit *de jure divino*, minime Thomas defenderet, sed ut optime constitutas infringeret Ecclesiae consuetudines, & contra sacrorum statuta canonum ageret, quod certe sine gravi crimine fieri non poterat. Similia vero ad *Votum Sanguinarium* defendendum afferri non posse. Placuit Muratorii responsio non modo Benedicto, qui jam per se Quirinio eadem fere in colloquio responderat, sed ipsi etiam Cardinali. Accidit id anno MDCCXLIII. Alia, quae Muratorio sunt objecta, calumnias alias & injurias, convicia etiam ab importunis hominibus illata praestat omittere, quam

in iis commemorandis, quae litteris ipsis dedecori essent, si ex litteratorum essent moribus aestimandae, versari. Unum illud hoc loco moneo, sententiam Ludovici Antonii *de Voto Sanguinario*, etsi non omnibus, at certe plurimis viris doctissimis, iisdemque nullo partium studio laborantibus, & cum ille inter vivos ageret, fuisse probatam & hodie probari; quamvis & illud equidem ultro fatear, contrariam quoque sententiam, quae videlicet *Votum Sanguinarium* tuetur, dummodo rationibus, non malis artibus, argumentis, non conviciis, aliisve defendatur injuriis, homine Catholico gravique Theologo nullo modo indignam videri. Equidem, nihil moror, neque morabor in posterum, quin in Muratorianam sententiam pedibus eam. Levius dicerem, si fieri tamen posse, ut ego errem, faterer, cum ipse Muratorius hac eadem in re falli potuerit. Sane Benedictus XIV., de cujus laudibus nulla unquam obmutescet vetustas, controversiam hanc ad accuratissimum examen revocat, rationes affert utriusque partis, ac multa de

iis erudite discepat *. Ille quidem Murato-
 rii opera *de moderatione Ingeniorum*, ac *de*
Superstitione vitanda non sine laude commemo-
 rat; rem tamen ipsam in medio relin-
 quit; neque ipse, qui certe poterat, defi-
 nire audet, an qui sanguinem ad senten-
 tiam, de qua saepe diximus, defendendam
 profunderet, inter *veros Martyres* recensен-
 dus esset. Attamen paullo post ea subdit,
 quae Muratorianae opinionis fundamenta sunt:
Tutam omnino dicimus in aliis casibus regulam,
ut moriens pro quaestione adhuc ab Ecclesia non
definita non moriatur pro causa, quae ad mar-
tyrium sufficiat. Haec etiam ideo commemo-
 ravi, ut contra Cavalesium, de quo nuper
 dicebamus, aliosque Muratorii obtrectatores
 omnino constaret, quam longe Benedictus
 ab ejus libris *de Voto Sanguinario* notandis
 absuerit. Ii quidem obtrectatores cavillati
 sunt, Benedictum eos libros innuere voluif-
 se, cum ad Episcopum Terulensem *Hispania-*
rum, ut vocant, *Majorem Inquisitorem* scri-

X 2

* *De Beatific. & Canon. Sanct. L. III. C. XIX.*

bens, ut eum commonefaceret nonnulla opera Norisiana minime damnanda fuisse, haec subdidit inter cetera: *Notum denique tibi erit nomen Ludovici Antonii Muratorii adhuc viventis, multorumque librorum communi applausu receptorum editoris. Oh quam multa reperiuntur in eis censura digna! Quot hujusce furfuris nos ipsi eos legentes offendimus! Quot nobis ab aemulis & accusatoribus oblata sunt! Et nos usque adhuc abstinuimus & abstinebimus ab ejus operum condemnatione, nostrorum Praedecessorum exemplis edocti, qui pacis & concordiae amore a proscribendis iis, quae proscriptionem merebantur, cessarunt, quando videlicet censuerunt plus mali quam boni a proscriptione derivandum.* Ceterum non modo ex iis, quae diximus; omnino constat, non eos libros eo loco respexisse Benedictum, sed & ex luculentissimo ejusdem Pontificis testimonio. Etenim Muratorius cum eodem an. MDCCXLVIII. quo datae sunt eae litterae, de tota re certior factus esset, Benedicto modestissimam; sed tamen ponderosam inscripsit epistolam, in qua infimis precibus contendebat, ut, quae tantopere Pontificium animum offen-

derant, sibi indicarentur; ea nempe ratione futurum, ut a se corrigi possent. Humanissime respondit Benedictus: *temeritate Procuratoris Generalis Augustiniensium esse factum, ut ea epistola ad Episcopum Terulensem in manus hominum perveniret. Procuratorem illum a se graviter objurgatum impudentiae poenas luere: ceterum nihil se voluisse verbis illis innuere, quod pertineret ad Ecclesiae dogma vel disciplinam: nihil quantum ad ea capita in operibus esse Muratorianis proscriptione dignum; sed multa esse notanda, quae scilicet ad temporalem Ecclesiae dominationem pertinerent: ea quidem se se indicare voluisse; cum fieri vix posset, quominus ea virgam censoriam ac proscriptionem effugerent, si essent in aliorum Auctorum libris: id factum non esse a Romanis Patribus contra Muratorium, quod omnibus esset satis perspectum, quanti Pontifex ipsum faceret **. Hactenus de motibus animorum & controversiis per Muratorianum librum *de moderatione Ingeniorum* in Italia & Sicilia excitatis loquuti

* Epistolas Muratorii ad Summum Pontificem & hujus ad illum in Append. I. ad vit. Murat. Solius affert.

sumus ; nunc de tumultu fortasse graviore ; qui praecipue contra librum eundem , & ejus occasione contra quosdam alios Muratorianos , commotus est Salisburgi , verba nos facere , ipsa rerum series ac ratio postulat . Salisburgi in urbe Germaniae ex florentissimis una , docti quidam homines in societatem quamdam coiverant , quae coetus Academicorum in Italia vigentes ad litterarum incrementum ac decus imitabatur . Ii quidem librum de *Ingeniorum moderatione* miris quibusdam efferre laudibus , atque optimae spei juvenibus commendare consueverant . Adversabantur iis hominibus Monachi ex Ordine Sancti Benedicti , qui nondum superiorum aetatum barbariem exuerant , Scholasticorum praejudicatis opinionibus occupati . Multo magis hi Monachi exarserunt ira , cum Christianus ex iis doctis hominibus unus librum refutavit a Monacho nescio quo compositum , ut probaret *Divum Rupertum Salisburgi primum Archiepiscopum & ipsum fuisse Monachum* . Ut dolorem suum ulciscerentur anno MDCCXL. de laudato Muratorii libro , ad quem scilicet in illa etiam controversia

iidem docti homines provocabant , ut veteriores ex eo artis criticae regulae ediscerentur ; nec non de ipso Muratorio palam obloqui coeperunt . Fuerunt etiam qui contra gravissimum virum innumerabiles in vulgus spargere calumnias instituerent . Inter has illa risu excipienda eundem caput auctoremque fuisse sectae, quam nos Itali dicimus *dei liberi Muratori*, quamque ex Britannia in Galliam , & ex Gallia in Italiam , ut ferebatur , prolapsam Pontifices Romani damnaverant atque proscripserant . Ex illa nimirum similitudine nominum nebulones calumniae ansam arripuerant . Ea quidem de re Benedictus XIV. , qui mirum quemdam ac vere Atticum leporem cum summa morum gravitate componere noverat , cum Cardinali Tamburinio Muratorii studiosissimo saepius facete ludit . At ex bonis illis Salisburgi civibus inveniebantur , qui Monachis crederent quidquid ii credi juberent . Iidem Monachi circumferebant *epistolam ab eo conscriptam*, qui a secretis erat Ministri Generalis Capuccinorum . Is autem in ea calumniabatur , librum *de moderatione Ingeniorum* , tamen

nondum Romae proscriptus fuisset, cum plura complecteretur a sana doctrina non leviter abhorrentia, brevi proscribendum esse. Neque vero e Cappuccinis iisdem defuerunt qui privatis in colloquiis insusurrarent, & in ipsis concionibus persuadere conarentur, novam haeresim Salisburgum invectam esse. Subinde contigit, ut juvenis quidam nobili genere natus, coram Salisburgensis Lycei magistris, hoc est Benedictinis Monachis, de quibus diximus (ii enim Lyceum idem regunt) paullo audaciorem haberet *Orationem de necessitate studia litterarum melius, quam fieret, instituendi*; & eodem fere tempore typis alia ederetur Oratio a Cecchetto docto viro *in obitu Praefulis Harrachii* pronunciata, in qua de ipsa Salisburgensi Academia parum honorifica fiebat mentio. Hinc animi multo magis exasperati, & ea calumnia, quod haeresis nova Salisburgi glisceret, cuius auctor fuisset Muratorius, longius etiam provecta. Tunc is, qui vices in ea Academia Cancellarii gerebat, typis *Orationem*, a se dudum in concione habitam, evulgavit, qua probare voluerat, *non bonum dun-*

taxat & utile, sed etiam omnino necessarium atque praeceptum esse Christianis, Coelicolas; maxime vero sanctissimam Dei Genitricem, venerari atque invocare. In animadversione autem, quam ipsi apposuit, Muratorii monitum vituperabat in libro de piis Exercitationibus juxta Segnerii rationem ab eo propositum: *Pietatem* (vulgo *Devotionem* dicimus) erga *Divos*, ac praecipue erga *Deiparam* esse utilem atque laudabilem, non tamen omnino necessariam, ut pietas est erga Dei Filium salutis nostrae reparatorem. Alia multa de his rebus ab aliis etiam oratoribus in concionibus dicta sunt, quae maximos in ipso popello ciebant motus. Mulieres ipsae ac pueri, nedum in circulis quibusque viri de Muratorio, ejusque opinionum pravitate obloquebantur, ac res eo devenerat, ut plebis aliqua seditio contra eos, qui Muratorio studebant, brevi oritura esse videretur. Archiepiscopus, idemque, more Germanorum; summam rerum omnium potestatem obtinens Thunius, ut eos compesceret motus, nihil intentatum reliquit: *Orationis*, de qua diximus, exemplaria, quae nondum omnia fue-

rant edita, vulgari vetuit: sacros animarum Pastores admonuit, ut populum certiores facerent, nihil de nova haeresi vel secta timendum: multa ipse pro Muratorio dixit. Hujusmodi tamen labor frustra ab eo suscipi videbatur; quin & orator inventus est plenus inconsideratissimae ac dementissimae temeritatis, qui scilicet in concione die Deiparae in Coelos Assumptae sacro, *necessitatem invocationis ejusdem Beatae Virginis* coram ipso Archiepiscopo tueri non dubitaret. Cum de his omnibus a nobili viro Germano Mutina transeunte certior factus est Muratorius, ad *Rectorem* aut *Syndicum*, ut vocant, *Salisburgensis Universitatis* illico litteras dedit, quae de injuriis sibi illatis conquereretur, veramque suam doctrinam defenderet. Respondit ei *Syndicus* partim negans, partim imminuens, quae Muratorius ferebat aegrius, partim excusationes praetexens, partim vero aperte confessus, praecipue quae ad librum *de moderatione Ingeniorum*, & ad alium *de piis Exercitationibus* pertinebant. Etenim quod ad alterum spectabat, Rector conque- rebatur, *auctorem de Immaculata Dei Genitri-*

cis Conceptione sentire tam viliter, ut eam inter leves causas abjecisset: quod vero alterum respiciebat, nullo modo ferendum a Catholicis affirmabat, quod Devotio sive Invocatio Divini nostri Salvatoris, non autem Deiparae ac Sanctorum necessaria homini Christiano ad aeternam salutem esse diceretur. Ad haec pro Voto Sanguinario, ad sententiam de Beata Virgine sine labe concepta omni tempore defendendam, seque suosque stare affirmabat. Aliam dedit ad eum epistolam Muratorius, ut suos libros veramque tueretur doctrinam. Primum illud omnino esse commentitium facile ostendit, cum potius Scotisticae sententiae sectatores Pritanius non uno laudet in loco, neque se amplecti contrariam affirmet unquam, aut aliqua ratione indicet: Quod pertinet ad Votum Sanguinarium eadem assert quae in aliis libris; quamobrem non ea fufius commemorabo. At de necessitate colendae Beatissimae Virginis verba faciens ita loquitur, ut equidem nesciam an clarius aliquid aut verius ab ullo Theologo possit asferri. Duo enim esse plane diversa bonos illos Monachos docet; Cultum sive honorem

Sanctis & praesertim Sanctorum Reginae debitum, atque *Invocationem Deiparae*, aliorumque Coelitum. Ultro fatetur esse Catholicae Fidei doctrinam, honorem habendum Sanctis, eorumque Reliquiis atque Imaginibus, ac multo majorem ipsi Deiparae, quae tot ex capitibus omni Sanctorum ordini antecedit. Ad *Invocationem Deiparae & Sanctorum* quod attinet, Ecclesiae Catholicae dogma esse concedit contra Haereticos veteres recentesque statutum, non solum licere, sed utile etiam ac bonum esse, eorum patrocinium apud Deum implorare. At Salisburgenses reprehendit Monachos, quod *Cultum & Invocationem* simul jungentes, utriusque necessitatem ad salutem tam confidenter atque animose praedicarent, & quidem e sacro etiam suggestu ad indoctum populum verba facientes. Ea quae illi sumerent, Ecclesiae Catholicae contraria videri subdit, necessariam sufficientemque ad salutem esse statuenti *Mediatoris nostri Jesu Christi Invocationem*, ex quo omnia, per quem omnia. Neque huc, inquit, advocanda unquam erunt exorbitantia quaedam piorum hominum verba, quae ex affectus fer-

vore *ipsis exciderunt*; sed ea, ut Theologum de-
 cet, emollienda, & ad saniores Theologiae le-
 ges temperanda sunt. Haec etiam ea ratione
 fusius affero, quod satis respondere pluri-
 mis videantur, quae post mortem quoque
 Muratorii contra ejus doctrinam, tum in iis
 quae jam commemoravimus, tum in aliis
 commemorandis operibus explicatam, allata
 sunt ab hominibus fortasse piis, at non satis
 eruditis. Incredibile autem dictu est quot
 absurda, cum sapientissima Muratorii monita
 minime teneant, effundere illi soleant, quo-
 ties Deiparae vel Sanctorum laudationes ad
 populum habent, aut litteris etiam libellis-
 que consignant. Etenim ab alicujus aut ali-
 quorum etiam ex Sanctis Ecclesiae Patribus
 oratorio quodam more pronunciatis, tan-
 quam a certissimis Catholicae doctrinae prin-
 cipiis, nonnullas consecutiones eliciunt, quas
 videlicet horreat sancta mater Ecclesia, Hae-
 retici universi rideant, & ex iis eidem Ec-
 clesiae detrectandi occasionem rapiant. Ce-
 terum Muratorius hac etiam in epistola il-
 lud fatetur, quod non dedecet titulo *Me-
 diatricis* sub aliqua ratione ornare Deiparam.

Verumtamen cum in ea voce palmarem illi suorum errorum rationem esse positam existimarent, graviter admonet, non id ita posse dici, ut sine *Mediatrice* Christus *Mediator* noster apud Deum esse non possit *. Cum haec & alia, quae omittimus, Muratorius ad Salisburgensium Monachorum Principem scripsisset, nihilofecius ad sanam mentem calumniatores, & odio & superstitione pessimis consultoribus extimulantibus, nondum redire voluerunt. Perlectis etiam litteris Muratorii sycophantae de ipso per totam civitatem obmurmurabant. E sacris quoque suggestibus homines alii religiosi ordinibus addicti, qui antea siluerant, pro *necessitate invocandi Sanctos ac praecipue Deiparam*, non secus ac si de summa Religionis ageretur, pugnare coeperunt, quin & *Decanus*, ut vocant, *Theologicae Facultatis Salisburgensis*, coram frequentibus auditoribus, quidquid in libro *de moderatione Ingeniorum* contra *Sanguinarium* illud *Votum* assereretur, refutandum

* Duae Muratorii epistolae ad Syndicum, & unam hujus ad illum videre potes ap. Sol. in *Append. I. ad vit. Murat.*

suscepit, eo etiam amentiae prolapsus, ut Muratorium *stultescientem auctorem ac temerarium* per summam injuriam appellaret. Tunc enimvero ponendum esse clementiae ac lenitati modum, neque haec amplius sibi ferenda duxit sapientissimus Thunius. Itaque & Monachum eum docendi munere privavit, ac publico cavit edicto, ne quis de controversiis, quae Salisburgi fuerant excitatae, in posterum loqueretur aut scriberet, jubens etiam omnes *de Invocatione Sanctorum* ea sentire ac profiteri, quae Tridentinum Concilium sanctissime constituerat. Post id de renovanda studiorum ratione cogitavit, & *Universitatis Rectorem & Cancellarii gerentem vices* exauctoratos dimisit. Ita Salisburgensis Academia splendorem suum recuperavit clarissimis viris, qui optimas excolerent disciplinas sub tanti Praefulis ac Principis auspiciis instructa. Neque vero is iniquo tulit animo, quod anno MDCCXLI. Coloniae libellus ederetur a Joanne Baptista Gaspero exaratus, in quo & universa, quae Salisburgi acciderant, narrabantur, & vera *de Invocatione Sanctorum*, recitatis gravissimo-

rum ex omnibus gentibus Theologorum testimoniis, doctrina propugnabatur *. Pertinent omnia, quae modo narravimus, ad Theologicum opus *de moderatione Ingeniorum*, quod alios conscribendi libros occasionem, aut potius necessitatem, adventante atque etiam urgente jam senectute, Muratorio detulit. Nunc ad viridiorem ipsius aetatem revolvi nos oportet, ut de Theologicis aliis ejusdem operibus, nihil ad illud pertinentibus, narrationem instituamus; qua quidem in re deinceps accuratiorem temporum rationem servare poterimus. Ac primo quidem commemorandus est liber *de Charitate Christiana*, quatenus est *proximi amor*, vernaculo sermone scriptus. Impressus est hic typis Mutinensibus anno MDCCXXIII. quin & saepius alibi, & in Gallicum sermonem a Vergyo docto pioque viro conversus. Huic libro *tres orationes* subjiciuntur eloquentissimi viri Francisci Badae, quae tum sunt habitae Mutinae,

* Libelli titulus erat: ΑΔΕΙΣΙΑΙΜΟΝΟΣ
ΦΙΛΟΡΩΜΑΙΟΥ *Vindiciae adversus Sycophantas
Japyvenses*.

nae, cum Institutum Societatis de qua verba fecimus, & ab ipsa caritate nomen etiam ac leges accepisse diximus, promulgatum est, quod quidem & hujus condendi libri occasionem Muratorio suppeditavit. Cum ipsum magna diligentia composuisset, optavit etiam, ut Romae probaretur. Itaque Magister Sacri Palatii legit illum accurate, cumque nihil is afferre videretur homine Catholico non omnino dignum, facultatem ut imprimeretur typis, jam scripto consignarat. Casu accidit, ut homo, qui facultatem eam concedi pro Muratorio curabat, cum sese contulisset, scriptum illud a Magistro Sacri Palatii recipere distulerit. Interea tota res Fontaninio innotuit. Is igitur tanta contra Muratorium ei Magistro insufurravit, ut hunc omnino terruerit, & ad lacerandum idem scriptum adegerit. Allato ea de re ad Muratorium nuncio, curavit is, ut ab insignibus Theologis perlegeretur atque approbaretur opus; quos inter fuit Vincentius Gottius ex Ordine Praedicatorum, mox ob insignem doctrinam sacro Collegio Cardinalium adscriptus. Hunc autem eundem librum

dicavit Carolo VI. Caesari, a quo hanc ipsam ob rem anno MDCCXXVI. pretiosa imagine sua, nec non torque aureo donatus est. Ut aliquid *de Jejunio* scriberet Muratorius, occasio sic enata est. Episcopus Fidentiae (vulgo Burgi S. Domnini) anno MDCCXXXVI. cum ab Apostolica Sede indultum fuisset, ut populum sibi subiectum eo anno per quosdam hebdomadae dies in *Quadragesima* carnibus vesci concederet, eam tamen dispensationem ita largitus est, ut jejunium iisdem diebus servari praeciperet. Aliqui non id Episcopo licuisse causabantur. Itaque Alexander Mantegazzius Placentinus *Dissertationem* edidit eodem anno *de Jejunio cum esu carniū coniungendo*, ut quod Episcopus egerat, recte actum esse defenderet. Rogatus est Muratorius, ut quid ea de re sentiret, significare vellet. Ideo longam is Latinam *epistolam* Mantegazzio inscripsit, qua *potuisse Episcopum ea praecipere, & cum esu carniū jejunium posse coniungi*, satis apte demonstravit. Interea contra Mantegazzium *Diatribam* emisit Doctor quidam Petrus Cappelottius. Ille quo se se defenderet librum

edidit anno MDCCXXXVII. cui fusissimam illam Muratorii praefixit epistolam, qua quidem de re noster cum Mantegazzio leviter conquestus est. Quanquam enim ea utendi potestatem fecerat, si fuisset opus, Mantegazzio, non tamen hac in controversia primas partes agere voluisset. Hic etiam liber oppugnatus fuit, cum anno MDCCXXXIX. prodierit sine Auctoris nomine *Dissertatio* in ipsum, quae *Theologica-Moralis-Critica* inscribebatur. Eidem *Responsio* fuerat praefixa contra Muratorii iudicium. Hujus opusculi auctorem fuisse Herculem Montium Mutinensem e S. J. satis compertum sibi scribit Solius. Montio Muratorius minime respondit, sed pro Muratorio satis superque respondit Daniel Concina, homo non tam doctrina, etsi doctus ille quidem erat, quam magnis inimicitiis hac aetate nobilitatus. Verumtamen eum hac in re optimae causae suscepisse patrocinium, quis tandem, dummodo veritatis, quam hominum studiosior esse velit, inficias ierit *? Sane, ut omittam hac in caus-

Y 2

* Vide Cap. II. della Quaresima Appellante. Vi-

sa Montium, non ita magnae doctrinae hominem id ausum esse, ut Muratorii, quem omnino suspicere debuisset atque vereri, eruditionem ipsam illiberalibus quibusdam jocis doctrinamque contemneret, certe, quod caput controversiae debuerat esse, *Jejunium cum esu carnum posse conjungi*, post Benedicti XIV. sapientissimas epistolas atque *Constitutiones*, universi, quod equidem sciam, temporibus hifce Theologi confitentur. Rationes autem, quibus adversarii nitebantur, fuitiles omnino fuisse, & ex earum genere, quas *laxas* appellant, ex tanti Pontificis iisdem decretis apparet. Post haec Muratorius librum edidit adversus Thomam Burnetum Anglum, qui *de Statu Mortuorum & Resurgentium* ita scripserat, ut assereret Iustis aeternae beatitudinis coronam ad diem usque *finalis*, quod vocamus, *judicii* differri. Cum id & Catholicae doctrinae refragaretur, & theologicam spei virtutem non leviter in Christianis laefactaret, eum sibi convincendum sumpsit

de etiam *la Dissertazione Apologetica in fine Voluminis II. della Storia del Probabilismo*; quae nimirum historia ab ipso Concina conscripta est.

Muratorius anno MDCCXXXIV. librumque adversus eum composuit, cui titulus: *De Paradiso Regnique coelestis Gloria, non expectata corporum resurrectione, Justis a Deo conlata adversus Thomae Burneti Britanni librum de statu mortuorum &c.* Hunc librum intra tres menses absolvit, ex eoque conjici potest quantum auctor versatus esset tum in divinarum Scripturarum, tum in SS. Patrum lectione, ex quibus plura collegit, quae ad fovendam spei, quam dicebamus, virtutem pertinent; sed totius operis scopus est, ut probet justis hominibus, dummodo, quae purgentur omnino, criminibus aut levioribus culpis minime premantur, plenam, quam Deus pollicitus est suis, beatitatem illico post corporis interitum in coelesti regno conferri. Opus hoc evulgari typis Londini cupierat, quo certius haeresi in ea regione grassanti medicamentum afferret. Id fieri posse Michael Maittaireius affirmabat, qui, licet esset e Protestantium numero, colebat maxime Muratorium ac suspiciebat, eique operam suam ad illam rem pollicebatur. Sed destitit postea ab hac mente, ex quo factum est, ut liber

non ante annum MDCCXXXVIII. Veronae imprimuntur. Inter Muratorii scripta de rebus Theologicis memoratur *epistola de Communione in Missa* ad Comitem Ferdinandum Scottium VI. Id. Septembris an. MDCCXLIII. data, quae simul cum aliis epistolis ad idem facientibus argumentum, tacito tamen urbis, in qua sunt editae, nomine lucem vidit. Gravissima controversia, quae de re non levis momenti excitata, Lusitanorum praecipue sacrorum Antistitum turbaverat animos, novo Muratorii libro occasionem prae-buit. Anno MDCCXLV. per Lusitaniam rumor increbuit, Sacerdotes quosdam, cum *sacras* Christianorum *confessiones* exaudirent, ab iisdem, quinam fuissent criminum complices, percunctari consueffe; nec non, qui parere nollent, a criminibus iisdem absolutos minime dimittere. Iis addebatur, eosdem Sacerdotes ea notitia penes Regem uti, quo alios perditis moribus Sacerdotes, aut alios quosvis homines, ut aliorum integritatem atque innocentiam vitae corrumperent, adlaborantes, poenis affici curarent atque coerceri. Ea fama permoti Cardinalis Almeida

Patriarcha Ulyssipponensis, & Cardinalis Acugna Inquisitor in eo Regno Generalis, ut gliscenti, quod opinabantur, malo occurrerent, publica edicta proposuerunt. At hic alter ultra, quam par fuerat, sine dubio progressus, edicto suo imperavit, ut, quotquot ea ratione fuissent a Sacerdotibus in *Poenitentiae Sacramento* interrogati, vel de aliis criminum adjunctis (*circumstantias* vulgo dicimus) haud manifestandis interpellati, eorum nomina ad terribile illud *Sanctae Inquisitionis* appellatione conspicuum tribunal deferrent. Inquisitoris iudicium adeo praeceps ceteris totius Regni Archiepiscopis & Episcopis non displicere non potuit. Primo quidem rumorem, de quo diximus, *omni Sacerdotum Ordini summopere injuriosum esse, neque veritate ullo modo niti* dicebant: deinde *suam ipsorum auctoritatem ac jurisdictionem* per illud edictum laesam videri: postremo *nimis grave, nulla-que ratione ferendum ab Inquisitore onus Christianorum imponi cervicibus*. Itaque cum non levis inter sacros populorum Pastores esse lis exorta videretur, res ut disceptaretur ad Benedictum XIV. Romanum Pontificem delata

est. Hic Episcopis contra Inquisitorem duabus *Constitutionibus* adjudicavit causam, tam grave onus idemque minime necessarium, Christifidelibus imponi vetans. Cum tamen controversia nondum satis composita videretur, vir nescio quis maximae auctoritatis Muratorium rogavit, ut aliquid ad Episcoporum Lusitaniae ac Pontificis Romani sententiam defendendam litteris mandaret. Praestitit id noster opere Latino Mutinensibus typis in lucem edito anno MDCCXLVII. quod inscribitur: *Lusitanae Ecclesiae Religio in administrando Poenitentiae Sacramento*. In eo demonstrat *naturali juri adversari*, ideoque *prorsus e medio tollendam esse novitatem*, quam praeposterum pietatis religionisque studium invehendam censuerat. Pontificium vero Decretum non modo laudat, sed & ab iis vindicat ratiunculis, quibus impetebatur. Cum liber hic in Lusitaniam perlatus est, simul nunciatum est ab Equite Ludovico Antonio Vernejo Lusitano Romae commorante fuisse conscriptum. Cum in illo Regno plures a duobus illis Cardinalibus contra Episcopos in ea causa starent, incredibile di-

ctu est, quanta fuerint in ipsum turbac excitatae. Et Cardinales nimirum & alii *Sacrae Inquisitionis* Ministri Vernejum *haereticum*, quod tantis, credo, iudicibus nulli errori obnoxiiis adversaretur, appellare minime verebantur. Crevit in Vernejum invidia, quod auctor etiam in Lusitania creditus est alterius libri *de Methodo studendi singulis disciplinis ad intellectum Lusitanorum accommodata*; quem quidem librum, id jure sine dubio mireris, doctissimus nescio quis Cappuccinus elucubratus fuerat. Quamobrem Muratorius his de rebus certior factus anno MDCCXLIX. XV. kalendas Aprilis Mutinae dedit *ad Vernejum Latinam epistolam* * ut eum utroque crimine liberaret. Sed e Lusitanis ipsis minime defuerunt, qui *librum de Lusitanae Ecclesiae Religione* Muratorii, cujus gerebat nomen, esse revera foetum agnoscerent. Inter eos fuit Dionysius Bernardes de Moraes, qui statim librum componere contra illum aggressus est. Vix eum absolverat, cum diem supremum obiit. Im-

* Vid. apud Solium in Append. I.

pressus tamen is est typis Ulyssiponenſibus anno MDCCXLVIII. Sed ne Muratorius quidem hunc librum vidit; cum & ipſe, antequam eundem Ulyſſipone ſibi miſſum acciperet, fato functus fuerit. His de cauſſis, cum ad Muratorii vitam proprie non ſpectet, mihi equidem temperabo, nec quae convicia, quas contumelias in ſapientiſſimum ſenem conjecerit, cum & ejus librum *de Moderatione Ingeniorum*; & ſententiam *de Voto Sanguinario*, & hoc praecipue, de quo modo loquimur, opus exagitandum ſibi ſuſcepisset, ſuſius hoc loco memorabo. Fingit enim Scriptor inverecundus, idemque & Dialecſticae & Theologiae, & ceterarum artium libero homine dignarum expertus a Muratorio pravam opinionem defendi, *quod liceat complicitis nomen in Poenitentiae Sacramento exquirere*; quamvis hic diſertiſſimis verbis non uno quidem in loco prorfus contrarium aſſeruerit. Hiuc ea ſcribit, quae neſcio equidem, an ſobrius in Italia unus, ex iis ſaltem, qui vera germanaque doctrina excoluerint animum, non dicam ſcribere, aut ab alio ſcripta probare, ſed omnino legere

patienter, ac sine stomacho possit. Sufficiat hic ex iis pauca describere, quae de illo libro litteris mandavit vir religiosissimus Andreas Gallandius sub Grandorgei (quod diximus) nomine delitescens in praefatione ad opus Muratorianum de Moderatione Ingeniorum: ubique livorem spirat, ubique inscitiam suam prodit, adeo dicacitatis atque ignorantiae plena sunt omnia.... Peream, si legi quidpiam nigriori stylo exaratum. Meus animus fuit (inquit pag. 588.) neminem offendere, solumque Muratorio parcere non studui. Hominis os! Audisti in improbum petulansque consilium? Equis porro aequo animo ferat ista effutire audentem? Nimius sim, si quod sentio scriptis pluribus persequi velim. Ergo faceffat a me istiusmodi liber*. Amariorem enim me lectio facit, stomachor omnia. Eodem anno MDCCXLVII.

* Quam ridiculam hic Auctor teneat scribendi rationem satis apparebit, si tantummodo ipsum titulum operis hic exseribam: *Coruscationes Dogmaticae universo orbi terrae pro recta Sacramenti Poenitentiae administratione resurgentes, in varios distributae radios, quibus noxia praxis detegendi Complices destruitur, atque variae propositiones tam Morini tam Muratorii dissipantur.*

librum edidit Muratorius Venetiis mole quidem exiguum, at vel propter optimam, quam tuetur, doctrinam, vel propter atroces, quibus impetitus est, adversariorum calumnias (quid enim res non suis appellem nominibus?) unum ex operibus Muratorii celeberrimis. Inscribitur autem *de recta hominis Christiani pietate sive devotione*. Lamindi Pritanii nomen & iste praefert, & Italica lingua conscriptus est. Rursus autem bis editus est Venetiis, totidemque Neapoli, ut de aliis editionibus Italicis sileam. Idem ab Hoffmannio Germanicam in linguam conversus Moguntiae, nec non quater Vindobonae typis impressus est, ac demum iterum Vindobonae praelum subiit, cum a Bernardo Lama, qui a Latinis erat epistolis Imperatricis Mariae Theresiae semper Augustae, Latinitate donatus esset. In hoc opere sibi scriptor proponit, ut, quae vera sit pietas homine Catholico digna, & quibus potissimum in rebus ab ea distingatur, quae tantum virtutis habet speciem, nec satis a superstitione secernitur, ac proinde omnino commentitia dicenda est, optima in luce collocet. Mihi quidem videtur Au-

ctor praeceptum Concilii IV. Provincialis a Divo Carolo Borromaeo celebrati tenere diligenter: *Quantum in Religione stabilicnda laboris ponendum est, tantum in superstitione ex hominum animis evellenda curae & diligentiae est impendendum.* Non omnia potuit dicere, quae dicenda ac monenda ipsi videbantur: quae tamen dixit, hujusmodi sunt, ut fere totidem in hoc esse libello aurea praecepta quot verba (fremant, per me licet, omnes ejusdem obrectatores) non modo mihi, qui facile decipi possum, sed etiam viris & rerum scientia & vera pietate praestantibus videatur. Illud enim praecipue Christianis Catholicis in memoriam revocat, quam necessaria sit in Jesum Christum, qui *Mediator est inter Deum & homines*, pietas; & quanta injuria haec ab iis negligatur, qui tantillum *de cultu Sanctorum reliquiis aut imaginibus praestando* omittere, aut *de certis quibusdam ad Beatissimam Virginem precibus* detrahere magnae sibi religioni ducerent. Catholicam vero *de Cultu & Invocatione Sanctorum* doctrinam, si quis alius, vindicat, atque ita declarat, ut Protestantes, quibus imprudentes

quidam Catholici libellis anili superstitione plenissimis anam reprehendendi, ac, si Superis placet, illudendi Ecclesiam praebuere, hoc libro facile convinci, ac, si velint, ad sanam mentem redire possint. Ut exemplum aliquod proferam, nihil homine Catholico verisque doctrinis exulto dignius proponi potuit, quam duae ~~theses~~ post Muratorii mortem ab aliquibus Jesuitis, fortasse non satis easdem intelligentibus, oppugnatae. Altera est: *peccatorum nostrorum veniam a Deo postulandam esse & a Deo sperandam, quia ipse solummodo, non autem Sanctus aliquis potest a peccatis absolvere*: quo loco nihil meminisse necesse est, quod Muratorius sexcenties etiam hoc in libro fatetur, *Sanctos a nobis tum pie, tum utiliter exorari*, ut ipsi pro nobis a Deo vel ipsam nostrorum criminum veniam impetrent. Altera propositio est; *Gratias, quas dicimus, ac Miracula fieri a solo Deo per nos aut pro nobis per Sanctos exorare*. Sane qui propositionibus huiusmodi contradicat, anicularum, non Theologorum aut Ecclesiae sententias novit. Multa quidem habet Auctor in eos, qui studio colendae Beatae Vir-

ginis incensi nesciunt intra fines a vera pietate ac religione definitos consistere. Ea quidam homines ex eorum numero, quos devotos dicimus (utinam ex iis multi non aliquando veteres illos Phariseos imitarentur!) acrius infectati sunt, nec modo reprehensione, sed conviciis & contumeliis, nimirum sanctis, nimirum piis, nimirum Deo ac Deiparae gratis acceptisque, prosequi consueverunt. At ea si quis ex rationis religionisque regulis dijudicare velit, non aliam videbit referre doctrinam, quam illam Dionysii Petavii a Catholicis omnibus jamdiu probatam ac collaudatam: *Illud monere omnes audebo Cultores & Laudatores Virginis Sanctae, ut ne pietati ac devotioni suae nimium indulgeant, & ut veris contenti: solidisque praeconiis ficta & commentitia repudiant, quorum vel nullus possit, vel non idoneus Auctor afferri. Quod genus latentis, & insitae cordibus humanis, ut Augustinus ait, Idolatriae multum abhorret ab Theologiae, hoc est coelestis sapientiae, gravitate; quam quidem nihil sentire aut asseverare par est, nisi quod ad certam & exquisitam regulam sit exactum.* His quidem Petavii verbis

non abutitur Muratorius, ut non nemo scribere non dubitavit, sed ad ea perpetuo videtur in hoc libro respicere, nec latum quidem unguem ab eis discedere. Omnino quoque falsum est, Muratorium quaedam hoc in opere arguere, ac more haereticorum, praecipue Joannis Clerici, ridere signa pietatis, quibus uti Catholici consueverunt. Nolo mihi lectorem credere; breve opusculum ipse pervolvat; nihil hujusmodi inveniet. Muratorius quidem *de sacris Numismatibus*, *de Agnis Dei*, *de Sanctorum Imaginibus*, de iis, quibus *Carmelitae* aut *Dominicani* fidelium pietatem fovere solent, *de sacris ipsis parvis Vestibus*, de iis, quae *Scapulis* imponuntur, *Funiculis*, *Coronis*, nec non de *Sodalitiis*, aliisque similibus loquitur. At haec disertis verbis ait esse *non modo licita, sed etiam laudabilia*, quatenus videlicet ab Ecclesia probata sunt; & ad alendam, quam diximus, praecipue populi non satis eruditi pietatem mirifice conferre possunt. Juriaeum & alios Calvinii affectus ille reprehendit, qui scilicet eas Ecclesiae consuetudines cachinnis excipiunt.

Quid

Quid igitur sibi vult Muratorius? Ut quisque sit in iis finibus,

Quos ultra citraque nequit consistere rectum.

Quae cum ita sint, eos equidem Sacerdotes sacris etiam familiis addictos, ac nominatim quosdam Jesuitas laudare non possum, qui tantopere de hoc aureo libello, inter vivos etiam agente Muratorio, nescio qua de causa, obloqui voluerunt. Et eos quidem Jesuitas in auctorem, a quo Societas non modo laudata, sed & defensa fuerat, ingratos extitisse, gravibus nonnullis hominibus ea de re conquestis, non assentiri non possum. Verumtamen alio etiam ex capite hic idem liber Muratorium carpendi occasionem praebuit. Etenim ea, quae afferebat Cap. XXI. ad commendandum ac defendendum Benedicti XIV. S. P. consilium de diebus festis diminuendis celeberrimo Cardinali Quirinio admodum displicuerunt. Id sane mirum videri debuit Muratorio. Etenim totam hanc de festis diebus minuendis tractationem, quod non poterat ignorare Quirinius, non ipse sua sponte susceperat, sed ut Benedi-

cto XIV. pareret, mentem suam aperuerat. Benedictus quidem anno MDCCXLII. scriptum evulgavit, quo faciliorem Episcopis festorum dierum imminutionem efficeret; scripti autem ejus exemplum ad Muratorium deferri voluit, eidemque per Cardinalem Tamburinium significari, sibi fore gratissimum, si, quid ipse de rebus iis opinaretur, edissemus. Sententiam illico suam litteris mandaverat Muratorius, ac per eundem Tamburinium Benedicto scriptum idem transmiserat. Tamburinius autem cum mandata fecisset, Muratorio rescripsit Pontificem exemplo tum scriptum legisse, tum in ejus & auctoris ipsius, quem *magnum ac bonum* vocavit *virum*, laudem plura secum esse loquutum. Addebat etiam Pontificem tunc imperasse, ut Muratorio suis verbis salutem diceret, ipsique significaret, *scriptum illud Cynosuram sibi fore in iis omnibus, quae de festis diebus imminuendis effect constituturus*. Sed & ad Quirinium anno MDCCXLII. scripserat Muratorius, ut consilium Pontificis de diebus festis imminuendis ipse Cardinalis promoveret ad pauperum utilitatem. Cardinalis autem ea de

re cum ipso Pontifice collocutus fuerat, Muratorii sententias exposuerat atque rationes; ac demum per litteras & ipse a Muratorio quaesierat, ut fufius etiam de hac tota re quidquid opinaretur litteris consignaret. At enim Cardinalis Quirinii animus eo tempore, quo Muratorii liber, de quo modo loquimur, imprimebatur, omnino commutatus erat. Nam contra Alexandrum Borgiam Firmanum Archiepiscopum, qui ante alios veniam a Summo Pontifice pro diebus festis minuendis obtinuerat, multa conscripserat, quibus etiam Praeful ille responderat, atque hinc nonnullæ ex utraque parte epistolæ typis impressæ fuerant. Itaque Cardinalis Quirinius, perlecto Muratorii libro, *epistolam* edidit *Abbati Dissensio* inscriptam, qua rationes capite, quod jam diximus, a Muratorio propositas confutaret. Respondit Cardinali Muratorius libello, qui anno MDCCXLVIII. typis editus est Lucae cum libellis aliis ad hanc controversiam pertinentibus *. Antequam il-

Z 2

* Titulus erat : *Difesa di quanto ha scritto Lamin-*

lum ederet Muratorius, Pontificem Benedictum nomine suo rogari curavit, ut omnium Episcoporum & Catholicorum Collegiorum elenchus sibi mitteretur, qui Festorum imminutionem ab Apostolica Sede petivissent, ac deinceps illud etiam, ut sibi libellum eundem publici juris facere liceret. Utrumque statim a Benedicto obtinuit. Elenchum vero illum ad calcem novi libelli Muratorius apposuit. Hic etiam libellus Cardinalem vehementer offendit quamvis admodum iusta de causa Muratorius pro pauperibus pugnare videretur. Putabat Quirinius, eam controversiam non ad *Ecclesiasticam* tantummodo *disciplinam*, sed ad ipsum quoque *δογμα* pertinere. Hinc eos, qui Festorum imminutionem esse concedendam arbitrabantur, in eum errorem nolentes delabi putabat, ut Pontifices & Ecclesiam Catholicam in iis instituendis peccasse statuerent. Itaque eodem

da Pritanio in favore della diminuzione delle troppe feste. Extat in Collezione, quae inscribitur: Raccolta di Scritture concernenti la diminuzion delle Feste di precetto.

anno MDCCXLVIII. longam edidit *epistolam ad Italiae Episcopos universos*, qua Pritanii rationes confutandas evellendasque suscepit. Hac etiam vice Muratorius minime sibi taceendum duxit, eodemque anno, cum apud Marchionem Ludovicum Coccapanium rusticaretur, *Responsonem* aliam elucubratus est, qua Cardinalis argumenta diluit, addito pro pauperibus, ipsorumque nomine ad eosdem Italiae Episcopos libello supplici. Haec tamen altera ad Quirinium *Responso* publici juris eo tempore minime fieri potuit, quod cum eam auctor misisset Romam, ut, siquid displiceret, corrigeretur, XVIII. kal. Decembris eodem anno MDCCXLVIII. Summus Pontifex Benedictus XIV. ea de controversia utrique parti silentium imposuit, Ecclesiasticas etiam censuras iis, qui minime parerent, comminatus. Eodem tamen decreto Pontifex controversiam ipsam non ad *dogma*, quod volebat Quirinius, verum ad *disciplinam* dumtaxat, quod Muratorius probaverat, pertinere edixit. Ex eo etiam tempore plures Episcopi, quin & integra regna *Pontificium Decretum pro Festorum dierum imminutione* petiverunt.

runt, atque obtinuerunt, ut hoc etiam ex capite Muratorie contra Quirinium adjudicata lis esse videatur. Verumtamen post indictum quoque silentium Quirinius in id adlaboravit, ut edita typis Lucensibus Muratorii Defensio Romae proscriberetur. Etenim causabatur, Auctorem damnare Festorum multipliciter a Summis inductam Pontificibus, ac verbis uti, quae contemptum aliquem Ecclesiasticae significarent auctoritatis. At id frustra tentavit. Integerrimi enim ac maxime pii sensus quique illius libelli deprehensi sunt. Postea Quirinius in id curam omnem animumque convertit, ut simultatibus universis de medio sublatis, vetus amicitia & familiaritas, quae Muratorio cum ipso intercefferat, omnino renovaretur. Tentavit id per Franciscum Rotam Abbatem ex Ordine S. Benedicti Venetiis gravissimum virum, qui negotium totum per epistolam cum Muratorio facillime confecit. Hinc Muratorii ad Rotam, & ad ipsum Muratorium Quirinii litterae leguntur apud Solium officii humanitatisque plenissimae. Ea vero doctissimorum hominum amicitia feliciter instaura-

ta egregiis officiis, & amoris atque existimationis omni significatione per annos, qui consequuti sunt, exculta fuit. Jam vero Muratorii liber de recta Devotione, non amplius ad mortem illius fuit acriter exagitatus. Postquam ea contigit, incredibile dictum est, quot in eum tragoediae excitatae fuerint. Pepius Jesuita, vir magnae apud plebem Neapolitanam auctoritatis, ita de libro & auctore loquutus est e sacro suggestu, ut stomachum universis cordatis hominibus in ea civitate moverit. Auctorem ejus libri *sine Sacramentis Ecclesiae mortuum esse, haereticum, aeternis poenis addictum*, opus vero *haeresibus plenum*, si pluribus ejus auditoribus habeatur fides, ad populum verba faciens ille praedicavit. At quoniam id falso fuisse nunciatum ipse Franciscus Pepius datis ad Solium litteris conquestus est, quas quidem litteras in Aretina commemorata saepius a nobis editione Solius ipse religiose recitat, etsi non admodum eis fidere se se demonstrét, nihil in ea re nos immorari necesse est; praesertim cum in iisdem litteris Pepius de Muratorii eximia pietate singularique vir-

tute magnifice loqui ac sentire videatur. At certe Pepius (neque id aliquis negare audeat) *temerarias*, vel *haeresibus affines*, *falsaeque propositiones* proprio Marte per summam, ut levius dicam, excogitatas amentiam, ei-que libro tributas, acerbissimis confutare verbis in suis ad populum orationibus institit; neque vero antea furere destitit, quam ejus, cui parere cogeбatur, auctoritate ad silentium adaetus est. Narrant tamen ita tacuisse, ut ex eodem suggestu, *denique ad extremum sibi Diaboli filios, ne quid amplius de illo libro loqueretur, os obstruxisse* diceret. At Benedictus Piazza, & Salvator Mauricius ex eadem Societate homines libris quoque editis * contra Muratorii doctrinam pugnarunt,

* Piazzae liber est: *Christianorum in Sanctis Sanctorumque Reginam, eorumque Festa, Imagines, & Reliquias communis & propensa Devotio a praepostere Lamindi Pritanii Reformatione venerandae potissimum antiquitatis monumentis & documentis vindicata simul & illustrata*: Editus est hic liber anno MDCCCLII. Anno autem MDCCCLIII. prodiiit Mauricii liber, cui titulus: *La Divozione dei Cristiani difesa dalla Critica di Lamindo Pritanio Dialoghi compilati da Salvatore Maurici della Compagnia di Gesù*: Hic auctor omnia fere, quae profert, e Piazzae libro mutuatus est.

quibus etiam plures Ordinum aliorum homines, praeter Jesuitas non ita paucos, ad stipulati sunt, ille praesertim, de quo loquuti sumus, Carmelita, qui sub Iosephi Antonii de Vera nomine delitescens infame illud opus ex tot contumeliis mendaciisque confutum contra Muratorium exaravit. Magnarum ii libri turbarum inter homines literis deditos occasiones extitere, de quibus me multa scribere nihil necesse est, quod cum contigerint post Muratorii obitum, ad ejus vitam, quam suscepi describendam, proprie non spectent. Aliquid idcirco dico, quod & de libris ejus, ipsorumque librorum fortuna nonnihil dicere institui. Illud certe veritati me debere quodammodo sentio, ut clarius etiam apertiusque significem, quantopere Benedicti Plazzae liber, etsi doctissimum aliquem Jesuitam habuerit laudatorem atque patronum, mihi displiceat. Equidem cum quovis homine quovis sacramento contenderem, ne unam quidem ex temerariis aut audacioribus propositionibus a Plazza Muratorio tributis, atque hinc oppugnatis in

ipso Muratorii libro inveniri. Aerem verberat Piazza scribens in aureum illud opusculum, aut fingit potius hostem, quem feriat. Etenim fervidus hic Siculus eo se se furoris abripi sinit, ut & *Jansenistam & haereticum in postremis septem libri capitibus auctorem nostrum videri*, velit ostendere. Paullo moderatior est Mauricius: & ipse tamen eo saepius proclivis est, ut, quae Muratorius catholicam in sententiam scripsit, ipse in deteriore partem accipiat, atque ita virgam censoriam in eum exerendi occasionem non tam sumit, quam ipse creat. Hi clamores fortasse effecerunt, ut Benedictus XIV. Muratorii librum ab iis, quorum hujusmodi munus est, ad examen vocari jufferit. Cunctis suffragiis judicatum est, nullam illi posse vel levissimam notam censoriam inuri. Rationem autem hujus rei Ricchinius, qui tum *Indicis*, ut vocant, a *Secretis* erat, eam fuisse, Christophoro Migazzio Vindobonae Archiepiscopo scripsit, *quod illa, quibus auctor adversatur, quaeque criminationibus locum dederant, essent vel certae manifestaeque sacrarum rerum depravationes, vel insipientes ad superstitionem*

caeteroqui pronioris popelli Opiniones, quas Catholica Ecclesia numquam probavit. Hoc testimonio usus est optime Migazzius idem ad Muratorii librum contra Jesuitarum quorundam, ac praecipue Schezii, criminationes defendendum. Hic enim in *Confessu Regio*, sic enim dicitur, *Censurae librorum pro tota domus Austriacae ditone* magnopere conquestus fuerat, quosdam Jesuitarum libros integerrimae doctrinae ab eo *Confessu* fuisse proscriptos, cum liber Muratorii *de recta hominum Christianorum devotione*, multa continens perniciem animabus allatura, esset in manibus hominum, nec quisquam de illo notando cogitaret. Iis quidem verbis Migazzius senserat, se potissimum peti. Etenim is non modo laudaverat librum, sed & Augustae Mariae Theresiae ac filiabus ipsius lectionem ejusdem commendaverat. Itaque per Simeonem Stockium ex ejus *Confessus* Theologis unum Schezio indici curaverat, ut pronunciati sui rationem intra tres hebdomadas produceret, &, quid in Muratorii libro non satis homine Catholico dignum esset, ostenderet. Conditionem Schezius accepit. Verum-

tamen, quae post dies quindecim ad eum *Confessum* attulit, tam infirma gravissimi viriprehenderunt, ut omnium suffragiis iterum Muratorius fuerit absolutus. Accidit id anno **MDCCLIX**. Migazzius postmodum ad eum *Confessum* litteras Ricchinii misit, ac *Monitum* vel *Germanae* vel *Latinae Muratoriani Operis Interpretationi* praefigi curavit, quo de Romanorum Patrum judicio omnes edocerentur. Ea ratione turbae quieverunt, quae Viennae fuerant a quibusdam, praesertim Jesuitis, contra aureum, de quo loquimur, Muratorii opusculum excitatae. Aliquid hoc loco etiam contra Constantinum Rotignyum ex Cassinensibus Monachis dici oporteret, qui volumine Venetiis edito an. **MDCCLI**. * magnam voluit invidiam creare Muratorio, quod is Molinae doctrinam *de Gratia Dei* in eodem illo opusculo sequi visus fuerit. Sed Rotignyo satis respondet Maffejus non semel honoris causa in Muratorii vita nomi-

* Titulus est: *Trattato della Confidenza Cristiana* sub nomine Alethophili Sacerdotis.

nandus *. Ceterum res huiusmodi non erat, ut vel objurgationis, vel defensionis argumentum deberet esse. Etenim nec, quod Rotignus confidenter sumpsit, vere significaverat Muratorius, nec, siqua ratione significasset, ab eo, qui vellet his in rebus Pontificum Summorum stare decretis, fuisset ullo modo vituperandus. Ceterum non defuerunt huic etiam Muratorii libro strenui fortesque defensores. Eorum sane libri maxima essent laude digni, nisi aliquando longius fortasse quam par fuerat ab ira sine dubio iusta, semper tamen a sapienti viro coerenda, se se abripi passi essent. De iis consulere potes Solium, qui multa in iis, quae in *Aretina editione Vitae Muratorii* adiecit, contra tum sui, tum avunculi obrectatores habet, ex quibus non omnia probet pacatus lector, non omnia rejiciat. Equidem non possum, quin hoc loco magnopere laudem Ambrosium Manchium ex Ordine Augustinienfium, qui Neapoli commorabatur,

* Cap. VIII. oper. cui titulus. *Il Gianfensmo Nuovo*. Venet. anno 1751.

hominem & doctrina & modestia omnino singulari. Is enim auctor est operis, quod *Lamindi Pritanii Redivivi Epistola Paraenetica ad P. Benedictum Plazza &c.* inscribitur; quo quidem opere quidquid in Muratorii librum, de quo loquimur & quaerimus, allatum est ab acerrimo ejus adversario dissolvitur atque refellitur. Manchius quidem postea *Dialogos vernaculo sermone composuit contra Mauriciū*. Ii quidem an lucem viderint, nondum rescire potui. Consutaverat etiam scriptis aliis alios ejusdem aurei opusculi calumniatores, ab iis tamen edendis de gravissimi viri consilio abstinuit, ne nimis obscuros contemptosque scriptores honore non merito afficere videretur. Ceterum in ea epistola facile invenias quidquid omnibus respondere debeas saepe laudatum Muratorii librum injuste carpentibus. Defessi jam sumus Muratorianis operibus commemorandis. At egregius ille senex & morbis & aetate admodum ingravescente pressus non tamen in operibus ipsis conscribendis se se defessum profitebatur. Jam ergo de postremo ejus opere Theologico, quod unice jam superest

exponendum, tandem aliquando verba faciamus. Summus Pontifex Benedictus XIV. *epistolam* dederat ad *Episcopum Augustanum de quadam Sanctimoniali*, quae nimirum in oppido, quod *Causbira* dicitur a Germanis, magna fuit sanctitatis gloria, quamvis postea detectum sit, superstitionis omnia fraudibus constituisse. Ea epistola fuerat an. MDCCXLVII. multis argumentis oppugnata per Christianum Ernestum de Windheim religionem Protestantem, gente Germanum. Hic quidem ea scribens alias etiam Benedicti sententias in opere *de Canonizatione Sanctorum* positas labefactare aggressus fuerat. Muratorius itaque ei respondit *Dissertationem* typis Lucensibus anno MDCCXLIX. in lucem edens, cui titulus erat: *De Naevis in Religionem incurrentibus, sive Apologia Epistolae a Sanctissimo D. N. Benedicto XIV. Pontifice Maximo ad Episcopum Augustanum scriptae*. Ea demum *Dissertatio* Augustae etiam praelum subivit. Benedictus autem, cum ipsam a Cardinali Tamburinio accepisset, gratias auctori per epistolam humanissimam egit, quam Solius recitat. Verumtamen hoc in opere praeter

Summi Pontificis defensionem, rem aliam non levis momenti praestat. Etenim ex iis, quae de muliere illa acciderant, occasionem nactus, & libertate usus, quae Catholicum eundemque honestum deceat scriptorem, naevos aliquos aut vitia, quae non Ecclesiae sunt, aut in Ecclesia detegit, praesertim in iis, quae pertinent ad pietatis cultum. Etenim hoc etiam in libro demonstrat, leves aliquos viros, nedum leviores mulierculas, eo saepissime progredi, ut a vitio superstitionis aut parum, aut etiam nihil abesse videantur. Neque vero doctissimi hominis ingenua confessio Protestantes in erroribus confirmavit, ut severiores quidam Theologi verebantur, at optimae causae non parum profuit. Ii quidem etiam eo deliniti sunt, quod Muratorius, contra Windheimium scribens, qui regnantem Pontificem non levi laceffiverat impudentia, humanitatis atque urbanitatis regulas universas constantissime tenuerit. Nempe non tam quid illi audiendum, quam quid sibi dicendum esset, Muratorius cogitabat. Accidit, ut quondam cum eo sermonem de illo libro habens homo

mo nescio quis religioso cuidam Ordini adscriptus eam scribendi rationem, *ut nimis dulcem atque suavem* improbare. Nempe huiusmodi homines omnia ferro flammaque miseri vellent, cum de rebus agitur ad Catholicam Fidem, vel quod ipsi Catholicae Fidei nomine intelligunt, aliqua ratione spectantibus, & eas tragoedias, ubi possunt, agunt, quae nimium quantum a Christi Domini ac Salvatoris nostri clementia & mansuetudine abluunt. Cui Muratorius illico respondit; nunquam fore, ut ejus rei se quidem poeniteret: persuadendo, non objurando, eum proficere debere, qui convincendos haereticos refutandosque suscipiat. Muratorium ex vero totam eam rem agnoscisse vel ex iis constat, quae, libro *de Nævis* perlecto, Augustani Protestantes aperte confessi sunt. Sane Joannes Baptista Bassius Augustae Canonicus datis ad Muratorium litteris v. kal. Maii anno MDCCXLIX. testatus est, doctissimos Protestantes prae se tulisse, si cum hominibus Muratorio similibus agendum esset, magnum illud negotium optatae pacis inter Catholicos & Protestantes incun-

dae facillime per se se susceptum iri. Ea de re, ut obiter id dicamus, cogitaverat jamdiu noster, quin & Quirinium suis etiam consiliis ad id juverat, ac stimulos currenti addiderat, ut eam tractationem cum Protestantibus quibusdam & doctrinae & honestatis laude florentibus tandem aliquando susceperet. Itaque lectis iis Bassii litteris, vehementer laetatus est, quod rem aliquando fieri posse viderit, simulque vehementius indoluit, sibi aetatem ingravescentem, ac non satis firmam valetudinem impedimento esse, quominus iter in Germaniam ad rem ita praeclaram exequendam arriperet. Verumtamen, quod proprius huc pertinet, liber *de Naevio* per Italiam etiam & Galliam cordatis hominibus ita probatus est, ut gravissimum in eo Theologum a studio partium, & a praejudicatis opinionibus alienum se se admirari dicerent. Haec de singulis Muratorii operibus dicta sufficiant. Aliqua nos missa fecimus ex iis, quae reliquit inedita; quamvis & ea Aretini *Muratorianorum Operum Editores* publici juris facienda susceperint. Ea quidem hujusmodi esse novimus, ut non

admodum nos in iis omittendis aut pigere necessitatis, aut alicujus etiam negligentiae poenitere debeat. Restat ut cum de singulis dixerimus Muratorii libris, & quid de iis aut ab aequis judicibus, aut ab adversariis pronunciatum sit exposuerimus, aliquid etiam de judiciis dicamus, quae de operibus iisdem universis fecerunt homines invidia praesertim in Muratorium, aut odio, aut alia quavis animi perturbatione laborantes. Nam si de iis dicendum esset, qui universa laudarunt, multo difficilius esset orationis ejus exitum quam initium invenire. Tota mihi potius compellenda esset Europa, cum nemo fere sit etiam extra fines Italiae vir literis deditus, quin de iis magnifice loquatur ac sentiat. Ille litigiosus accusator Cennius vel ex ipsa Muratorianorum operum multitudine detrahendi opportunitatem arripit *. Quid? Rationibus etiam initis fieri nullo modo potuisse conatur ostendere, ut vel brevi tempore, quo testatur Solius, ali-

A a 2

* Vid. *Giornale di Roma* anno 1760.

qua conscripta fuerint, vel omnia sine multis adjutoribus elaboraverit. At enim Cennio facile respondeas, non modo Solium, sed & fere omnes ex ea civitate summo opere litteris ac litteratis hominibus abundante de singulari quadam atque alias inaudita, quae Muratorio fuit, scribendi librosque condendi celeritate dicere testimonium, quod certe non sine magna temeritatis nota repudies. Iidem sane Mutinenses, quinam adjutores Muratorio fuerint in Estensi bibliotheca nos edocent, innumerabiles nimirum libri, quibus etiam in tabula, super qua scribebat, adaperitis quandoque circumfusus sumebat ille quidquid erat opus, & in rem suam derivabat; non ita tamen, ut alienis se se penuis exornaret, quod levioribus quibusque scriptoribus solemne est, sed ut iudicium suum sane gravissimum & maximum adhiberet. Ceterum illud equidem voluissem Cennius considerasset maturius, non eodem modo, quod pertinet ad eam rem, de Muratorio ac de ceteris etiam doctis hominibus bonorumque librorum auctoribus esse judicandum. Si duodenas per singulos fere

dies, paucis quibusdam annis exceptis, horas eum liberalissimis studiis impertiri consueſſe, Cennius in memoriam revocasset; ſi qui fuerint Muratorio ingenii motus ad excogitandum acuti, ad investigandum celeres, ad explicandum uberes, ad memoriam vero quam maxime firmi atque diuturni cogitaſſet; ſi tantopere Muratorium studiis iisdem delectatum fuiſſe, ut non alio, ſi tantum demas officia religionis, mentis acerrimae vires facultateſque converteret, Cennius idem ſecum animo reputaſſet, nae facile vidiſſet non ita multis adjutoribus hominem ſapientiſſimum opus habuiſſe. Ceterum ſi quando Muratorius aliorum opera debuit uti, debuit autem ſaepius, quod & ipſi ſuo loco narra- vimus, nunquam id admisit, ut in aliquem ingratus aut eſſet, aut ullo modo videri poſſet. Alia quaedam in Muratorianos libros Cennius habet, quae facile per ſe quiſque refellat. Nescio autem quam hic ſcriptor ipſe ſibi conſtet, cum non modo *eruditum*, aut *doctum*, aut *magnum* eundem Muratorium appellat, ſed librorum auctorem fuiſſe ſatetur, *cui certe invidere poſteritas poterit, non*

autem ad ipsius laudem ullo modo pervenire :
 Fuit qui conquereretur acerbius Franciscum
 Antonium Zachariam minus aequum se se
 cenforem in Muratorium saepenumero prae-
 buisse . Equidem non diffiteor , eum ita
 quandoque de tanto viro scribere , ut mi-
 nus ei studere , neque admodum ejus glo-
 riae favere videatur . Sed quibus de causis
 id factum fuerit , quis non facile sentiat ?
 Attamen nemo negare ausus fuerit , Mura-
 torium Zachariae summum fuisse virum , &
 iis aliquando celebratum laudibus , ut hujus
 animadversiones in libros Muratorianos for-
 tasse minus aequae facile compensentur , aut
 certe admodum emolliantur . Quid jam de
 quibusdam ego Scriptoribus pronunciabo ,
 qui magni videlicet ingenii , ad veritatem
 inveniendam facti , gloriam Muratorio dene-
 garunt ? Ita certe desipuerunt Archangelus
 Ballatius Carmelita * & Joachimus Gabar-
 dius e S. J. ** ; & ii quidem addiderunt ,

* In Vita Italice scripta S. Monicae Senis anno
 1757. in lucem edita .

** Vid. *Saggio Critico di Letteratura Straniera P.I.
 T. II. p. 10.* Ibi enim hujus de Muratorio judicium
 refertur .

pravis & absurdis opinionibus Muratorium *impleviffe libros*, & alia similia, quae scilicet sine maximo fastidio nemo perlegat, nisi qui fere nihil de liberalissimis disciplinis audiendo quaerendove cognoverit. Mihi quidem verba non suppetunt, quibus tantam inconsideratorum hominum temeritatem exagitem atque proscindam. Fateor equidem Muratorium fuisse hominem, fateor in quibusdam hallucinatum fuisse, fateor errasse. At quis plurima dicat in ejus libris *absurda*, *summique viri doctrina prorsus indigna* reperiri, nisi caput omnino gerat tribus Anticyris insanabile? Non enim; qui levissime sapiat, absurda vel prava vocare debeat, a quibus ipse dissentiat. Probabilia dicenda sunt, quae doctorum hominum, atque prudentum assensum movere possint, etsi nobis eadem a veritate aberrare satis idonea ratione persuasum fuerit. Quatenam est autem ex opinionibus Muratorianis, iis praesertim, quas ille fufius ac data opera propugnavit, quae non plurimos habeat assensores gravissimos viros quavis eximia laude florentes? Jam vero quâ potest summum ingenium homini

denegari, qui maximarum, earundemque inter se dilutarum omnino rerum scientiam animo complexus, ita de iis disputaverit, ut nova multa protulerit, multa prolatis addiderit, & ad veritatem inveniendam avia saepissime loca nullius ante trita solo peragraverit? Etenim in iis vel maxime rebus admirabilis ingenii vis exeritur. Cetera memoriae, vel ejus, quae *phantasia* dicitur, viribus, vel ipsa exercitatione, vigiliis, ac laboribus perfici possunt. Verum consilii mei me jam poenitet, quod hujusmodi retulerim censuras, & parum abfuerit, quin ipsas refellendas hoc loco susceperim. Quid sit de iis dijudicandum quisque non illitteratus & ingenio subacto lector facile statuit. Muratorii autem gloria ita est in tuto posita, ut non modo eam nulla levissimorum Scriptorum dicacitas, sed ne ulla quidem vetustas, aut posteritatis oblivio obscuratura esse videatur. Jam igitur haec relinquamus, & ad ea commemoranda pergamus, quae de Muratorii Vita dicenda restant. Etenim illud superest, ut de morbo ejus extremo, ac demum de morte non immatura quidem,

sed tamen bonis omnibus luctuosa narrem; quod memoriae proditum accepi. Ex ipsa rerum narratione constabit, quid sit de iis omnino statuendum, qui Muratorium tum coecitate, tum morte poenas Deiparae, propter *Sanguinarium* illud *Votum* oppugnatum, luiffe sparserunt in vulgus, ac litteris etiam consignare non dubitarunt. Equidem nisi de tanto viro tam gravi contumelia affecto ageretur, nihil ad risum excitandum aptius afferri potuisse dicerem. Quid enim levius enunciari potest, quam coelesti prodigio tribuendum, quod homo, cujus aetas ac valerudo libris qua legendis qua componendis contrita fuerat, cum octavum supra septuagesimum vitae annum attigisset, & oculis tandem fuerit captus, & supremum diem in suo lectulo jacens post longum sane morbum obierit? Italiae profecto dedecus est, in ea homines inveniri, qui vel in concionibus vel in libris ista effutiant, neque fere omnium auditorum aut lectorum conviciis excipiantur. Illud multo liberalius & homine Catholico dignius, idemque factum, quod in eos nebulones, ut equidem

interpretor, ludens Lamius scripsit: "divinitus
 factum videri, ut x. kalend. Februarii Mu-
 ratorius obiret", quo meritorum suorum in
 Deiparam, die Deiparae sacro, coronam
 corporeis vinculis exsolutus acciperet. At,
 quod instituimus, absolvamus. Quamvis te-
 nui valetudine Muratorius vel ab adolescen-
 tia futurus videretur, & exercitatione cor-
 poris, praesertim in deambulando, & a no-
 xiis voluptatibus, quin & a cibis paullo co-
 piosioribus, abstinencia ita eam confirmave-
 rat, ut praeter morbum anni MDCCXX. de
 quo diximus, & alium anni MDCCXXXVI.
 quo non leviter ob tumorem in pede labo-
 ravit, morbis tentatus haud fuerit nisi levi-
 bus, iisdemque minime longis. Anno tamen
 MDCCXLVI. & eo, qui consequutus est, per
 Septembrem febre, quam *tertianam duplicem*
 appellant medici, correptus fuit, ac demum
 anno MDCCXLIX. per hiemem in genibus
 magnam debilitatem passus est non sine tu-
 more ac dolore aliquo. Mentis etiam vires
 ita eum defecerunt, ut nihil per totam hie-
 mem litteris mandare potuerit. Tunc qui-
 dem S. Joannis Chrysostomi leſcitabat homilias,

quibus, ut supra narravimus, mirum delectabatur in modum. Ineunte vere easdem vires recuperavit, ac librum *de populari eloquentia* conscripsit. Verum gravioribus ex eo tempore valetudinis incommodis affectus est: qua de re medici, ut jus viperæ fumeret, auctores eidem fuere. Paruit Muratorius; at nullo modo potuit adduci, ut in lectulo esset, magisque, studiis intermissis, curaret valetudinem. Huc accessit, quod eodem anno per Majum, quin & per majorem Junii partem frigidior esset aer ob nimias pluvias; quam eo tempore soleat. Hinc factum est, ut ex quo remedio proficere debuisset, non parum ejus valetudo laederetur. Itaque noxius humor, qui consistere consuevit in genibus, supernas partes non sine acribus doloribus petiit; ex quo contigit etiam, ut dexteræ manus usum per plures menses amitteret. Ad hæc prostratio virium ac nausea ciborum adjungebatur. Aliquantulum se se ruri per Autumnum relevare sensit, sed mense Novembri vis morbi admodum ingruit, cum etiam capitis vertigines, quæ videbat res omnes duplices, pateretur. Quamobrem

VII. kalend. Decembris die Catharinae Virgini ac Martyri sacro, cum sibi mortem propius imminere sentiret, vitae suae culpas universas Catholico ritu Sacerdoti, pietatis religionisque signis haud levibus editis, confiteri voluit. Ad V. kalendas improvise inter scribendum oculo dextero se se captum esse deprehendit, cum sinistrum forte occlusisset. Accidit hoc vi paralyfis, qua paullo ante visum omnino amiserat, ac deinde, quod in morbis id genus non solet ita raro fieri, recuperaverat. At pridie non. Decembris etiam sinistrum amisit oculum, ex quo tempore non amplius ad mortem videre potuit. Homini tantopere libris dedito nihil molestius potuisset accidere. Fortiter tamen, ne dum patienter, id pertulit. Crudelius etiam per eum mensem morbo doloribusque tentatus fuit. Tandem omnibus Christianae Fidei sacramentis pridie kal. ipsisque kalendis Januarii, procurari voluit. Ad diem prid. id. vis morbi semper in deterius vergere visa est, quo etiam tempore noster non modo virtutes universas homine Christiano dignas prae se tulit, sed amicos ac

necessarios ipse consolabatur, ut, quod sibi conditione naturae accidebat, leviter ferrent. Cum triduo ita melius habuisset, ut jam convalescere videretur, litteras etiam ad Tamburinium Cardinalem, & ad Massejum dictare potuit. Quod pertinet ad eas litteras, unum est, quod silentio minime praetermittendum esse duco. In epistola, quam ad Massejum dictavit, duabus ex causis fieri dicebat, quominus opinionem illius, quod neque veri magi, neque sagae sint, amplecteretur. Altera erat, quod ab ea sententia Sacrarum Scripturarum auctoritate deterrebatur; altera quod, cum ad ea tempora nullum ex suis operibus fuisset ab Ecclesia damnatum, ne damnari quidem aliquod voluisset in posterum. Verum ad x. kal. Februarii, cum pridie magno dolore ad partem cordis afflictatus esset, sed tranquillum in speciem ea nocte somnum habuisset, repente crudelissimi, quo correptus fuerat inter dormiendum, *σύμπτωματος* indicia dare mane coepit, ac paullo post, adstante Solio ejus sororis filio, quem saepe laudavimus, & Catholicis ritibus ea omnia peragente;

quae per tempus peragi potuerunt, spiritum emisit, cum annos LXXVII. menses. III. dieſque II. abſolviſſet aetatis. Ita mortuus eſt Ludovicus Antonius Muratorius, cujus nomen tamdiu ſine dubio vivet, quamdiu literis erit ac bonis artibus apud homines honor. Juſta fuit ſtatura ejus; corpus quadratum, quod tamen ad pinguedinem vergeret; alta frons ac lata; coerulei oculi; longior naſus; quin & ipſa facies oblonga, & colore plerumque ſano. Gravitas in illa ſimul ac neſcio quae ſuavitas exiſtebat, ut omnes ad amorem ſui ac reverentiam facile alliceret. Quamvis omnino paucorum eſſet verborum, affabilis erat & humanus & hilariſ; quin & hilarium hominum, praecipue juvenum, dummodo ii ſervarent in omnibus verecundiam, ſocietate delectabatur. Nihil eomodeſtius, nihil etiam demiffius fuiſſe narratur. Eam enim animi virtutem, quam Ethnicis fere incognitam Chriſtiani *Humilitatem* appellavere, ita coluit, ut ipſam in actibus omnibus, in ipſo inceſſu atque veſtitu praefeſſet. Nunquam enim ſericis, at laneis dumtaxat veſtibus, in quibus nihil, praeter

munditiem, magnopere laudasses, uti voluit. Gloriam appetentior, nisi in juventute, minime fuisse dicitur, cum ad finem multo nobiliorem quidquid agebat aut scribebat, referre videretur. Catholicam enim Religionem non modo dictis, sed & tota vivendi ratione ita professus est, ut nunquam omnino, quin ea divinitus tradita sit hominibus addubitare visus fuerit. Hinc reliquis etiam omnibus enituit virtutibus, quae Catholicum virum, praecipue sacris addictum, vel maxime decent. Multa de illius in Deum Fide, multa de Spe, multa de Charitate in Deum & in homines commemorat Solius, a quibus equidem afferendis, praesertim quod ex reliquis a me narratis intelligantur satis, ut brevitati aliquando consulam, abstineo. Mansuetudo vero atque patientia, qua plerumque pertulit injurias, tamen natura fervidus esset, ac facile sanguis ipsius, quod vel ex vultus colore agnoscebatur, exardesceret, fuerunt omnino singulares. Ut paucis omnia complectar, non modo scriptorem eximium in Muratorio universus terrarum

orbis, sed virum omnino bonum, ac Sacerdotum ordine suo dignissimum civitas Mutinensis, & quotquot cum illo egerunt unquam familiarius admirati sunt. Corpus ejus postridie quam ille decessit, non sine magnis honoribus in S. Mariae de Pomposa elatum est, Episcopo Mutinensi cum Parochis omnibus, aliisque Sacerdotibus ex principibus civitatis pro eo sacra facientibus. Sed & alias Muratorio parentatum est non sine rara quadam illoque digna magnificentia. Etenim Messanae docti homines, qui Muratorium tanquam unum ex fundatoribus Academiae suae venerabantur *, cum nuncius de morte ejus esset allatus, memoriam tanti viri funebri oratione, pluribusque carminibus, ad ejus imaginem floribus redimitam, in ipsa Senatorum Messan'ensis civitatis aula, celebravit, & Mutinae x. kalend. Februarii anno MDCCLI. cum dies recurreret ipsius obitus justa denuo solemni ritu, majore etiam cum pompa ei persoluta sunt, elegantem

ORA-

* *I Pericolanti Pelgrini.*

orationem in ejus honorem Jacobo Alberto Leporatio ad frequentissimum populum habente. Ille quidem testamento caverat, ut sine ulla funeris pompa, quin & sine capsâ conderetur in tumulo, quem ipse sibi paraverat cum epigraphe

LUDOVICUS ANTONIUS MURATORIUS
SIBI AC HAEREDIBUS PARABAT
ANNO MDCCXXI.

Sed Solius aliquid dandum suae pietati celeberrimae avunculi putavit. Itaque illi duo marmorea monumenta cum elogiis in eadem Ecclesia posuit.

INDEX OPERUM

Cum singula saepius praelum subierint, ut brevitati consulamus, locum dumtaxat & annum primae editionis apponemus.

Anecdota Latina ec. T. I. Mediol. 1697. II. ibid. 1698. III. & IV. Patavii 1713.

Vita e Rime di Carlo M. Maggi. In Milano 1900. Tomi V.

I primi Disegni della Repubblica Letteraria d' Italia ec. In Napoli (Venezia) 1703.

Prolegomena ec. in librum, cui titulus: Elucidatio Augustinianae de divina Gratia doctrinae. Coloniae 1705.

Lettera ai generosi e cortesi Letterati d' Italia, senza data. In Venezia 1705.

Della Perfetta Poesia Italiana ec. To. II. Modena 1706. colle Note del Salvini in Venezia 1713.

Lettera in difesa del March. Gio. Gioseffo Orsi ec. Bologna 1707.

Introduzione alle Paci Private. In Modena 1708.

Riflessioni sopra il buon Gusto ec. sotto nome di Lamindo Pritanio. In Venezia 1708. e colla II. parte in Colonia (Napoli) 1715.

Osservazioni sopra una Lettera intitolata. Il Dominio temporale della Sede Apostolica sopra la città di Comacchio ec. In Modena 1708.

Epitola ad Jo. Albertum Fabricium ec. 1709.

Anecdota Graeca Patavii 1709.

Supplica di Rinaldo I. D. di Modena alla S. Cef.
Maeftà ec. per le controverfie di Comacchio. In Mo-
dena 1710.

Queftioni Comacchiefi. In Modena 1712.

Epiftola ad Leibnitium de connexione Brunfueicenfis
Familiae cum Eftenfi. Edita T. III. Scriptorum Brun-
fueicenfia illuftrantium ejufdem Leibnitii.

Lettera di Lamindo Pritanio ad uno degli Autori
del Giornale d' Italia. Modena 1716.

Vita e Rime di Francefeo Petrarca. In Modena
1711.

Vita del P. Paolo Segneri Juniore, ed Efercizj
Spirituali ec. Tomi II. Modena 1720.

Piena Efpofizione dei Diritti Imperiali ed Eftenfi
fopra la città di Comacchio. In Modena 1712.

Governo della Pefte ec. Modena 1714. e colla Re-
lazione della Pefte di Marfiglia. In Modena 1721.

De Ingeniorum Moderatione in Religionis negotio.
Parifis 1714.

Antichità Eftenfi P. I. in Modena 1717. e P. II.
1740.

Difamina d' una Scrittura intitolata: Rifpofte a varie
Scritture in propofito della controverfia di Comae-
chio. In Modena 1720.

Epiftola ad Cl. V. Davinium de potu vini calidi.
Mutinae an. 1720. & 1725. inter ejufdem Davinii
Traftatum.

Della carità Criftiana ec. In Modena 1723.

Rerum Italicarum Scriptores Volumina XXVII. ab
anno 1723. ad 1738. Mediolani.

B b 2 .

Vita ed Opere Critiche di Lodovico Castelvetro.
In Liene (Milano) 1727.

Motivi di credere tuttavia asceso ec. il sacro corpo di S. Agostino . In Trento [Lucca) 1730.

Lettera al Zeno sulla dimora di Torquato Tasso in S. Anna di Ferrara. To. X. dell' Opere del Tasso cominciate a stampare in Venezia nel 1732.

Votum circa Dissertationem de Jejuniis cum esu carnum conjungendo. Est in libro, cui titulus: Giudizio del dottissimo ec. Muratori ec. intorno la Dissertazione Latina de Jejuniis ec. Parmae anno 1737.

Vita Caroli Sigonii: in fronte dell' Opere di questo stampate in Milano nel 1732.

Vita del Marchese Gio. Gioseffo Orsi: in Modena 1735.

Dissertazione sopra una Iscrizione trovata nella città di Spello. Nel To. XI. degli Opuscoli del P. Calogera .

La filosofia Morale. In Verona 1735.

Primo Elame della Eloquenza Italiana di Monsignor Fontanini, senza il luogo della stampa 1737.

Dissertazione sopra l'Ascia Sepolcrale . In Roma 1738. nel To. II. dei Saggi di Dissertazioni dell' Accademia Etrusca di Cortona.

De Paradiso ec. Veronae 1738.

Antiquitates Italicae Medii Aevi To. VI. Mediolani ab anno 1738. ad 1743.

Vita di Alessandro Tassoni . In Modena 1738.

Novus Thesaurus Veterum Inscriptionum ec. Tom. IV. Mediolani ab anno 1739. ad 1743.

.

Vita Raynaldi I. Ducis Mutinae: inter Memorabilia
Italarum Lamii To. I. Florentiae an. 1742.

Vita Francisci Torti praemissa ejusdem Operibus.
Venetiis an. 1743.

De superstitione vitanda ec. Mediol. (Venetiis) an.
1742.

Dei Difetti della Giurisprudenza. In Venezia 1742.

Epistolae sub nomine Ferdinandi Valdesii ec. Me-
diolani (Venetiis) anno 1743.

Il Cristianesimo Felice ec. P. I. in Venezia 1743.
e P. II. nel 1749.

Disertazione sopra un' Iscrizione spettante alla città
di Frejus in Provenza. Nel To. XXXI. degli Opu-
scoli Calogeriani 1744.

Delle Forze dell' Intendimento umano ec. In Ve-
nezia 1745.

Della Forza della Fantasia. In Venezia 1745.

Lustranas Ecclesiae Religio in administrando Poeni-
tentiae Sacramento. Mutinae 1747.

Della Regolata Divozione dei Cristiani, sotto nome
di Lamindo Pritanio. In Venezia 1747.

Vita di Benedetto Giacobini. Padova 1747.

Disertazione sopra i Servi e Liberti antichi. Nel
T. I. delle Memorie della Società Colombaria di Fi-
renze 1747.

Placitum Ravennae apud Classen habitum a Silve-
stro II. P. M. & Ottone III. Aug. & a Muratorio il-
lustratum. In Vol. V. Symb. Gorian. Florentiae 1747.

Liturgia Romana Vetus. T. II. Venetiis 1748.

Risposta sotto nome di Lamindo Pritanio al Sig.

Cardinal Quetini nella Raccolta delle Scritture circa la diminuzion delle feste . In Lucca 1748.

De Naevis in Religionem incurrentibus ec. Lucae 1749.

Della pubblica Felicità ec. Lucca (Venezia) 1749.

Della Insigne Tavola di Bronzo spettante ai Fanciulli e Fanciulle Alimentarj di Trajano ec. In Firenze. 1749.

Omittimus utpote res minoris momenti, cum de tanto agatur viro, plures epistolas ejus ab amicis, ipso inscio, in aliis libris impressas, aut certe breviores; quamvis inter has postremo loco commemoratas emineant, epistola ad Scottium *sopra la Comunione nella Messa*, epistola ad Imbonatium in laudem Puricellii quae legitur ante hujus carmina, epistola ad Cl. Bandinium *sopra l' Obelisco di Campo Marzo* ec.

OPERA POSTHUMA.

Dei pregi dell'Eloquenza Popolare . Venezia 1750.
Dissertazioni sopra le Antichità Italiane Tomi III. Milano (Venezia) 1751.

Opera, quae aut edi noluit, aut de quibus edendis nunquam visus est cogitare .

Dissertatio de Barometri depressione .

Panegyricus Ludovico XIV. ec.

Sette Dissertazioni Accademiche sopra varj argomenti recitate in Modena.

Dissertatio de Graecae Linguae Usu & Praestantia.

Dissertatio de primis Christianorum Ecclesiis .

Dissertatio de Sacrarum Basilicarum apud Christianos origine & appellatione .

Lezioni di Filosofia Morale per istruzione di un Principe .

Sette Discorsi spettanti agli Ecclesiastici , recitati in occasione degli Esercizj Spirituali .

Discorsi delle Novene del Natale per gli anni 1718. e 1719.

Dissertatio de Codice Carolino , sive de novo Legum Codice instituendo Ad Augustissimum Carolum VI. Imperatorem .

Dissertazione sopra un antico documento del Monastero dell' Avellana .

Esposizione del Pater Noster .

Parafrasi de' Salmi , ma non compiuta .

Lettera scritta in nome d' una Signora Inglese Cattolica ad un Inglese Protestante suo congiunto .

Risposta seconda all' Eminentissimo Querini intorno alla diminuzione delle Feste .

Varie Poesie Italiane e Latine .

Hæc opera fere omnia partim impressa sunt typis magnifico sane luxu , partim imprimenda essent in editione universarum Muratorii operum , quæ Aretii pluribus ab hinc annis cœpta sub auspiciis amplissimi viri Angeli Franceschi Episcopi tum Aretini in plurima jam volumina excrevit . Cum, eo ad Archiepiscopatum Pisanum translato, ea editio substitisset , audio per hos dies esse , qui serio cogitent de illa ad umbilicum ducenda ; quod certe, non cadere non potest in litterarum bonum .

ANGELUS FABRONIUS

MICHAELI ANGELO JACOMELLIO

S. P. D.

Meminisse debes quae tu mihi aliquando narraſti de Francisco Lorenzino, quocum tibi ſummus uſus & conjunctio fuit. Quam multa de illius praestantia in poesi, de celebritate nominis, deque moribus ejusdem! Ex eo tempore in animum induxi meum illius vitam literis mandare, idque praestiti proximo Sextili mense, quo fui in Monte Albano caloris Urbani declinandi cauſſa. Hoc, quid quid eſt, ad te mitto, mi ornatissime Jacomelli; & ſi forte tale erit, quod poſſint tuae etiam aures triuae jampridem notandis generibus horum ſcriptorum non omnino improbare, velim tibi perſuadeas praeclarissimo viro majora me fuiſſe daturum, ſi per vires licuiſſet. Quod ſi ſecus rem eſſe cognoveris, quantum me amas, & quantum tribuere potes carissimo illi capiti, ſtilo ne parcas. Nihil enim magis opto, quam a tui ſimilimis corrigi & moneri. Jam tibi non improbari gaudeo multorum ſententiam, qui de poesi actum fore

clamant, nisi coarguatur eorum audacia, qui magnos se aemulari poetas putant, cum versus sublimes ructant, & ubique furentis animi signa edunt. Fuit robustus & grandis Lorenzinius, & vividis sane coloribus sua carmina infecit; sed cum ipse natura & arte ad poësin instructus optime nosset

Quid deceat, quid non, quo virtus, quo
ferat error,

vivent ejus carmina, dum stabit honos Italicis Musis. Eum quidem Michaeli Angelo Bonarrozio libenter assimilaverim, qui in hoc praesertim elaboravit, ut figurae, quas scalpebat pingebatque, magnum semper quiddam ostentarent; quare vehementes corporum motus consecratur, sicque venae, ossa, muscoli, qui vix apparent in operibus ceterorum magni nominis artificum, adeo extant in figuris Bonarrozii, ut eorum initia, cursus atque exitus facile notare possis. Quod similes ei esse voluerunt plures consequentium temporum pictores atque sculptores, qui neque divino illo praediti erant ingenio, neque paria quaesiverant adjumenta anatomicae doctrinae, effecerunt sane, ut eorum impudentiam ri-

deremus, qui, dum ipsorum opera dura ac rigida ingrato quodam animi sensu adspicimus, cogimur fateri tantum illos arti, quam profuebantur, detraxisse, quantum se addidisse falsa magnitudinis specie existimarunt. Sed ut ad Lorenzium redeam, is quidem agebat, poësin, quae admirationem non habet, nullam se judicare; quare hae illi fuerunt artes grandia invenire, & cum ampla verborum maiestate inventa exprimere. Admirari enim ea praesertim consuevimus, quae verum sic repraesentant, ut non solum habeant quaedam verborum & sententiarum insignia, sed quae animum audientis sic afficiant, ut supra se elatus vix se ipsum agnoscat. Sed fieri solet distinctio sublimitatis imaginum & sensus. Per illam quidem magnifice res aliqua pingitur, sed minime commotiones vehementes animorum excitantur. Quis non admirabitur (pace Macrobii dixerim) famae descriptionem in IV. Aeneidum libro, minimeque fatebitur nihil unquam sublatius fuisse dictum?

. mox se se attollit in auras;
 Ingrediturque solo, & caput inter nubila
 condit.

*Neque minus mihi arrident in hoc sublimitatis
genere Horatiana illa.*

Justum & tenacem propositi virum
Non civium ardor prava jubentium,
Non vultus instantis tyranni
Mente quatit solida; neque auster
Dux inquieti turbidus Adriæ,
Nec fulminantis magna Jovis manus;
Si fractus illabatur orbis,
Impavidum ferient ruinae.

*Profecto quid potuit excogitari majus universi
terrarum orbis, qui corrui, fragore, & iusti
hominis tranquillitate propriaeque virtutis con-
scientia, quae in hac tanta ruina neque pavet,
neque commovetur? Jam vero si ex ipso Virgi-
lio sumere exempla volumus alterius generis su-
blimitatis, quam ad sensum & cor pertinere di-
ximus, illa Nisi mortem ab Eurialo avertere
conantis eminere mihi videntur.*

Conclamat Nisus, nec se celare tenebris
Amplius, aut tantum potuit perferre do-
lorem:

ME ME: adsum qui feci: in me convertite ferrum

○ Rutili, mea fraus omnis: nihil iste, nec ausus,

Nec potuit: caelum hoc & conscia sidera testor;

Tantum infelicem nimium dilexit amicum.

Quis non paret amicorum, quibus nihil unquam fuit conjunctius, periculum, quis non suspicit animi magnitudinem in Niso, quis demum non vehementissime dolet utriusque sortem, qui in flore juventutis indignissimam mortem occubuerit? Alia hujusmodi plura reperiuntur in Virgilio, ceterisque praestantioribus epicis poetis, ut & in tragicis, sed rariora sunt in lyricis, quod ab ode actio soleat abesse. Neque desunt exempla in Virgilio ipso, quae utramque sublimitatem tum mentis, tum cordis continere facile dixeris. Ut sortem miseramur Aeneae ceterorumque Trojugenum, quando coacti sunt diversa exilia & desertas quaerere terras! Ut valent ad commovendum animi sensum, & ad magnum quiddam exprimendum verba illa

Littora tum patriae lacrimans, portus-
que relinquo
Et CAMPOS, ubi Troja fuit.

Nihil mea quidem sententia sublimius illo verbo campos, quo uno tanta repraesentatur vastitas ac solitudo, ut nec rudera, nec parietinae inspectantium oculis se se objiciant, & ne ad deplorandum quidem Trojae nomen, atque ad lamentandam tantae urbis calamitatem ullus relictus esse videatur. Quapropter non immerito dixit Macrobius (lib. V.) Virgilium paucissimis verbis maximam civitatem hausisse atque absorpsisse. Ille quidem mihi par esse Superis videtur, qui grandia & sublimia exprimere novit, qui rapit auditores lectoresque suos, sive verum vel in causa vel in effectibus ad vivum repraesentat, sive res, voces, actus ob oculos ponit, sive copia imaginum eandem rem mirabiliter augentium, ut illa de Neptuno apud Homerum, magnus aliquid exhibet, vel paucis plura ad memoriam revocat, ut celebre illud jusjurandum Demostheneum per caesos in Marathone ac Salamina propugnatores, vel denique (non enim nunc propositum est nobis omnes sublimitatis fon-

tes indicare) vehementi commotione animos afficit. Non dubito autem quin ad id assequendum plurimum valeat lectio & imitatio antiquorum scriptorum, per quam, ut ait Longinus, eodem modo animabimur, atque ii, qui ad Apollinis specum accedebant, qui divino quodam spiritu implebantur, caelestique mentis offlatu agitabantur ad fundenda consulentibus oracula. Id expertus est Lorenzinius, qui cum vellet eminere illo sublimitatis genere, quod ad imagines pertinere diximus, diurna nocturnaue manu Propheticos libros praesertim versabat, a quibus tanto ingenii aestu se inflammari affirmabat, ut procul a terra abreptus atque in altum a conspectu pene omnium abstractus sibi esse videretur. Sed nolo te pluribus morari, doctissime Jaccomelli; & cum de Lorenzini in poesi virtutibus, me differentem audis, talem me existima, ut ii, qui ad picturam probandam adhibentur, qui cuiamfi sint infcii faciendi, cum aliqua tamen solertia judicare videntur.

Romae IV. Id. Septemb. MDCCLXV.

FRANCISCUS MARIA LORENZINIUS

Franciscus Maria Laurentinus, seu Lorenzinius (utroque enim modo se appellavit) filius Sebastiani Florentini, & Ursulae Mariae Neriae Bononiensis, Romae natus est IV. non. Octobres an. MDCLXXX. honesta quidem familia. Haec enim plures edidit doctrinae laude illustres homines. Pater ejus inter domesticos fuit Christinae Svecorum Reginae, gratiamque illius tenuit non minus propter mores, quam propter magnam corporis dignitatem, quae non minimum commendat. Is filium instituendum dedit hominibus S. J. tum in humanioribus litteris, tum in philosophia, quibus in studiis & naturae bono, & diligentia adeo profecit, ut nobilis inter aequales ferretur. Quo factum est, ut iidem Religiosi viri huic roganti, ut in eorum Societatem reciperetur, quamvis aetate paullo grandiori esset (agebat enim vicesimum secundum aetatis annum) libentissime sint obsecuti. Susceptae tamen

vitae rationem undecim fere post menses propter valetudinis causam abrumpere coactus est. Huic cum integra esset potestas constituendi quo in genere studiorum potissimum versaretur, diu secum multumque dubitavit juris prudentiae ne, an litteris politioribus totum se dederet. Ad has sua illum voluntas deducebat, ad illam multitudinis impellebat iudicium, cum quae majori parti pulcherrima videantur, ea saepe soleant homines amplecti. Movet autem, ac prope stupidum vulgus detinet non scientiae nobilitas, sed privati commodi ratio, cum videat haec juris prudentiae studia vendibilia, cetera autem plerumque algere atque esurire. Prudenter igitur se gessit Lorenzinius, qui cum re familiari laboraret, forensam illam viam delegit, in qua adeo processit, ut brevi potuerit esse in eorum numero, qui consilium suum fidemque Cyriaco Lancettae litibus iudicandis XIIViro praestabant. Sed quotidie, quae jam a pueritia valde illum delectarunt mansuetiores Musae ac philosophia, tantum ingenium juris prudentiae invidentes ad se se advocabant, quarum vocibus tandem sic ille

ille paruit, ut omni alia cura abjecta, in earum sinu complexuque se abdiderit. Florebatur id temporis quam qui maxime Arcadium coetus, quem quatuordecim viri interioribus litteris praediti anno MDCXC. instituerant ad profligandam immanem illam ac intolerandam barbariem, quae adeo poësin infuscaverat, ut omne suum decus amississet. In quem coetum cum cooptatus fuisset Lorenzinius anno MDCCV. idibus Junis nomine Philacidae Eliaci (nam quod postea Philacides Lucinianus dici voluerit, id quæ ratione factum sit opportuniore in loco narabimus) toto pectore incubuit, ne manerent ulla illius pestis vestigia. Qua quidem in re tanta felicitate usus est, ut si assentiri nolumus propriam ejus laudem esse gloriosum hoc opus ad exitum perduxisse, fateri certe debeamus aequè meritum de poësi, quam qui conditores illius coetus fuerunt. Erant hi in ea sententia, inverecundas translationes, tumidos & inflatos dicendi modos, ceteraque vitia, contra quae ipsi bellum susceperant, ex eo praesertim capite fluxisse, quod Petrarcha vulgo contemptui haberetur,

quare hunc unum esse praedicabant, unde salubritas poeticae dictionis, & incorruptus color & succus petendus esset. Non diffitebatur Lorenzinius, Petrarchae versus suavitatis plurimum habere & dignitatis, & variis ingenii atque etiam artis luminibus refertos esse, & animum saepe permovere atque impellere, ut de Amoribus ne Graecus quidem quisquam melius: sed verebatur ne si hunc unum homines intuerentur, & exemplar sibi proponerent, in eundem illum languorem reciderent, quem plerisque poetarum saeculi XVI. attulisse videtur plane servilis illius Poetae imitatio. Quare aliam viam insistendam putavit, qua ad id, quod omnes volebant, feliciori eventu perveniri posset. In hac ducem sibi Dantem praefertim elegit, cui cum libenter condonaret, quas in eo dicunt esse maculas nimium fortasse severi Censores, nihil magis optabat quam illius se persimilem esse in iis praefertim singularibus ac prope divinis virtutibus tum granditatis, visque verborum ac sententiarum, tum evidentiae, quibus consecutus est, ut cum delectatione aculeis

tiam relinquat in animis lectorum, & ante oculos esse, non narrari ea quae legas videantur. Profecto in hoc difficili itinere hanc gloriam obtinuit Lorenzinius, ut sanum quoddam sibi efformaverit stili genus, in quo dicas ex Petrarchae lenitate aliquid ad vim Dantis influxisse, & ex hac vi non parum animi inflammatum esse illi lenitati. Neque solum Italicas Musas, sed etiam Latinas coluit hoc tempore. Namque aliquot sunt ejus *Melodramata* (ita appellabantur sacra poemata, quae in quibusdam religiosis locis catis statis temporibus solita erant) e quibus impressa fuere *Athalia*, *Bethsabea*, *Jahel Sifarae debellatrix*, *Mater Machabaeorum*, *Sedecias*, *Thamar vindicata*, *S. Magdalena de Pazzis*, quod postremum etiam Italicis carminibus reddidit. De his vero poematibus hoc unum dicam, satis eleganter ea scripta fuisse, neque aliam laudem praeter hanc elegantiae ex iis quaesivisse Lorenzinium. Quibus rebus cum illius nomen multum Romae floreret, accidit, ut oriretur celebris controversia inter Crescimbenium & Gravinam, quae totam distraxit Arcadiam. Posita haec erat in in-

terpretatione tertiæ legis Arcadicae, quæ de de creandis duodecim Collegis, * qui Custodi adesse debent, rogata est. Nam Gravina adversus Crescimbenium contendebat, hanc esse vim hujus legis & verborum *sex in orbem eligito*, ut non liceret semel functum munere suo Collegam, præteritis aliis idoneis, iterum eligere. Placuit rem ad concilium Pastorum referri; ac nullus erat qui non videret, si Graviniani superiores discessissent, Crescimbenium de Custodis gradu dejectum, ejusque in locum Lorenzinium suffectum iri. Erat enim ille harum partium, omniumque hujus dignitatis gloria maxime dignus existimabatur. Sed res aliter evenit. Nam plerique Arcadum secundum Crescimbenium pronuntiarunt, sequi eum defensores palam professi sunt, dictæque etiam graves sententiae in Gravinam ejusque sectatores;

* Sic se habet lex. Custodi Vicarius & Collegae duodecim adsunt. Eorum singulis annis Custos, consulto universo Coetu, novos sex in orbem eligito; sex veterum retineto. Administros sibi duos adsumito. Præter hæc alia munera publica ne suntu. Patronus nullus esto.

quod miscere & turbare omnia viderentur. Quae contumelia non fregit eos, sed erexit. Nam cum sibi Custodem creassent Braccianensium Ducem Livium Odescalchium; fidem inter se dant, omni ope atque operam enifuros, ut adversarios e laudis possessione exturbarent; & quoniam se solos esse conservatores & custodes legum Arcadicarum gloriabantur, omnem penes se redactam esse potestatem affirmabant. Nihilo segnius, qui erant alterius partis, causam suam agebant, cumque ceteros *Exarcades* judicassent; eorum nomina albo Pastorum erasere. Memorabilem ego hanc controversiam existimo; quia litteratissimi homines non magis de dominatu Arcadiae, quam de principatu Poetis inter se contendebant. Qua in contentione magnum profecto fuit nomen Lorenzini, quem etiam Braccianensium Dux Vicarium suum habuit. Non defuere amplissimi viri, qui rem ad otium deducere tentarunt. Sed id ne fieret maxime obsistebant Graviniani, dicentes non privati odii causa, aut amore discordiae a ceteris se avertisse, sed uti fartas rectas leges Arcadiae conservarent;

utque se & Arcadiam paucorum factione oppressam in libertatem vindicarent. Non est praetereundum hoc loco, Dominicum Octavium Petrosellinum adolescentem ad poeticam natum, qui a Gravina stabat, materiem ex hac controversia sumpsisse poematis ita varii, ita morati, ita concinni, ut nihil fieri possit elegantius. In hoc summis laudibus effertur Lorenzinius, cujus in intima familiaritate ille versabatur. Tali dum pugnatur modo, moritur Braccianensium Dux; cumque in dies, se fortuna inclinante, intelligerent Graviniani se pares amplius adversariis esse non posse, statuerunt aliquid sibi novi consilii capiendum esse. Suasit Gravina, ut sua adversariis relinqueretur Arcadia, novamque sibi instituerent Academiam: Quod & fecerunt. Id tamen non probavit Lorenzinius, qui in ea fuit sententia, aut cum adversariis concordiam reconciliandam, aut in suscepta contentione perseverandum. Quid enim erat Arcadiam relinquere, nisi turpiter se fateri victos, & fidem datam illius dignitatis se fore custodes, frangere? Hanc si ipsi negligerent, se pro-

fecto servaturum. Itaque tertio anno, postquam a veteri Arcadia discefferat, ad illam reversus est, datique ei fuere agri Luciniani, unde nomen sumpsit. Philacidae Luciniani: nam Eliaci, quos initio possederat, quosque amisit, ubi *Exarcas* cum ceteris Gravinianis iudicatus fuit, in alterius potestatem venerant. Hujus discessum vehementer doluere Graviniani, quod ab nullo se plus adjuvari posse intelligebant ad novae Academiae gloriam comparandam; quodque non dubitabant plures fore, qui illius moti auctoritate & exemplo se Arcadiae conjungerent. Sed id non tam conatus est Lorenzinius, quam ne ullae superessent simultatis reliquiae. Haud tamen res plane tranquillatae sunt nisi ex obitu Crescimbenii, qui malis Arcadiae licentiaque audacium non movebatur solum, sed etiam rumpebatur, sic ut ejus odia non forberet solum, sed etiam concoqueret Lorenzinius. Sed erant curae graviores, quae hunc sollicitarent angereque vehementer. Nam propter inopiam & propter negligentiam, qua parvam rem suam dilabi sinebat, in egestate coepit esse. Illud quo-

que accessit calamitatis, quod non desue-
runt, qui in ejus vitam maledicta conjice-
re audent, quibus tantum quidem tribuit
Alexander Falconerius; qui severe & iuste
Urbi praeerat, ut hominem ad se accersie-
rit. Sed statim vidit inimicorum, quos mul-
tos habebat Lorenzinius, iniquitatem & per-
fidiam; ejusque admiratus ingenium, & mi-
seratus fortunam voluit, ut pincernae loco
apud se esset. Quo beneficio tanquam ad-
aspiciendam lucem vocatus, potuit studia lit-
terarum ardentius colere. Haec enim hila-
ritatem quamdam desiderant, quam in sum-
ma inopia frustra quaeras. Sic nullus dies
erat, quo non faceret versus, & nunquam
non aderat *ἐκδοτικὸς ποῦς*, quo commoveretur
ad ea, quae Maecenas suus optabat, canen-
da. Quod omnes grandiloquo dicendi & ex-
primendi genere superabat, vel ipsas levita-
tes amatorias magniloquentia vestiebat, &
nihil tam pavebis quam ultoris Cupidinis
iras, ut unam rem exempli causa ponam,
canente Lorenziniō *. Ne tamen credas, cum
de amore saepe locutus fuerit Lorenzinius

* *Capitolo, ejus initium: NP aveva la bella visione &*

in suis carminibus, quasi mores poetae effingere orationem. Nihil enim ab illo aberat longius hujusmodi juvenilibus ineptiis. Eodem tempore Latinas excolebat Musas, & miraberis fortasse ipsum vim ingenii, quae praeter ceteros pollebat, consumpsisse interdum in Latinis, & praesertim Plautinis comoediis in Italicum convertendis. Raro enim qui per se aliquid potest interpretis personam suscipit. Ut vero Falconerium sibi magis magisque conciliaret, cujus amore unice delectari videbatur, scribere aggressus est vitas ejus gentiliū B. Alexii atque B. Julianae, quarum unam anno MDCCXIX., alteram anno MDCCXXXVII. typis commisit. In hoc etiam sibi favisse fortunam dicebat, quod gratiam inierit Ottobonii Cardinalis, cui ut rem gratam faceret, non ut Musis servires, pleraque ejusdem *Melodramata* Italicis carminibus composita Latina fecit. Neque in una poesi conquievit Lorenzinius existimabis. Multam enim & diligentem ope-

amore. Libenter mentionem feci illius generis carminum, quae nos Itali dicimus *Capitoli*, quod in his, meo quidem judicio, virtus Lorenziani poetica praesertim ex-
celsa,

ram dabat anatomiae, cuius flagrans studium eum impulit, ut socium se adjungeret Cajetano Petriolio, qui tum chirurgiam magnam cum ingenii laude Romae exercebat. Mirum tantam solertiam eos contulisse ad noscendam admirabilem fabricam membrorum animantium, ut potuerint quaedam nondum ab aliis animadversa deprehendere! Eligebant ea, quae notatione & laude digna erant, eaque librario transcribenda dabant ea mente, ut postea in vulgus ederentur. Sed fuit qui suo nomini ex horum laboribus libere laudem voluit. Nam turpi largitione corrupto librario, scripta ab eo abstulit, iisque opus quoddam suum ornavit, quod inscripsit: *In Tabulas Anatomicas Bartholomaei Eustachii, Chermesii de Fulget Commentarii*. Tantum crimen non ferendum putavit Lorenzinius. Itaque Dialogum * compo-

* Huic titulus est. *IL CARDO. Dialogi & Ignazio Carletti, ne quasi si discorre dei Comentarj di Chermesio di Fulget sopra le Tavole Anatomiche di Bartholomeo Eustachio. Tav. IX. Dialogo primo a Leyda per Gio. Pavovete 1728.* Nomine Chermesii de Fulget occultari Antonium Coochium, qui in Archigymnasio Romano Botanicam docebat, aperte in Dialogo declaratur.

suit vulgavitque, in quo & furti reus ille convincitur, & errata quaedam ipsius falsissime exagitantur. Qua re illi vehementer offensus toto ferebatur animo ad insectandum Lorenzinium. Sed ne statim faceret, contulit gratia, qua ille plurimum apud Falconerium pollebat. Itaque hoc vita functo, in vulgus emisit Sermone[m] quemdam Latinum, in quo plane evomit virus acerbitatis suae. Sed forte non intellexit quocum sibi certamen institueret. Nam Lorenzinius non solum paria paribus retulit, edito nomine Quinti Attilii Serrani Sermonem, quem non dubito laude Latinitatis Q. Sertani satyris anteponere, quemque ipse Italicis versibus reddidit, sed etiam epigrammata in eum fecit eo sapore Latino condita, ut cum antiquitate certare videantur. In his praeter plagiarium illum, alii quoque, qui illius se fore acerrimos defensores palam ferebant, omnibus contumeliis lacerantur. Quibus veluti fulmine illi percussi, ne hiscere quidem amplius ausi sunt. Haec epigrammata inscribuntur: *Analecta variorum Pastorum Arcadam*, quos defensionem sui arripuisse fingit

Lorenzinius. Et aequum videbatur, cum munus Custodis sustineret: quod qua ratione ei delatum fuerit, breviter explicabimus. Mortuo anno MDCCXXVIII. Mario Crescimbenio, Arcades creando successori convocantur, suffragia feruntur, renuntiantur, pleraque nomen Lorenzinii habere inveniuntur. Aliqua tamen deerant ad justum implendum numerum, quem lege quarta Arcadiae de creando & removendo Custode, sancitum est duas esse ex tribus partes. Illius fautores postulant rem ad suffragia revocari. Obstant adversarii, praetexentes satis haud superesse diei. Latum deinde ad Arcades de abroganda lege, quod iisdem adversariis usque eo visum est indignum, ut statim a concilio discesserint, denuntiantes, testificantes, jurantesque per omnes poeticos Deos quidquam se tale nunquam probaturos: Qui superfuerunt Arcades scitum fecerunt, ut abrogaretur lex, omnesque Custodem declararunt Lorenzinium. Seges hinc atque materies magnarum discordiarum. Ad Magistratus quoque aditum est, ut quod factum erat, id irritum juberent esse. Sed cum Lorenzi-

nus se munivisset benevolentia multorum ; potuit adversariorum conatus prohibere , seque suo in munere , quoad vixit , tuefi . Quo in munere haud pauca praeclara gessit . Nam Colonias quinque constituit , Truentinam Asculi in Piceno , Fanestrem Fani , Parmensem Parmae , Icneuticam Foro Livii , & Incultam Romae in Collegio Nazareno : in morem induxit ut octavo quoque die Arcades privatim convenirent : effecitque ut in locum publicorum coetuum , qui magna in discordia Pastorum haberi non poterant , scena succederet . Nam cum instituisset quosdam adolescentes ad agendas fabulas Plauti ac Terentii , has spectandas dedit tanto quidem cum plausu , ut nihil potuerit supra . Id assequerantur actores industrii , ut ii etiam , qui bene linguam Latinam non callerent , facile tamen ad poetae sensum penetrarent . Quare minime est mirandum , si omnium ordinum virorum magnus ad eos fiebat concursus . Voluit & esse spectator Fridericus Christianus Poloniae Regis filius , qui argenteo numismate singulos actores muneravit . Neque solum Plautinas ac Terentianas fabu-

las, sed etiam dialogos Ciceronis de Amicitia & de Legibus, contentionemque Aiacis & Ulyxis ab Ovidio mirabiliter descriptam in scenam produxit Lorenzinius. His vero exercitationibus plurimum fuisse Clementem XII. ex hoc intelligi facillime potest, quod eas tutelae Cardinalium Gentilii & Corfinii commendavit; ac saepe Lorenzinium ingenti pecunia donavit, qua & theatrum instruere, & sibi prospicere posset. Nam, mortuo Cardinali Falconerio, iterum in egestate coeperat esse. Huic quoque subventum est a Cardinali Francisco Burghesio, qui illum in numerum retulit suorum nobilium familiarium, tantaque in illum usus est indulgentia, ut stipendium homini semper erogaret, operam nunquam exigeret. Inter haec Lorenzinius Parrhasium nemus, quod fuerat decennio clausum, rursus aperuit. Data hinc occasio plurimis adolescentibus, quos ipse in poetica instituerat, in lucem prodeundi. Et si quos ex iis ingenio minus valere videbat, non patiebatur inglorios esse; sua enim & libenter & facile iis concedebat. Quo factum est, ut quasdam carminum

collectiones habeamus, e quibus si Lorenzinius auferret quod suum est, haud paucos similes superbo illi graculo omni ornatu nudatos videremus. Idem nobiles juvenes, qui in Collegio Germanico Latinas tragoedias a Josepho Carpanio scriptas agerent, gestum docuit atque ad scenam instituit. Nemo autem fuit, qui operam ab eo exposceret, cui ipse libentissime non satisfaceret. Quod non praestabat natura solum, sed etiam doctrina: nam, ut ait ille, *principum philosophorum ita percepta habuit praecepta, ut iis ad vitam agendam, non ad ostentationem uteretur*. Non semper tamen homines in se aequae liberales expertus est; & post excessum Clementis XII., cum magnis subsidiis caruisset, neque idcirco sumptus minuisset, quos in theatrum praesertim faciebat, in aes alienum incidit. Metuens ne hujus magnitudine opprimeretur, anno MDCCXLI. omnem suam de Latinis fabulis curam abjecit; relictaque domo, quam conduxerat prope templum SS. Laurentii & Damasi, Burghesianas in aedes habitatum venit. Quoniam hic tantum habebat otii, quantum ei nunquam antea contigerat, plura scri-

psit tum Italicis, tum Latinis carminibus. In his sunt aliquot ejus Sermones, in quibus Persii stylum imitandum sibi proposuit, non illum durum & obscurum, sed. falsum, acrem, & brevi, ut ipse aiebat, jugulantem mucrone. Sed praesertim ad sacrarum litterarum studia traduxit animum, sumpsitque hoc sibi, ut librum Job, & cantica Prophetarum versibus Italicis redderet, non ut interpres, sed ut παραφραστής. Quibus in rebus cum esset acerrime occupatus in febriculam incidit, quam initio ipse & medici, quamvis ventris profluvium accederet, contempserunt. Sed cum nunquam plane decederet, morbus ingravescere coepit. Id ut sensit Lorenzinius, Josephum Carpanium, quem paullo supra commemoravimus, & quocum sibi vetus erat familiaritas, ad se accersiri jussit, sibi ut adesset rogavit. Plurima quidem in hac diuturna, gravique extremo praesertim tempore aegrotatione dedit ille testimonia constantiae ac pietatis. Dicitur, cum ei morti proximo allatum esset sacrum & salutare Domini nostri Corpus, aestu ingenii sui divinoque amore abreptum fuisse

fuisse ex tempore carmen illud , quod incipit;

Un Dio nelle mie stanze ? Ah non son degno ec.

Sed falso ei tributum fuisse , & stilus , ab
ejus consuetudine abhorrens , & qui do-
mum ejus frequentabant , fidem faciunt .
Diem extremum obiit postridie id. Junii an.
MDCCXLIII. eique honestum funus in Tem-
plo S. Nicolai *de' Perfetti* Cardinalis Burghe-
sius faciendum curavit . Ibidem conditus est ,
tumuloque triennio post haec inscripta fuere.

D. O. M.

FRANCISCO LORENZINI ROMANO

LITTERARII ARCADUM COETUS

CUSTODI GENERALI

DOCTISSIMO VIRO POETAE SUMMO

MICHAEL JOSEPH MOREI

ARCADIAE CUSTOS

DECESSORI CLARISSIMO

ARCADUM CONSULTO

POSUIT

ANNO MDCCXLVI.

OBIIT ANNO MDCCXLIII.

Tem. X,

D d

Deberi quoque Arcades hoc a se tanto viro
putarunt, ut mortem illius carminibus de-
flerent, hocque elogium Parrhasio in ne-
more inciderent.

Θ C. V. C.

PHILACIDAE LUCINIANO
ARCADIAE CUSTODI GENERALI
COETUS ARCADUM
VIRO MAXIMO

OLYMP. DCXXX. AN. III. AB. A. I.
OLYMP. XIV. AN. II.

Praeclara haec quidem ad diuturnitatem glo-
riae; sed his perenniora erunt elegantissima
illius carmina. Pauca quidem sunt in mani-
bus, si numerus spectetur eorum, quae sci-
mus condidisse. Nec omnia propria illius di-
cere debemus, si ea excipias, quae legun-
tur decimo in volumine *delle Rime degli Ar-
cadi*. Utinam aliquis reperiretur, qui vera
a falsis distingueret, qui quae sunt alieno
nomine vulgata, suo auctori restitueret, qui-
que plura ab hoc relictis sedulo perquireret,
omniaque in lucem proferret. Profecto huic

Italica poësis non parum deberet, ut plurimum certe debet Loreuzinio, quod inter primos Romae viam muniverit ad genus scribendi nervosum, grande atque magnificum. Idem etiam, si res posceret, dulcis erat, suavis & venustus. Sed praesertim in eo altero genere excellebat. Habet ille quidem multa & praeclara summorum hominum iudicia, sed mihi unus instar est omnium Vincentius Gravina, qui solitus erat dicere, Lorenzinium alterum esse Homerum. Ejus domum quoque comparabat modo equo Trojano, ex qua scilicet non belli duces, sed egregii poetae plurimi in apertum prodirent; modo antro Apollinis, unde, qui ingrederentur, poetae redirent. Libet hoc loco referre jambum ejusdem, quem scripsit in quodam libello carminum Lorenzinii, quae ipse collegerat.

*Petrarcha primus temperavit Italiam
Lyram, sed usus artibus Scholasticis,
Quas illius ferebat aetas squallida.
Post cultiores prodire litterae
Sacri Leonis a favore provido,
Qui versiones provocans, Grajum novas*
D d 2

Exsuscitavit, & Latinas Gratiâs.
Hos anteire cum studeret Ciampolus
Musarum adulter, & Marinus impudens,
Et qui Petrarcham nominarunt aridum,
Inane murmur, spumeosque turbines
Stulti dedere, & dum cavent communia,
Feruntur imprudenter ad contraria.
Qua peste multi saniores territi
Stylo Petrarchae muniantur sobrio:
At cum Poetae verba misso spiritu
Texant, neque ultra quam Petrarcha prodeant
Per cantilenas, perque eorum nenias,
Vox vana sensu destituta circuit.
Sed qui POETA paganis illis canit,
Parique quisquis educatur fidere
Ab aridis declinat atque turgidis,
Dircaea tutus dum pererrat flumina.

Sed quemadmodum laudatores quamplurimos habuit Lorenzinius, ita obrectatores (quod fatum est clarissimorum virorum) ei non defuerunt, qui illius scribendi genus non ipsius viribus, sed imbecillitate sua metientes, dixere saepe plus aequo efferri, ac etiam turgescere, nec varietatem quamdam habere.

Sed hos confutare neque necesse est, neque est hujus loci. Tantum monere volumus eos, qui se Lorenzianos profitentur, stulte errare, si ex eo, quod pauca verba illius sint imitati, hoc nomen mereri putant. Sunt multo plura & majora, ad quae aspirare non possunt nisi ii, qui natura valent, & mentis viribus excitantur, & quasi divino quodam spiritu afflantur; qui in scriptis veterum studiose & multum sint volutati; quique judicio summo sint praediti, ut intelligant, qui sunt recti fines, dum illum feliciter audentem consecrari volunt. Noverrat optime Lorenzinius, quod

Scribendi recte sapere est principium & fons:

quo factum est, ut nunquam intermiserit studia philosophiae: sacris vero litteris tantum operae navavit, ut non facile reperire possis quid ei fuerit incognitum. Neque leviora studia contempsit: nam non solum de signis, picturis, aedificiis rectissime judicabat, sed etiam pastillis haud ineleganter pingebat. Ob quam rem a nonnullis harum ar-

tium peritis mirifice colebatur, eosque multum consilio suo juvabat. Fuit autem pro-cero corpore, formaque ad dignitatem appo-sita; sed sui & omnis munditiae ita de-spiciens, ut Cynicum dixisses. Jocis & con-viviis plurimum delectatus est. Idem suspi-cax, pronus ad iram, & paullulum turbu-lentus. Etiam machinatio, & illa astutia, quae vult illa quidem videri se esse pruden-tiam, sed abest ab ea distatque plurimum, haud raro visa in eo est. Adversam vero fortunam moderate tulit; divitias non expe-tebat, ac saepe oblata sibi a Cardinali Gen-tilio Clementis XII., ut vocant, Datario sacerdotia constanter recusavit. Quod non tantum moderationi, quam religioni tribuen-dum est. Intelligebat enim, Ecclesiae bona iis solum deberi, qui ad ministerium illius a Deo sunt vocati. Fide fuit singulari, ac liberalitate in amicos, ut possit judicari, om-nia ei cum ipsis fuisse communia. Pluri-mum valebat in genere dicendi gravi, apto-que ad persuadendum, quod saepe fervor quidam inflammabat. Nunquam de se glo-riofius praedicavit, levisque animi esse dice-

bat quaerere laudes hominum, quasi mercedem meritorum. Nihil ei optabilius & jucundius erat quam impertire ceteris, quam ipse consecutus fuerat, praestantiam doctrinae. Ex quo factum est, ut ejus domus, tanquam ludus quidam, semper patuerit industriis adolescentibus.

O P E R A E D I T A

Rime. Non uno in loco impressa sunt carmina Italica Lorenzinii, videlicet Mediolani, Venetiis, Neapoli, Praeneste, & Foro Livii. Romae vero edita suere cum carminibus Italicis aliorum illustrium Arcadiae Pastorum. Separatim a reliquis volitant per manus hominum παραφρασης Canticorum Moysis, quae sic incipiunt: *Audite Coeli, quae loquor, & Cantemus Domino gloriose*: *Debbore: Qui sponte obliuistis*: *trium Puerorum*: *Benedicite omnia opera Domini*; atque Ode sane nobilissima, quam dixit in aedibus Cardinalis Ottobonii, cum Marcellus musicus docuisset canere ad harmoniam Psalmos Davidicos.

Melodramata varia, Haec sunt:

---- *Jahel Sisarae debellatrix*: Romae apud Joannem Franciscum Buagnum 1701. in 4.

---- *Athalie*: apud eundem 1703. in 4.

---- *Sedecias*: apud eundem 1704. in 4.

---- *Mater Machabaeorum*: apud eundem, eodemque anno, in 4.

--- *Thamar vindicata*, apud eundem 1706. in 4.

--- *Diva Maria Magdalena de Pazzi*; Italice & Latine apud eundem Baagnum 1707.

--- *Bethsabea*; apud eundem 1708.

Melodramata Cardinalis Ottobonii & Lorenzino in Latinum versa.

Vita del B. Alessio Falconieri. Roma presso Francesco Gonzaga 1719.

--- della B. Giuliana Falconieri; Roma nella stamperia del Komarek. 1737.

Il Cardo. Dialogi d' Ignazio Carletti, nei quali si discorre dei commentarii di Chermesio di Fulget sopra le tavole Anatomiche di Bartolomeo Eustachio, Tav. IX. Dialogo Primo: a Leyda per Gio. Pevoyle 1728.

Sermo Quinti Aulii Serrani. Latine atque Italico editus.

Epigrammata in eundem Chermesium. Inter *Analetha varia Pastorum Arcadum*.

INDEX RERUM

NOTATU DIGNIORUM, QUAE IN HOC VOLUMINE
CONTINENTUR.

A

Alexander VIII. 73.
Amedeus Rex 242.
Arcadia Academia 11. ejus
leges 12. 76. instituta
401.
S. Augustini Reliquiae 236.

B

Bacchini Benedictus
97.
Bandinius Angelus 278.
Bassius Joannes 369.
Benedictus XIV. 115. & seq.
292. 308. 322. 324. 340.
353. 354. 362. 367.
Biscardus 8.
Blancus Janus 212.
Blanchinius Franciscus 75.
133. 134.
Brenna Aloysius 89.
Burnetus Thomas 340.
Buurius oppugnatus 152.
162.

C

Carolus VI. 229. 244.
Carus Annibal 160.
Caroprefius Gregorius 5. 6.
49.
Casuistae reprehensi 20.
Castelvetrius 160.

Cennius Cajetanus 188. 203.
228. 238. 281. 286.
361.
Ciampinius Justus 76.
Clemens XI. 35. 84.
Coardus Paulus 10.
Comacium ejus causa con-
troversiae 185. 214. &
seq.
de Conceptione Virginis
contraversiae 305. & seq.
Concina Daniel 305. 339.
Corfinius Eduardus 266.
Corte Bartholomeus 178.
Crescimbenius Marius 12.
42. 403.
Cujacius 29.
Cyrillus Pasqualis 183.

D

Devotio quae vera 348.

E

Emmanuel III. Sardi-
niae Rex 100. 262.
Etensum Antiquitas 219.
& seq.

F

Fabricius Albertus 213.
Falconerius Alexander 408.

Ferraria ejus causa contro-
versae 217. & seq.

Festorum diminutio 353.

Fontaninus Justus 153. re-
prehensus 208. 214. 227
232. 337. & seq.

Frugonius Carolus Inno-
centius 63.

G

Gabriellus Pirrus 69.
75.

Gallandius Andreas 347.

Gartius Antonius 145.

Gherardus Petrus Hercules
104. 256.

Gorius Antonius Franciscus
276.

Gotius Vincentius 337.

Gravina Jan. Vincent. ejus
vita 5. in eum Sectani o-
dia 19. 77. ejus de ori-
gine Juris opus 22. 33.
munera 35. orationes 26.
liber de poesi 40. tra-
goediae 44. carmina 47.
honores & mors 51. testa-
mentum 53. mores & in-
genium 54. stilius 57. o-
pera 60. controversiae
cum Crescimbenio 403.

Guldottius 91.

Guidius Alexander 15. &
seq.

H

Historiae scribendae
praecepta 64.

Huetius Daniel 171. &
seq.

I

Iacomellius Michael An-
gelus 392.

Iesuitae 288. 353. 360.

Iejunium quomodo obser-
vandum 338.

Innocentius XII. 80.

Inscriptiones veteres 263.

Julianus Apostata 202.

L

Lamius 251.

Lancifius 135.

Lazzarinius Dominicus
160.

Lemenes Franciscus 204.

Leibnizius 218.

Liturgia vetus 279.

Lorenzinius ejus vita 399.
controversiae 401. stilius
398. 408. 419. & seq.
Arcadium regit 411. La-
tinas fabulas exhibet
414. anatomiam colic
410. satyras scribit 411.
416. mors 417. mores
& opera 423.

M

Abillonius 74.

Massejus Scipio 14.

121. 208. 243. 267.

274. 364.

Maggius Carolus Maria

146. 204.

Martinus Emmanuel 21.

40. 79. & seq.

Martellius Petrus Jacobus

167.

Mazzocchi Simmachus 376.

Metafasti laudes 1. &

seq. 53.

Migazzius Card. 363.

de Miro Jo. Baptista 46.

Molierius 15 1.

Muratorius Ludovicus An-

tonius ejus vita 89. Ma-

gistri 90. & seq. prima

opera 100. munera 99.

101 105. religio 104.

caritas 107. honores &

elogia 121. & seq. indu-

stria 124. ejus respublica

litteraria 127. & seq. ejus

carmina & de poeti li-

ber 150. controversiae

154. Petrarchae carmina

edie 165. ejus stilus 168.

qui philosophus 171.

quam juris peritus 179.

& seq. ejus eruditio 187.

& seq. pro juribus sui

Principis pugnat 216. & seq.

quam antiquitatis peritus

239. & seq. Annales Ita-

liae scribit 281. quam de

Theologia meritis 293.

& seq. hujus causa con-

troversiae 305. & seq.

ejus industria 372. mor-

bis 377. mors 382. ope-

ra 386.

N

N Azianzeni Gregorii
poemata 199.

O

O Descalchius Livius 405.
Ottonobius Cardinalis 74.

P

P Anlini Nolani poemata
189.

Pepius Franciscus 359.

Pestis remedia 176.

Petrarchae Odae defensae

156. ejus carminum edi-

tio 164. 165. de his ju-

dicium 166.

Petrocellinus Dominicus O-

rovius 15. 406.

Philosophia moralis 173.

Plazza Benedictus 360.

Poenitentiae Sacramentum

343.

Poesis Italica 147. Gallica

148.

Puricellius Franciscus 214.

Q

Q Uirinius Card. 321.
355. & seq. 370.

R

R Apolla Franciscus 183.
Raynaldus Estensis 101. &

seq. 213.

Respublica litteraria 137. &

seq.

Rollius Paullus 15.

Rossius Gabriel 247.

Rotignus Constantinus 164.

S Alvinus Antonius Maria
157.

Salisburgenses Monachi 326.

Sancti quomodo colendi 351.

Schezius 363.

Schiavus Blasius 159. 162.

Sectani satyrae 19. 79. &
seq.

Segnerus Paullus 105.

Sergardius Ludovicus 19.

ejus vita 68. ejus satyrae

70. in Gravinam 79. &

seq. ejus errores 83. mors

86. opera 87.

Sigonius Carolus 109. 252.

Solius 136. 156. 181. 291.

365. 385.

Sublimitatis fontes 394. &
seq.

T Amburinius Cardinalis
117. 327.

Tassus Torquatus 210.

Tassonus Alexander 111.

Tortius Franciscus 112.

Trevisanius Bernardus 117.

131. 136. & seq. 140.

V

V Alifnerius Antonius
178.

Vœum Sanguinarium 103.

& seq.

Ursius Joann. Josephus 99.

161. 163. 209.

Z Acharia Antonius 160.

313. 374.

Zenus Apollolus 114. 108.

240.

INDEX VITARUM

QUAE IN HOC VOLUMINE CONTINENTUR.

JANUS VINCENTIUS GRAVINA pag. 5.

LUDOVICUS SERGARDIUS pag. 68.

LUDOVICUS ANT. MURATORIUS p. 89.

FRANCISCUS MARIA LORENZINIUS p. 399.


ERRATA


CORRIGE


Pag. lin.

4. 17.	ut eas	ut eas se
11. 9.	quo	ex quo
110. ult.	Sane vidimus	Sane quod vidimus
175. ult.	tribuendum	tribuendum esse. Alteram hujus
182. 32.	vitiis careat	vitiis haud careat
ibid. 23.	majoris momenti	adde res attulerunt
288. 10.	nero	neque vero
292. 11.	deceptos, decipientes	deceptos, aut decipientes
293. 10.	in rep. de iis	in rep. litterarum de iis
342. 8.	imprimetur.	imprimeretur.
348. 11.	totidemque	adde vicibus

VIA
1554214







148.
7.
53.

